

# আত্মারামের কাহিনী

শ্রীভূপেন্দ্রনাথ বন্দ্যোপাধ্যায়

প্রকাশক :—

শ্রীসুধেন্দু বিকাশ মজুমদার

৫৪।১, বারাগসী ঘোষ ষ্ট্রীট,

কলিকাতা।

দোল পূর্ণিমা—১৩৪০

ছ'টাকা

প্রিটার—শ্রীশরৎকুমার হোড়

শ্রীগোবিন্দ প্রেস

১।১, ভীম ঘোষ বাই লেন,

কলিকাতা।

আহ্মারামের কাহিনী



# আত্মারামের কাহিনী ।

## উপক্রমণিকা :

বহুর কয়েক পূর্বের কথা বলিতেছি । কি খেয়াল হইল, হঠাৎ নৈকাল বেলা সহরের দূষিত বায়ু সেবনের জন্ত বাটার বাহির হইলাম । বেড়াইতে বেড়াইতে একেবারে লেক রোডে গিয়া উপস্থিত । ভাবিলাম, যখন অগ্রমনকে “রোডে” আসিয়া পড়িয়াছি তখন একেবারে লেকের ভিতরে গিয়া হাজির না হই কেন ? “লেকের ভিতরে” মানে,—হ্রদের জলের ভিতরে ডুবিয়া জালা জুড়াইতে নয় । তাহার পাড়ের চারিদিকে ঘুরিয়া ফিরিয়া প্রাকৃতিক—অপ্রাকৃতিক, কৃত্রিম—অকৃত্রিম, স্বাভাবিক—অস্বাভাবিক, সাক্ষ্য ও নৈশ শোভা-সৌন্দর্য্য এবং সেই সঙ্গে রং-বেরংএর মজা দেখিয়া আসা যাক না কেন ? চরণযুগল যখন এতদূর একটানা বহন করিয়া আনিয়াছেন,—তখন আর একটুখানি কষ্টস্বীকার না করিয়া আমার মনঃস্কণ্ডের কারণ হইবার প্রয়োজন কি ? উৎসাহ লাভ করিয়া চরণজুড়ী স্ফুর্তিসহকারে চলিলেন । লেক পৌছিয়া গেলাম ।

অহো ! ধন্য কলিযুগ ! ধন্য কলিকাতা সহর ! কি  
 শুভরূপে এই লেক্ নামধেয় মহা সুখসম্ভোগের স্থানটা সৃজিত হইল !  
 সে যে কি শোভা,—সেখানে যে কত মজা,—কত আনন্দ,—তাহা লিখিয়া  
 জানাইবার নয় ! দলে দলে যুবক—যুবতী, কিশোর—কিশোরী, তরুণ  
 —তরুণী, সধবা—কুমারী, বালক—বালিকা, ছাত্র—ছাত্রী, বিগুন্ধ বায়ু  
 সেবনের জন্ত,—প্রাণ খুলিয়া আমোদ উপভোগের জন্ত আসিয়া  
 জুটিয়াছেন—জুটিতেছেন এবং নিত্য জুটিবেন ! মজা—আনন্দ—সুখ  
 —সম্ভোগ যেন মূর্ত্তিবানী হইয়া লেক্-নন্দন কাননের চ'ন্ধারে নাচিয়া  
 নাচিয়া বেড়াইতেছে । যে দিকে দেখ,—সেই দিকেই নানা-রকমের আনন্দ-  
 পরমানন্দের মেলা ! জলের ধারে আনন্দ, সাঁকোর উপরে আনন্দ, ঘাসের  
 বিছানায় আনন্দ, বেড়াইবার পথে আনন্দ, গাছের তলায় আনন্দ,  
 ঝোপে-ঝোপে পরমানন্দ ! কাহারও বা আনন্দ দেখিয়া আনন্দ,—কাহারও  
 বা আনন্দ করিয়া আনন্দ ! এ তো লেক্ নয়,—এ সদানন্দপুরা !

নিরানন্দ কেবল আমি ! কারণ ও তাহার যথেষ্ট ! গিয়াছি সটান  
 পদব্রজে,—নঙ্গে নাই এমন একটি প্রাণী যাহার সঙ্গে বসিয়া ছটো  
 পরচর্চা-পরনিন্দা করিয়া ওরই মধ্যে কিছু আনন্দ উপভোগ করি !  
 বেড়াইতে বেড়াইতে শ্রীচরণপ্রভুস্বর যখন বিদ্রোহিতা ঘোষণা  
 করিলেন, তখন অগত্যা জলের ধারে একপাশে স্থাননির্দেশ করিয়া  
 বসিয়া পড়িলাম । প্রথমে আসন-পিঁড়ি হইয়া বসিয়াছিলাম,—অন্ধঘণ্টা  
 পরে বাম কনুইয়ের উপর ভর দিয়া একটু “কাৎ” হইয়া অর্ধ-  
 শায়িতাবস্থায় দেহযষ্টিকে রক্ষা করিলাম । কিছুক্ষণ পরে চরণ দুইটী  
 লম্বা ব'সিয়া ছড়াইয়া দিয়া কটীদেশ হইতে মস্তক পর্য্যন্ত ধকুকের

আকারে মাটি হইতে উর্দ্ধদিকে রাখিয়া দৈহিক আনন্দ-লাভে যত্নবান হইলাম। এইভাবে আরও কিছুক্ষণ অভিবাহিত হইলে পর,—পৃষ্ঠদেশের অর্ধেকটা “মাটি লইল” বৃত্তিতে পারিলাম। চারিদিক যখন বেশ অন্ধ-কারাচ্ছন্ন তখন দেহটা চৌদ্দপোয়াই মাটির উপর রক্ষা করিয়াছি! আঃ—কি আরাম! আরামের চরম হইল,—সেইখানে সেই অবস্থায় গাঢ় নিদ্রায়! এমন সুনিদ্রা নিজগৃহে দুগ্ধফেননিভ সুকোমল শয্যায়ও কখনো হয় নাই!

চমক যখন ভাঙ্গিল তখন আতঙ্কে বিস্ময়ে যেন হতভম্ব হইয়া গেলাম; বাড়ী নয়—ঘর নয়—বিছানা নয়, কোথায় জলের ধারে আসিয়া শুইয়া পড়িয়া আছি? খানিকক্ষণ স্তব্ধ হইয়া বসিয়া আত্মোপান্ত একবার ভাবিয়া লইলাম। রাত্রি কত,—ঠিক আন্দাজ করিয়া লইতে পারিলাম না। তবে যে খুব বেশী নয়,—তাহাও অসুমান করিয়া লইলাম। কারণ, লেকে যদিও সন্ধ্যাকালে বেরূপ জনতা দেখিয়াছিলাম সেরূপ জনতা নাই, তবু সৌখীন তরুণ—তরুণী এবং বাবু—বাবুনীদের অথবা খেতাস—খেতাসিনীদের অভাব ছিলনা। আর অপিকক্ষণ বিলম্ব করা যুক্তিসঙ্গত নয় বিবেচনা করিয়া গৃহপ্রত্যাগমনের আশায় গাত্রোথান করিলাম। জলের দিকে মুখ করিয়া শুইয়াছিলাম,—বাড়ী যাইবার জন্ত স্থলের দিকে মুখ ফিরাইতে গিয়া দেখি, যেখানে শুইয়াছিলাম ঠিক সেইখানে একটা বাণ্ডিলের মত কি পড়িয়া আছে! সন্ধিগ্ধচিত্তে দ্রব্যটা তুলিয়া লইলাম। দেখিলাম, কাগজের একটি বাণ্ডিল,—ছোট একটা বালিসের আকার। কোনো হৃদয়বান ভদ্রলোক অথবা সহৃদয়া ভদ্রমহিলা,—গভীর নিদ্রামগ্ন এই

হতভাগ্যের মুণ্ডটা মাটির উপর গড়াগড়ি যাইতেছে দেখিয়া বালিশ  
 অভাবে কতকগুলি কাগজ সংগ্রহ করিয়া বাণ্ডুল বাঁধিয়া আমার নিদ্রা-  
 সুখভোগের সহায়তা করিয়াছেন। অপরিচিত অজ্ঞাত সেই মহানুভব  
 পুরুষপুঙ্গব অথবা নারীকুলশিরোমণি দেবীর প্রতি কৃতজ্ঞতা ও ভক্তিতে  
 প্রাণ ভরিয়া উঠিল! বলিলে বিশ্বাস করিবেন কিনা জানিনা,—দুই  
 চারি ফোঁটা অশ্রুহল আনন্দে ও বিষাদে পাষণ প্রাণ ভেদ করিয়া চক্ষু  
 হইতে ঝরিয়া পড়িল! আনন্দের কারণ অবশ্য ব্যাখ্যা করিয়া বুঝাইতে  
 পারি না। কিন্তু বিষাদের কারণ এই যে,—এই লোকরূপ আনন্দ-  
 কাননে এই রাত্রিবেলায় পরমানন্দ উপভোগের সময়—চারিধারে  
 বিস্তর নরনারী এবং অন্ত্যাত্ত মজার জিনিস উপেক্ষা করিয়া সেই দয়া-  
 ময় বা দয়াময়ী নজর করিলেন কিনা আমার মত এক খপদার্ত্ত জীবকে  
 এবং তাহার মস্তকের তলায় “মধু অভাবে গুড়ং দণ্ডাং”  
 হিসাবে কাগজের বাণ্ডুলে দালিশ প্রস্তুত করিয়া তাহার সুখভোগের  
 ব্যবস্থা করিয়া দিতে না জানি কত কষ্টই স্বীকার  
 করিয়াছেন! ইহাপেক্ষা বিষয় বা বিষাদের ব্যাপার আর কি হইতে  
 পারে? তাহার সাহায্যে এতক্ষণ নিদ্রাসুখ উপভোগ করিলাম,  
 সেই বাণ্ডুলটী একবার পরীক্ষা করিয়া দেখিবার বাসনা হইল। আবার  
 সেইখানে বসিয়া পড়িলাম। প্রথমে মনে করিয়াছিলাম,—কাগজগুলি  
 পুরাতন খবরের কাগজের বাণ্ডুল। পরীক্ষা করিয়া দেখিলাম, পরিষ্কার  
 কাগজ,—লাল ফিতা দিয়া বাঁধা। টাদিনী রাত্রি না হোক,—মনোযোগ-  
 পূর্বক দেখিলে বেশ স্পষ্ট বোঝা যায়,—কাগজগুলি নিছক সাদা নয়,  
 —লেখ্য কাগজ! হাতে-লেখা বই হোক, অথবা উকীলবাড়ীর



লেখাপড়ার কাগজ হোক, কিম্বা হিসাবনিকাশের খাতা হোক,—  
এই রকম একটা না একটা কিছু হইবে নিশ্চয়ই !

তাহা হইলে ইহাকে ত্যাগ করিয়া যাওয়া তো যুক্তিসঙ্গত বা ভদ্রোচিত  
নয় ! নিশ্চয়ই কাহারও কোনো দরকারী কাগজপত্র ;—বালিশ অভাবে  
আমার মস্তকটা ধুলায় গড়াগড়ি বাইতেছে দেখিয়া অগত্যা আমার  
উপকারার্থে এটা কিছুক্ষণের জন্য তিনি আমার কাজে লাগাইয়া  
দিয়াছেন ! ভদ্রলোক বা ভদ্রমহিলা আশেপাশে কোথাও আছেন,—  
ঘুরিয়া ফিরিয়া এইখানে তাঁহাকে আসিতেই হইবে ।

ঘণ্টাখানেক কাটিয়া গেল । কাগজের তাড়া চাহিতে কেহই আসি-  
লেন না । মহা বিপদে পড়িলাম আর কি ! হাত পাঁচ ছয় দূরে একটি  
মহিলা বসিয়াছিলেন,—অনেকক্ষণ হইতে তাঁহাকে দেখিতে পাইতে-  
ছিলাম । ভাবিলাম,—ওঁকেই একবার জিজ্ঞাসা করিয়া দেখি,—উনি যদি  
কাগজ-সম্বন্ধে কিছু জানেন । উঠিয়া তাঁহার নিকটে গেলাম । মহিলাটি  
গুণ্ গুণ্ করিয়া গান গাহিতেছিলেন,—আমি নিকটে গিয়া  
দাঁড়াইতেই কণ্ঠস্বর একটু চড়াইয়া দিয়া আমার পানে চাহিয়া  
গাহিলেন—

“আমি—যাব কি ও হৃদি’পরে ছুটিয়া

পড়িব কি পদতলে লুটিয়া—”

মন লাগিতেছিল না । একে জীকণ্ঠ, তায় “রজনী তিমিরে ঘেরা”,  
তায় নির্জন পুষ্করিণীর পাড় । প্রাণে একটু আতঙ্কেরও উদয় হইল ।  
মহিলাটি হঠাৎ গান থামাইয়া বলিলেন,—“বসুন । দাঁড়িয়ে রইলেন  
কেন ? মোটর সঙ্গে আছে তো ? আমি সর্বদাই প্রস্তুত জান্বেনু”

কি বলে রে বাবা !

আমি ও সকল কথায় ক্রক্ষেপ না করিয়া তাড়াতাড়ি কাগজের বাণ্ডিলটা তাঁহাকে দেখাইয়া বলিলাম—“এ বাণ্ডিলটা আপনার ?”

আমার কোঁচাটী ধরিয়া ঈষৎ একটু টানিয়া যুবতী বলিলেন,—  
“আমার কি আপনার—তার বিচার হবে’খন ! বসুন না !”

বসিতে বাধ্য হইলাম ।

মহিলাটী কাছে “যেসিয়া আমার হাত হইতে বাণ্ডিলটা লইয়া চুপি চুপি বলিলেন,—“বাজে কথা ছেড়ে দিন। নভেল হাতে করে বেরিয়েছেন,—সাহিত্যিক আপনি—বুঝতে পেরেছি। আমিও সাহিত্য-সেবিকা। বেছে বেছে ঠিক ধরেছেন আমাকে। তা—এখানে এখন ত আর কেউ নেই,—কা’কে শুনিয়ে সাহিত্যকথা ক’য়ে দোষ কাটাতে চাইছেন ?”

আমি তো অবাক ! বলিলাম,—“কি বলছেন আপনি ?”

“ঠিকই বলছি প্রেমিকপ্রবর ! বাজে কথা ক’য়ে দরকার নেই, ট্যান্সি হাজির আছে তো ? চলুন !”

“কোথায় যাব ?”

... “যেখানে আপনার খুসী ! আমার বোডিংএ তো সুবিধে হবেনা। কত টাকা সঙ্গে আছে ?”

“গণ্ডা আষ্টেক পয়সা———”

“নিকালো—”বলিয়া সেই ভারী কাগজের বাণ্ডিলটা আমার গায়ে ছুঁড়িয়া ফেলিয়া যুবতী গাত্রোথান করিয়া মরালগমনে কোথায় অদৃশ হইলেন।

বহুহাতের স্তায় খানিকক্ষণ সেইখানে বসিয়া থাকিয়া আমিও উঠিলাম। ভাবিলাম,—কি করা যায়! দরকারী কাগজপত্রগুলি ফেলিয়া যাওয়াও ত উচিত নয়! লেকের চারিদিকে ঘণ্টাখানেক ঘুরিয়া ফিরিয়া অনুসন্ধান করিলাম, এ বাণ্ডিল কাহার! অধিকারীর সন্ধান কিছুতেই পাইলাম না! ফটকের বাহিরে একটি বৃদ্ধ মোটরে উঠিতেছিলেন,—সঙ্গে একটি নানালঙ্কারভূষিতা বিচিত্রবসনা ষোড়শী। মোটরের কাছে আসিয়া বৃদ্ধকে জিজ্ঞাসা করিলাম,—“আপনি কি এখানে কোনো বাণ্ডিল ফেলে এসেছেন?”

বৃদ্ধ অবশিষ্ট দস্ত কয়েকটা বিকাশপূর্বক ঈষৎ হাসিয়া বলিলেন,—“হা—হা—বাণ্ডিল তো চাই! (ষোড়শীর দিকে ফিরিয়া) কি কও পোটল বিবি,—গরে বাণ্ডিল ফুরাইছে না?”

ষোড়শী বৃদ্ধের গণ্ডে একটা মৃদু চপেটাঘাত করিয়া বলিল,—“মর্ মুখপোড়া বাঙ্গাল! কি ব'লছেন ভদ্রলোক,—আগে ভাল ক'রে শোনুন।”

বৃদ্ধ। “হঃ—কবে আর কি—মোর মাথা আর মুণ্ড! রাত্ৰিকালে লুকায়ে বাণ্ডিল ব্যাচ্ছে—বুঝবার পারনা?”

আমাকে সম্বোধন করিয়া বৃদ্ধ পুনরায় বলিলেন, “থিরি ইষ্টার হিন্দি বাণ্ডিল রাখ নাহি?”

আমি বঙ্গ ভাবুর ভাষা সম্যক হৃদয়ঙ্গম করিতে না পারিয়া জিজ্ঞাসা করিলাম,—“কি ব'লছেন?”

বৃদ্ধ। “বাণ্ডিল আনুছ নাহি? কি বাণ্ডিল?”

আমি কাগজের বাণ্ডিলটি দেখাইয়া বলিলাম,—“এ কাগজের বাণ্ডিলটা কি আপনার ?”

“হালা—মস্করা করবার লাগ্ছ ?” বলিয়া বৃদ্ধ আমাকে ঈষৎ ধাক্কা দিয়া মোটরে উঠিয়া বসিয়া শফারকে বলিলেন—“চলো—চীনা হুটেল !” ষোড়শী মোটর হইতে হাদিয়া আমাকে বলিলেন—“কিছু মনে ক'র্ষেন না মশাই—উনি ব্যাণ্ডিকে ‘বাণ্ডিল’ বলেন কিনা,—তাই আপনার কথা শুনে মনে করেছিলেন,—আপনি বুঝি লুকিয়ে ব্যাণ্ডি বেচতে এসেছেন !”

মোটর সশব্দে চলিয়া গেল। অগত্যা বাণ্ডিলটা লইয়া পাপের ভোগ ভুগিতে ভুগিতে গৃহে প্রত্যাগমন করিলাম। তাহার পর উপযুপরি প্রায় মাসাবধি লেকে গিয়া প্রত্যহ সন্ধ্যা হইতে রাত্রি দশটা পর্যন্ত অনুসন্ধান করিয়াছি,—এই কাগজের বাণ্ডিলটার কোনো কিনারা করিতে পারি নাই।


সকলেই বলে—“খুলিয়া দেখ—উহার ভিতর কি আছে !”

পরের জিনিষ,—খুলিয়া দেখিতে ভরসা হয়না। সত্যচরণ ভায়া বলিল,—“চুপি চুপি খুলে দেখুন দিকি দাদা—হয়তো ভেতরে দশটাকার কিম্বা একশো টাকার নোটের বাণ্ডিল থাকতে পারে !”

শাগল আর কি !

মাটির পয়সা খরচ করিয়া সংবাদপত্রে বিজ্ঞাপন দিয়াছি,—কাগজ ছাপাইয়া চারিদিকে বিলাইয়াছি,—এ পোড়া বাণ্ডিলের মালিকের কোনো সন্ধান পাই নাই !

মাসের পর মাস চলিয়া গেল। অগত্যা এক পুলিশ-কর্মচারির পরামর্শে বন্ধুর উকীলপ্রবর নলিন বাবুর সম্মুখে কাগজের বাণ্ডিল খুলিয়া ফেলি-

লাম। দেখিলাম,—যাহা ভাবিয়াছি ঠিক তাই! একখানি হাতে-লেখা সম্পূর্ণ উপন্যাস! উপন্যাস কি জীবনচরিত কি নিছক 'মাজার খেয়াল,'—আগাগোড়া পাঠ করিয়া আমার ক্ষুদ্রবুদ্ধিতে ঠিক বুঝিতে পারিলাম না বটে, তবে বড় মাজার ব্যাপার! আর কিছু না হোক—সময় কাটাইবার মহৌষধ!  কর নাম-ধাম ঠিকানা কিছুই নাই। রচনারও কোনো নামকরণ নাই। প্রথম পৃষ্ঠায় স্ত্রীলোকের হাতে লেখা একখানি পত্র 'পিন' দিয়া আঁটা আছে। পত্রখানি এই :—

“শ্রীচরণেষু—

সেজ্জি! রমেশদা'র ভারি জাঁক! মেজাজের আর আজকাল কিছুই ঠিক নেই! বলেন—“এখন আমি মস্ত বড়লোক,—আমার কি ছোটখাটো কথায় কান দেওয়া উচিত,—না,—ছোট-খাটো ব্যাপারে মাথা ঘামানো শোভা পায়?” আত্মারামের ওপর ভারি চটেছেন। কাহিনীখানা প'ড়'তে দিয়েছিলুম। ফেরত দিয়ে বলেছেন,—“এটা আত্মারামের কাহিনী নয়,—পাগলের দলীল। বি এ এম এ পাশ ক'রলেই বিত্তে হয়না।”

আত্মারাম চলে গেছেন। কোথায় গেলেন—তা ব'ল্লেন না। কাগজ গুলো পুড়িয়ে ফেলতে বলেছেন। ব'ল্লেন—“সুনীলাকে বলিস্—তার ছেলের দুধ গরম করবার কাজে লাগবে।” যাবার সময় বলে গেলেন—“আর ইহজীবনে আমার সঙ্গে দেখা হবেনা। আমার খুব ছনিয়া-দর্শনের সাধ মিটেছে। একটা কথা জেনে রাখ। মাত্র বরাতক্রমেই আজ রমেশদা'র 'আজুল ফুলে কলাগাছ'। এঁটোপাত স্বর্গে উঠেছে! ওর সংস্পর্শে কেউ যাস্নি। ও দেশের শত্রু,—জগতের শত্রু,—হিন্দু সমাতনধর্মের শত্রু,—

নর-নারীর শত্রু ! বাঙ্গালা দেশের মুখে আঙন,—নইলে রমেশদা'কে  
মাথায় চ'ড়তে দেয় ?” কুগজগুলো ভুমিই পুড়িও—

ইতি তোমার মেহের—

“রাগু”—

কে সেজদি',—কে সুনীলা,—কে ~~রমেশদা~~,—কে আত্মারাম,—কে  
রাগু,—বাস্তব জগতে কাহাকেও পরিচিত বলিয়া বোধ হউল না।  
সমস্ত গ্রন্থ পাঠ করিয়া স্পষ্ট বুঝিলাম,—ইহা “আত্মারামের কাহিনী।”  
সত্যকার রমেশদা'কে জানি না,—তবে তিনি যে ইহাকে “পাগলের  
দলীল” বলিয়া ছাড়িয়াছেন, সেটা নিতান্ত বিদ্বেশবশেই,—তা বেশ স্পষ্ট  
বুঝিতে পারা যায়। তবে আমার বক্তব্য এই,—আত্মারাম নিজের  
কাহিনী লিখিয়া কাহারও কোনে উপকার বা মঙ্গলসাধন করুন  
আর নাই করুন,—ছনিয়াটাকে যে তিনি ভাল রকম চিনিয়াছেন  
এবং সকলকে চিনাইয়া দিয়াছেন,—এ কথা যিনি অস্বীকার করিবেন  
তিনি পাষণ্ড—মিথ্যাবাদী—অর্কাচীন !

ইতি—

সৎ—চিৎ—আনন্দ বল্লম,

তেজপুর—বিছাপীঠ।

ধাপ্‌ধাড়া।

# আত্মারামের কাহিনী ।

## প্রথম খণ্ড :

### প্রথম পরিচ্ছেদ ।

স্মৃতিকাব্যের জন্মদিন থেকে প্রায় ৭৮ বছর বয়েস পর্য্যন্ত আমার জীবনের সমস্ত ঘটনাগুলি সঠিক লিপিবদ্ধ করা সম্ভবপর নয় । কারণ,—দে সব আমার অজ্ঞান অবস্থায় ঘটেছিল । তবে পিতৃদেবের নিজহস্তলিখিত ডায়েরি-বুক থেকে আমি অনেক কিছু সংগ্রহ করেছি, তার ভেতর থেকে বেছেগুছে নিয়ে যেটুকু বিবৃত করব, তাতেই আমার শৈশব-ইতিহাস অনেকটা আপনাতঃ বুলতে পারবোঁন ।

আমার পিতার নাম শ্রীযুত ( এক্ষণে স্বর্গীয় ) গণেশচন্দ্র বন্দ্যোপাধ্যায় মহাশয় । মাতা শ্রীমতি ( এক্ষণে স্বর্গীয়া ) নীতিময়ী দেবী । পিতা যশোর জেলায় ডেপুটী-ম্যাজিস্ট্রেট-রূপে যখন অবস্থান কর্ত্তেন তখন এ হতভাগ্যের সেইস্থানে এক বৈশাখ মাসের শুক্লাষ্টমী তিথিতে সোমবারে সন—সালে জন্ম হয় । পূর্বে জন্ম হলেও আমার পৈতৃক বাসভূমি কলিকাতা বাছড়বাগানে । আমার জাল নাম অর্থাৎ সভ্যসমাজের নাম শ্রীআত্মভূচরণ

বন্দোপাধ্যায়। ডাকনাম আত্মারাম। পাঠকপাঠিকা নিশ্চয়ই ব'লবেন, বঙ্গভাষায় কি নামের দুভিক্ষ হইয়েছিল যে, ছেলের বিদ্যুটে নাম রাখা হ'ল "আত্মভূ" ? আমিও প্রথম প্রথম তাই ভাবতুম এবং লোকে যখন নাম শুনে অবাক হ'ত,—কেউ কেউ ( বিশেষতঃ স্কুল-পাঠশালায় মাষ্টার-পণ্ডিত গুরুমশাই ) চ'টে যেতেন, সমবয়সীরা ঠাট্টা-বিদ্রুপ ক'র্ত্ত, তখন এ অদ্ভুত নামকরণের কারণ একদিন পিতাকে জিজ্ঞাসা করে জান্লাম যে, তাঁর গুরুদেব ( মহাপণ্ডিত এবং পূর্ববঙ্গনিবাসী ) সাধ ক'রে শিষ্যের নবজাত শিশুপুত্রের অনেক ভেবে-চিন্তে এই অপক্লপ নামকরণ করে আশীর্বাদ করে গেছেন। সুতরাং, এ নাম বদল করে কার সাধ্য ? ঠাকুরমা বাবার কাছেই যশোরে থাকতেন। তিনি বাবাকে ব'ল্লেন—“এ রকম বেয়াড়া নাম আমার মুখ দিয়ে বেরবে না বাবা ! তার চেয়ে তোর ছেলেকে আদি “আত্মারাম” বলে ডাকবো !” শুনেছি,—বাবা ঠাকু'মাকে দেড় ঘণ্টাকাল কাছে বসিয়ে “আত্মভূ” শব্দের ব্যুৎপত্তি, অর্থ, বানান ইত্যাদি সকল রকম বুঝিয়ে দিলেও ঠাকু'মা কিছুতেই আমার “আত্মারাম” ছেড়ে “আত্মভূ” বলে ডাকতে স্বীকৃতা হলেন না।

বাবা ব'ল্লেন—“আচ্ছা মা—আত্মারাম ব'ল'তে যতটা সময় লাগে, আত্মভূ ব'ল'তে তার চেয়ে কম সময় লাগে কিনা—তুমি একবার বলেই দেখনা !”

ঠাকু'মা। “ছিঃ ! ছেলের নাম “ভূ” ? ঐ “ভূ” থেকে হবে “ভূসু,” আবার তা থেকে দাঁড়াবে “ভূত” ! এ আমি প্রাণ গেলেও ব'ল'তে পারিনা। তার চেয়ে আত্মারাম চের ভাল নাম,—ঠাকুরদের নাম !



## প্রথম পরিচ্ছেদ

আমার আত্মারাম খাঁচা-ছাড়া হ'লেও,—তোদের আত্মারাম চিরদিন ঘরে বাঁধা থাকবে বাবা !”

পিতা । “আত্মভূ ঠাকুরদের নাম,—তোমাকে যদি একবার বোঝাতে পারি মা, তা'হ'লে তুমি ভুলেও আত্মারাম ব'লতে চাইবেনা । “আত্মন্” মানে “স্বয়ং”,—“ভূ” মানে “হওয়া”—অর্থাৎ “যে হয়” । তার মানে কিনা,—যিনি আপনা হ'তে হয়েছেন । “মদনদেব রতিপতি,” “ব্রহ্মা,” “বিষ্ণু,” “শিব,”—এঁদের বলে “আত্মভূ” ।

ঠাকু'মা । “বলিস্ কি বাবা ? ব্রহ্মা—বিষ্ণু—মহেশ্বর,—এঁদের ঐ নাম ? কই,—কারও মুখে ত শুনি নি কখনো ?”

পিতা । “গুরুদেব হলেন মহাপণ্ডিত—ঈশ্বরজানিত—মহাপুরুষ ! তিনি যা ব'লবেন,—যে নাম রাখবেন,—সে কি যে-সে কল্পনায়ও আনতে পারবে ?”

ঠাকুরমা চুপ্ করে রইলেন । গুরুদেবের নাম উঠতেই উদ্দেশে প্রণাম করে আগ্রহসহকারে বাবার কথা শুন্তে লাগলেন । বাবা আরও উৎসাহের সঙ্গে ব'লতে শুরু ক'লেন,—“মহাকবি কালিদাস “কুমার-সম্ভবে” ব্রহ্মাকে “আত্মভূ” বলেছেন,—“নচশ্রবসিতে তস্মিন সসর্জ্জ গির-মাত্মভূ ।” “রঘুবংশে” বিষ্ণুকে “আত্মভূ” বলেছেন,—“সর্বজ্ঞস্বমবিজ্ঞাতঃ সর্বযোনিভুমাত্মভূঃ ।” “শকুন্তলায়” শিবকে “আত্মভূ” বলেছেন,—“মমাপি চ ক্ষপয়তু নীললোহিতঃ পুনর্ভবং পরিগতশক্তিরাত্মভূঃ ।”

পুত্রবৎসলা ঠাকু'মা, বাবার সঙ্গে একটা রফা করে ফেলেন,—গুরুদেবের “আত্মভূ”র আত্মাটুকু থাক, আর ঠাকু'মা'র “রাম”টুকু থাক ।

শুরুদেবেরও মর্যাদা রক্ষা হ'ল এবং মহাশুরু মায়ের আদেশও পালন করা হ'ল। আমার ডাকনাম বাহাল রইল—“আত্মারাম,”—যে নামে এ অধম আজ সর্বত্র পরিচিত।

আমার শৈশব ইতিহাস-সম্বন্ধে বাবার ডায়েরির সারাংশ এই :—

“প্রথম স্ত্রীর মৃত্যুর পর বিবাহ করা বৃদ্ধিসঙ্গত নয়। বিশেষতঃ, যদি সে সতীলক্ষ্মী সন্তান রেখে যান। কমলা সত্যিই আমার গৃহলক্ষ্মী ছিলেন। রূপে, গুণে,—শুধু নামে নয়। একাধারে এত রূপ বাংলা দেশে কোনো স্ত্রীলোকের হ'তে পারে,—আমার বিবাহের পূর্বে এ ধারণা ছিলনা। স্কুল-কলেজে না গিয়ে বাঙ্গালীর মেয়ে এত লেগাপড়া যে শিখতে পারে,—কমলাকে যে না দেখেছে সে কিছুতেই বিশ্বাস ক'রেনা। সেই কমলা আমার ছেড়ে অন্যের মত চলে গেল। সেই কমলার স্থান অধিকার করে এ লক্ষ্মীছাড়া জীবনের মহা অভাব দূর ক'র্তে পারে,—এমন স্ত্রীলোক কি পৃথিবীতে আছে? আবার বিবাহ ক'রব আমি? অসম্ভব! মা বলেন—“ছত্রিশ বছর কি এমন বয়েস? তুই আবার বিয়ে কর। নইলে—আমি এ বুড়ো বয়সে তোর কচিকাচা ছেলেমেয়ে মানুষ ক'রব কেমন করে?”

“বাবা বলেন—“চার পাঁচটা ছেলেমেয়ে হয়েছে,—আবার বিয়ে ক'র্বে কোন্ লজ্জায়?” বাবাতে মায়েতে প্রত্যহ এই নিরে তর্কবিতর্ক—বাদবিসম্বাদ। ভাগ্যে ডেপুটীগিরি পেয়েছিলুম, বিদেশে বিদেশে ঘুরে বেড়াতে হয়,—তাই রক্ষা! নইলে,—রাজায় রাজায় যুদ্ধে উলু-খাগড়ার প্রাণ থাকতো কি?

“বড়দিনের ছুটীতে ক'লকেতায় গেছি। হঠাৎ মা একদিন গঙ্গাস্নান

করে এসেই আমার শোবার ঘরে ঢুকে ব'ল্লেন, “গণেশ ! তোকে বিয়ে ক'র্তে হবে ! আমি কোনো কথা শুন্বনা,—তোকে বিয়ে ক'র্তেই হবে । আমি গঙ্গাজলে দাঁড়িয়ে সইকে কথা দিয়েছি !”

“সর্বনাশ ! একেবারে কথা দিয়ে এসেছেন,—তার আবার গঙ্গাজলে দাঁড়িয়ে ?

“ব্যাপারটা এই । দিন তিন-চারের জন্তে মা গিয়েছিলেন বাগবাজারে মাসীমার বাড়ীতে বেড়াতে । বাগবাজারের স্বর্গীয় কিশোরীমোহন মুখুয্যে মহাশয় এক কালে খুব বড়লোক ছিলেন । তাঁর পুত্র হরিনাথন মুখুয্যে মহাশয় সরিকানী মামলায় সর্বস্বাস্ত্র হয়েছেন । তাঁর তিনটা কন্যা । প্রথম দুইটির বিবাহ হয়েছে । কনিষ্ঠাটি অবিবাহিতা,—বিবাহের বয়স উত্তীর্ণ হবার উপক্রম । সম্প্রতি হরিনাথন বাবু দেহত্যাগ করেছেন । কিশোরীমোহন বাবুতো বহুপূর্বেই ইহলোক পরিত্যাগ করেছেন । কিশোরীমোহন বাবুর বিধবা পত্নী ( “বড়গিন্নী” নামে বাগবাজারে প্রসিদ্ধা, )—এখন ঐ অনাথ পরিবারের একমাত্র অভিভাবিকা । বুড়ী খুব “জাঁহাজ” জীলোক । আমার মামার বাড়ী এবং বড়গিন্নীর পিত্রালয় একই জায়গায়,—বর্তমান জেলার বেলকুঠি গ্রামে । ছেলেবেলায় আমার মায়েতে এবং বড়গিন্নীতে খুব ভাব ছিল । বিবাহের পূর্বেই দু'জনে “সই” পাতিয়েছিলেন । কিশোরীমোহন বাবু আমার মেশো মহাশয়ের জ্ঞাতি ; এই কারণে মার সঙ্গে “সই-মার” বাল্যপ্রণয় সমভাবেই চিরদিন বজায় থাকবার সুযোগ হয়েছিল ।

“দুই বৃদ্ধা “সই” অন্তর্পূর্ণাঘাটে প্রাতঃকালে গঙ্গাস্নান ক'র্তে গিয়েছিলেন । গঙ্গাগর্ভে আশ্রীত-নিমজ্জিতা দু'জনের সাংসারিক

সুপ দুঃখের নানা কথার মাঝখানে হঠাৎ “সইমা” মাকে ব’ল্লেন,—“সই !  
অনাথিনী সইয়ের একটা উপকার ক’র্কে ?”

“মা সাদাসিদে মানুষ, চালাকী ঘোরপ্যাচের কোনো ধারই ধারেন  
না। অবলীলাক্রমে বলে ফেলেন,—“আমার সাধের ভেতোর যদি  
হয়—নিশ্চয় ক’র্ক সই !”

“সইমা মাকে “গঙ্গাজলী” এবং “তিন সত্যি” করিয়ে ব’ল্লেন—  
“তোমার ছেলে গণেশকে আমায় দাও !”

“মা কথাটা ঠিক বুঝতে না পেরে জিজ্ঞাসা ক’ল্লেন,—“কি ব’ল্ছ  
সই ? আমার ছেলে তোমায় দোবো কি ?”

“সইমা ব’ল্লেন, “আমার নাতনী “নীতের” সঙ্গে গণেশের বিয়ে  
দিতে হবে।”

“মা একেবারে আকাশ থেকে প’ড়লেন। কি কি কথা ভয়েছিল  
জানিনা। কিন্তু গঙ্গাজলে দাঁড়িয়ে “তিন সত্যি” করে যখন কথা  
দিয়ে এসেছেন, তখন এ বিবাহ আমাকে ক’র্ভেই হ’ল !

“বাবাতে মায়েতে যে ব্যাপার হ’য়েছিল,—সেটুকু লিপ্তে হাত  
কিছুতেই সর্ছে না। শুধু তাই নয়। আমাদের বাড়ীশুদ্ধ লোক একদিকে  
আর মা ( স্মতরাং আমিও সেই সঙ্গে ) অন্ডদিকে। বাবা এই বিবাহের  
সপ্তাহখানেক পূর্বে আমার ছেলেদের নিয়ে কাশীবৃন্দাবন চলে  
গেলেন।

“কোনমতে বিবাহকাগ্যটা শেষ হ’ল। নববধু দেখে মা বিশেষ  
প্রীতি হয়েছেন বলে মনে হ’লনা। আত্মীয়স্বজন বন্ধুবান্ধব “বর-কনে”  
বাড়ী ঢুকতেই মার সঙ্গে সম্মুখসমর ঘোষণা ক’ল্লেন। সবাই ব’ল্লেন “বুড়ীর

ভাষিত হইছে। এমন জ্যাস্ত কার্তিকের মত ছেলে, রূপে গুণে দশ হাজারে ( হাজারে নয়,—শত-করা তো নয়ই,—একেবারে দশহাজারে ) একটা মেলে কিনা সন্দেহ,—তার বিত্তীয় পক্ষের বৌ আনলে কিনা— একটা জলার পেয়ী ধরে ? ছি—ছি—ছি !”

“মা-ও কোমর বেঁধে আরম্ভ ক’লেন, “হ্যা—হ্যা—জানি ! রূপের তো সবাই ধুচুনী ! হ’লই বা রং কালো ! মুখশ্রী দেখ দিকি—যেন মা ভগবতী ! বলি,—কালো মেয়ের কি বিরে হয়না ? তার কি সুন্দর বর হ’তে নেই ?”

“কিন্তু যতই আক্ষালন করুন, মা শেষটা হ’টে গেলেন। আমি মাকে বোঝালুম—“তুমি পরের কথায় কাণ দিচ্ছ কেন মা ? আমি যখন সন্তুষ্ট হয়েছি তখন পরে কে কি ব’লে তা নিয়ে তোমার মাথাব্যথা কেন ? তোমার পুত্রবধুর রং কালো হোক,—কিন্তু কিশোরী মুখুয্যের মত বনেদি ঘর—এমন সম্ভ্রান্ত বংশ ক’লকাতার সহরে ক’টা আছে লোকে দেখাক্ দিকি !”

“মা যে কি খুসী হ’লেন—তা আর লিখে কি প্রকাশ ক’রব ?

“যথাসময়ে নীতিময়ীকে সঙ্গে নিয়ে কর্মস্থল যশোরে এলুম। হ’ এক মাস অন্তর মা যশোরে আমার কাছে আসেন,—মাদকতক থাকেন—আবার ক’লকাতায় চলে যান। বড় ছঃখ,—বাবাকে কিছু-তেই তুষ্ট ক’র্তে পারলুম না। ছুটীতে বাড়ী যাই বটে, কিন্তু থাকি যেন একঘরে হয়ে। ছেলেরা কেউ আমার শোবার ঘরে ঢোকেনা। নীতি যেন চোরের মত খণ্ডরালয়ে দিনযাপন করে। যশোরে কিন্তু সে সর্ক-সর্কময়ী ! কালো রং হোক—গুণ তার অপেষ। যদিও

হাকিমের জী, তথাপি তার আচরণে মুগ্ধ হয়ে আবালবৃদ্ধবনিতা বিশেষতঃ দরিদ্র যারা, সবাই এক-যোগে ব'লতে লাগল—“আহা—বেন মাতীর মানুষ—বেন যথার্থই শ্রামাঠাক্করণ্।”

“বিবাহের বছর তিনেক পরে ছোট খোকা জন্মালো। খাণ্ডী—দিদি-খাণ্ডী (সইমা) যশোরে মাসখানেক এসে রইলেন। মা ছ'মাস আগে থেকেই আছেন। খোকা ভূমিষ্ঠ হবার পরদিনই বাবাকে টেলিগ্রাম ক'রলুম। উত্তর পেলুম—“তোমার ঔরসজাত যথেষ্ট সম্ভান আমাকে উপহার দিয়ে গেছ। তাদের নিয়েই আমি বিব্রত। তোমার নূতন সম্ভান জন্মেছে শুনে—আমার আনন্দলাভের কারণ নেই। বরং নিরানন্দের সম্ভাবনা অধিক। এ আনন্দ তোমার গর্ভধারিণী একা উপভোগ করুন, আর আনন্দে নৃত্য করুন তোমার নূতন খণ্ডরবাড়ীর সম্পর্কে যে যেখানে আছেন।”

“গুরুদেব এলেন। মা মহানন্দে তাঁর শ্রীচরণে খোকাকে রেখে ব'ল্লেন, “আশীর্বাদ করুন,—দুঃখীর ছেলে যেন বেঁচে-বর্ত্তে থাকে। বৌমাটা দোষের মধ্যে একটু ময়লা কিনা,—বড় ভয় হয়েছিল—ছেলেটা পাছে কালো-কোলো হয়! আপনার আশীর্বাদে কেমন টকটকে নবঘনশ্রাম ছেলে হয়েছে—”

“মা উপমা দিলেন ভাল! টকটকে তায় আবার নবঘনশ্রাম! তা হোক! উপমার মানে না হ'লেও, মার আনন্দাতিশয্য দেখে খুব আনন্দ হ'ল! মার আনন্দে আমি এত আনন্দলাভ ক'রলুম,—বোধ হয়—সুন্দর নবজাত পুত্রমুখ দেখে তত আনন্দ পাইনি। কোম্পী তৈরি হ'ল। গুরুদেব ব'ল্লেন—“সুকুমার খুব চঞ্চল—খুব যশস্বী—খুব মেধাবী হবে! সৌভাগ্যের যথেষ্ট লক্ষণ দেখা যায়!”

“কথাটা কেমন গোলমেলে মনে হ’ল ! যশস্বী—মেধাবী—ভাগ্যবান তো হবে ! তার মাঝখানে “চঞ্চল” হবে কি রকম কথা ?

“যাক্ । মায়ের কথায় ছোট খোকার ভাল নাম “আত্মভূষণের” বদলে—“আত্মারাম” বলেই সবাই ডাকতে শুরু ক’লো ।

“হাতে-খড়ীর পর আত্মারামের সঙ্গে একটা গুরুমশাই নিযুক্ত ক’লুম ।

“গুরুদেবের কথা মিথ্যা হবার নয় । কোণ্ঠিতে যা লিখেছেন—ছেলেটা “চঞ্চল” হবে,—এখন থেকে তার একটু আধটু বেশ নমুনা পাওয়া গেল ! এত চঞ্চল আর দুটা চারটা হ’লে—এ অঞ্চলে কাউকে তিষ্ঠতে হবেনা ।”

## দ্বিতীয় পরিচ্ছেদ ।

হাকিমের ছেলেকে লেখাপড়া শেখাতে হবে,—কথাটা প্রচার হবারমাত্রই সমগ্র যশোর জেলাটায় যত মাষ্টার, পণ্ডিত, গুরুমহাশয় ছিলেন,—বাবার কাছে দরখাস্ত পাঠাতে শুরু ক'লেন। কেউ কেউ মশরীফে আমাদের বাসায় উপস্থিত হয়ে আমার বিদ্যাশিক্ষার ভার গ্রহণের জন্যে বাবাকে পীড়াপীড়ি ক'র্তে লাগলেন। কা'কে কি ব'লে বাবা বিদায় ক'লেন তা জানিনা। অন্ততঃ জানলে শুনলেও এখন মনে ক'র্তে পাচ্ছি না। তবে অনেক গুরুমশাই, পণ্ডিতমশাই, মাষ্টার মশাই বিদায় হবার পর যশোর-কোর্টের পেন্সনপ্রাপ্ত বৃদ্ধ পেন্সনার কৃষ্ণবল্লভ নন্দর মহাশয় আমার শিক্ষার ভার গ্রহণ ক'লেন।

শুনতে পাই,—মাসখানেকের মধ্যেই আমি প্রথম ভাগ, দ্বিতীয় ভাগ, তৃতীয় ভাগ, শিশুশিক্ষা, বোধোদয় শেষ করে বিদ্যাসাগর মহাশয়ের কথামালার প্রায় অর্ধেক সাজ করে ফেলেছিলুম। সত্য মিথ্যা জানিনা,



সকলেই ( বাবা, মা, ঠাকু'মা এবং যশোরে অবস্থানকালে যে সমস্ত লোক-  
জনের সঙ্গে আমাদের ঘনিষ্ঠতা হয়েছিল তাঁরা ) আমার সম্বন্ধে কথা  
উত্থাপন হ'লেই বলতেন—“আত্মাবামের মেধা খুব! এ ছেলে যদি বাঁচে”  
ইত্যাদি ইত্যাদি আরও অনেক কিছু,—যে সব কথা শুনতে বেশ তৃপ্তিকর  
( বিশেষতঃ বাপ মা এবং ঠাকু'মার ) এবং চক্ষু যুদে যে সম্বন্ধে  
ভবিষ্যদ্বানী উচ্চারণ করাও খুব সহজ,—কিন্তু কার্যক্রেত্রে উত্তরকালে  
যে গুলো সম্যক রূপে মিলিয়ে পাওয়া অত্যন্ত দুর্ঘট হয়ে পড়ে!

নন্দব মশাই আমাকে যে খুব যত্নপূর্বক পড়াতেন সে-দ্বারা কোনও  
সন্দেহ নাই, কিন্তু মাসের মধ্যে অন্ততঃ বিশ দিন,—বা চাকরদের  
মারফৎ তিনি মাকে বাড়ীর ভিতর খবর দিয়ে পাঠাতেন,—কাল থেকে  
আর তিনি এ'ছেলেকে ( অর্থাৎ আমাকে ) পড়াতে আসতে পারেন  
না! বাপ্—রে—বাপ্! এমন ছুটু ছেলে তিনি বাপের জন্মেও কখনো  
দেখেন নি! মা এই বকম অভিযোগ প্রায়ই শুনতেন এবং শোন্বা-  
মাত্রই আমাকে বাড়ীর ভেতর ডাকিয়ে নিয়ে গিয়ে নন্দব মহাশয়কে  
শুনিয়ে শুনিয়ে গলা ছেড়ে খুব একচোট ধমকানি দিতেন,—আব সঙ্গে  
সঙ্গে কিছু আহাৰ্য্য—( আমের সময় আম,—কমলা লেবুর সময়  
কমলালেবু, ইত্যাদি,—আর তার সঙ্গে কিছু মিষ্টান্ন ) উপঢৌকন দিয়ে  
তাঁর দস্তবিহীন গুচ্ছশ্রবর্জিত মুখে হাসিখুসির তরঙ্গ তুলিয়ে তাঁকে  
শ্রম ক'র্তেন। বেঁটে খেঁটে—হুলোদর—তাম্রবর্ণ—কেশবিহীন বিছা-  
কার-মস্তক—অহিকেনসেবী শুকুমশাই গুরফে কৃষ্ণবল্লভ নন্দব, বেলা  
বারোটায় সময় আমাকে পড়াতে আসতেন আর চারটে পর্য্যন্ত  
যেঠকখানার ঢালা বিছানার ওপর বসে আমাকে শিক্ষা দিতেন। এই

চার ঘণ্টার ভিতর গড়পড়তায় পূর্ণ দু'ঘণ্টা তিনি বসে বসেই রীতিমত নামিকাগর্জনের সঙ্গে নিজামুখ উপভোগ কর্তেন। এক ঘণ্টা অতিবাহিত হ'ত চার ছিলিম তামাকসেবনে আর বাকী এক ঘণ্টা কাটাতেন আমার পড়া বলে দিতে, হাতের লেখা দোরোস্তো করাতে, নাম্তা শেখাতে, তেরিজ জমাখরচ কসাতে এবং ঘরের বাইরে দেহের স্বাভাবিক কার্য সম্পাদন কর্তে! গুরুমশায়ের কার্যের এই রকম নিখুত হিসেব দিত,—বাবার এক পেয়ারের পুরাতন খানসামা “রাখাল।” রাখালকে আমি “রাখন্দা” বলে ডাকতুম। কি জানি কেন—গুরুমশায়ের ওপোর “রাখন্দার” বেজায় আক্রোশ ছিল। বাবা কাছারী থেকে এলেই—“রাখন্দা” তাঁর নামে যা-নয়-তাই বলে লাগাতো। ব'লতো “ওকে ছাড়িয়ে দাও—দাদাবাবু! খোকনের জন্তে একটা ভাল দেখে “মশাই” না হয় “ম্যাষ্টের” রাখো! এ তস্কর মশাইটা কিছু নয়!”

বাবা ব'লতেন—“আহা—গরীব মানুষ—বুড়ো মানুষ, ওকে একটু খাতীর যত্ন করিস্! খোকা তো প্রথম ভাগ—দ্বিতীয় ভাগ পড়ে,—তার পক্ষে এই পণ্ডিতই বখেট!”

সবাই আমাকে “ভারি দুষ্টু ছেলে” ব'লতো,—কিন্তু কেন যে ব'লতো তা আমি কিছুতেই ভেবে ঠিক কর্তে পার্তুম না। তবে ছেলেবেলা থেকে একটু “মজা” কর্তে বা “মজা” দেখতে আমি বড় ভালবাসতুম, সেই জন্তেই কি? কে জানে?

এই ধরন,—আমাকে পড়াতে বসিয়ে আঙুন-ধরানো তামাক-সাজা কলকে-বসানো হ'কোটা হাতে নিয়ে, তোব'ড়ানো গাল ভরা ধোঁয়া ছেড়ে তামাক টানতে টানতে যখন চুলে চুলে বিছানার কাছ

বরাবর গুরুমশায়ের মাথাটা মুইয়ে পোড়তো অথচ হুকোটা ডান হাতে তাঁর ঠিক ধরা আছে,—তখন হঠাৎ আমার মনে হ'ত, এইবার গুরুমশায়ের হুকো-ধরা হাতটা যদি জোরে একবার নাড়া দিই তাহ'লে কেমন মজাটা হয় ! যেমন মনে হওয়া আর অমূনি কাজে করা !

“আরে—রে—রে—গেল—গেল—সব পুড়ে লোকাকাণ্ড হয়ে গেল !  
 অরে—অরে—ও রাখলা—ও বিষ্টে—ও জগাই—আরে দেহে যা  
 আইসে—ছোরাডা কি কাণ্ড করলে”—বলে নস্কর মশাই বিছানার ওপরই  
 তুড়িলীফ খেতে শুরু ক'লেন ! চাদিক থেকে চাকরবাকুরেরা—বাড়ীর  
 ভেতর থেকে ঝি বাম্নী পর্যন্ত ছুটে এল ! বাগান থেকে মালীরা—  
 আস্তাবল থেকে সহিস কোচ'ম্যান্ প্রভৃতি যে যেখানে ছিল, সবাই  
 তাড়াতাড়ি জগের বালুতি নিয়ে বৈঠকখানার হাজীর ! ওঃ—সে  
 যে কি মজা—তা আর কি বলি বলুন !

এদিকে গুরুমশাই আমার কাণ ধরে আমাকে শাসিয়ে ব'লতে  
 লাগলেন—“আমুন আজ হজুর,—কাছারি থেকে একবার ঘরকে  
 আমুন,—তোমার পিঠের চামড়াটা না তুলে লই তো মুই কি কইছি !  
 যাঃ—এই চল্লাম—আর তোমার মত ছাওয়ালেরে আমি লিখাপড়া  
 শিখায় না—”

রাখুদা কোমরের গামছাখানা তাড়াতাড়ি খুলে ফেলে ফের জোর করে  
 সেটা কোমরেই বেঁধে নিয়ে হাত নেড়ে ব'লতে শুরু ক'লেন—“ভারি বে  
 কচি ছেলোটোর ওপোর ঝালু ঝাড়ছো দেখছি ! তুমি আপিং চড়িয়ে  
 নেশায় বুঁদ মেয়ে তুলে তুলে বিছানায় রোজ আগুন লাগাবে,—আর  
 যিছিমিছি দোষ চাপাবে ওর ষাড়ে ?”

“অ্যা—তুই কি কোস্‌রে অর্কাটীন ? আমি আশুন ফ্যাল্‌ছি—না—তোর মনিবের ছাওয়াল আমার হাতে ঝটকান্ দিয়ে ছুকা ফ্যাল্‌ছে ? আমি চল্লিশ বোৎসর যাবৎ অইফেন সেবন করছি,—যখন পেস্কার ছিলাম, হাকিমের হুকুম লইয়ে এজলাসে বসে তাগাক ঝাইছি মুহমুহঃ, নিদ্রা দিছি বসে বসে সারাক্ষণ, একটা দিনও এই কিষ্টোবোল্লভ লঙ্করের হাত হইতে ছুকা পড়ছে যদি কেউ কইতি পারে—তবে না আমি কি কইছি—হঃ !”

এই ভাবে বর্ণপরিচয় থেকে আরম্ভ করে আখ্যানমঞ্জরীর দ্বিতীয় ভাগ সমাপ্তি পর্যন্ত গুরুশিষ্যসংবাদ ব্যাপার সংঘটিত হয়েছিল !

রাখ্‌দা বাবাকে জোর করে ধরে বোস্‌লো—“গোকাকে আর তঙ্করের হাতে রাখ্‌লে চল্বে না দাদাবাবু—এবারে অন্য ব্যবস্থা কর !”

বাবা ব’ল্লেন—“কার হাতে ?”

রাখ্‌দা ব’ল্লেন—“দূর হোক্‌ গে ছাই—আমার সব সময় ঠিক মুখ দিয়ে বেরোয় না,—ঐ তোমার গিয়ে—“নঙ্কর” না “তঙ্কর,”—ও একই কথা—”

বাবা ব’ল্লেন—“ছিঃ—ভদ্রলোককে কি “তঙ্কর” ব’ল্‌তে আছে ? তঙ্কর মানে “চোর”—তাজা নিম্ ?”

“আরে ছ্যাঃ—তঙ্কর চোরকে বলে—তা কই শুনিনি ! আমাদের মৈদনীপুরে “তঙ্কর” “লঙ্কর” “ছুঙ্কর” এ সব ভদ্রলোকদেরই বলে শুনিছি !”

যাক্‌। নঙ্কর মশাই বিদায় হ’লেন। ইংরাজী বিদ্যার দৌড় তাঁর প্যারিচরণ সরকারের ফাষ্ট’ বুকের “দি রায়ম—ঐ ভেড়া” পর্যন্ত,—কাজেই তিনি আমাকে ততদূর পৌঁছে দেবার ভরসা ক’ল্লেন না। সুতরাং বাবাকে অগত্যা তিনি ব’ল্‌তে বাধ্য হ’লেন,—“এংরাজি আমার

তেমন হরস্ত নাই, — আর এই ব্রহ্ম বয়সে ছেরম করবার শক্তিও নাই !  
আপনি খোকনের জন্ত এংরাজি ম্যাষ্টর রাখবার ব্যবস্থা করুন !”

গগন সুদীর দোকানে দাবার মজলিসে হাকিমের ছেলে-পড়ানো  
সব্বন্ধে কথা উত্থাপন হ'লে নসর মশাই ব'লতেন শুমেছি—“বাগ! !  
অমন বদ্মায়েস ছাওয়ালেরে বিছে শিক্কে যে দিবে,—তার দ্যাহ কাঠের  
তৈরী হওয়াই আবশ্যক ! রক্তমাংসের দ্যাহ লইয়ে ও ছাওয়ালেরে  
শিক্কা দিবার পারে,—এমন মানুষ তো বঙ্গদেশে দেহিনা !”

শৈশব অবস্থায় ছুঁমু মীটা—বিশেষতঃ নসর মশাইয়ের সঙ্গে,—সমস্তই  
যে আমারই উর্ধ্বমস্তিষ্কসজ্জাত, এ বাহাদুরী নিতে আমি বধেষ্ট ইতস্ততঃ  
বোধ করি। এই রকম পুরস্কারযোগ্য ছুঁমু মীটুলি অধিকাংশ আমি  
রাখ্দারই শিক্ষা এবং উপদেশে দস্তুরমত শিক্ষিত এবং উপদিষ্ট  
হয়ে কার্যে পরিণত ক'র্তুম।

নসর মশাই প্রত্যহ যে স্থানটীতে বসে আমার শিক্ষা দিতেন—ঠিক  
সেইখানে বিছানার চাদরের নীচে দুটা চারটা আলপিন্ সতরঞ্জির তলা  
দিয়ে ফুটিয়ে তাদের ছুঁচোলো মুখগুলো খাড়া করে রাখতুম। বস্কা-  
মাত্রই আলপিন-বিদ্ধ নসর মশাই একেবারে কড়িকাঠ সমান উঁচুতে  
লক্ষ দিয়ে উঠতেন। মুখ হাত পা ধোবার জলের ঘটতে বিছুটা গাছ  
ডুবিয়ে রাখতুম। নসর মশাই আসবার কিছুক্ষণ আগে বিছুটাগুলো  
কেলে দিয়ে জলের ঘটটা যথাস্থানে রেখে দিতুম। নসর মশাই প্রান্ত  
দেহে কিছুক্ষণ বিশ্রামলাভের পর অঙ্গ শীতল এবং সঙ্গে সঙ্গে চরণের  
ধূল্যকর্দম সাক করবার আশায় বিছুটারসম্বন্ধ জলে যেমন হস্তপদ  
প্রক্ষালন ক'র্তেন, সঙ্গে সঙ্গে তাঁর যে অবস্থা হ'ত,—তা দেখে যদিও সে

সময় যথেষ্ট পরিমাণে আনন্দ ও মজা উপভোগ করেছি,—এখন তা স্মরণ করে সেই পরিমাণে মর্ষব্যথাও অনুভব ক'চ্ছি! শিক্ষাদানকার্য শেষ ক'রে নঙ্কর মশাই—(মার কাছ থেকে প্রত্যহ কিছু-না-কিছু আহাৰ্য্যসামগ্রী পেতেন,—সেইটা হাতে নিয়ে) আনন্দে বাড়ী ফেরবার আশায় যেমন তক্তাবোস্ থেকে নাব্তে বাবেন অম্নি “গুরুমশাই—গুন্ন” বলে পেছন দিক থেকে তাঁর স্মুখের “তোলা” চরণটা ধরে একটু টান দিলুম,—ব্যাস্—নঙ্কর মশাই বিকট চীৎকারে ঘরের ছাদ এবং প্রাচীর বিদীর্ণ করে “পপাত” একেবারে তক্তাবোস্ হতে নীচে মাটির ওপর! এ অপরাধে বাবা-মার কাছে যথেষ্ট শাস্তিভোগও বে করেছি,—তা বলাই বাহুল্য।

বশোর ইংরাজি স্কুলের নবম শ্রেণীতে ভর্তি হ'লুম। বাবার ইচ্ছা ছিলনা—এত অল্প বয়সে আমি স্কুলে যাই। কিন্তু মা এবং ঠাকু'মার পীড়াপীড়িতে বাধ্য হয়ে তিনি আমাকে স্কুলে ভর্তি করে দিলেন।

ঠাকু'মা ব'ল্লেন—“শত্ৰুর মুখে ছাই দিয়ে ছেলে তোর আট বছর পেরিয়ে ন'য়ে পোড়লো! এখন থেকে স্কুলে না গেলে সহবৎ শিখ্বে কোথা থেকে?”

মা ব'ল্লেন—“থোকাকে যদি সমস্ত দিন বাড়ীতে রাখো তাহ'লে গুরুদৌরাত্ম্যে আমার এমন একটা কঠিন রোগ ধ'র্বে যে আমি মাস স্থানেকের মধ্যেই মরে যাব।”

একে হাকিমের ছেলে তায় হেড-মাষ্টার থেকে স্কুলের কেবানীটা পর্যন্ত প্রত্যহ সকালসন্ধ্যা আমাদের বৈঠকখানায় এসে হাজির দিলে বাবার মনস্তৃষ্টি ক'র্ভেন, সুতরাং স্কুলে আমার খাতীর দেখে কে? অস্বাভ

ছেলেরা সামান্য অপরাধ ক'লে যে রকম গুরুতর শাস্তি ভোগ ক'র্ত,—  
আমি যদি এগার' ইঞ্চি ইঁট মেরে কোনো মাষ্টার বা পণ্ডিতের মাথাও  
ভেঙ্গে দিতুম,—তা'হ'লে আমাকে তার সিকির সিকি শাস্তি দিতে  
হেড্ মাষ্টার কিম্বা সুপারিন্টেন্ডেন্ট পর্যন্ত ভরসা ক'র্তেন না  
তো ছোটখাটো মাষ্টার পণ্ডিতদের কা কথা ! তার ওপোর,—  
পড়াশুনায় আমি সবাইকে হারিয়ে দিতুম,—ক্রাশে আমি ফাষ্ট বয়  
বরারবই ! এর জন্তেও আমার সাত খুন মাপ ছিল ! টিফিনের ছুটী হ'লে  
কিম্বা স্কুল বসবার আগে সময়টুকুর কথা ছেড়ে দিন,—ক্রাশের ভিতর  
লেখাপড়ার সময়ও আমার ছুটুগীর অন্ত ছিলনা । ভাল চেয়ারখানি  
সরিয়ে একখানা পা-ভাঙ্গা তে-পায়। চেয়ার এনে ভাঙ্গা পা-টী তা'তে  
ঠেকিয়ে বেমানুম বদল করে রাখলুম । হতভাগ্য মাষ্টার বা পণ্ডিত  
তাড়াতাড়ি বস্বামাত্রই একেবারে চমৎকার কোতুকময় পতন-দৃশ্য !  
ক্রাশের ছেলেরা সবাই আমায় ভয় ক'র্ত,—সুতরাং প্রকৃত অপরাধী কে—  
শিক্ষক মহাশয় নির্ণয় ক'র্তেন না পেরে সন্দেহক্রমে আমি এবং দু'  
একজন অতি নিরীহ ছেলে বাদে ক্রাশস্কুল ছাত্রদের বেত্রাঘাতে  
একেবারে “গন্ধক ছুটিয়ে” দিতেন । নিতান্তই যখন হাতে-নাতে ধরা  
পড়তুম, তখন বড় জোর একটু আধটু কাণ-মলা বা ধম্‌কানির দ্বারা  
স্কুলের ছাত্রশাসন আইনের মর্যাদা রক্ষা হ'ত !

সকল কার্যেই আমি ছিলাম অগ্রণী । স্কুলে আমার বেশ একটা দল  
তৈরী হয়েছিল,—তার দলপতি আমি । আমার দক্ষিণহস্ত—অর্থাৎ  
উপযুক্ত সহকারী—মন্ত্রী—পরামর্শদাতা—প্রাণের বন্ধু ছিল রাজেন  
চাটুয্যো,—যশোরের সিভিল সার্জেন ডাঃ রমা প্রসাদ চাটুজির ছেলে ।

বদমায়েসি, ফিচলেমী, মৌয়ারতুমিতে আমি তার তুলনায় ঐরাবতের কাছে গঙ্গা-ফড়িং ! প্রয়োজন হলে—রাজেন মাষ্টারপণ্ডিতকে আঘাত ক'র্ত্তেও ইতস্ততঃ ক'র্ত্তনা। আগার কিন্তু অতটা ভরসাও হ'ত না,—প্রকৃতিও ততটা উর্দ্ধগতি প্রাপ্ত হয়নি ! ডাক্তার সাহেবের বাড়ী কলকাতায় বাগবাজারে। তিনিও সপরিবারে আমাদের মত কর্মস্থান যশোরে থাকতেন। বালক হ'লে কি হয়—রাজেনের দৌরাভ্যে স্কুলের মাষ্টারপণ্ডিত,—ছাত্র,—চাকরবাকর পর্য্যন্ত ভয়ে তটস্থ। ডাক্তার বাবু ছেলেকে কিছুতেই শাসন কবে দাঁতে পারতেন না। আমি স্বচক্ষে দেখিছি, ডাক্তার বাবু ছেলেকে চাবুক মেরে পিঠের ছাল তুলে নিয়েছেন, তথাপি রাজেনের চোখে এক ফোঁটা জল নেই কিম্বা মুখে “আঃ—উঃ”—যন্ত্রণাসূচক শব্দ নেই ! অবশ্যতঃ রাজেন “চোরের মার” চক্রম ক'র্ত্তে পারত।



## তৃতীয় পরিচ্ছেদ ।

বশোর জেলার এক সম্ভ্রান্ত জমিদারের ছেলে আমাদের ক্লাসে পোড়তো। আমি তখন পঞ্চম শ্রেণীতে পড়ি। ছেলেটির নাম মোহিনী-রঞ্জন রায়। অতি শিষ্ট শান্ত ভালমানুষ, যাকে বলে গো-বেচারী! দেখতে অতি সুশ্রী। ক্লাসে মোহিনী কারুর সঙ্গে মিশ্‌তোনা বা কথা-বার্তা কইতো না। জমিদারের ছেলে,—খুব ফিট্‌কাট্‌ বাবু সেজে গাড়ী চড়ে আসে, সঙ্গে ভোজপুরি দরোরান। মাষ্টারপণ্ডিত যে তাকে যথেষ্ট খাতির ক'র্তেন সে কথা বলাই বাহুল্য। বাড়ীতে শুনেছি তার চারজন মাষ্টারপণ্ডিত আছে,—কিন্তু বরাবর একজামিনে ফেল্ হ'য়েও বৎসর বৎসর সে ক্লাস্ প্রমোশন ঠিক পেয়ে বেতো। ক্লাসে মাষ্টারের পাশেই চুপ্ করে বসে থাকতো,—কখন পড়া বলত না, অথবা কেউ তাকে পড়া জিজ্ঞাসা করে বিরক্তও ক'র্ত না।

প্রথম যে দিন পঞ্চম শ্রেণীতে এসে মোহিনী ভর্তি হ'ল, হেড-মাষ্টার নিজে তাকে সঙ্গে করে ক্লাসে নিয়ে এসে ইংরিজির মাষ্টার সর্কেশ্বর বাবুর জিম্মা করে দিয়ে গেলেন। সর্কেশ্বর বাবু অতি যত্ন-পূর্বক এবং মহাসমাদরে তাকে দক্ষিণ বাহুদ্বারা বেধেন করে নিজের কাছে বসাবার জন্তে রাজেনকে ব'ল্লেন “সোরে বোসো রাজেন” এবং সেই বেঞ্চির শেষের দিকে গঙ্গাধর নামে যে ছেলেটা বসেছিল—তা'কে হুকুম ক'ল্লেন “গঙ্গা! পিছনের বেঞ্চে ব'স্গে যা!” গঙ্গাধর আদেশমত অবনতশিরে আসন ত্যাগ করে পেছানের বেঞ্চে গিয়ে ব'সলো,—কিন্তু রাজর্জন আদেশ পেয়েও ঘাড় ওঁজে বই খুলে ভীষণ রকম পাঠে মনোযোগ প্রদান করে নিজের জায়গায় বসে রইলো! একবার নড়লে-চড়লেও না।

সর্কেশ্বর বাবু মোহিনীকে অতি নম্র স্বরে ব'ল্লেন “বোসো ঐখানে!” অর্থাৎ বেগানে রাজেন বসে আছে সেই জায়গায়। মোহিনী বেচারী কোথায় ব'সবে বুঝতে পারেনা,—চুপ্ করে দাঁড়িয়ে রইলো।

সর্কেশ্বর বাবু চোকমুখ রাজা করে রাজেনকে ধমক দিয়ে ব'ল্লেন “এই রাজেন—শুন্তে পাস্নি কি ব'ল্লম?”

“কি?”

“একটু সরে বাস্না!”

“কেন?”

“এই ছেলেটাকে ব'সতে জায়গা দে—”

“আরও তো ঢের বসবার জায়গা আছে—”

“না—এইগেনে ও ব'সবে।”

“কেন?”

“আমার হুকুম—ষ্টুপিড রাস্কেল্ !”

“আমার ওপোরে এসে ও ব’সবে কেন ? আগিতো পড়া বলে এইথেনে উঠে এসে বসেছি !”

“তা হোক—আমি ওকে ঐখানে বসাবো !”

“কেন ?”

“আমার ইচ্ছে !”

“আপনার চেয়ার ছেড়ে ওকে বসানু না কেন ?”

আর যায় কোথা ! সর্কেশ্বর বাবু একে স্বভাবতঃই একটু কোম্পনস্বভাব, —তার ওপোর— ক্লাস্‌রুম্ ছেলেদের সামনে এ ভাবে একজন ছাত্রের কাছে অপমানিত হয়ে একেবারে তেলে-বেগুনে জলে উঠে তখনি চেয়ার থেকে লাফিয়ে এসে রাজেনকে দু’হাতে ধরে টেনে ব’লতে লাগলেন “গেট্ আউট্ ইউ বদ্‌ম্যায়েস্—ক্লাস্ থেকে গেট্ আউট্ ! আজই তোকে আমি রাস্‌টিকেট্ ক’রব্ ! গেট্ আউট্ !”

কিন্তু রাজেনকে ‘গেট্ আউট্’করাতো বড় সোজা ব্যাপার নয় ! সর্কেশ্বর বাবু পেছন থেকে রাজেনের দু’হাত ধরে যত টানেন,—রাজেনও দু’হাতে ডব্ল্ বেঞ্চের সামনের টেবিল তত জোরে আঁকড়ে ধরে ! ক্লাস্‌রুম্ ছেলেরা গুরুশিষ্যের টানাটানির মজা দেখে দস্তুরমত একটা আনন্দের কলরব তুলে দিলে ! সর্কেশ্বর বাবু উত্তরোত্তর রাগের মাত্রা চড়িয়ে রাজেনকে ধরে টানাহিঁচড়া ক’র্তে ক’র্তে বলেন ‘গেট্ আউট্’—আবার মাঝে মাঝে ছাত্রদের দিকে চেয়ে চোঁচিয়ে বলেন “অর্ডার—অর্ডার—সাইলেন্ট্ ।” রাজেন নিরীক হয়ে টেবিল আঁকড়ে মুচকে মুচকে হাসতে থাকে !

কিছুক্ষণ টানাটানির পর সর্বেশ্বর বাবু ক্লাশের বাহিরে এসে হাঁকতে লাগলেন “রামখেলান—জগমল—বেহারা” ! চীৎকারের চোটে অজ্ঞাত ক্লাশ থেকে মাষ্টার পণ্ডিত সঙ্গে সঙ্গে জনকতক ছাত্র আমাদের ক্লাশে এসে জমায়েৎ হ’ল ! সর্বেশ্বর বাবু তখনও রাজেনকে বল্ছেন “যাও—বেরিয়ে যাও,—ক্লাশ থেকে গেট্ আউট্—। এই জগুয়া—বোলাও রেজিষ্ট্রী কেতাব,—আজ উম্কা নাম কাট দেগা—”

দেখতে দেখতে হেড্ মাষ্টার, সুপারিন্টেন্ডেন্ট্ প্রভৃতি মুকব্বিরা সেখানে উপস্থিত হ’লেন ! ব্যাপার খুব গুরুতর দাঁড়াল। বুদ্ধিমান হেড্ মাষ্টার মশাই খুব শাস্তভাবে রাজেনকে নিয়ে অফিস ঘর চলে গেলেন। সর্বেশ্বর বাবু বিজয়নিশান লাভ ক’লেন বিবেচনা করে মোহিনীকে হাঁপাতে হাঁপাতে চড়া সুরে বল্লেন “নাউ—টেক্ ইওর্ সিট্” এবং সঙ্গে সঙ্গেই কক্ষস্বরে পাখাটানা বেহারাকে লুকুম ক’লেন “এই রাসকেল্ জোরসে থিঁচো।” পরক্ষণেই আমার দিকে “কট্ মটিয়” দৃষ্টিনিষ্কপ করে আদেশ ক’লেন—“ইউ আত্মারাম—” ডা বলো—।”

আমি ভালমানুটির মত দাঁড়িয়ে পড়া বল্তে আরম্ভ ক’লুম—

“When the British warrior queen—

Bleeding from the Roman rod,—

“যখন ঐ ইংরাজের যোদ্ধা রাণী রোমানদের ডাণ্ডা খাইয়া রক্তাক্ত-  
কলেবরে—”

সর্বেশ্বর বাবু বল্লেন—“সিট্ ডাউন্—! নেক্ষ্ট্!”

বিন্দুমাধব পড়া বোলতে দাঁড়িয়ে ওঠবা’ মাত্রই ঢং ঢং করে ঘণ্টা বেজে গেল এবং সর্বেশ্বর বাবুর পড়ানোর ঘণ্টা শেষ হ’ল। তিনি গম্ভীর মুখে

ক্লাস থেকে বেরিয়ে গেলেন ! আমি মহানন্দে ক্লাসের ভেতোরই অল্পচ-  
স্বরে একলাইন গান গেয়ে ফেলুম,

“মেরেছ—বেশ করেছ—হরি বোলে নাচো ভাই ।”

সে দিন রাজেন আর ক্লাসে আসেনি । মনে ভাবলুম— নিশ্চয়ই  
তার নাম কেটে দিয়েছে !

বৈকালে মাঠে বেড়াতে গিয়ে রাজেনের সঙ্গে যথাস্থানে যথাসময়ে  
দেখা হ’ল । জিজ্ঞাসা করে জানলুম—হেড মাষ্টার অনেক নীতি-উপদেশ  
দিয়ে সর্কেখর বাবুর কাছে মাপ চাইতে বসেছিলেন । রাজেন ব’লে  
—“দোষ করিনি, ঘাট করিনি, শুধু শুধু মাপ চাইতে আমার দায়  
পড়েছে ।”

“হেড মাষ্টার কি ব’লেন ?”

“ব’লেন, ‘তোমার বাবাকে গিয়ে ব’লে দোবো—তুই ভারি বদনাস  
হয়েছিস ; তোকে এ স্কুলে আর রাখা হবেনা ।’ আমিও বলুম,—‘এ  
বাস্তাল দেশে আর থাকবে কে ? আমি ক’ল্কেতায় গিয়ে লেখাপড়া  
ক’র্ব ?’

“ডাক্তার বাবু শুনে তো তোকে খুব ঠাঙ্গাবেন !”

“ঠেকিয়ে কি ক’র্বেন ? আমি দিব্যি করেছি, এ বাস্তাল দেশে আর  
থাকছি না !”

দুজনে মাঠে বসে গোটা পাঁচ ছয় বার্ডসাই সিগারেট নিঃশেষ করে  
সন্ধ্যা হ’তেই বাড়ীর দিকে রওনা হ’লুম ।

এই অল্প বয়সেই তামাক, বার্ডসাই, সিদ্ধিতে আমি, রাজেন আর  
জনকতক ছোকরা বেশ পরিপক্ব হয়ে গেছি !

পরদিন স্কুলে গিয়ে শুন্লুম—রাজেন বাপ-মাকে না ব'লে ক'য়ে সেই  
রাত্রেই ক'লকেতায় চলে গেছে। ডাক্তার বাবু ব'লেছেন—  
“মরুক্কে বেটা নছার! আমি আর ওর মুখদর্শন ক'রনা!”

রাজেন যশোর ত্যাগ করবার পর—যশোর যেন আমার শ্মশান মনে  
হ'তে লাগল! হায়, আমি কবে ক'লকেতায় যেতে পাব! বয়েসের সঙ্গে  
সঙ্গে যেমন জ্ঞানের বৃদ্ধি হয়,—সহরে যাবার লালসাত্তেমনি বৃদ্ধি হ'তে  
থাকে! বিশেষতঃ ক'লকেতার সহর—যেখানে আমার পৈতৃক বাসভূমি,  
যেখানে বাস করবার জন্তে ভারতবর্ষের লোক আত্মহারা, সেই স্বর্গতুল্য  
ক'লকেতা সহরে কি আমি এ জীবনে যেতে পাবনা? মনে মনে ঠাকুর-  
দেবতার পায়ে এর জন্তে কতই না মাথা খুঁড়েছি!

## চতুর্থ পরিচ্ছেদ ।

মনে করেছিলুম, আত্মকাহিনী লিখতে ব'সে—নিছক সত্যকথা ব'লব বটে—কিন্তু অপ্রিয় সত্যের ধার দিয়েও যাবনা ! সে সব বেমানুম বাদ দিয়ে কেবল কাহিনীটা মজার ওপোর দিয়েই চালিয়ে দোবো । কিন্তু অনেক ভেবে দেখলুম যে,—তা' ক'র্তে গেলে—ঘটনা-গুলো কেমন খাপছাড়া হয়ে যাবে ; একটার সঙ্গে আর একটার কোনো মিল বা সামঞ্জস্য থাকবে না । সংসার বা সমাজঘটিত ব্যাপার নিয়েই মানুষের জীবন । ঘরে-বাহিরের ঘটনাগুলো সব পরস্পর পরস্পরের সঙ্গে এমন জড়িত যে, নিজের সম্বন্ধে শুধু ঘরে বা সংসারের কথাগুলো ব'লে, অথবা কেবল বাইরের বা জনসমাজের কাহিনীগুলো প্রকাশ ক'লে,—আত্মকাহিনীর মূল উদ্দেশ্য কোন মতেই সিদ্ধ হ'তে পারেনা । কাজেই যতদূর মনে পড়ে,—সত্যের আশ্রয় নিয়ে স্পষ্টাঙ্গা স্পষ্ট সকল কথাই ( ওরই মধ্যে যতটা সম্ভব গুছিয়ে ) বন্বার চেষ্টা করি !

তবে “প’ড়লে কথা সভার মাঝে, যার কথা তার প্রাণে” বাজবেই।  
কিন্তু উপায় কি ?

বারো-তেরো বৎসর বয়স পর্যন্ত যশোরই আমার এক রকম স্বদেশ-জন্মস্থান-লীলাভূমি,—যা বলেন তাই। কথা উঠতে পারে, ক’লকাতায় পৈতৃক বাটীতে কি তার মধ্যে একবারও যাওয়া হয়নি ? অথবা—সেখানে কি আত্মীয়স্বজন অথবা সম্পর্কীয় কেউ ছিলনা ? উত্তর এই যে—ক’লকাতায় বাজুডাঙ্গানে আমার পৈতৃক ভিটে; জনসমাজে পরিচয় দেবার দিক সবাই সেখানে আছেন এবং এই যশোরে আমি, বাবা এবং মা— ( বাবার এটা কর্মস্থান হ’লেও ) এক রকম নির্বাসনে কালযাপন ক’চ্ছি।

আমার বংশপরিচয়টা এই সূত্রে না দিলে—কাহিনীটা ভেমন জমাট হবেনা এবং পাঠকপাঠিকার সে রকম মনঃপুত হবেনা—বেশ বুঝতে পাচ্ছি। সূত্ররূপে আরম্ভ করা যাক দুর্গা বলে। উর্দ্ধতন চৌদ পুরুষের খবর যদিও আমার জানা আছে,—কিন্তু এ ক্ষেত্রে ঘটকের “কুলুচি আঙড়ানোর” দিক সে সমস্ত যদি বিবৃত ক’র্তে বসি, তাহ’লে তা’তে নিতান্ত বেরদিকের পরিচয় দেওয়া হবে। পাঠকপাঠিকারও এই নীরস কাহিনীতে বৈধ্যচ্যুতি ঘটবার যোলা জানার ওপর আঠারোআনা সম্ভাবনা; সূত্ররূপে যেখান থেকে “আমল নাটক” আরম্ভ—সেইখান থেকেই শুরু।

পূর্ববঙ্গের কোন এক জিলাস্থ ( নাম না হয় নাই করলুম, তবে সেটা এমন কিছু ভীষণ “বাস্তাল দেশ” নয় যে সেখানকার অধিবাসীদের কথা শুনে ঠিক বুঝতে পারা যায়না—সেটা জার্মান ভাষা



কিষ্কা অষ্ট্রেলিয়ার আদিম নিবাসীদের ভাষা,—তবে কাছাকাছি East Bengalএর ) কোনো একটি পল্লীগ্রামের এক দরিদ্র কুলীন ব্রাহ্মণবংশ-জাত এবং শৈশবেই পিতৃমাতৃহীন আমার প্রপিতামহ স্বর্গীয় হরিরাম বন্দোপাধ্যায় মহাশয় বারো তেরো বৎসর বয়সে কুলীন ঘর-জামাই-রূপে ক'লকাতার এক সম্ভ্রান্ত মুখ্যো বংশে উদয় হন। বড়মানুষের বাড়ীর ঘর-জামাই হয়ে প্রপিতামহ মহাশয় স্বদেশ, পৈতৃক বাটী এবং সেই সঙ্গে তাঁর বিমাতা, সহোদরগণ এবং বৈমাত্রেয় ভ্রাতাগণের সঙ্গে চিরদিনের মত সম্বন্ধ পরিত্যাগ করেছিলেন। যতদিন স্বপুত্র-স্বাশুড়ী বর্তমান ছিলেন—ততদিন বোধ হয় ঘরজামাই হয়েও স্বপুত্রালয়ে সুখেই বসবাস কর্তেন—ভাল রকম খেতে প'র্তে পেতেন ; লেখাপড়াও একটু আধটু শেখ'বার সুযোগ পেয়েছিলেন। কিন্তু স্বপুত্র-স্বাশুড়ীর দেহরক্ষার পর হরিরাম বাঁড়ুয্যে মশাই দেখলেন, তিনি একেবারে মুখ্যো বংশের “জামাই বারিকে” একজন জামাই-তালিকা-ভুক্ত টিকিট-ধারী” প্রাণী ভিন্ন আর কিছুই নন। আত্মমর্ষাদাজ্ঞানের বশেই হোক—অথবা স্বর্গীয়া প্রপিতামহী মহেশ্বরী দেবীর প্ররোচনায়ই হোক,—হরিরাম ক'লকাতার এক সাহেবের কুঠিতে মাসিক পাঁচ “তঙ্কা” বেতনে এক ওজন-সরকারের চাকরী জোগাড় করে নিলেন। স্বপুত্রবাড়ীর ছ'বেলা ছ'মুটো রান্না ভাত খেয়ে—অতি কষ্টে হরিরাম বেতনের টাকাগুলি জমিয়ে ঐ বাছড়বাগানের ভীষণ বনবাদাড়ের ধারে বিধে তিনেক জায়গা—মাত্র ত্রিশ টাকায় কিনে ফেলেন এবং আরও বছর খানেক মিতব্যয়ী এবং কষ্টসহিষ্ণু হয়ে “নিজ খরিদ” জমীর উপর খান ছই “খোড়ো ঘর” তুলে—শুভদিনে শুভক্ষণে চারি বৎসরের স্কুমার

এক পুত্র ( অর্থাৎ আমার পিতামহ রামচন্দ্র বাবুকে ) কোলে নিয়ে “উদ্যোগীনং পুরুষসিংহমুপৈতি লক্ষ্মীঃ” এই শাস্ত্রবাক্যের সারস্বৎ স্বপ্নরবাড়ীর এবং তৎপল্লীবাসীদের হাড়ে হাড়ে বুঝিয়ে দিবে এবং সকলকে সঙ্গে সঙ্গে বিস্মিত এবং ঈর্ষ্যান্বিত করে “নিজ ভিটার” গৃহে-প্রবেশ ক’লেন।

সে আজ প্রায় দেড়শো বছর আগেকার কথা ব’লছি। মাত্র পাঁচটি “তঙ্কা” বেতনে সংসারখরচ চালিয়ে লোকলৌকিকতা বজায় করে—পরিবারের গহনা পরার সাধ সম্পূর্ণ না হোক ওরই অল্পবিস্তর কিছু কিছু মিটিয়ে সকল রকমে নিজের মনোবাসনা পূরণ করা কিছুতেই সম্ভব নয়, তা সে যত সস্তা-গণ্ডার বাজারই হোক না কেন? বড়-মানুষের বাড়ী “ঘরজামাই” থেকে বড়মানুষের আবহাওয়ায় বহুকাল কাটিয়ে হরিরামের মেজাজটা একটু যে বড়মানুষের মত না হয়েছিল, এমন কথা ব’লতে পারিনা। হরিরামের “বড়মানুষ” হ’তে তারি ইচ্ছা, কিন্তু তা হয় কেমন করে? বাড়ী হয়েছে—ঘর হয়েছে—জ্যায়গা হয়েছে,—জমী হয়েছে, কিন্তু তা হ’লেও হরিরাম গেরোস্তো ভিন্ন আর কিছু নন, “বড়লোক” তাঁকে কেউই বলেনা।

“বাদশী ভাবনা যার সিদ্ধি সেইমত”—কথাটা সকলের পক্ষে সব সময় না খাটলেও—হরিরামের পক্ষে খুবই খেটেছিল। হরিরাম দেখতে দেখতে ক’ল্কেতার সহরে একজন নামজাদা বড়লোক হয়ে উঠলেন। কেমন করে—তাই ব’লছি।

নীলকুঠির গোমস্তা হরিরাম ( ওজন-সরকারী বা গোমস্তাগিরি—ঐরকম যাহোক একটা চাকরি তিনি ক’র্তেন— ) একদিন বেলা দ্বিপ্রহরে

কুঠির কার্যোপলক্ষে কোথায় যাচ্ছিলেন। শ্রাবণ মাস,—মুঘলধারে বৃষ্টি পড়ছিল সে সময়টা। গোলপাতার ছাতি থাকলেও—এমন তোড়ে জল হ'চ্ছিল যে সে সময়ে রাস্তা চলা ছরুহ ব্যাপার। হরিরাম রাস্তার ধারে একটা বড় দরের মনোহারীর দোকানের বারান্দার নীচে দাঁড়ালেন। এখনকার মত সে সময় মনোহারীর দোকান ব'লতে শুধু “কাগজ উড়-পেন্সিল, লজনচুস, চুল বাঁধবার ফিতা” ইত্যাদি খুচরো জিনিষের দোকান বোঝাতো না। সে সময় মনোহারী দোকানে ঢাকার মসলিন থেকে কৃষ্ণনগরের - পতল এবং নানাদেশ বিদেশের তৈরী যত ছাপ্রাপ্য শিল্পদ্রব্য,—সোখীন এবং ধনবান ক্রেতাদের জগু মজুত থাকতো। বড়-দরের সাহেবমেমেরা, নবাববংশীয়েরা, রাজারাজাডারা সহরে বেড়াতে বেরুলে সখ করে এই রকম মনোহারীর দোকানে এসে নিজেরা পছন্দ করে জিনিষ কিনতেন। হরিরাম দোকানের বাহিরে বারান্দায় দাঁড়িয়ে তন্ময় হয়ে জিনিষপত্র দেখছেন আর রকমারি ক্রেতাদের মুঠো মুঠো টাকা দিয়ে জিনিষ কেনার বহর দেখে অবাক হ'চ্ছেন—আর সঙ্গে সঙ্গে দোকানদারের “খরিদার-জমানো” বাক্চাতুর্য্য শুনে গনে মনে দোকানদারীর তারিফ ক'চ্ছেন।

বৃষ্টি প্রায় ধরে এসেছে। হরিরাম দোকান থেকে নেবে যাবার উত্তোগ ক'চ্ছেন,—এমন সময় একটা প্রকাণ্ড জুড়ী এসে দোকানের সামনে দাঁড়ালো। হরিরাম জুড়ীগাড়ী আর তার আরোহী একজোড়া “ভবিষ্যুক্ত” সাহেবমেম দেখে থমকে দাঁড়িয়ে পড়লেন। সাহেব-মেম গাড়ীর ভিতর থেকে দোকানের দিকে সঙ্গে সঙ্গে হরিরামের দিকে নজর ক'র্তেই—“সেলাম-পোক্ত” হরিরাম সসন্ত্রমে মাথাটা হাঁটু পর্য্যন্ত মুইয়ে দু'জনকে একসঙ্গে এক

বারে দুই সেলাম। খেতাব-খেতাবিনী মহোদর-মহোদয়া হরিরামের প্রতি ক্রক্ষেপ ক'ল্লেন কিনা জানিনা, কিন্তু হরিরাম বুঝলেন তাঁরা একটু বিপাকে পড়েছেন। মুম্বলধারে না হোক—বৃষ্টি তখনো বেশ পড়ছিল এবং যেখানে গাড়ী দাঁড়িয়েছিল—সেখান থেকে দোকানে ওঠবার সিঁড়ি পর্য্যন্ত এমন জল-কাদা যে অতি দীন-হুঃখী কালা অদমি পর্য্যন্ত তার ওপোর দিয়ে চ'লতে কুণ্ঠিত হয় তো সাহেবমেমদের কা কথা। এখনকার মত তখন তো আর সহরের পথবাট পিচের কিম্বা “গ্যাকাডাম ইজড্” হয়নি। তখন পল্লীগ্রামের মত মাটির রাস্তার দুপাশে খানা সূত্রাং তখন ছোড়ার গাড়ী এসে কোনো বাড়ীর ফটক বা দরজা ঘেসে দাঁড়াতে পারত। গাড়ীকে রাস্তার মাঝ-বরাবর রেখে গাড়ী থেকে নেবে আরোহীদের পাওদলে খানিকটা যেতে হ'ত। গাড়ী থেকে দোকান পর্য্যন্ত রাস্তার তো এই ভীষণ অবস্থা—তার ওপোর সহিস্কেচম্যান বরাতক্রমে ছাতাও আনেনি! সাহেব রাজা চোখমুখ আরও রাজা করে সহিস্কে কোচম্যানকে খুব ব'কতে শুরু ক'ল্লেন। সহিস বেচারী ছ'জন ভয়ে শশয্যস্তে দোকানের বারান্দার উঠে দোকানদারের কা'কেও ডেকে একটা কিছু ব্যবস্থা করবার জন্তে তৎপর হয়ে পড়লো। ইত্যবসরে হরিরাম তাড়াতাড়ী খুব লম্বা চওড়া তক্তা —( ভাগ্যক্রমে সেই দোকানের বারান্দার একপাশে কতকগুলো দাঁড় করানো ছিল, বোধ হয় প্যাকিং বাক্স তৈরী করবার জন্তে, তারই একটা ) একাই তুলে নিয়ে দোকান-ঘর থেকে একেবারে গাড়ীর “পা-দানি” পর্য্যন্ত পেতে দিলেন, আর তার ওপোর নিজের গায়ের মোটা চাদরখানা লম্বা করে বিছিয়ে দিয়ে গাড়ীর দরজার কাছে গিয়ে আবার উপরো-উপরি একজোড়া “আজানুদার্ব” সেলাম ঠুকে ব'ল্লেন

—“কাম মাই লর্ড (come my lord) মাই বিগ আম্ব্রিলা হাজ ; (my big umbrella has) নো বিট ওয়াটার (no bit water) লর্ড Lordদের গায়ে—!” হরিরামের কার্যতৎপরতা, উপস্থিতবুদ্ধি এবং সেই সঙ্গে শক্তিম্যান জোয়ান কুলীর মত তাঁর দেহের অসীম ক্ষমতা দেখে—সাহেবমেম্ বথেষ্ট খুদী হয়ে মহানন্দে গাড়ী থেকে নেবে হরিরামের ধৃত ছাতার তলায় দু’জনের দেহবৃষ্টির জল থেকে বাঁচিয়ে দোকান-ঘরে ঢুকলেন। সাহেব দোকানের ভিতরে বাবার সময় হরিরামকে ব’ল্লেন—“ঠারো—!” চুরুট দাঁতে চেপে খেতাজপ্রবর জড়িত স্বরে ক’ক যে ব’ল্লেন, বেচারী ব্রাহ্মণ কিছুই বুঝলেন না। বটে, তবে যে কথামালার বাঘ ও বকের গল্পের বাঘের মত এই উপকারের বিনিময়ে “মারো কিম্বা মরো” গোছের কোন কথা বলেন নি,—এটুকু হরিরাম গোমস্তা মশাই সাহেবমেমের মুখের ভাব ও চলনের ভঙ্গিমা দেখে স্থির বুঝতে পেরেছিলেন।

দোকান-পরিদর্শন এবং সচ্ছামত দ্রব্যাদি কেনা শেষে সাহেবমেম যখন সেই তক্তা এবং হরিরামের চাদরের ওপর চরণ দু’জোড়া অবহেলার চালিয়ে এবং তাঁহারই হস্তধৃত গোলপাতার ছাতার তলায় বৃষ্টি নিবারণ করে দিব্য শুদ্ধ দেহ-পরিচ্ছদ-জুতা-সমেত জুড়িতে গিয়ে উঠে ব’ল্লেন, হরিরাম আবার একজোড়া পূর্ববৎ দীর্ঘ সেলাম “বাজিয়ে” সাহেবমেমকে মুহু শরীরে অন্তর্ধান হ’তে দেখবার অপেক্ষায় গাড়ীর ধারে দাঁড়িয়ে রইলেন। এক মুষ্টি (প্রায় গোটা কুড়ি) টাকা পকেট থেকে বার করে হরিরামকে দিয়ে এবং একটা চিরকুট কাগজে কি লিখে দিয়ে সাহেব ইংরাজি-ফার্সি-বাংলা-মিশ্রিত ভাষায় ব’ল্লেন—“কাল সকালে এই ঠিকানায় আমার সঙ্গে দেখা কোরো, তোমার ভালো হবে।”

ভালো যথেষ্টই হ'ল। শুধু ভালো নয়,—হরিরাম সেইদিন থেকে মা কমলার বিশেষ কৃপাদৃষ্টিতে প'ড়লেন এবং দিনকয়েকের মধ্যে বাংলা দেশে (ক'লকাতার সহরে) একজন “বড়লোক” বলে জনমানবের কাছে খ্যাতিলাভ ক'লেন। উপরোক্ত যে সাহেবটি তাঁর ভাগ্য পরিবর্তনের উপলক্ষ হলেন তাঁর নাম মিষ্টার উইলিয়াম বোল্টস্ (Mr. William Bolts); তিনি ইষ্ট ইণ্ডিয়া কোম্পানীর একজন বড়দের পাণ্ডা। নীলকুঠির গোমস্তাগিরির চাকরি ছাড়িয়ে হরিরামকে তিনি সঙ্গে করে নিয়ে কাসিমবাজারে চলে গেলেন এবং সেখানে তাঁকে রেশমের কুঠিতে প্রধান গোমস্তার চাকরি দিয়ে তাঁর বিপুল অর্থ-উপার্জনের পথ প্রশস্ত করে দিলেন।

## পঞ্চম পরিচ্ছেদ ।

এখনকার বড় বড় চাকুরে বাবুদের হাজার দেড়-হাজার টাকা বেতনেও হুঃখ ঘোচেনা,—তার কারণ, এখন উপরি রোজগার একরকম নাই ব'লেও চলে । আর চাকুরিতে “উপরি” রোজগার না থাকলে শুধু বাঁধা মাইনেতে কখনো টাকাও জমেনা,—“বড়মানুষও হওয়া যায় না । এই “উপরি-রোজগারের” জগেই সেকলে একটা প্রবাদ বচন সৃষ্টি হয়েছিল,—“যেমন-তেমন চাকুরি, দি'ভাত !” হরিরাম যাত্র ছ'টাকা মাইনের গোমস্তা ছ'লে কি হবে,—মোট মোটা টাকা উপরি রোজগারে অল্পদিনে একেবারে “ফেঁপে” উঠলেন । এই সূত্রে সেকলে ইস্ত ইত্তিয়া কোম্পানীর ব্যবসাবাগিজের বিষয় কিছু যদি বলি তাহ'লে পাঠক-পাঠিকাদের নিতান্ত মন্দ লাগবেনা বলেই আমা? বিশ্বাস ; বিশেষতঃ আজকের দিনে ।

১৭৫৭ খৃষ্টাব্দে পলাশীযুদ্ধের পর বিশ্বাসঘাতক মীরজাফর যখন বাংলার মস্‌নদে চেপে বসলেন,—তখন ইষ্ট ইণ্ডিয়া কোম্পানীকে অর্থাৎ তার যত কর্মচারীদের কাছে দাসগণ মিথে দিয়ে তিনি নামে “নবাব” কিন্তু কাজে তাঁদের “গোলাম” হয়ে পড়লেন। কোম্পানী এসেছেন এদেশে ব্যবসা করে অর্থ উপার্জন কর্তে ; নিজেদের ব্যবসা-বাণিজ্যের উন্নতিসাধন কর্তে। মীরজাফর তাঁদের সাহায্যে “গদী” পেয়ে মনের আনন্দে “চণ্ডু” টানতে লাগলেন—আর প্রকৃত পক্ষে রাজত্ব কর্তে লাগলেন, এই স্বনামধন্য ইষ্ট ইণ্ডিয়া কোম্পানী নামধের বণিক সম্প্রদায়টা। মীরজাফরকে সিংহাসনে বসাবার সময় তাঁরা এইরূপ প্রতিজ্ঞা করিয়ে নিলেন যে, নবাব কোন কারণেই কোম্পানীর বাণিজ্য, কুটির সাহেব এবং গোমস্তাদের কাজকর্ম সম্বন্ধে কথানী পর্যন্ত কইবেন না, হস্তক্ষেপ করা তো দূরের কথা। শুধু তাই নয়, কোম্পানীর কোন লোকের উপর কেউ যদি কোনরূপ অত্যাচার করে, নবাব সে অত্যাচার হ’লে চিরদিন তাঁদের রক্ষা করবেন এবং তার প্রতিকারে স্বয়ং যত্নবান হবেন। নবাব তাতেই রাজী। বাস্—সেইদিন থেকে দেশের তাঁতিদের বা এ দেশের সকল শ্রেণীর শিল্পীদের ওপোর আত্মরিক অত্যাচার হ’তে শুরু হ’ল। সে কি যেমন-তেমন অত্যাচার? সে রকম পৈশাচিক অত্যাচারের কাহিনী এই পোড়়া বাংলাদেশ ছাড়া আর কোনো দেশের ইতিহাসে পাওয়া যায়নি। আর এক কথা। অত্যাচারটা যে এত গুরুতর রকমের হয়েছিল তার প্রধান কারণ, সে সময় ভদ্রবংশের বা বড় বংশের ইংরাজ ভারতবর্ষে আসতো না। আম্তো—যত নীচা-শয় অর্থলোলুপ ছোটলোক “বাপে-খেদানো মায়ে-তাড়ানো” হত-



ভাগ্যের দল, যারা নিজের দেশে খেতে প'র্ন্তে পেতেনা, যারা অর্থের জন্তে কোনো রকম পাপ কাজ ক'র্তে পশ্চাৎপদ হ'তনা। এ দেশে তখন এত ভালো ভালো সব তাঁতি ছিল—এমন উচ্চদের শিল্পী সব ছিল—যা' পৃথিবীর অন্ত কোন দেশে ছিলনা। এই সব তাঁতিদের সন্ধান করে এনে দিতেন গোমস্তারা,—যে চাকরী হরিরাম পেয়েছিলেন। কোম্পানীর সাহেব কর্মচারীরা সামান্য টাকা দান দিবে এই সমস্ত তাঁতিদের কাছ থেকে জোর করে এই হিসেবে মুচলেকা লিখিয়ে নিত,—অমুক সময়ের মধ্যে এত কাপড় বুনে দিতে হবে। কিন্তু দাম যা দিত—তা'তে বাস্তবিকই তাঁতিদের ভরসার ক্ষতিগ্রস্ত হ'তে হ'ত। বাজারে যে কাপড় বেচে একশো টাকা রোজগার ক'র্তে পারত, কোম্পানী দান দিবে জুলুন করে সেটা মাত্র পঞ্চাশ টাকার নিত। গোমস্তা বাবুরা এই সমস্ত নিরীহ তাঁতিদের সন্ধান করে এনে দেবার দক্ষণ কোম্পানীর কাছ রীতিমত দস্তুরি পেতেন এবং যদি কোনো তাঁতি মুচলেকা-মত অথবা চুক্তির হিসাবে যথা-সময়ে কাপড় বুনে দিতে না পারত, তাহ'লে কোম্পানীর দিপাই শাস্তি সঙ্গে নিয়ে গিয়ে এই সব গোমস্তারা সেই হতভাগা তাঁতিদের ঘরবাড়া লুট করে তার বেশী ভাগটা নিজেরা অবহেলে গ্রহণ করে “উপারি রোজগার” ক'র্তেন! যে সব তাঁতিদের দান দিবে মুচলেকা লিখিয়ে নেওয়া হ'ত, তা'রা অপর কোনো বণিকদের কাপড় বেচতে পারেনা,—মুচলেকার ভিতর এই সর্ভটাই ছিল প্রধান। সে সময় কাশিমবাজারে ইংরাজ ছাড়া ফরাসী (French,) ওলন্দাজ (Dutch,) আরমেনিয়ানদেরও বেশের কুঠি ছিল। তাঁতিরা

এদের কাছে কাপড় বেচে বিলক্ষণ ছ'পয়সা রোজগার ক'র্তে সক্ষম হ'ত। কিন্তু কোম্পানীকে মুচ্লেখা লিখে দিয়ে দান নিয়ে— তাদের লাভের পথ একেবারে বন্ধ হয়ে গেল। কোম্পানীর গোমস্তা বাবুরা নিরীহ তাঁতীদের কাছ থেকে “উপরি রোজগারের” অতিপ্রায়ে সময় সময় তাঁদের নামে মিথ্যা অভিযোগ ক'র্তে যে,—তা'রা গোপনে ফরাসী বা অন্যান্য বণিকদের বস্ত্র বিক্রয় করেছে। কোম্পানীর সাহেবরা অভিযোগ শুনেই নে সঙ্কে সত্যাসত্য অনুসন্ধান না করেই তৎক্ষণাৎ তাঁতীদের প্রতি গুরুতর দণ্ডের বিধান ক'র্তেন। প্রাণের দ্বায়ে তাঁতীরা এই সব গোমস্তা বাবুদের তুষ্টি রাখবার আশায় মাঝে মাঝে তাঁদের জন্মে মোটা রকম “ঘুষের” বন্দোবস্ত ক'র্তে।

এই গোমস্তাগিরীর কাজে হরিরামের অল্পদিনেই বিস্তর টাকা রোজগার হ'য়ে পোড়লো। হরিরাম সাহেবকে সুপারিশ ধরে এর চেয়ে আরও একটা লাভজনক কর্মে নিযুক্ত হয়ে, কাশিমবাজার পরিত্যাগ ক'লেন। সাহেব মেমসাহেবের বিশেষ সুপারিশে হরিরামকে নিম্কির দারোগার পদে নিযুক্ত ক'লেন অর্থাৎ “নির্দিষ্টবাদে কোম্পানীর লবণের একচেটে কারবার চলছে কিনা” সেই বিষয়ে তদারক ক'র্ষার ভার দিলেন।

ইষ্ট ইণ্ডিয়া কোম্পানীর লবণের বাণিজ্যসঙ্কে এইখানে গোটা-কতক কথা বলার বিশেষ প্রয়োজন। নবাব মীরকাসিমকে সিংহাসনচ্যুত করে মীরজাফর যখন দ্বিতীয়বার বাংলার গদীতে ব'সলেন—তখন বড়লাট ক্লাইব সাহেব এবং ক'লকাতার কোম্পিলের মেসাররা এ দেশে একটা স্বতন্ত্র বণিকসভা স্থাপন ক'লেন,—তার নাম হ'ল ট্রেডিং এসো-

সিয়েশান্। এটা স্থাপন করবার একটা উদ্দেশ্য ছিল। ইষ্ট ইণ্ডিয়া কোম্পানীর ডিরেক্টাররা বিলেত থেকে দ্বিতীয়বার ক্লাইভকে ভারতবর্ষে পাঠাবার সময় বিশেষ করে বলে দিলেন,—“বাও দাদা,—বাংলাদেশে গিয়ে লবণ, তামাক, সুপারি এই তিনটে তুচ্ছ জিনিষের ব্যবসা ফেঁদে কোম্পানীর যা’তে দু’চার পয়সা রোজগার হয়—তাই কর’গে ; কিন্তু দেখো ভাই—যেন নবাবের কোনো দিকে ক্ষতি না হয় অথবা সেখানকার দেশীয় ব্যবসাদার বা প্রজাদের কোন রকম অসুবিধা বা অনিষ্ট না হয় !” ক্লাইভ মহাশয় লম্বা জিব কেটে ব’ল্লেন—“আরে বাপরে ! তা কি পারি ? আমরা ব্যবসা ক’র্তে যাচ্ছি, পয়সা রোজগার ক’র্তে যাচ্ছি, সকল দিক বাঁচিয়ে কোম্পানীর যা’তে দুটো পয়সা ধর্ম্যভাবে সহুপায়ে রোজগার হয় তাই ক’র্ক ! সেখানকার প্রজারাই হ’ল আমাদের লক্ষ্মী। সেখানকার নবাব আমাদের মাথার মণি ! তাদের যা’তে সব দিকে ভাল হয় সেইটেই আগে আমাদের ক’র্তে হবে ? নইলে ধর্ম্য থাকবে কেন ?” সেখানে লর্ড ক্লাইভ মহাশয় যা ব’লে এলেন. এখানে এসে তাঁর কার্যকলাপে আমাদের ছরদৃষ্টক্রমে সে সবই “উল্টা-বুঝ্‌লি-রাম” হয়ে গেল। কথায় বলে “ইংরেজের চালের” ( British policyর ) কাছে ভগবান পর্যন্ত “বান্‌চাল” হয়ে যান। সোজামুজি ইষ্ট ইণ্ডিয়া কোম্পানী থেকে ঐ লবণ, তামাক, সুপারির ব্যবসাটা একচেটে হবার যখন দোঙ্গরা রাস্তা নেই, তখন এই ধূর্ত বণিকসম্প্রদায় বেনামিতে এই কটা অত্যাণ্ডকীয় জিনিষের ব্যবসা চালাবার জন্তে ঐ ট্রেডিং এশোসিয়েশান ( Trading Association ) খুলে বোসলো এবং কোম্পানীর সমস্ত ইংরেজ কর্ম-চারীরা তার সভ্য হয়ে পড়লেন। এই উপায়ে ক্লাইভ সাহেব “সত্য শ্রায় ধর্ম্য” তিনটীর মর্যাদা রক্ষা ক’ল্লেন।

সঙ্গে সঙ্গে এসোসিয়েশনের একটা কড়া আইন পাশ হোলো যে এদেশে যত লবণ, তামাক আর সুপারি উৎপন্ন হবে, সে সবের মালিকেরা একটা নির্দিষ্ট দামে তাদের সমস্ত মাল এই বণিকসভায় (Trading Association) বেচবেন। এরাই অর্থাৎ এই এসোসিয়েশান্ই সেই সব মাল এ দেশের ব্যবসাদারদের বেচবেন। এসোসিয়েশানের কাছ থেকে নগদ টাকা দিয়ে মাল কিনে এ দেশের ব্যবসাদাররা স্বচ্ছন্দে নিজেদের ব্যবসা চালাবেন অর্থাৎ এই দেশের লোকদের বেচবেন, তা'তে এসোসিয়েশানের কোনো আপত্তি নেই। কিন্তু দেশী ব্যবসাদাররা দেশীয় লোকদের কাছ থেকে এ সব মাল অর্থাৎ এই লবণ, তামাক, সুপারি কিছুতেই নিজেরা সোজাসুজি (direct) "গস্ত" ক'র্তে পারেন না। দায় সম্বন্ধে নিয়ম হ'ল,—এদেশের লোক দ্বারা লবণ তৈরী করে, তাদের কাছ থেকে এসোসিয়েশান মাত্র ৭৫ টাকায় একশো মণ লবণ কিনবেন। সেই লবণ ৭৫ টাকায় কিনে—এসোসিয়েশান দয়া করে (অতি সামান্য লাভে) মাত্র ৫০০ টাকায় একশো মণ এদেশীয় ব্যবসাদারদের বিক্রয় ক'র্ষেন। এদেশের ব্যবসাদাররা এসোসিয়েশানের কাছ থেকে পাঁচ টাকায় প্রতি মণ লবণ কিনে, তার ওপর নিজেদের রীতিমত লাভ চড়িয়ে দেশের লোককে মনের সুখে বেচতে থাকুক। ব্যস্ত, তা'হ'লেই কে কত মস্তায় মুগু খাবে খাও!

এদেশের লোকের কত সুবিধা হ'ল আর ব্যবসারও উন্নতি হ'ল বুঝুন দিকি। দেশী লোকের তৈরী "নুন" সোজাসুজি (direct) দেশীয় লোকের কাছ থেকে কিনলে, বড় জোর নুনের বাজার-দর হ'ত পাঁচ-সিকে! কিন্তু কোম্পানী ব্যবসাদারী বুদ্ধি খরচ করেছিলেন বলেই

দেশের লোকেরা নিজের হাতে নূণ তৈরী করে সেই নূণই নিজেরা ৫৭ টাকা মণে কিনছেন, আর ৭১০ টাকায় বেচছেন। ক্,—এখন আইন যখন হ'ল, তখন বে-আইনি কাজ ক'লেই শাস্তি পেতে হবে! সুতরাং কোথাও কেউ নিজেদের আহারের জন্তে লুকিয়ে নূণ তৈরী ক'চ্ছে কিনা, কিম্বা নূণ তৈরী করে গোপনে আপনা-আপনির ভেতর ব্যবসা চালাচ্ছে কিনা, আইনের মর্যাদা রক্ষা ক'র্তে হ'লে এ সব রীতিমত তদারক করা নিশ্চয়ই দরকার। নইলে, আইন করা না-করা দুই-ই সমান। কাজেই সেই সঙ্গে “নিমকির দারোগা” নামধের এক শ্রেণী জীবের অভ্যুদয় হ'ল। এই নিমকির দারোগাগিরির কাজে কি ভাবে জলের মত টাকা “উপরি রোজগার” স্বভাবতঃ হ'তে পারে—সে কথা যদি ক'কেও বুঝিয়ে ব'লতে হয় তা'হলে তাঁর বনগমনই শ্রেয়ঃ।

একজনকে মেরে আর একজন বাঁচে। একজনকে পথে বসিয়ে সর্বস্বান্ত করে আর একজন বড়লোক হয়। একজনকে ছোট করে আর একজন বড় হয়। সংসারের এই নিয়ম বরাবর চলে আসছে, সেই জন্তে চ'লতি কথায় বলে “কেউ মরে কেউ হরি-হরি করে।” “কারুর সর্বনাশ কারুর পৌষ মাস।” পলাশী যুদ্ধের পর ইষ্ট ইণ্ডিয়া কোম্পানীর এদেশে প্রভুত্বের প্রারম্ভে তাদের রেশমের কুঠিতে বা লবণের গোলায় কাজ করে বাংলা দেশে হরিরামের মত অনেকেই এমন ধনবান হয়েছিলেন, যার জোরে এখনও তাঁদের পৌত্র-প্রপৌত্রেরা আভিজাত্য-গৌরবে গৌরবান্বিত হয়ে বুক ফুলিয়ে “বনেদি” বড় বংশের ( Aristocrat family ) ছেলে বলে

পরিচয় দিয়ে থাকেন। কিন্তু তাঁরা যদি তাঁদের আভিজাত্যের সূত্রপাত কোথায়, নিজেদের বংশ-ইতিহাসের বাঁ দিকের কয়েকপৃষ্ঠা বেশী করে উল্টে দেখেন, তাহলে বেশ স্পষ্ট বুঝতে পারেন যে, এই বাংলার শিল্পী, বাংলার চাষী, বাংলার ব্যবসাদার এবং সকল রকম শ্রমোপজীবীদের দেহের রক্ত দিয়েই তাঁদের “বনেদি” বংশের “বনেদি” তৈরী হয়েছে। তা হোক—মা কমলা চিরদিনই চঞ্চলা। একজন একজনকে মেরে যেমন বড়লোক হয়েছে, আবার একদিন তা’কে মেরে আবার একজন বড়লোক হবে। এই ভাব বরাবর চ’লতে থাকবে, তার জন্তে দুঃখ নেই। কিন্তু এই বাংলা দেশের যে শিল্প, যে বাণিজ্য, যে সমস্ত সূক্ষ্ম কারুকার্য কয়েক জন বা কয়েক ঘর বনেদি লোকের বনেদি খাড়া করবার জন্যে বিনাশপ্রাপ্ত হয়েছে, তা আবার কখনো ফিরে পাওয়া যাবে না। এই জন্তে পাশ্চাত্য কবি গোল্ড স্মিথ বলেছিলেন,—

“Princes, Lords may flourish,  
or may fade,  
A breath can make them,  
as a breath has made,  
But a bold peasantry  
their country’s pride,  
When once destroyed,  
can ne’er be supplied.”

করুণানন্দ বোল্টন্ সাহেবের রূপায় হরিরাম এই “নিম্‌কির দারোগাগিরি” কার্যটি লাভ ক’লেন। এই কার্যভার বছর কয়েক বহন করবার পর—নানাদেশে ঘুরে ফিরে তাঁর স্বাস্থ্যভঙ্গ হয়। তিনি লোক-দেখানো নামমাত্র একটা পেনশান্ নিয়ে অবসর গ্রহণ

করে—ক'ল্কেতার বাহুড়বাগানে নবনির্মিত অট্টালিকায় এসে চেপে ব'সলেন।

হরিরাম তখন রীতিমত বড়লোক। শুধু বড়লোক নন—তিনি একজন সমাজপতি। তখন ক'ল্কেতার সহরে ক'টা লোকই বা বাস কর্ত্ত! তখন “হুতোমুটী—গোবিন্দপুর” বকেয়া নামের পরিবর্তে সবেমাত্র “ক'ল্কেতা” নামটা বঙ্গদেশে জাহীর হয়েছে। ঐ যে আজ গড়ের মাঠ দেখছেন,—যেখানে মোহনবাগানের মাচ্ হ'লেই পাঁচ সাত লক্ষ লোক বেলা এগারোটা থেকে সন্ধ্যা পর্যন্ত জমায়েৎ হয়,— একশো বছর আগে ওখানে একটা রীতিমত জঙ্গল ছিল! রাত্রিবেলা তো দূরের কথা,—দিনের বেলা ওর ধার দিয়ে লোকের চলাচল ক'র্ত্তে ভরসা হ'তনা! ঐ যে মনমজানো ইডেন গার্ডেন, আজ যার শোভা দেখে মনে হয়—কোথায় লাগে স্বর্গের নদনকানন,—যেখানে সূর্য্যদেখ পশ্চিম দিকে চলে প'ড়তে না প'ড়তেই—বুক গোলা—হাঁটু পর্যন্ত তোলা কিশোরী যুবতী প্রোচা খেতাজিনীরা প্রায়-নগ্ন সৌন্দর্য্য ছেলেদের যুবাদের দূরে থাকু—বুড়োদের পর্যন্ত মাথা ঘুরিয়ে দিয়ে রকমারি চুৎ যুরে ফিরে (যেন নেচে নেচে) বিহার ক'রেন,—ঐ ইডেন গার্ডেনের হু'নটী তখন গঙ্গাগর্ভে ছিল। ঐ চোরঙ্গীতে সে সময় কারুর আস্তে হ'লে,—পালকি-বেহারাদের চারগুণো ভাড়া কব্লাতে হ'ত। চোর ডাকাতের ভয়ে তখন সন্ধ্যা না হ'তে হ'তেই ক'ল্কেতাবাসীরা বাড়ীতে “দোরতাড়া” বন্ধ করে শয্যাশ্রয় গ্রহণ কর্ত্ত। যাকু—সে সব পুরোণো ইতিহাস।

হরিরাম তখন ক'ল্কেতার “পয়সা-ওলা” বাবু। জমিদারী কেনার বিশেষ পক্ষপাতী তিনি ছিলেন না। তিনি বুঝতেন নগদ

টাকা,—যেটা তাঁর অপৰ্যাপ্ত হয়েছিল। নিজের প্রাসাদতুল্য বাড়ী ছাড়া—এই সহরে বিস্তর কোঠা বাড়ী নির্মাণ করিয়ে ভাড়া দিয়েছিলেন, অনেক জায়গা-জমিও কিনে রেখেছিলেন। বাহুড়বাগানে নিজের বাড়ীর সামনে একটা প্রকাণ্ড মাঠ খুব সম্ভাব্যে তাঁর আয়ত্রে এসে পড়েছিল। সেটোতে বহুকাল পর্যন্ত “বস্তি” ছিল—অনেক টাকা খাজনা-বাবদে সেখান থেকে আদায় হ’ত।

মা লক্ষ্মীর সঙ্গে সঙ্গে তাঁর “বয়সাত্মীর দল” আসেন,—কথাটা পুরোণো হ’লেও সত্য কথা। হরিরামের লক্ষ্মীনাভের সঙ্গে সঙ্গে অনেক আত্মীয়লাভও হ’ল। হরিরামের বাড়ীতে বারো মাসে তেরো পার্বণ তো হ’তই, তা ছাড়া,—তিনি বাৎসরিক পিতৃশ্রাদ্ধ—মাতৃশ্রাদ্ধ—স্ত্রীর “জলসংক্রান্তি” ব্রত ইত্যাদি নানা কার্য্য উৎসর্গ করে বিস্তর লোক খাওয়াতেন। শুনেছি,—দূর সম্পর্কের তাঁর এক মামী-মা (যিনি হরিরামের সংসারে “গিন্নী মামী”-রূপে আবিপত্য লাভ করেছিলেন) পরলোকগমন কলে হরিরাম তাঁর শ্রাদ্ধে “গঙ্গাজলা” শালের ছোড়া বিতরণ করে কাঙ্গালীবিদায়-রূপ তরুহ কার্য্য সুশৃঙ্খলে সম্পন্ন করেছিলেন। সত্য মিথ্যা জানিনা—এইরূপ প্রবাদ বরাবর শুনে এসেছি। মোট কথা এইটে বেশ স্পষ্ট বোঝা যাচ্ছে,—হরিরাম বাবু অগাধ টাকার মালিক হয়েছিলেন।

হরিরামের সাতটা কন্যার পর একটীমাত্র পুত্র হয়েছিল,—তিনি আমার পূজ্যপাদ পিতামহ স্বর্গীয় রামচন্দ্র বন্দোপাধ্যায় মহাশয়। হরিরাম দরিদ্রের সম্ভান ছিলেন—কিন্তু তাঁর পুত্র রীতিমত “বড়লোকের ছেলে”। তাঁর মহড়া নেয় কে ?



## ষষ্ঠ পরিচ্ছেদ ।

সেকালে বড়মানুষের ছেলে হ'লে যেমন চালে চ'লতে হয়, বিশেষ যদি তিনি “সবে-ধন-নীলমণি” হন,—ঠাকুরদাদা ঠিক তেমনি চালেই বরাবর চ'লতেন । গাড়ী—ঘোড়া—পাল্‌কী না হ'লে এক পাও কোথাও যেতেন না । চেহারাটি যে একবারে নব-কার্তিক ছিল—তার বড়ো বয়েসের চেহারা দেখে আঁচ করে নিয়েছিলুম । বাবুরি ছাঁটা চুল, গলাপাট্টা (সৌখীনবাবু-উপযোগী),—হাতে হীরের আংলী, সোণার তাগা, রফাকবচ ( বাজু ), গলায় সোনার চেন্ ইত্যাদি সুশোভিত পিতামহ স্বর্গীয় রামচন্দ্র বন্দ্যোপাধ্যায় মহাশয়ের যৌবনের চেহারা ( যা' এখনও আমাদের বাড়ীতে একখানা অয়েল-পেইন্টিং ছবিতে দেখতে পাই ) একটা দেখবার জিনিষ বটে ! সত্যিই তিনি সুপুরুষ ছিলেন । ধনকুবের হরিরাম বাবু একমাত্র পুত্রকে যেরূপ আদর দিয়ে মাথায় তুলেছিলেন, শুনতে পাই, সেরূপ আদর নবাব আলিবর্দি খাঁ আদরের

দৌহিত্র সিরাজ উদৌলাকে দিয়েছিলেন কিনা সন্দেহ ! সেই আদরের ফলে, ঠাকুন্দা হেন অপকর্ম নেই যা' করেননি ! দাঙ্গা-হাঙ্গামা—মামলা-মকদ্দমা—নিরীহের প্রতি অত্যাচার তিনি অবাধে ক'র্তেন,—এবং এই সবে “তাল সামলাতে” পুত্রবৎসল হরিরামকে যে কত অর্থ ব্যয় ক'র্তে হয়েছে—তা আর বলবার কথা নয় । মদ, বেগুণা, জুয়া, বাগানপাটি (ইয়ার-বন্ধু-বাউজী-সমেত),—এসবে রামচন্দ্র একবারে (যাকে বলে) “তক্ষক” ছিলেন । “আকাশের টাঁদ” ধর্বার বায়না কখনো নিয়েছিলেন কিনা শুনিনি ; কিন্তু,—পুত্রের “উত্তট” রকমের কোনো আবদার পূর্ণ ক'র্তে হরিরাম কখনো তিলমাত্র কৃপণতা করেননি ! রামচন্দ্র পিতার প্রশ্নে এতদূর “গরম-মেছাজী” হয়েছিলেন যে—আত্মীয়স্বজন তো দূরের কথা, পাড়াপ্রতিবেশী কেউ তাঁর সঙ্গে বাক্যালাপ ক'র্তে সাহস ক'র্তেনা । কি জানি,—কখন কা'কে কি অপমান করে ব'সবেন ! স্বয়ং হরিরাম নিজপুত্রের কাছে ভয়ে ভয়ে থাকতেন ।

হরিরাম পুত্রের কঠোরতার প্রশ্ন দিলেও নিজে কিন্তু ততটা নিশ্চম ছিলেন না । দরিদ্র হরিরাম যৌবনে কঠোরতা-নিশ্চমতার মুখোন্ প'রে অর্থোপার্জন করেছিলেন সত্য । সে সময় কঠোর নিশ্চম দয়াদাক্ষিণশূণ্য না হ'লে কখনও এতটা ধনসম্পত্তির তিনি মালিক হ'তে পারতেন না । কিন্তু—ধনধান হবার পর অর্থাৎ অবসর নিয়ে যখন তিনি ঘরদংসার ক'র্তে ব'সলেন, তখন সত্যিই তাঁর আচরণ দেবতুল্য হয়েছিল । তিনি বহু অনাথ দরিদ্র গৃহস্থ পরিবারকে যথেষ্ট অর্থ সাহায্য ক'র্তেন ; কল্যানায়ত্ত বিপন্ন ব্যক্তিদের দায়োদ্ধার ক'র্তেন,—অনেক আত্মীয়স্বজনের মাসোয়ারার বন্দোবস্ত করে দিয়েছিলেন ।

দূরসম্পর্কীয় সহায়গীন যে কেউ তাঁর আশ্রয়প্রার্থী হ'ত, তিনি নিজগৃহে তা'কে আশ্রয় দিয়ে প্রতিপালন ক'র্ভেন। শুন্তে পাই,—তাঁর পল্লীতে ডাকনাম ছিল “রাজা বাবু”। যাই হোক,—মোট কথা,—মনটা তাঁর যথার্থই উদার ছিল। বোধ হয় তিনি ভাব'তেন,—“অনেক পাপ করে অর্থ উপার্জন করেছি,—সে অর্থের যতটা সম্ভব আমি সৎব্যবহার করি।” পিতামহের অর্থাৎ রামচন্দ্রের বৈঠকখানায় সন্ধ্যার পর রীতিমত আড্ডা জ'মতো! সে আড্ডায় মাঝে মাঝে বড়মানুষ হয়তো দু'দশ জন “চালের ওপোর” আসা-যাওয়া আমোদ-প্রমোদ ক'র্ভেন,—কিন্তু রীতিমত আড্ডা জমিয়ে রাখতো—গৃহস্থ দ্বিধ্ব হতভাগ্যের দল,—যাদের চলিত কথায় বলে “মোসায়েব!” তা'রা দু'চার ঢোক মদের প্রত্যাশায়—কখনো বা বাবুর মর্জ্জিক্রমে ভালমন্দ খাবার লালসায়—সন্ধ্যা থেকে যতক্ষণ না বাবু নিজের খেয়ালমত বৈঠকখানা ত্যাগ করে অন্তরমহলে গমন ক'র্ভেন—ততক্ষণ পর্য্যন্ত পাঁচ রকমে বাবুর মনকে উৎফুল্ল রাখবার জন্তে যত্নবান হ'ত। হরিরাম এই সব হতভাগাদের রকম-সকম দেখতেন আর কিছুতেই ভেবে ঠিক ক'র্ভে পারতেন না যে, এরা কি স্বার্থে প্রত্যহ এতটা কষ্টস্বীকার করে তাঁর পুত্রের মোসায়েবী করে! ভিতরে ভিতরে খবর নিয়ে জানলেন,—পুত্র রামচন্দ্র কা'কেও নগদ এক পয়সা দিয়ে সাহায্য করেনা। একদিন তিনি পুত্রকে নিভূতে ডাকিয়ে জিজ্ঞাসা ক'লেন—“বাবু—এই যে প্রত্যহ রাত্রে দেখি—দশ পনেরো জন অতি গরীব অথচ ভদ্রলোকের ছেলে সন্ধ্যা থেকে রাত্রি বারোটা পর্য্যন্ত তোমার সঙ্গে ব'সে আমোদ করে, আর তুমি বাড়ীর ভেতর চলে গেলে তবে তা'রা যে যার বাড়ী যায়,—এদের কি তুমি মাসিক কিছু দাও এর জন্তে?”

রুম্বুস্বরে রামচন্দ্র ব'ল্লেন—“ওরা নিজেরা আসে—নিজেদের ইচ্ছে-মত বৈঠকখানায় বসে—গানবাজনা করে,—নিজেদের ইচ্ছেমত চলে যায় ; এর জন্তে আমি ওদের পয়সা দিতে গেলুম কেন ?”

হরিরাম পুত্রকে আর কোনো কথা ব'ল্লেন না । বাড়ীর সরকার লোকজনদের মারফতে খবর নিলেন,—এই সব ভদ্রলোকের ছেলের অবস্থা অত্যন্ত হীন ; এমন কি, কারো কারো বাড়িতে হাঁড়ি পর্যন্ত ছ'বেলা চড়েনা ! এদের পেটে অন্ন নেই—কিন্তু তবু বাবুর মনস্তপ্তির জন্তে বাবুর সঙ্গে কাঠহাসি হেসে এরা বৈঠকখানা গুলজার ক'র্তে আসে । হয়তো মনে মনে আশা,—বাবুর দ্বারা ভবিষ্যতে যদি কিছু হিলে হয় ; কিম্বা কোনো দায়ে বিপদে বাবু যদি দয়া করে কিছু সাহায্য করেন !

হরিরাম ঝানু লোক ! তিনি কিন্তু মনে মনে স্থির জানতেন,—এদের মধ্যে যদি কেউ মরেও যায়,—ধর্ম ভেবে রামচন্দ্র তার মুখের দিকে একবার ভুলেও চাইবেনা । রামচন্দ্র অকাতরে অর্থসাহায্য ক'র্তে পারেন তা'কে,—যে তাঁ'র কামানলে আর্জিত দেবার সহায়তা ক'র্বে—কিম্বা এমন কোনো একটা পাপ কাজ ক'র্তে অগ্রসর হবে—যে কাজে রামচন্দ্রের ষোলো আনা স্বার্থ আছে ! হরিরাম এই সকল হতভাগ্য জীবদের অর্থাৎ পুত্রের “মোসায়েবদের” জন্তে একটা মাসোহারা বন্দোবস্ত করে দিয়েছিলেন ।

তখনকার কালে বড়মানুষের ছেলের বতটুকু লেখাপড়া শেখা দরকার বা ভদ্রোচিত, রামচন্দ্র ঠিক ততটুকুই শিখেছিলেন । তা'ও বাড়ীতে পাঁচ ছয়টা মাষ্টারপণ্ডিত রেখে । তখন দেশের নবাব সিংহাসনেই বসুন বা “বেগীমাধবের ধ্বজার” মত উচ্চাসনে প্রতিষ্ঠিতই

থাকুন আর যত নবাবী চালই চালুন,—দেশের লোক বেশ বুঝে নিয়েছিল, “নবাবী আমল” শেষ হয়ে এইবার রীতিমত “কোম্পানীর মুল্লুকে” দাঁড়িয়েছে এবং ভবিষ্যতে এই বাংলা দেশের মালিক হবে এই স্বনা:সাধন ইষ্ট্ ইণ্ডিয়া কোম্পানী নামধারী চতুর বণিক-সম্প্রদায় । কাজেই, দেশের লোক “আলেফ—বে—পে—তে—সে” বকেয়া হুর্কোধ্য বিপজ্জনক ফার্সি পাঠ ছেড়ে—আই কাম্—( I como )—বাই কাম্ ( By como—অর্থাৎ become )-গোছ দু’দশটা “কলিযুগ-দেবভাষা” এই ইংরাজিতে মনোনিবেশ ক’লেন । এখনকার মত তখন অলিতে গলিতে স্কুল-কলেজ ব’লে কোনো পুণা-প্রতিষ্ঠানের নামও কেউ জানতো না । পূজনীয় মিশনারী মহোদয়গণ-সঙ্কলিত দু’একখানা ইংরাজি ডিক্‌সনারী বাজারে যা’ বিক্রি হ’ত,—তাই কিনে বাঙ্গালী ভদ্রলোকের ছেলেরা মুখস্থ ক’র্তে শুরু করে দিলে ! তাই পড়েই কাজ চালাবার মত এক-রকম বিত্তে আগার পুণ্যপাদ পিতামহ মহাশয় লাভ ক’লেন ; সুতরাং সে বিত্তে জাহির করবার জন্য হরিরাম বাবু পুত্রকে দুই একটা নামজাদা কোম্পানীর “হোসের” মুংসুদ্দি বা বেনিয়ান্ করে দিতে পথ পেলেন না ।

ইষ্ট্ ইণ্ডিয়া কোম্পানী “জাত সমুদ্দুর তেরো নদী” পার হয়ে এসে যখন বাংলা রাজ্যটা প্রায় দখল করে ফেলেন—তখন “শ্রীবিলেত” থেকে নবাব-দত্ত পরোয়ানার জোরে দলে দলে “এণ্ড কোং” রূপে রকমারি শ্বেত-সওদাগর-সম্প্রদায় এখানে বাণিজ্য করে এদেশের লোককে বড়-লোক করে দেবার জন্তে মাথায় টুপি আর গাঁটুরিতে কিছু মালপত্র নিয়ে শুভপদার্পণ ক’লেন । ইংরেজরা এদেশে বেচ’তে এলেন—“ছেলে-ভুলোনো” ঠুনুকে জিনিষ রকম রকম,—কিন্তে লাগলেন “গতর-ফোলানো”

ধান—পাট—তিসি—ভূষি—গম্ ! ব্যবসা-বাণিজ্য সেই থেকে এই দেশে এমন জোর সুরু হ'ল যে, পৃথিবীর চাঙ্গিকে একটা দস্তুরমত সোরগোল পড়ে গেল। পৃথিবীর যত সভ্যদেশ পাক্কা খবর পেয়ে গেল—সমুদ্রের পারে ভারতবর্ষ—বিশেষতঃ বাংলা দেশ ব'লে অসভ্য একটা জায়গা আছে—যেখানে সত্যিই গাছে গাছে সোণা ফলে ! টুপি মাথায় দিয়ে সাগর ডিঙ্গিয়ে যে কেউ সেখানে লাফিয়ে গিয়ে প'ড়তে পারবে—সেই অতি অল্পদিনে একেবারে ধন-কুবের হ'য়ে যাবে ! সুতরাং, লোকমুখে সংবাদ পাবামাত্রই দলে দলে “সফেদ” সওদাগর মশাইরা নানা রকম চক্চকে সওদাগরী মাল নিয়ে এসে হাজির হ'তে সুরু ক'লেন। এসেই এদেশের লোককে ব'ললেন—“তোমাদের ময়লা জিনিষ ( Raw material )-গুলো আমাদের দাও,—তোমরা নিয়ে কি ক'র্বে ? নষ্ট হ'চ্ছে বইতো না ! আমরা তোমাদের জন্তে দেখ দিকি—কেমন সব ভাল ভাল বাহারী শিশি-বোতলে ভরা রং-করা মন-মজানো প্যাকিং বাক্স এনেছি ! এন ভাই—আদান-প্রদান হোক—ব্যবসা-বাণিজ্য চলুক,—তোমরাও কেনো—আমরাও কিনি ! তোমরাও বেচো—আমরাও বেচি ! তোমাদের বড়লোক করে দিতে এবং অদস্তন চৌদ্দপুরুষের সুখদমুষ্টির বন্দোবস্ত ক'র্ত্তে আমরা বড় সাধে “হাল ধরে—পাল তুলে” ছুটে এসেছি।” এই সব ব'লে তো সওদাগর মশাই অর্থাৎ “এও কোং” প্রভুরা এদেশে ব্যবসা খুললেন,—যত রাজ্যের ফক্কিকারি মাল তো আনলেন,—কিন্তু এসব মাল কাটায় কে ? আর তাঁ'রাও যে এখানে মাল কিনবেন—এদেশের মহাজনেরাই বা কি বিশ্বাসে ধারে তাঁদের মাল ছাড়বে ? সম্বলের ভেতর ত টুপি আর বুট ! তখন

তো ব্যাক্ ব'লে কিছু ছিলনা,—যার দোহাই দিয়ে নির্বিবাদে উভয় পক্ষের “লেন-দেন” চ'লবে ! সুতরাং তাঁদের ব্যবসা চালাবার জন্তে তখন দাঁড়াতেন এদেশেরই একজন “পাট্টাওয়াল” ধনবান,—যিনি উভয় পক্ষেরই গ্যারান্টি হ'তেন এবং দরকার হ'লে সওদাগর মশাইদের ব্যবসা সুচারু-রূপে চালাবার জন্তে এইভাবে গ্যারান্টি হওয়ার দরুণ সময় সময় বিশ-পঞ্চাশ হাজার কখনো বা লাখো টাকা ঘর থেকে বার করে দিতেন । অবশ্য—এর জন্তে দস্তুরী পেতেন নিশ্চয়ই । এই সব গ্যারান্টি-হওয়া লোকেরাই ছিলেন সেকালের “মুৎসুদ্দি” বা “বেনিয়ান” । এঁরা যদি না থাকতেন—অর্থাৎ আমাদের দেশের লোকেরা যদি সে সময় মুৎসুদ্দি-রূপে ইংরাজ সওদাগরদের ব্যবসায় না দাঁড়াতেন,—তাহ'লে আজ ক্লাইভ দ্বীটে পিঁপড়ের সারির মত ছ'ধারে এত “এণ্ড কোং”র সারি দেখা যেতেনা—আর দলে দলে পোনে-মরা বাঙ্গালী কেরানীর দল তাড়াতাড়ি ছুঁতী ভাত পেটে পুরে “হস্ত-দস্ত” হয়ে ছুটে attendance Registryতে ( হাজুরে খাতায় ) সেই মারবার জন্তে প্রাণপাত ক'র্তে না । মুৎসুদ্দি মশাইরা তখন পরসা পেয়েছেন—সে বিষয়ে সন্দেহ নেই । কিন্তু তাঁ'রা ঘরের কড়ী বার করে বিদেশী বণিক মহাশয়দের যে ভাবে সাহায্য এবং উপকার তখনকার কালে করেছিলেন এবং সদাগর মশাইরা এর জন্তে যে পরিমাণ লাভ করেছেন, তার শতাংশের একাংশ পরিমাণ অর্থ উপার্জন বা লাভ মুৎসুদ্দি মশাইরা ক'র্তে পারেননি ! আর সেই সাহায্য এবং উপকারের বিনিময়ে ইংরাজ বণিকদের কাছে মুৎসুদ্দি মহাশয়দের পুত্রপ্রপৌত্রেরা কিরূপ সাহায্য, উপকার বা খাতির আজকাল পেয়ে থাকেন অথবা পাবার প্রত্যাশা ক'র্তে পারেন, তাঁ'রা

নিজেরাই একবার ভেবে দেখলে বুঝতে পারেন। সেই শ্রেণীর মুৎসুদ্দিবংশজাত কোনো এক ভদ্রসন্তান একবার তাঁর পূর্বপুরুষদের নাম নিয়ে কোনো অফিসে চাকরির জন্যে যাওয়াতে, সুসভ্য এবং ভদ্র (gentleman) “বড়সাহেব” মহাশয় বলেছিলেন—“কৃতজ্ঞ এবং উদার হ’লে ইংরাজজাতির ব্যবসা এদেশে কখনই চ’লতে পারেনা।” (A grateful merchant can never thrive in this country)। অথচ এই অফিসের যিনি প্রতিষ্ঠাতা বড়সাহেব, তিনি যদি এই চাকরি-প্রার্থী ভদ্রসন্তানের মুৎসুদ্দিরূপী পিতামহের নিকট রীতিমত আর্থিক সাহায্য না পেতেন, তা’হলে একদিন অল্প অফিস হ’তে বিতাড়িত হয়ে সহায়-সম্বলহীন কপর্দকশূণ্য বিপন্ন অবস্থায় তাঁকে জাহাজের মাণ্ডল ভিক্ষার দ্বারা সংগ্রহ করে সাগরপারে স্বঘরে প্রত্যাবর্তন ক’র্ত্তে হ’ত।

হরিরাম পুত্র রামচন্দ্রকে ইংরাজি ভাষায় বেশ “লায়েক” বুঝে বিষয় কন্মের লিপ্ত করবার জন্তে এই রকম চার পাঁচটা সওদাগর “এও কোং”-র হোসের মুৎসুদ্দি বা “বেনিয়ান” করে দিলেন। হরিরামের জ্ঞানহীনা পত্নী স্বর্গীয়া মহেশ্বরী দেবী স্বামীকে বললেন,—“হ্যাঁগা! ছেলেকে ঘরের পয়সা দিয়ে চাকরী ক’র্ত্তে পাঠাচ্ছ কেন? রামচন্দ্রকে একটা দোকান টোকান করে দিয়ে ব্যবসা ক’র্ত্তে শেখাও না!” একথা শুনে হরিরাম ক্রোধে জ্ঞানশূণ্য হয়ে পত্নীকে শুধু মাত্তে বাকী রেখেছিলেন। বাঙ্গালীর ছেলে ব্যবসা ক’র্ত্তে—এত বড় স্পর্ধার কথা পত্নী হয়ে স্বামীর সামনে উচ্চারণ করে? মহেশ্বরী দেবী যে অল্পে অল্পে নিস্তার পেয়েছিলেন, এতে স্পষ্ট বোঝা যাচ্ছে,—হরিরাম খুবই সংবমী—নিরীহ—পত্নীবৎসল



ছিলেন। নইলে—এখনকার কাল হ'লে হরিরাম পত্রকে নিশ্চয় “ডাইভোর্স” ক'তেন।

হরিরাম এখন ধনকুবের, সহরের নামজাদা “বড়লোক।” তাঁর আলালের ঘরের ছাগল—ননীর পুতুল রামচন্দ্র “দোকান” খুলে ব'সে— ছোটলোক ইতারের মত খদ্দেরকে জিনিষ বেচবে? লোকে ব'লবে—“বা তো—রামচন্দ্রের দোকান থেকে অমুক জিনিষটা কিনে নিয়ে আর তো।” বংশের(তথা) বনেদি বংশের মুখ উজ্জল না করে—বংশের “মুখে” চূণকালী দেবে?

আর মুৎসুদ্দিগিরি কি চাকরি? সে তো রীতিমত “নবাবী”! মাথায় “ঙ”-র মত করে “ফ্যাটা” বেঁধে, বিলিতি খান কাপড়খানা কুঁচিয়ে প'রে—হাঁটুর নীচে পর্য্যন্ত ধপ-ধপে সাদা চাপ্কান গায়ে চড়িয়ে, দড়ীর মত পাকানো লম্বা মলমলে চাদর পশ্চাদ্ভাগে কটিদেশ বেষ্টন করে সামনে বুকের ওপোর “ইন্-টু” (cross) ভাবে নিয়ে গিয়ে “স্কন্ধরূপ” ছটা আন্লার ওপোর দিয়ে পেছন দিকে ঝুলিয়ে সাদা ফুল মোজা জোড়া টেনে উরুত পর্য্যন্ত নিয়ে গিয়ে তা'তে শক্ত করে লাল-ফিতের “গাটার” বেঁধে তেল চুক্চুকে বাণিশ করা “সাইডস্প্রিং” জুতো চরণে শোভিত ক'রে বেলা বারোটোর সময় হাতবাক্সসমেত গাড়ীতে উঠে সমস্ত পথটা জোড়হাতে মনে মনে “ঠাকুর” বা “সাহেব” প্রণাম ক'ত্তে ক'ত্তে অফিসে পৌঁছবে এবং তাঁরই নিযুক্ত লোকজন কর্মচারীরা প্রণাম, নমস্কার, সেলাম ইত্যাদির দ্বারা খাতির করে “ছাতার” দ্বারা “মুৎসুদ্দির” মাথা রক্ষা করে চেয়ারে বসাবে। এ কি “চাকরি”—না—“লাটসাহেবী?” কাজের মধ্যে—“টুপিমাথায় হ্যাট-কোট-ধারী” সাহেব দেখলেই (তা

সে অফিসেরই হোক অথবা বাইরেরই হোক ) “আত্মনিমিত” সেলাম  
ঠোকা! খাটুণী সমস্ত দিনে কেবল এই কাজটিতে! প্রথম প্রথম  
একটু কষ্ট হয় বটে; বাড়ী গিয়ে দিনকতক কোমরে হাতে পিটে  
একটু মালিসের ব্যবস্থা ক’ত্তে হয়, তারপর কিছুকাল এ কার্যটা এমন  
অভ্যস্ত হয়ে যায় যে, চৈত্রমাসে জেলেপাড়ার সং দেখতে গিয়ে হ্যাট-  
কোট-পরা সাহেব-সাজা “সং” দেখেও ( automatically ) মুৎসুদ্দি  
বাবুদের সেলাম বেরিয়ে পড়ে!

পলাশী যুদ্ধের পর বাংলাদেশের লোকেরা বেশ স্পষ্ট বুঝে নিলে যে,  
সৃষ্টিকর্তা ইংরাজ জাতিকে বাঙ্গালীর মনিব এবং বাঙ্গালী জাতিকে  
ইংরেজের বা সাহেবের বা সাগরপার-নিবাসী হ্যাটকোটধারী সমস্ত  
শ্বেতাঙ্গজাতিরই চাকররূপে সৃষ্টি করে ধরাধামে পাঠিয়েছেন। এই  
সৃষ্টিতত্ত্বের যেদিন ব্যতিক্রম হবে—ভারতে সেই দিনই মহাপ্রলয়,—  
একথা শাস্ত্রে বড় বড় অক্ষরে লেখা আছে! শুধু তাই নয়! সর্ব-  
শাস্ত্ররচয়িতা সর্ববর্ণারাম্য ব্রাহ্মণজাতি এই পলাশী যুদ্ধের পর নবশাস্ত্র  
মুখে মুখে প্রচার করে দেশবাসীকে শিক্ষিত দীক্ষিত ক’ল্লেন,—কলিতে  
জাগ্রত দেবতা—সাহেব! তাঁদের ঘোড়শোপচারে পূজা, ভক্তিভরে  
প্রণাম, বন্দনা এবং শ্রীবুটশোভিত চরণসেবাই বাঙ্গালী এবং কিছুকাল  
পরে সমগ্র ভারতবাসীর ধর্ম-অর্থ-কাম-মোক্ষ লাভের একমাত্র উপায়।  
এই বলে ব্রাহ্মণই পথপ্রদর্শক হয়ে সবার আগে সাহেবের শ্রীচরণতলে  
সাষ্টাঙ্গে প্রণত হয়ে প’ড়লেন।

## সপ্তম পরিচ্ছেদ ।

মানুষ চিরদিন থাকেনা—এর চেয়ে সত্য কথা আর কিছুই নেই ! প্রায় ৯৩৯৪ বৎসর বয়সে স্বনামোদয়—“এক পুরুষে” বড়লোক বাহুড়াবাগানের বনেদি বংশের প্রতিষ্ঠাতা রায় শ্রীল শ্রীযুক্ত হরিরাম বাঁড়ুয্যে বাহাছর গঙ্গাতীরে পুত্রকন্যা, আত্মীয়স্বজন,—আশ্রিত প্রতিপালিত শক্রমিত্র প্রভৃতি-পরিবৃত অবস্থায় “তে-রাত্রি” গঙ্গাবাসের পর ( শুন্তে পাই ) অতি সজ্ঞানে দেহত্যাগ ক’লেন । এমন অবস্থায় এত বয়সে কারুর মৃত্যু হ’লে তাঁর স্ত্রীপুত্রপৌত্রাদি অতি আপনার জনেরা যথার্থ শোকাভিভূত হ’য়ে কাঁদে কিনা তা ব’লতে পারি না,—তবে কাঁদা উচিত বলেই আমার মনে হয় । কারণ, মাত্র ছ’ চারদিন এক সঙ্গে বসবাসের পর যদি কোনো আত্মবন্ধু জন্মের মত কোথাও চলে যায় এবং তা’র বিচ্ছেদে প্রাণ যদি কাতর হয়,— তা’হ’লে প্রায় শত বৎসর যে ইহসংসারে আত্মীয়স্বজনের মধ্যে

কালযাপন করেছে—তা'র সঙ্গে চিরবিচ্ছেদে প্রাণ খুব বেশী রকম কাঁদবেনাই বা কেন? যাহোক,—হরিরামের মৃত্যুতে অল্প কেউ কাঁদুন আর না কাঁদুন, তাঁর পত্নী মহেশ্বরী দেবী যে যথেষ্ট কেঁদেছিলেন,—সে সম্বন্ধে আমি হলপ ক'র্ত্তে প্রস্তুত আছি। আর কেঁদেছিলেন তাঁ'রা, যাঁদের হরিরাম নিজগৃহে স্থান দিয়ে অতি যত্নে প্রতিপালন ক'চ্ছিলেন। কারণ, সে হতভাগ্যেরা এবং হতভাগিনীরা হরিরামের পুত্র রামচন্দ্র বাবুর (অর্থাৎ আমার পিতামহ মহাশয়ের) কথাবার্তা, চালচলন, আচার-ব্যবহার, মেজাজ ইত্যাদি দেখে শুনে বেশ স্পষ্টই বুঝতে পেরেছিলেন যে, হরিরামের অবর্ত্তমানে “কর্ত্তা রামচন্দ্রের” আমলে সে “রামরাজত্ব” নিশ্চয়ই থাকবে না।

রায় শ্রীম শ্রীমুক্ত হরিরাম বন্দোপাধ্যায় বাহাদুরের শ্রাদ্ধশাস্তি কি ভাবে হয়েছিল, সে সম্বন্ধে বিস্তারিত বিবরণের কোনো প্রয়োজন নেই। পিতামহ সে বিষয়ে তিলমাত্র ক্লেশতা করেননি, সে কথা শুনেছি। অন্ততঃ “নাম কা-ওয়াস্তে” যথেষ্ট সমারোহ করেছিলেন,—পিতৃভক্তিতে না হোক। মহেশ্বরী দেবী স্বামীর সঙ্গে সহমরণে যাননি বটে, কিন্তু পাকা মাথার নিঁছর মুছে তিনি চার মাসের অধিক পৃথিবীতে অবস্থান করেননি। মহেশ্বরী দেবী যথার্থই ভাগ্য-বতী সতীলক্ষ্মা ছিলেন; তেমনটী আর বড় দেখা যায়না।

রামচন্দ্র বাবু এখন সংসারের কর্ত্তা। শুধু “কর্ত্তা” নন,—একেবারে সর্কে-সর্কা। মাথার ওপর যতদিন “বুড়ো বুড়ী” (অর্থাৎ বাপ মা) ছিলেন, ততদিন অনেক কার্য তিনি ইচ্ছা থাকলেও ভদ্রতা বা চকুলজ্জার খাতিরে ক'র্ত্তে পারেননি। এইবার “বাড়ুয্যে-সংসার—

রাজত্ব” তিনি “একচ্ছত্র মস্বাট”। বাড়ীশুদ্ধ সবাই তাঁর ভয়ে “জুজু।” আমার পিতাঠাকুর তাঁর জ্যেষ্ঠ পুত্র হ’লেও কখনো সাহস করে তাঁর পিতার (অর্থাৎ আমার পিতামহের) সন্মুখে যুগ তুলে কথা ব’লতে সাহস করেননি। পিতা আমার নিতান্তই ভালমানুষ ছিলেন। সংসারে তিনি কারও সঙ্গেই জোরে বা “রুখে” কথা কইতেন না, তা “দোদীপ্তপ্রতাপশালী” নিজের পূজ্যপাদ পিতাঠাকুর! ব’লে বিশ্বাস ক’রেন কিনা জানিনা,—আমি জীবনে একটীবার ছাড়া দ্বিতীয়বার কখনো তাঁকে রাগতে দেখিনি! এরও যথেষ্ট কারণ ছিল। অবিচার অত্যাচার তিনি এ পৃথিবীতে যথেষ্ট সহ্য করেছিলেন, তথাপি ঐ একদিন ছাড়া আর কখনো একটা চড়া কথা তাঁকে ব’লতে শুনিনি! যথাসময়ে সে নৈর্য্যচ্যুতির কারণ ব’লব।

পিতামহের চার পুত্র, তিন কন্যা। তার মধ্যে পিতাই ছিলেন জ্যেষ্ঠ। বড়মানুষের ছেলেরা যে চালে, যে ভাবে, যে মেজাজে, যে রকম আদব-কারদার সংসারে ঘোরে ফেরে, বসবাস করে,—আমার খুল্লতাত তিনজন ঠিক সেই রকম নিক্তির ওজনে বরঞ্চ তার চেয়ে বেশী চ’লতেন। বাবা কিন্তু ঠিক তার উল্টো! খুড়ো মশাইরা “ঘোর বাবু,”—কাপড়-চোপড়, তেড়ির বাহার দেখলে বেশ স্পষ্টই বোঝা যায়—তাঁরা বড়মানুষের ছেলে! বাবাকে দেখলে—বাবার সঙ্গে কথাবার্তা কইলে—সামান্য “গেরোস্তো” ছাড়া তাঁকে আর কিছু বোঝাতো না। খুড়োরা ছেলেবেলা থেকেই “ইয়ারকি”—“আমোদ প্রমোদ”—জুড়ী-হাঁকানো—বাগানপাটি করা ইত্যাদিতে সদাই মজা গুল থাকতেন। বাবা চব্বিশ ঘণ্টা বই নিয়ে তন্ময় হয়ে কাটাতেন, এমন কি বুড়ো

বয়েস পর্য্যন্ত ! এই জন্মে বোধ হয় বড়লোক ঠাকুদার বড় ছেলে ( অর্থাৎ আমার পিতা মহাশয় ) মোটেই তাঁর পিতার প্রিয়পাত্র হ'তে পারেননি ! ঠাকুদা ভালবাসতেন, আদর ক'ন্তেইন অপর তিন ছেলেকে, বিশেষতঃ কনিষ্ঠ পুত্র কনকচন্দ্রকে ! মেজকাকা গোপালচন্দ্র বড়মানুষের ছেলে হ'লেও এবং বড়মানুষী চালে থাকলেও লেখাপড়া কিছু শিখেছিলেন ; অর্থাৎ বার চারেক একজামিনে ফেল করে—চারজন মাষ্টার পণ্ডিত রেখে আচারনিদ্রা ভাগ করে দিনরাত প'ড়ে (Third Division) “থার্ড ডিভিসনে” এন্ট্রেন্স পাশ ক'ল্লেন । মেজকাকা কমলচন্দ্র জুড়ী চেণ্ডে, বাইশ টাকা জোড়া ইংরেজী জুতো পায়ে, দামী রেশমীপাড় ধুতী প'রে—সিল্কের চুড়াদার পাঞ্জাবী ( সোণার বোতাম আঁটা ),—সিল্কের চাদর গায়ে চড়িয়ে,—প্রত্যহ আধ ঘণ্টা চুল ফিরিয়ে,—পমেটম পাউডার এসেন্স মেখে স্কুলে গিয়ে জলখাবারের ঘরে বেহারার সঙ্গে বন্দোবস্ত করে রীতিমত তামাক টেনে,—কষ্টে সৃষ্টে থার্ড ক্লাশ পর্য্যন্ত ক্লাশে হাজীর দিবেছিলেন । কিন্তু ছোট কাকা কনকচন্দ্র লেখাপড়ায় একেবারে “বাচ্ছা-কালীদাস ;” বিদ্যে চোটে যে ডালে ব'সতেন সেই ডালটাই কাটতেন । তিনি তাঁর মেজদা-মেজদার মত নবাবী চালে স্কুলে যেতেন বটে ; কিন্তু লেখাপড়ার পরিবর্তে এমন সমস্ত বিদ্যে শিখেছিলেন, বার জন্মে স্কুলের কর্তৃপক্ষীয়েরা বড়মানুষের ছেলে বলে বথেষ্ট খাতীর ক'ল্লেও অগত্যা স্কুল-রেজিষ্ট্রি থেকে মাত্র বঠ শ্রেণীতে অধ্যয়নকালে তাঁর নামটা কেটে দিতে বাধ্য হয়েছিলেন ।

বাধা হ'য়েছিলেন “দৈত্যকুলে প্রহ্লাদ ।” পিতামহ লেখাপড়ার কদর

মোটাই বুঝতেন না। বড়মানুষের ছেলে লেখাপড়া শিখে দেহনষ্ট ক'র্বে কি? সাহেবের সঙ্গে “yes—no—very well”-গোছ ছ'দশটা কথা কয়ে তাদের কথা বুঝিয়ে নিজের কাজ চালাতে পাল্লেই লেখাপড়ার চরম হ'ল। দিনরাত বই প'ড়ে পরিশ্রম করে বড়মানুষের ছেলের শরীর নষ্ট ক'র্বার আবশ্যকতাই বা কি? পিতামহের ইচ্ছা ছিল, কোনো গতিকে এন্ট্রেন্স পর্যন্ত প'ড়ে লেখাপড়া শেষ করে “বিয়ে-থা” হবার পর—বাবা তাঁর সঙ্গে মুংসুদির পোষাকে স্পনোভিত হয়ে একটা “হোসের” কাষে যোগদান করেন। বাবা কিন্তু কিছুতেই তাতে সম্মত হ'লেন না। কারণ, বাল্যকাল থেকেই লেখাপড়ায় তাঁর বিশেষ ঝোঁক, তার ওপর এন্ট্রেন্সে তিনি দশ টাকা জলপানি (scholarship) পেতেই সে ঝোঁক তাঁর খুবই প্রবল হ'য়ে উঠলো! পিতামহী অন্যান্য ছেলেমেয়েদের চেয়ে বাবাকে বেশী ভালবাসতেন। তিনি পিতামহের সঙ্গে দ্বীতিমত ঝগড়া বিবাদ করে বাবাকে লেখাপড়া ক'র্তে উৎসাহ দিতে আরম্ভ ক'লেন। ফলে, বাবা “এলে” একুঞ্জামিনে ইউনিভারসিটিতে তৃতীয় স্থান লাভ ক'লেন এবং যথাসময়ে বি-এ, এম্-এ, বি-এল পরীক্ষায় সম্মানের সহিত উত্তীর্ণ হ'লেন। কাজেই, বাবা চিরদিনই ঠাকুদার অপ্রিয় ছিলেন। রামচন্দ্র বাবু লোকের কাছে রাগ ও দুঃখ প্রকাশ করে প্রায়ই ব'লতেন, “যে ছেলে বাপের অবাধ্য, সে কি আবার ছেলে? তার লেখাপড়ার মুখে আঙুল।”

মোমায়েরা একযোগে সায় দিয়ে ব'লতেন “বটে তো!” পিতামহ ছনিয়াশুদ্ধ লোকের অর্থাৎ আত্মীয়স্বজনদের ওপর আধিপত্য

ক'ত্তে'ন, সকলকেই তিনি বশে আন্তে সমর্থ হয়েছিলেন,—পায়ে'ননি কেবল আমার পিতামহীকে ! পিতামহী দুর্গাসুন্দরী খুব ধনবানের কন্যা না হ'লেও, যথার্থই অপরূপ সুন্দরী ছিলেন । ধনকুবের হরিরাম চার পাঁচ বছর ধরে নানাস্থানে সন্ধান করে শেষে বেলকুঠি গ্রামে এক গৃহস্থের ভুবনমোহিনী কন্যার সঙ্গে কপর্দকমাত্র পণ গ্রহণ না করে পুত্রের বিবাহ দিয়েছিলেন । সেকালে মেয়েদের লেখাপড়ার “রেওয়াজ” ছিলনা । সুতরাং পিতামহী একেবারে নিরক্ষরা হ'লেও সাংসারিক বিষয়ে অদ্বিতীয়া বুদ্ধিমতী ছিলেন । সেইজন্যে পিতামহ সকলের সঙ্গে যথেষ্টাচার ক'লেও পত্নীকে পেরে ওঠেননি ! পিতামহীর স্বামী-ভক্তি যথেষ্ট ছিল, কিন্তু তা ব'লে তিনি স্বামীর “দাসী বাঁদী” হয়ে আত্মপালন ক'ত্তে' মোটেই প্রস্তুত ছিলেন না । সেই জগেই ব'লছি, পিতামহের বেরূপ বুদ্ধিশুদ্ধি এবং কড়া মেজাজ ছিল, ঠাকু'মা বিশেষ রকম গুণবতী এবং বুদ্ধিমতী না হ'লে, সব দিকে সামঞ্জস্য বজায় রেখে সংসার চালাবার এবং সংসারে চলবার শক্তি তাঁর না থাকলে, যত রূপসা বা সৌন্দর্যশালিনী তিনি হোন্ এবং কঠিনহৃদয় ঠাকুর্দা মহাশয় যতই তাঁর রূপে মুগ্ধ থাকুন্ না কেন, ঠাকু'মা কোনমতেই এ সংসারে প্রতিষ্ঠা বা প্রতিপত্তি লাভে সক্ষম হ'তেন না ! মোট কথা, ঠাকুর্দা জন্ম ছিলেন শুধু ঠাকু'নার কাছে ।

বাবা ছিলেন ঠাকু'নার নয়নের মণি ! শুধু বড় ছেলে ব'লে নয়, বাবার শান্ত প্রকৃতি, আদর্শ মাতৃভক্তি, বিঘাবুদ্ধির গুণে ঠাকু'মা বাবাকে অতটা ভালবাসতেন । সত্য কথা ব'লতে কি, আমার বাল্যকালে বাবাকে ঠাকুরদেবতা প্রণাম ক'ত্তে' বড় দেখিনি ! মনে মনে তিনি ঠাকুর-



দেবতাকে ভক্তি ক'ত্তে'ন কিনা, বাহ্যিক আচরণে তার কিছুই বোঝা যেত'না! কিন্তু জগতে গভ'ধারিণী মা ছিলেন তাঁর সাক্ষাৎ মূর্তি-মতী দেবতা। মার আদেশ তিনি ঈশ্বরের আদেশ অপেক্ষাও বড় মনে ক'ত্তে'ন। ঠাকু'মার অন্যায় আদেশও পালন ক'ত্তে' বাবা তিলমাত্র ইতস্ততঃ ক'ত্তে'ন না। তবে এ কথা যেন কেউ ভুলেও মনে না ভাবেন যে আমার বাবার প্রাণে পিতৃভক্তি মোটেই ছিলনা। তবে তিনি মুক্তকণ্ঠে সকলকে ব'লতেন “মার চেয়ে গুরু কেউ নেই!” এই কারণে পিতামহ বোধ হয় বাবার প্রতি মনে মনে অসন্তুষ্ট ছিলেন। কিন্তু তাঁর অসন্তোষের আর একটা প্রধান কারণ যা ঘটেছিল, তা পরে ব'লছি।

সে কালের ক'লকাতার 'সহরে যার “রক্ষিতা স্ত্রীলোক” না থাকতো, তিনি বড়লোক ব'লে সমাজে “ক'লকে” পেতেন না! “মাগী” (অবিদ্যা) “বগী” (গাড়ী জুড়ী) “বাগান”,—এই তিনে সেরা মান”, এই হ'ল সেকালে ক'লকাতার ধনবান—মাগুবান লোকের লক্ষণ! এ তিনটী যার নেই, সে হ'ল “ছাপোষা গরীব!” সুতরাং, বড়মানুষ রামচন্দ্র বাবুর নিশ্চয়ই এ তিনটী ভালরকমই ছিল। বাগানবাড়ী ছিল চারটা, পালকীগাড়ী জুড়ীগাড়ী মোট ছিল ছয়টা,—ঘোড়া প্রায় আটটা দশটা, কিন্তু “রক্ষিতা”—শক্রমুখে ছাই দিয়ে (শুন্তে পাই) ছিল এক গণ্ডা একটা অর্থাৎ একুনে পাঁচটা! সরকার ব'ড়া “মধু” দাদামশাই হেসে জিজ্ঞাসা ক'ত্তে'ন,—“ঘুঘু পুষে—বিজোড় করে রাখলে কেন বড়কর্তা? ” ঠাকুর্দা উত্তর দিতেন,—“শুভ ব্যাপারে জোড় রাখতে নেই। পাঁচটাকে প্রতিপালন ক'চ্ছি,—দেখতে শুন্তে ব'লতে—সব দিকেই শুভ!”

বাহুড়াবাগানে আমাদের পৈতৃক ভিটের সামনেই আমাদের বড় একটা বস্তী ছিল। বৃদ্ধ কর্তার আমলে সেখানে প্রজা-বিলি করা ছিল। সেটা প্রায় তিন বিঘে জমী হবে। খোলাঘর ঘর গেঁবে গরাব লোকেরা সেই বস্তীতে বাস করত—মাসে মাসে জমীর খাজনা দিয়ে। তাঁর মৃত্যুর পরে রামচন্দ্র বাবু সামনের অংশ—প্রায় বিঘেখানেক জমি থেকে প্রজা তুলে দিয়ে পুরানো ঘর ভেঙ্গে—নূতন একটা “বাংলোর” ধরণে বাগানবাড়া তৈরী করে দিলেন। সেই “বিহার-মন্দিরে” এসে ভর করলেন ঐ কলিযুগের “পঞ্চ-কণ্ঠা”—অহল্যাদ্রৌপদী কুন্তীতারামন্দোদরীসুখা! আমাদের পৈতৃক বাটার ফটক পার হয়েই প্রথমে বাগান—তারপর নৈটকখানা বা বার-বাড়ী, তারপর প্রকাণ্ড উঠোন,—তার সামনে “সাত-কুকুরে” মস্ত ঠাকুরদালান,—তার পেছন-দিকে অন্তরমহল। সদর বাগানে অর্থাৎ ফটকের সামনে বাটার প্রবেশ-পথে পাঁচাল-দেওয়া যে ফাঁকা জমীটা ছিল,—তা’তে নানা রকমের ফল-ফুলের গাছ,—পাঁচালের এক পাশে বড় একটা গান-বাধানো “পাতকো”,—তা’ থেকে গুল তোলবার জন্তে সরঞ্জামাদি থাকতো!

ফটকে ঢুকতেই ছ’বারে একহাত অন্তর সারি সারি চীনে মাটির তৈরী বস্তার “মোড়া” (অনেকটা টুলের আকার) পোতা ছিল। সপার্বদ ঠাকুদা মশাই সকালসন্ধ্যা সেইখানে বসে পথের লোকচলাচল দেখতেন—বিহার-মন্দিরের পঞ্চকণ্ঠার সঙ্গে ইসারা-ঈঙ্গিতে রঙ্গরহস্য, কথাবার্তা চালাতেন,—মুহমূহঃ গড়গড়ায় তামাক টানতেন—পান খেতেন! সন্ধ্যার পর প্রাণে বেদিন আনন্দের আতিশয় বোধ হ’ত,—সেইখানে বসে পানকার্য্যও সমাধা করতেন। রাত্রি আটটার পর

হেলে-হলে বিহার-মন্দিরে ঢুকে ঠিক একঘণ্টা সেখানে যাপন করে— ঘড়ীতে নটা বাজ্‌বামাত্রই বাড়ীতে ফিরে আসতেন। প্রতি শনিবারে বৈকাল-বেলা বাগানবাড়ীতে যেতেন, সোমবারে সাজ্জো-পাজ্জো নিয়ে অতি প্রত্যাশেই বাড়ী ফিরে স্নান-আহার সেরে যথাসময়ে “হোসে” উপস্থিত হ’তেন। বৈঠকখানা-বাড়ীর দ্বিতলে প্রকাণ্ড হল্‌ঘরে প্রতি সন্ধ্যায় তিনি একবার কবে “দরবার” ক’ত্বেঁন,—অন্ততঃ দশ মিনিটের জন্যে। সেই সময়টুকুর মধ্যে দুই একটি বৈষয়িক অতি জরুরী কার্য সমাধা করে নিতেন। গ্রীষ্মকালে হল্‌ঘরে সন্ধ্যা বা রাত্রিকালে বড় বেশীক্ষণ বৈঠক বা মজলিস বসাতেন না। শীতকালে এবং বর্ষাকালে ( বিশেষতঃ ) রাত্রে সুসজ্জিত হল্‌ঘরে জমজমাট মজলিস হোস’তো! এক একদিন যখন আসর বড় জমাট বেঁধে যেতো এবং রামচন্দ্র বাবুর শরীরের আভ্যন্তরিক অবস্থা তাঁর চলা ফেরা সম্বন্ধে সুনির্ধাজনক বিবেচনা ক’ত্বেঁন না অর্থাৎ সুরাদেবীর প্রভাবে যখন তিনি নিতাক্কেই উত্থানশক্তিরহিত হ’য়ে প’ড়তেন, তখন কত্ভাবাবুর হুকুমত পেয়ারের খানসামা “সুবল” এবং “শনী” গভীর রাত্রে “বিরাজি”, “বিন্দি”, “মুক্ত”, “গৌরী”, “অলকা” নামধারিণী অবিঘ্না-পঞ্চরত্নীকে “ঘেরাটোপ” ঢেকে সটান বিহারমন্দির থেকে হরিরামের বাস্তুভিটের যথারীতি পূজার্চনার জগ্গে এনে হাজির ক’ত্বেঁন। প্রথম প্রথম বাড়ীর চাকরবাকর ছাড়া একথা কেউ জানতে পারেনি। ঠাকুদ্দাও প্রথম প্রথম ভয়ে ভয়ে একাধ্য ক’ত্বেঁন। অবিঘ্নারা যে রাত্রে বৈঠকখানায় আসতেন,—রামচন্দ্র বাবুর চাকর দরওয়ান প্রভৃতির ওপর কড়া হুকুম ছিল, কোনো কারণে বাড়ীর ছেলেপলে বা অন্য

কোনো প্রাণী অথবা বাইরের কোনো ব্যক্তি দ্বিতলের হৃদয়ের ত্রিভীমানায় না আসে। তিলমাত্র এ আদেশপালনের ব্যতিক্রম হ'লে—চাকর-বাকরদের চাকরী তো কারুর থাকবেই না, উপরন্তু চাবুক খেয়ে সবাইকে প্রাণান্ত হ'তে হবে।

কথা কখনো চাপা থাকেনা,—বিশেষতঃ—নেটা চাপবার জন্য যদি চেষ্টা করা হয়। রামচন্দ্র বাবু বৈঠকখানায় অবিষ্ঠা-আবির্ভাবের কথাটা দেখতে দেখতে প্রবল ঝড়ের মুখে ধুলার মত চাদিকে ছাড়িয়ে পোড়লো! ঠাকু'মাও শুন্লেন। শুনেই ঠাকুদার সঙ্গে সম্মুখসমর ঘোষণা ক'লেন। শ্রদ্ধ এতদূর পর্যন্ত গড়িয়েছিল যে, একরাত্রে ঠাকু'মা হৃদয়ের ঝাঁটা হস্তে সংহারিণী চামুণ্ডামূর্তি ধারণ করে অবিষ্ঠা পাঁচজনকে “ঝেঁটয়ে” বিদায় করেছিলেন। ঝাঁটার ছ'এক ঘা রামচন্দ্রবাবু আশ্বাদন করেছিলেন কিনা, সে সম্বন্ধে বিস্তর মতভেদ আছে। কিন্তু ঠাকুদার বুড়ো খানসামা “সুবল” আমাদের কাছে বলেছিল,—“বাপ-রে-বাপ! গিন্নীমার কি ঝাঁটার বহর! কতটা বাবুকে তে-রাত্রি আর কিছু আহার ক'ত্তে' হয়নি!”

যাক। স্ত্রীর কাছে ঝাঁটা আহার করুন আর নাই করুন—বড়লোক রামচন্দ্র বাবু সেই রাত্রি থেকে আর লজ্জাসরমের কোনো খাতীর রাখলেন না। স্ত্রীর সঙ্গে আলাপ বন্ধ তো ক'লেনই, উপরন্তু সেই রাত্রি হ'তে অন্তরমহলে বাওয়া প্রায় বৎসরাবধি বন্ধ করেছিলেন। বিস্তর অনুনয় বিনয়, হাতে পায়ে ধরাধরি করে পিসীমা খুড়ীমা প্রভৃতি সবাই মিলে পিতামহকে ঠাণ্ডা করে অন্তর-মহলে এনে ঠাকু'মার সঙ্গে “সকী” করিয়ে দিয়েছিলেন। সকী হ'লেও

ঠাকুদা-ঠাকু'মার মধ্যে সস্তাব প্রীতি আর ফিরে আসেনি—এটা আমি বরাবর লক্ষ্য করেছিলুম। ঠাকুদা বিয়ন জেদী লোক ছিলেন। ঠাকু'মা যদি সে রাত্রে এই কেলেকেরী কাণ্ডটা না ক'র্তে'ন, তা'হ'লে হয়তো ঠাকুদা “অবিঘাদের” দৈবাৎ এক আধ দিন লুকিয়ে চুরিয়ে বৈঠকখানায় আনতেন। কিন্তু যেদিন থেকে এই ব্যাপারটা জানাজানি হয়ে পোড়লো,—সেইদিন থেকে তিনি প্রকাশ্যভাবে—যখন-তখন সকলকার সামনে “অবিঘাদের” নিজবাড়ীতে আনাতেন—পাঠাতেন এবং অবাধে “বিচরণ” ক'র্তে' দিতেন। শুধু তাই নয়, তিনি নিজে তাদের সঙ্গে করে অন্তরমহলে ছেলেমেয়েদের কাছে নিয়ে গিয়ে—দাঁড়িয়ে থেকে আলাপ করাতেন। তা'রা অন্তরমহলে ঢুকলেই ঠাকু'মা ঘরে খিল এঁটে সেই যে মেজেতে উপুড় হয়ে প'ড়তেন, একদিন—দু'দিন—এমন কি তিন দিন পর্যন্ত দরজা খুলে বেরুতেন না। বাড়ীশুদ্ধ লোক দেখে অবাক হয়ে যেতো! কেউ বুঝতে পার্তনা যে, কেমন করে মানুষ এভাবে দু'দিন তিনদিন প্রায়োপবেশন করে থাকতে পারে! ঠাকু'মা কারুর কথায় দরজা খুলতেন না। শেষে বাবা যখন অত্যন্ত কান্নাকাটী করে ব'লতেন—“তুমি আমার কথা যদি না শোনো মা—তাহ'লে আমি তোমার কাছে প্রতিজ্ঞা ক'চ্ছি,—এক্ষুনি আমি বাড়ী থেকে চলে যাব,—আর এ জীবনে কখনো তোমাকে এ মুখ দেখাবো না!” প্রিয়পুত্রের কাতর ক্রন্দনোক্তি শুনে মা আর থাকতে পার্তে'ন না; দ্বার খুলে ঘর থেকে বেরিয়ে আসতেন।

## অষ্টম পরিচ্ছেদ ।

কর্তার ইচ্ছায় কর্ম । ঠাকু'মা যখন দেখলেন—কর্তা কিছুতেই আর বাগ মানছেন না,—তখন তিনি রাগারাগি ঝগড়াঝাঁটির পথ ছেড়ে—“নরম গরম” চিকীৎসা চালাবার ব্যবস্থা করলেন । সময় সুযোগ পেলেই স্বামীকে বসিয়ে ব'লতেন,—“শক্রমুখে ছাই দিয়ে ছেলেরা সব যথেষ্ট বড় হয়েছে,—মেয়েজামাই নাতি-নাতনীরা সব চাদিকে ঘুচ্ছে ফিচ্ছে, আত্মীয়স্বজন বাড়ীতে আসছে যাচ্ছে,—তোমা'র ও গঙ্গা-মুখো-পা হয়েছে, বাড়ীর ভেতর এসব ঢলাঢলি আর ভাল দেখায় কি ?”

“ঢলাঢলি কি আবার ?”

“ঢলাঢলি নয়তো কি ? বৈঠকখানায় বসে যত মোসাম্বেব নিয়ে মদ খাওয়া—বাড়ীতে বেশা আনা কি ভদ্রলোকের উচিত ?”

“ভদ্রলোকের বাড়ীতে বেশা আসেনা—তুমি ব'লতে চাও ? বাড়ীর সব দাসী-বান্দীরা কি ভদ্র-গেরোস্তের মেয়ে ? লোকে বাড়ীতে বাইনাচ—খ্যান্টানাচ—মেয়ে-পাঁচালী দেয়না ?”

“কিন্তু ত’রা তো বাড়ীর কর্তার রক্ষিতা নয় ?”

“নাগীদের কি গায়ে লেখা থাকে যে সে অমুক বাবুর রক্ষিতা ?”

“দেখ,—তর্ক কর যদি—তা’হ’লে এর মীমাংসা হবেনা ! বেশ তো,—  
বুড়ো বয়েসে ও যদি মতিচ্ছন্ন দূর না হয়, তা’হ’লে আমি বলি কি, যা’ ক’চ্ছ,  
বাড়ীর বাইরে কর গিয়ে । ভদ্রলোকের বাড়ীতে ঢলাঢালি নাই বা ক’ল্লে !”

“বাড়ী আমার,—আমার বাবার ! আমার বাড়ীতে,—আমার বাবার  
বাড়ীতে ব’সে আমি যা’ খুসি তাই ক’র্ব্ব ! যার ভাল না লাগে—সে  
চলে যাক্ আমার বাড়ী থেকে ! আমি নাগ্—ছেলে—মেয়ে, আত্ম-  
কুটুম্ব—পাড়া প্রতিবেশী কারুর তোয়াক্কা রাখিনা,—কারুর কথার ধার  
ধারিনা !”

“সব স্বীকার করি । কিন্তু—আমি তো কোনো অন্তায় কথা  
ব’ল্ছিনি—”

“ব’ল্ছ বইকি ! যথেষ্ট অন্তায় ব’ল্ছ ! শুধু অন্তায় ব’ল্ছ না,—  
যথেষ্ট অন্তায় করেছ ! যে রকম কেলেকারী সেদিন বৈঠকখানা-বাড়ীতে  
করেছিল,—ত’রা নাকি অতি ভদ্র মেয়েমানুষ—আর আমি নাকি  
একটু তোমায় গিয়ে—কি বলে—“ই’য়ে” হয়ে পড়েছিলুম,—তাই তুমি  
ঝাঁটা চালিয়ে পার পেয়ে গেছ ! নইলে—যাক্—আর কি ব’ল্বে—তোমার  
মত জীর মুখ দেখলেও পাপ হয় ।”

ঠাকু’মা চেপে গেলেন ! যে রকম হাওয়ার গতিক—এর ওপোর  
যদি তিনি কথা চালান—তা’হ’লে এখুনি আমার একটা বিতিকিচ্ছি  
কাণ্ড বেধে যাবে ! ঠাকু’মা বুঝলেন,—কর্তা চিকীৎসার বাইরে  
অর্থাৎ “Past all surgery !”

বাবা সসম্মানে বি-এ পাশ হবার পর পিতামহ তাঁর বিবাহ দেবার জন্তে উত্তোঙ্গী হ'লেন। বাবার ইচ্ছে—লেখাপড়া শেষ না করে বিবাহ ক'র্ষেন না। কিন্তু—বাপের মুখের ওপোর সে কথা ব'লতে পারেন না। কারণ, পিতামহ বাবার সঙ্গে কোন পরামর্শ না করেই অথবা তাঁর মতামত জিজ্ঞাসার প্রয়োজন নেই বিবেচনায়—পুত্রের বিবাহের জন্তে নানা স্থানে পাত্রী দেখে বেড়াতে লাগলেন। উপরন্তু, ঠাকু'নারও খুব ইচ্ছে—বেটার বৌ দেখেন। বড় ছেলেকে পিতামহ তেমন প্রীতিচক্ষে না দেখলেও—তাঁর বিবাহে ধনবান পিতার যোগ্য সমস্ত কার্য করে-ছিলেন। অর্থাৎ কোনো অনুরূপেরই ক্রটি করেননি। পরমা সুন্দরী কন্যা নির্বাচন করে—বিস্তর অর্থব্যয় করে—সাত আট দিন লোকজন খাওয়ানো, আমোদ-প্রমোদ ইত্যাদি সম্পন্ন করে মহাসমারোহে পুত্রের বিবাহ দিয়েছিলেন। জ্যেষ্ঠ পুত্রের বিবাহের তিন চার মাস পরেই মধ্যম পুত্রের এবং তার নামথানেক পরে তৃতীয় পুত্রের বিবাহ ঐরকম সমারোহেই সম্পন্ন করেছিলেন। কনিষ্ঠ পুত্রের বিবাহ হয়,—পাঁচ ছয় বৎসর পরে। কিন্তু শূন্যে পাই—কনিষ্ঠ পুত্র (যেটা সকল বিষয়েই অর্থাৎ বিদ্যাতে বুদ্ধিতে মেজাজে চাল-চলনে আচারব্যবহারে পিতারই অনুরূপ) সেই আবার ছোটকাকা কনকচন্দ্রের বিবাহে এত অর্থব্যয়—এত সমারোহ ব্যাপার হইয়েছিল,—যা'বোধ হয় অনেক রাজারাজাড়ার ঘরে হয়না। জনশ্রুতি এইরূপ যে, এই কনিষ্ঠ পুত্রের বিবাহে রামচন্দ্র বাবুর নগদ টাকা যা হাতে ছিল, সমস্তই খরচ হয়েছিল। কিন্তু সেটা লোকের অনুমান মাত্র। তবে মোট কথা এই বোঝা যায়,—তিনি বড়মানুষী চাল বজায় রাখবার জন্তে প্রিয়তম কনিষ্ঠ পুত্রের বিবাহে ছ' হাতে পয়সা লুটিয়ে দিয়ে খরচ



করেছিলেন। ঠাকু'মার মুখে শুনি—পিতামহ বলেছিলেন—“এই আমার শেষ কাজ!” বস্তুতঃ, কনিষ্ঠ পুত্রের বিবাহ দেওয়া পিতা হিসাবে তাঁর শেষ কাজ ভিন্ন আর কি হ'তে পারে? তিনটী কন্যার (অর্থাৎ আমার তিন পিসিমার) তিনি যথেষ্ট অর্থ ব্যয় করে খুব বড়লোকের ঘরেই বিবাহ দিয়েছিলেন। চারটী পুত্রেরও সমারোহে মনের সাধ মিটিয়ে পাচপাতি করে আমোদ-আহ্লাদের চূড়ান্ত করে বিবাহ দিলেন। তাঁর জীবনের সাধ-আহ্লাদ পূর্ণ করবার বাকীই বা কি রইলো?

আমার বিমাতা কমলা দেবীকে সত্যিই পিতামহ অত্যন্ত ভাল-বাসতেন। নিজে পছন্দ করে সুন্দরী পুত্রবধূ ঘরে এনেছেন ব'লেই হোক অথবা বিমাতা তাঁর এক পরম বন্ধুর কন্যা ব'লেই হোক,— তিনি নিজকন্যার অধিক তাঁকে স্নেহ ক'র্তেন। আর এক কারণে শুনতে পাই,—অতি শৈশব কালেই বিমাতা পিতৃমাতৃহীনা হয়েছিলেন। স্মৃতবাং, বিবাহের পর স্বশুরবাড়ীতে “ঘর” ক'র্তে এসে তিনি বড় একটা বাপের বাড়ীতে যেতেন না। বাপের বাড়ী যাবেনই বা কি জন্তে? সেখানে আদরই বা পাবেন কার কাছে? থাকবার মন্যে—বিমাতার দুই সহোদর,—তাঁরা কস্মোপক্ষে বরাবর বিদেশে সপরিবারে বাস ক'র্তেন। বাড়ীতে থাকতেন এক বৃদ্ধ জ্যাঠামশাই আর তাঁর অতি “হতছাড়া” তিনটী পুত্ররত্ন। বরাতক্রমে বিমাতার জ্যাঠামশাইটি ছিলেন বিপন্নিক। শৈশবকাল হ'তে পিতৃমাতৃবিয়োগে বিমাতার যে একটা মহা অভাব বা দুঃখ প্রাণে ছিল,—স্বশুরালয়ে এসে সেটা যথার্থই মোচন হয়েছিল। তিনি স্বশুরবাড়ীতে বাপ-মা দুই—ই পেয়েছিলেন।

পিতামহ জ্যেষ্ঠ পুত্রের প্রতি তত স্নেহপরায়ণ না হ'লেও, জ্যেষ্ঠ পুত্র-বধূকে যৎপরোনাস্তি স্নেহ ক'র্তেন। পুত্রবধূও আপন পিতার আয় তাঁকে ভক্তি শ্রদ্ধা সেবা ক'র্তেন,—কন্টার মত সকল রকম আবদার স্বত্তরের নিকট ক'র্তেন। বাড়ীর কারও কিছু বলবার দরকার হ'লে—বদমেজাজী কত্তাকে হয়তো তিনি নিজের ব'লতে সাহস ক'র্তেন না। বড় বো ( অর্থাৎ আমার বিমাতা ) তাঁর বা তাঁদের হাযে দরখাস্ত “পেশ” ক'লেই তখন তা' মঞ্জুর হ'ত। বি-এল পাশ করে বাবা অতি অল্প দিনেই একটা “মুন্সেফী” চাকরী হোগাড় করেছিলেন। মুন্সেফী চাকরীতে বিদেশে বিদেশে ঘুরতে হয় ব'লে প্রথমটা পিতামহ খুবই আপত্তি করেছিলেন। কিন্তু পাঁচজনে বখন তাঁকে বুঝিয়ে দিলেন যে, এই মুন্সেফী, ডেপুটীগির্নি, মাব্জজি বা জ্জিগতি চাকরীতে কোম্পানীর কাছে বংশের পর্য্যন্ত খাতীর বেড়ে যায়,—অনেক তপস্বী ক'লে তবে এই সব সম্মানের চাকরী লোকে পেয়ে থাকে,—স্বয়ং লাটসাহেব পর্য্যন্ত এসব চাকরদের বাড়ীতে এসে ঘনিষ্ঠতা, বন্ধুত্ব, মাখামাখী করেন, তখন তিনি আর কোনো উচ্চবাচ্য ক'লে ন। কিন্তু,—পুত্রবধূ বা তাঁর ছোট ছোট ছেলেদের ( অর্থাৎ আমার বৈমাত্র ভাইদের ) বাবার সঙ্গে বিদেশে বিদেশে ঘুরতে যেতে দিতে চাইলেন না। ক্চিৎ কখনো ভাল স্বাস্থ্যকর স্থান বুঝে পিতামহীর সঙ্গে সপুত্রকন্টা বিমাতা স্বামীর কর্মস্থানে গিয়ে ছ'চার মাস থাকতে পেতেন। ক্রমে বাবা ডেপুটীগির্নি পদে উন্নত হ'লেন। এই পদ পাবার বছর দুই পরে চারটা পুত্র এবং একটা কন্টা রেখে ভাগ্যবতী বিমাতা স্বর্গারোহণ করেন। তারপরের ইতিহাস অর্থাৎ পিতার দ্বিতীয়বার দারপরিগ্রহ, আমার

মাতার এই বড়লোকের গৃহে আগমন এবং আমার জন্ম-বিবরণ সমস্তই পূর্ব পরিচ্ছেদে বর্ণিত হয়েছে।

পিতামহীর ইচ্ছায় আমার উপনয়ন উপলক্ষে বাবা যশোর থেকে তিন মাস ছুটি নিয়ে সপরিবারে কলকাতার বাছড়বাগানে পৈতৃক ভিটেয় চলে এলেন। পিতামহ আমাকে বিশেষ আদরযত্ন ক'লেন না! কথাবার্তা কইলেন বটে,—কিন্তু সেটা যেন “না-কইলে-নয়”—এই ভাব! বৈমাত্র চার ভাই যেন চারটি “নব কার্তিক।” বড়টির নাম “দীপেন” এন্টেন্স পড়েন; মেজটি “বিজেন” থার্ড ক্লাশের ছাত্র, সেজটি “দীনেন” ফিফথ ক্লাশে পড়েন, ছোটটির নাম “সুখেন”,—তিমি স্কুলে যাননা—বাড়ীতে মাষ্টারের কাছে পড়েন। সবার ছোট আমার বৈমাত্র ভগ্নী,—নাম “নলিনীবালা”,—সে সময় বিবাহের বয়স উত্তীর্ণ প্রায়! ঠাকুদা তাঁর বিবাহের জন্তে বিশেষ ব্যস্ত। চারিদিকে ঘটক-ঘটকী লাগিয়ে পাত্র অন্বেষণ করে বেড়াচ্ছেন। মনের মত পাত্র না পাওয়াতে নলিনী দিদির এত বয়েস দেখতে দেখতে হয়ে গেছে।

বাবার মুখের ওপোর ঠাকুদা স্পষ্ট ব'ল্লেন—“তোমার ছেলের পৈতে “নমঃ—নমঃ” করে মারো। আমার এখন বেজায় টানাটানি। আমি এক পয়সাও খরচপত্র ক'র্ত্তে পার্বনা।”

বাবা ব'ল্লেন—“কি দরকার?”

ঠাকু'দা শুনে মহা গরম হয়ে ঠাকুদাকে ব'ল্লেন—“কি রকম কথা? ছোট খোকার পৈতে হবে “নমঃ—নমঃ” ক'রে? কেন? ও কি ফ্যালনা?”

ঠাকুদা গভীর হয়ে জবাব দিলেন—“বলি—চখের সামনে একটা নাতনী “গলায় গলায়” হয়ে রয়েছে,—তার বিয়ে এখনি দিতে হবে ! না দিলে জাত যাবে, সেটা ভাবছ না? পৈতেতে টাকা খরচ করে ফল কি?”

সে সময়—সে যুগে এগারো বছরে মেয়ের বিয়ে না দিলে বাঙ্গালীর জাত যাবার ভয় হ’ত ! আর এখন তেত্রিশ বছরের মেয়ে ঘরে থাকলে জাত “অজাতশত্রু” হয়ে বজায় থাকে ! ষিক্ সেকাল !

ঠাকুদার কথা শুনে ঠাকু’মা বললেন—“তুমি খরচ না কর, আমি আমার গয়না বেচে আত্মারামের পৈতেতে ঘটা ক’র ! ও—মাগো ! কেন ? এমন এক-চোখোনী কর্কার মানে কি ? সব নাতি-নাতিদের ষেঠেরা পূজোতে হাজার হাজার টাকা খরচ হয়েছে,—আর ঐ একটা ছেলে, সোণার চাঁদ ছেলে,—নিজের বড়ছেলের ছেলে ! তার ভাতে তো এক পয়সা খরচ ক’লেনা, তার পৈতের নাম হ’তেই অমনি তোমার টাকার আঙণ লেগে গেল ?”

কথাটা না কয়ে ঠাকুদা বারবাড়ীতে চলে গেলেন ! যাই হোক—ঘটা হবেনা—ঘটা হবেনা করে করেও, আমার পৈতেতে শুন্লুম ২৩ হাজার টাকা খরচ হয়েছিল । সঠিক জানিনা,—বাজার গুজব এই,—ঠাকু’মা নিজের টাকা থেকে সমস্ত খরচ দিয়ে এই সমারোহ বজ্র করেছিলেন । কিন্তু পৈতের লোক-খাওয়ানোর দিন যে কাণ্ডটা ঘটলো, সেইটা আমার জীবনের একটা স্মরণীয় ঘটনা ।

“নৃতম ব্রহ্মচারীকে” সকলেই “যৌতুক” করেন—অবশ্য ব্রাহ্মণ যারা । আমি তখন মুণ্ডিত-মস্তক গেরুয়াবসনধারী হ’য়ে দণ্ড এবং ভিক্ষার বুলি

হাতে অন্তরমহলে একটা ঘরে “দণ্ডী”-রূপে বন্দী হয়ে আছি। কেউ যৌতুক ক’র্ত্তে এলে তিন দিন দণ্ডী ঘরে অবস্থান-কালে তাঁর কাছে ভিক্ষা চেয়ে ব’লতুম—“ভবান ( পুরুষ হ’লে ) বা ভবতী ( স্ত্রীলোক হ’লে ) ভিক্ষাং দেহি।” ঝুলিতে যৌতুক কিছু পেলেই ব’লতুম—“স্বস্তি”। এ এক রকম মন্দ ব্যাপার নয়। বেশ মজা হ’চ্ছিল,—কত লোক ( ব্রাহ্মণ নিমন্ত্রিত ব্যক্তি ) দণ্ডীঘরে আস’ছিল, যাচ্ছিল ; টাকা, গিনি, মোহর, আংটা, চেন, ঘড়ি ভিক্ষা দিচ্ছিল, আমোদ আহ্লাদ খুবই হ’চ্ছিল। নিজের পৈতৃক ভিটেতে আমিও একজন “দখলিদার”—বাড়ুড়াবাগানের বাড়ীতে এসে দিনকতক পরে অজ্ঞাতনারে এটুকু যেন আমার মনে আপনিই উদয় হয়েছিল। মাসখানেকের মধ্যে এই বাড়ুয়্যে গোষ্ঠীর রাবণের পুরীতে হরেক রকম ছেলেপিলের দলে দিব্যি ভিড়ে পড়েছিলুম। ঠাকুন্দা আমাকে যে চক্ষেই দেখুন—যতই আমাকে আমল না দিন, আমি কিন্তু বেচে সেবে গায়ে প’ড়ে যতটা সম্ভব তাঁর কাছ থেকে আদর—স্নেহ-যত্ন এক রকম ফাঁকি দিয়ে আদায় করে নিতুম।

পৈতের তিন দিন খুব সমারোহে উৎসবের ফোয়ারা ছুটেছে। তার মাঝখানে হঠাৎ সংসারে এমন একটা কিছু কাণ্ড ঘ’টল, যার জন্মে মনে হ’ল, এই আনন্দোৎসবের উজ্জল মূর্তিটার অকস্মাৎ কে যেন কালি ঢেলে দিয়ে গেছে। চারিদিকেই দেখি—নিরানন্দের বিকট মূর্তি! মাত্র আধ ঘণ্টা পূর্বে যে ব্যক্তি ( স্ত্রী বা পুরুষ ) হেসে লুটোপুটা খাচ্ছিল, যার প্রাণে আর আনন্দ ধ’চ্ছিল না,—অকস্মাৎ তার মুখ বিষণ্ণ! মা, ঠাকু’মা, বাবা,—এঁদের সবারই মুখে যেন কান্নার ভাব। বুঝতে পাচ্ছি—একটা কিছু অমঙ্গল নিশ্চয়ই ঘটেছে! কিন্তু ছেলেমানুষ, ক’াকেও

কিছু জিজ্ঞেসা কর্তেও ভরসা হ'চ্ছেনা। বাড়ীতে বিস্তর আত্মীয় কুটুম্ব জড় হয়েছে, হাজার হাজার লোক খাচ্ছে, বাড়ীর আর সবই ঠিক বজায় আছে, তবু যেন ভিতরে ভিতরে কিছু একটা ভীষণ কাণ্ড ঘটেছে,—বেশ বুঝতে পার্লুম।

কাজকর্ম চুকে যাবার দু'চার দিন পরে বাবা ভীষণ জ্বরে প'ড়লেন। ঠাকু'মা, মা আর আমি দিনরাত্রি বাবার কাছে বসে থাকি। ঠাকুদা বা কাকা মশাইরা দৈবাৎ এক আধ মিনিটের জন্তে বাবার খবর নিতে আমাদের ঘরে আসেন! বাড়ীতে “বাঁধা” ডাক্তার আছেন; যথাসময়ে আসেন, বাবাকে দেখেন, চাকরবাকর ঙ্গুণ এনে দেয়,—ঠাকু'মা, মা নিজেরা হাতে করে রোগীর পথ্য এনে দেন। হঠাৎ জ্বরির দরকার হ'লে আমি চাকরকে সঙ্গে নিয়ে ডাক্তার বাবুকে খবর দিতে যাই। বৈমাত্র ভায়েরা কেউ বাবার ত্রিসীমানায় আসেন না। এই ভাবে বাবা প্রায় মাসাবধি শয্যাগত হয়ে রইলেন।

ব্যাপার কি ঘটেছিল—ক্রমে জানতে পার্লুম। ঠাকুদার প্রধান অবিদ্যা “বিরাজী” আমাদের বাড়ীতে কর্তার “গিন্নার” মত যাওয়া-আসা কর্তেন! আমার ঠাকু'মা আর বাবা ছাড়া (বিনাতা কি কর্তেন জানিনা) সকলেই তাঁকে বেশ আদরনত্ন কর্তেন। ছপুর বেলা অন্তর মহলে মেয়েদের মজলিসে বসে তিনি “গেরাম-ভারি” চালে কত গল্প গুজোব কর্তেন, গান গাইতেন, খুড়ীমা পিসিমাদের চুল বেঁধে দিতেন। কোনো কাজকর্মে দস্তুরমত আমাদের বাড়ীতে এনে কর্তার পেয়ারের “অবিদ্যাটা” গিন্নীপনার চুড়ান্ত কর্তেন। কর্তা তাতে বেজায় খুসী থাকতেন এবং কর্তা খুসী থাকলেই বাড়ীশুদ্ধ সবাই খুসী হতেন! বাড়ীর

ছেলেমেয়েদের বিয়েতে গহনা কাপড় জামা দিয়ে তিনি বড়মানুষী চালের উপর “আশীর্বাদ” ক’তেন। কিন্তু শুনেছি,—বাবা কর্মস্থান থেকে ক’ল্কেতায় এলে “বিরাজী” ঠাকুরগা আসা যাওয়াই একবারে বন্ধ ক’তেন,—গিনীপনা করা তো দূরে থাক্। অগ্ৰাণ্ড ছেলেদের অর্থাৎ আমার বৈমাত্র ভায়েদের কিম্বা খুড়তুতো ভায়েদের অনপ্রাশনে, উপনয়নে বা বিবাহে “বিরাজী” বাড়ীতে এসে নিজের হাতে “যৌতুক” করেছেন,—বর-কনেকে আশীর্বাদ করেছেন। বাবা, ঠাকু’মা মনে মনে অত্যন্ত রাগ ক’লেও এ সম্বন্ধে কোনো কথা কইতেন না। এরা দুই মাদ্রে-পোয়ে এ-সমস্ত ব্যাপার থেকে নিজেদের খুব দূরে রাখতেন, দেখেও দেখতেন না। সর্বনাশ কাণ্ড হ’ল আমার পৈতের সময়,—লোক যাওয়ানোর দিন। “বিরাজী” একখানি মোহর—একটি আংটি হাতে নিয়ে খুড়ামার সঙ্গে আমার মার ঘরে গিয়ে উপস্থিত হ’লেন। মা ইতঃপূর্বে “বিরাজীর” নাম শুনেও কখনো তাঁকে চক্ষে দেখেননি,—কারুর বাড়ীর “গিনী-বানী” বিবেচনায় মা তাঁকে খাতীর করে ঘরে বসালেন। ছ’চারটে কথাবার্তার পর সেজকাকী মাকে ব’লেন “দিদি ! এঁকে চিন্তে পেরেছ ?”

মা অপ্রস্তুত হয়ে ব’লেন “না দিদি, আমি তো আত্মকুটুম্বদের মকলকে চিনিনা।”

সেজ কাকীমা হেসে ব’লেন—“ইনি আমাদের স্বাগুড়ী হন !”

মার মুখখানি নিমেষের মধ্যেই ছাইয়ের মত সাদা হয়ে গেল। তিনি “বিরাজীকে” চিন্তে পেরেই একবারে রাগে চাদিক অন্ধকার দেখলেন। তিলমাত্র ইতস্ততঃ না করে সেজকাকীমাকে ব’লে ফেলেন—“মূর্ত্তিমতী

সতীলক্ষ্মী স্বাগুড়ীর নামে কলঙ্ক দিওনা সেজ-দি ! মনে থাকে যেন,  
এটা ভদ্রলোকের বাড়ী, বিশেষতঃ—ব্রাহ্মণের বাড়ী !”

ব'লেই মা ঘর থেকে বেরিয়ে অগ্নি দিকে গেলেন ।

অপমানিতা “বিরাজী” কাঁদতে কাঁদতে এবং সেই সঙ্গে ( বোধ হয় )  
কর্তার চোদ্দ পুরুষ উদ্ধার ক'ত্তে ক'ত্তে তৎক্ষণাৎ এ বাড়ী থেকে চলে  
গেলেন । কথাটা কর্তার কাণে পৌঁছুতে বিলম্ব হ'লনা । তিনি বাড়ীর  
কর্তা, অথগুপ্রতাপশালী তিনি,—তার বিশ্বাস, তাঁর নামে বাঘে বলদে  
এক ঘাটে জল খায় ! সেই রামচন্দ্র বাঁড়ুয়োর “অবিচার” অপমান,—  
স্মৃতরাং তাঁকে ও অপমান ? আর সে অপমান ক'ল্লে কে ? তাঁরই পুত্রব-  
ধাকে তিনি দুটী চক্ষে দেখতে পারেন না । কর্তা খোসামোদ, আরাধনা  
ইত্যাদির দ্বারা বিরাজীর রাগ ভংগ মিটিয়ে তাঁকে বিধিগত প্রকারে  
ঠাণ্ডা করে সঙ্গে করে নিয়ে একবারে অন্তরনহলে হাজির হ'লেন ।  
অগ্নি কোনো কথা না ব'লে ঠাকু'মাকে হুকুম ক'ল্লে—“তোমার বৌমাকে  
বলো, এখুনি বিরাজকে নিজে সঙ্গে করে নিয়ে গিয়ে দণ্ডীঘরে ছেলেকে  
নৌতুক করতো !”

ঠাকু'মা সমস্ত ব্যাপার শুনেছিলেন । মা তাঁর কাছে কেঁদে গিয়ে  
ব'ল্লে—“আমি কি এমন মহাপাতক কবেছি মা যে আজ আমার  
ছেলের এমন একটা শুভকাজের দিনে একটা বাজারের বেগা তোমার  
পবিত্র নাম নিয়ে আমার সামনে দাঁড়ালো ? শুধু তাই নয় মা, সবাই  
ব'ল্লে, তিনি নাকি দণ্ডীঘরে ঢুকে থোকাকে যৌতুক ক'র্বেন ! মাগো—  
কি এমন অপবাধ করেছি আমি আর আমার ছেলে, যার জন্তে এত শাস্তি  
ভোগ ক'র্বে !” এই রকম মর্মানভেদী কথা বলে মা কাঁদতে কাঁদতে ঠাকুমার



পা ছুটো জড়িয়ে ধরে ফেলেন। ঠাকু'মা মাকে সাহুনা দিয়ে বুঝিয়ে ব'লেন, “স্থির হও মা—কেঁদো না! এই রকম বাড়াবাড়ি ক'রে ক'রে কর্তার দেখছি “বুক ব'লে” গেছে! সত্যিই তো—একি অন্যায় কথা? দণ্ডীঘরে তিনদিন শূদ্রের প্রবেশ নিষেধ,—এমন কি কায়স্থরা পর্যন্ত ঢুকতে পায়না! সেই দণ্ডীঘরে ঢুকবে কিনা একটা বাজারে বেগা নতুন ব্রহ্মচারীকে “যৌতুক” ক'র্তে?”

কর্তার হুকুম শুনে ঠাকু'মা বিরাজীর সামনেই এই সমস্ত কথা ব'লে কর্তাকে মুখের ওপোর যাচ্ছে-তাই করে শেষে স্পষ্টই বলে ফেলেন, “এতদিন ধরে এই সব অনাচার অত্যাচার করেছ—সবাই ভয়ে ভয়ে কিছু বলেনি! এবার শক্ত পাল্লায় পড়েছ! বুঝলে? এসব ইল্লতে কাণ্ড এ বোয়ের কাছে—এ নাতির কাছে চ'লবেনা!”

“বিরাজীর” মহা বিপদ! কর্তাও ত'াকে ছাড়েন না, ঠাকু'মাও অপমান ক'র্তে কসুর করেন না! কর্তা শেষে বাবাকে ডেকে এই কড়া হুকুম দিয়ে ব'লেন, “এই হাজার হাজার লোকের সামনে আজ যদি তোমার স্ত্রীর কাছে আমার অপমানিত হ'তে হয়, ত'হ'লে আজ থেকে তুমি আমার ত্যজ্যপুত্র!”

বাবা কোন কথার জবাব দিলেন না। চুপ করে মাথাটা হেঁট করে দাঁড়িয়ে রইলেন। কারণ, এত বড় অহিন্দু ব্যাপার যদিও এ বাড়ীতে ইতঃপূর্বে বহুবার এবং ইদানিং বরাবর হয়ে আসছিল, বাবা তার সম্পূর্ণ বিরোধী হ'লেও সে সম্বন্ধে পিতার কার্যের প্রতিবাদ না করে নিজে দূরে দূরেই থাকতেন! কিন্তু আমার মা

যখন অবলা স্ত্রীলোক হ'য়ে এ অহিন্দু বর্ষরের আচারের বিরুদ্ধে  
 রুখে কোমর বেঁধে দাঁড়ালেন, তখন বাবা এমন কোনো শাস্ত্র বা  
 শ্রায়সঙ্গত যুক্তি-কথা এবং তর্কের উপাদান খুঁজে পেলেন না,—নার  
 দ্বারা তিনি মাকে বুঝিয়ে তাঁর পিতার আদেশের বিরুদ্ধাচরণ হ'তে  
 তাঁকে নিরস্ত ক'র্তে পারেন।

এইতেই যে আগুন সংসারে জ্বলে উঠলো সেই আগুনে বাবা,  
 মা এবং আমি চিরদিনের মত পুড়ে ভস্মীভূত হয়ে গেলুম! এই  
 সাংসারিক অশান্তি-অনল যতদিন পিতামহ জীবিত ছিলেন, ততদিন  
 তো সমান তেজেই জ্বলেছিল, পিতামহের মৃত্যুর পরেও সে অনল  
 বাঁড়ুয্যে পরিবারের অনেককেই জ্বালিয়ে পুড়িয়ে থাকু করে দিয়েছিল।

## নবম পরিচ্ছেদ ।

দেড় মাস কাল বাবা শয্যাগত ছিলেন । পথ্য পেয়ে সম্পূর্ণ  
েরে উঠতে আরও দিন পনেরো কেটে গেল । বাবা তিনমাসের  
ছুটি নিয়েছিলেন । শরীর এখনও সুস্থ ও সবল নয় ব'লে আরও  
তিনমাসের ছুটির জন্যে দরখাস্ত ক'লেন । ছুটি মঞ্জুর হ'লনা বটে,  
কিন্তু তিনি বদলী হয়ে আলীপুরে ডেপুটী কালেক্টারের পদে প্রতি-  
ষ্ঠিত হ'লেন । শাপে বর হয়ে গেল ।

এইবার আমি রীতিমত ক'লকেশবাসী,—যাকে বলে “সহরে ছেলে”  
হ'য়ে প'ড়লুম । বাবা আমাকে হিন্দু স্কুলে ভর্তি করে দিলেন । বৈমাত্র  
ভায়েদের সঙ্গে একত্রে স্কুলে বাই । বাড়ীতে আমাদের বিস্তর ছেলে,—  
খেতে ব'সতো যেন একটা ছোটখাটো রেজিমেন্ট । খুড়তুতো ভাই,  
পিস্তুতো ভাই,—দূর সম্পর্কে মামাতো ভাই, এই রকম রকমারি সম্পর্কের  
কত “ভাই” যে আমাদের সংসারে ছিল,—তা আর বলবার নয় । সবাকার  
ইতিহাস বর্ণনা করার প্রয়োজন এ কাহিনীতে নাই । তবে এই  
“রাবণের গোষ্ঠিতে” একটা জীলোকের দোঁর্দণ্ড প্রতাপে সবাই আড়ষ্ট,

—তিনি হ'লেন আমার ছোটপিসী—নাম প্রসন্নময়ী। পিতামহের তিনি বড় আদরের মেয়ে। বিস্তর অর্থ ব্যয় করে তিনি এই মহরের কোনো ধনবানের একমাত্র পুত্রের সঙ্গে মেয়ের বিবাহ দিয়েছিলেন। ছোট পিসেমশাই বিয়ের দু'বছর পরেই পিতৃবিয়োগে অগাধ সম্পত্তির মালিক হয়েছিলেন বটে, কিন্তু ক'লকেতার নামজাদা “বাপুেন” হয়ে এমন ফুর্তির জাহাজ চালিয়ে দিলেন যে পাঁচ সাত বছরের মধ্যে সর্বস্বাস্ত হয়ে গেল এবং একটি মাত্র পুত্রকে পথে তো বসালেনই, উপরন্তু ভীষণ ব্যাধিগ্রস্ত হয়ে একটি বৎসর যাবৎ শয্যাগত থেকে উহসংসার থেকে জন্মের মত বিদায় গ্রহণ ক'লেন! এই এক বৎসরকাল যে রোগে ভুগে টেকেছিলেন,—সে কেবল ধনবান স্বস্তুরের ( অর্থাৎ আমার পিতামহের) অর্থসাহায্য লাভ করে। স্বামী স্বর্গীয় হবার পরদিনই ছোটপিসি বিধবাবেশে একমাত্র পুত্র “রমেশের” হাত ধরে বড়মানুষ বাপের ভিটেয় এসে ভর ক'লেন। শুধু ভর কলেন নয়,—আনাদের সংসারে ছোটপিসি একেবারে সর্ব্ব-সর্ব্বময়ী।

আমার বিমাতার মৃত্যুর পরেই ছোটপিসি এ বাড়ীতে চিরস্থায়ী বন্দোবস্ত ( Permanent Settlement ) করেছিলেন। ঠাকুদা আদরের ছোট মেয়েটিকে সংসারের সকল বিষয়ে এতটা কর্তৃত্বভার প্রদান ক'লেন যে ততটা কর্তৃত্ব আমার ঠাকু'মাও কারুর ওপরে খাটাতে ইতস্ততঃ ক'লেন। অবশ্য, এর জন্যে ঠাকু'মার মনে কোনো দুঃখ নিশ্চয়ই হ'ত না। হাজার হোক ছোটপিসি তো তাঁরই গর্ভের মেয়ে! তার ওপরে—অভাগিনী স্বামীহারা অনাথিনী কপর্দকশূন্যা হয়ে মা-বাপের কাছে এসে আশ্রয় নিয়েছে। সুতরাং ছোটপিসির কোনো দোষ

হ'লেও ঠাকু'মার কাছে তা দোষ বলে পরিগণিত হ'তনা। ছোট পিসি বাপের বাড়ীতে মা-বাপের প্রশ্রয়ে যতদূর অত্যাচারী হবার তা' হয়েছিলেন। তিনি এ সংসারে প্রবেশলাভ করেই সর্বপ্রথম আমার বৈমাত্র ভাইগুলিকে নিজের কোলে টেনে নিয়ে তাদের তত্বাবধানের ভার গ্রহণ ক'লেন। বাস্তবিক, যে কোন উদ্দেশ্যেই হোক, ছোট পিসি এই মাতৃহারা চারটা ছেলেকে এত আদরযত্ন ক'র্তে লাগলেন যে তা'রা ছোট পিসি-অন্ত-প্রাণ হয়ে প'ড়লো! ছোট পিসি নিজের ছেলে রমেশকে বোধ হয় এতটা আদরযত্ন ক'র্তেন না। এই নির্ঘাত চালে তিনি বাপ-মাকে একেবারে মুঠোর মধ্যে পুরে ফেলেছিলেন।

আমার বৈমাত্র ভগ্নী নলিনী দিদির বয়স যখন মাত্র দশমাস তখন আমার মা বধুরূপে এ সংসারে প্রবেশ করেন। বিমাতা স্বর্গীয়া হবার পর ঠাকু'মাই নলিনী দিদিকে মানুষ ক'চ্ছিলেন! বশোরে যখন তিনি বাবার কাছে থাকতেন তখন থেকেই মাতৃহারা দুগ্ধপোষ্যা কন্যাটির লালনপালন কর্কার ভার তিনি আমার মায়ের ওপরই দিয়েছিলেন। ঠাকু'মা ক'ল্কাতায় চলে এলেন,—নলিনী দিদি মায়ের কাছেই রইলো এবং জ্ঞান হবার পূর্ব-পর্যন্ত আমার মাকেই মা বলে জানতো।

ছোট পিসির নাম “প্রসন্নময়ী” কে রেখেছিল জানিনা, কিন্তু তাঁর ব্যাপার দেখে আমার কেবলই মনে হ'ত—“অপ্রসন্নময়ী” নামই তাঁর একমাত্র যোগ্য। আমার ঐ বৈমাত্র ভাই ক'টা এবং তাঁর ছেলে “রমেশ” ছাড়া তিনি সংসারে কারুর প্রতি প্রসন্ন ছিলেন না। আজ হয়তো যার সঙ্গে হেসে কথা কইছেন, আলাপ ক'চ্ছেন, কাল দেখি তাঁর সঙ্গে “রাম-রাবণের” যুদ্ধ লাগিয়েছেন। আরে, বাপরে—সে

যুদ্ধ হাতাহাতি নয়, অস্ত্রশস্ত্র নিয়ে নয়,—সে তার চেয়ে ভীষণ,—  
বাক্যযুদ্ধ! এ রকম যুদ্ধটা প্রায়ই হ'ত আমার কাকীদের সঙ্গে। শুধু  
কাকীদের সঙ্গে নয়, আবশ্যিক হ'লে তিনি কাকাদেরও সম্মুখযুদ্ধে  
আহ্বান ক'র্তেন! ছোট পিসি “চিরজয়ী”! কেঁদে হোক—মাথা খুঁড়ে  
হোক অথবা প্রতিদ্বন্দীকে ভীষণ বাক্যবাণে পরাস্ত করে তা'কে পৃষ্ঠ-  
প্রদর্শন করিয়েই হোক,—ছোট পিসির জয় অনিবার্য!

আর এক মহৎ গুণ ছিল পিসিঠাকুরগের। তিনি পরের নামে  
“লাগাতে” বড় ভালবাসতেন। সেটা বেশীর ভাগ স্মৃতিধে হ'ত  
বাপের কাছে। পিতামহ একে ভীষণ “কান-পাতলা” ছিলেন;  
তার ওপোর ছোট মেয়ের কথা তিনি বেদবাক্য বলে মানতেন।  
মোট কথা, বাঁড়ুয্যে সংসারটাকে ভেসে চূড়ে “তচ-নচ” করবার  
জন্তেই ( শুভক্ষণেই বলুন আর অশুভক্ষণেই বলুন ) ছোট পিসিমা  
বিধবাবেশে বাপের বাড়ীতে উদয় হয়েছিলেন।

আমার মা এবং আমি—এই দুটা প্রাণী ছিলুম ছোট পিসির  
চক্ষুঃশূল। আমার স্থির বিশ্বাস,—আমরা দুই মায়ে-পোয়ে যে ঠাকুরদার  
এত নিষেষের পাত্র হ'য়েছিলুম,—ঐ ছোট পিসিই তার একমাত্র কারণ।  
সত্য কথা ব'লতে কি, ছোট পিসিকে দেখলেই ভয়ে আমার বুকটা  
কেঁপে উঠতো! হুড়োহুড়ী, দৌড়োদৌড়ি, লাকালানি, ঝাঁপাঝাঁপি,  
বাড়ীর সকল ছেলে যেমন ক'র্ত, আমিও ( এই বাড়ীর ছেলে—)  
সেইরকমই ক'র্তম। কিন্তু পিসিমা ব'লতেন,—“চের চের বদ্মায়েস  
ছেলে দেখেছি বাবা, আত্মারামের জুড়ি আর কোথাও দেখিনি।”  
ঠাকুরদাকে স্পষ্টই ব'লতেন—“দাদার ঐ ছোটকা ছেলেটা যদি আমার  
দিয়, সুখু ( অর্থাৎ আমার বৈমাত্র তৃতীয় ও চতুর্থ ভ্রাতা—

যাদের সঙ্গে আমি খেলাধুলো কর্তুম, বেড়াতুম, উঠতুম-বসতুম ) ছ'জনের সঙ্গে বেশী মেশে, তাহ'লে আমার ছেলে ছ'টোই গোল্লায় যাবে—তা আমি ব'লে দিচ্ছি!" ঠাকুরদার মনে মনে ইচ্ছে থাকলেও একবাড়ীতে থেকে সব রকমে তো ভিন্ন থাকবার উপায় নেই। তবে যতটা সম্ভব, আমি বাধ্য হয়ে বৈমাত্র ভায়ের কাছ থেকে দূরে থাকতুম।

আমার সমস্ত বিষয়ের তত্ত্বাবধান আমার মা কর্তেন। ছেলেদের পড়বার ঘর ছটো। কিন্তু মার পরামর্শে বাবা আমাকে তাঁর বৈঠকখানায় প'ড়তে বসাতেন। ব'লেছি,—বাবা অতি নিরীহ লোক ছিলেন। কোনো দিকে তাঁর তীক্ষ্ণদৃষ্টি ছিলনা। ছেলেরা কে কি ক'ছে, না ক'ছে, বাড়ীতে মেয়েরা কে কার সঙ্গে কি বিষয়ে ঝগড়া ক'লে, কে কা'কে কি ব'লে—কি অপমান ক'লে,—কোনো কথায় তিনি কাণ দিতেন না। সকালে উঠ'তেন, একটু "হেদো" কিম্বা "গোলদিঘীতে" পায়চারি করে আসতেন, তার পর বৈঠকখানায় বসে বেলা ৯। টা পর্যন্ত খপরের কাগজ প'ড়তেন, দশটার সময় স্নানাহার' সেরে বেলা এগার'টার সময় কাছারী যেতেন। কাছারী ফেরৎ গড়েরমাঠে বা ইডেন্ গাডেনে খণ্টাখানেক বেড়িয়ে সন্ধ্যা নাগাৎ বাড়ী এসে মুখহাতপা ধুয়ে কিঞ্চিৎ জলযোগ করে—বৈঠকখানায় ছ' একজন বন্ধু যদি কেউ এলো তো তাঁদের সঙ্গে ছটো সাহিত্যিক বা রাজনৈতিক কিম্বা দেশবিদেশের গল্পগুজব ক'লেন, কেউ না এলে একখানা বই নিয়ে রাত্রি দশটা পর্যন্ত তন্ময় হ'য়ে প'ড়লেন।

আমার জন্মে একটা মাষ্টার রেখেছিলেন। তিনি সকালে এক ঘণ্টা সন্ধ্যায় ঘণ্টা দেড়েক পড়িয়ে যেতেন। রাত্রে মাষ্টার চলে গেলে

আমি প'ড়তে প'ড়তে হয়তো কোনো দিন বইয়ের ওপোর মাথা রেখে ঘুমিয়ে পড়তুম,—নয়তো বই বন্ধ করে নটা না বাজতে বাজতেই বাবার কাছে একটা তাকিয়া টেনে নিয়ে শুয়ে ঘুমিয়ে পড়তুম। বাবা বাড়ীর ভেতর যাবার সময় “রাখ্‌দা” (বাবার সেই পুরোণো খানসামা) আমাকে ঘুমন্ত অবস্থায় তুলে নিয়ে বাড়ীর ভেতর শুইয়ে দিয়ে আসতো। এর জন্তু ঠাকুন্দা এবং পিসিমার কাছে বাবাকে অনেক কথা শুনতে হ'ত। পিসিমা একদিন মাকে স্পষ্ট ব'লে ফেলেন—“এ কোন্‌ দিশি কথা বো? রোজ রাত্তিতে চাকর ছেলে ঘাড়ে করে এনে অন্তরে শোবার ঘরে ঢুকবে! এমন তো হতচ্ছাড়া কাণ্ডকারখানা কোথাও শুনিনি!”

সেইদিন থেকে রাত্রে পড়াশুনোর পরই আমাকে ঘুমে টলতে টলতে বাড়ীর ভেতর অতি কষ্টে একা শুতে যেতে হ'ত। যেদিন নেহাৎই ঘুমিয়ে পড়তুম, সেদিন বাবা—আমার ঘুমন্ত দেহটাকে ঘাড়ে করে বাড়ীর ভেতর নিয়ে যেতেন,—আর সেই আধ-ঘুম আধ জাগরণের মাঝখানে মায়ের বকুনি খানিকটা বেশ শুনতে পেতুম।

হঠাৎ শুনলুম—দিদিমার খুব বাড়াবাড়ী অসুখ! সংবাদ পাবামাত্রই মা বাগবাজারে চলে গেলেন। আমি স্কুল কামাই হবে বলে মায়ের সঙ্গে গেলুম না। কিন্তু দিন-দুই-তিন পরে একদিন সন্ধ্যার সময় বাবা কাছারী থেকে এসেই আমাকে সঙ্গে করে নিয়ে আমার বাড়ীতে গেলেন। সেই রাত্রে দিদিমার গঙ্গালাভ হ'ল।

মানার বাড়ীর অর্থাৎ মাতামহের সম্পত্তির মধ্যে বাগবাজারের ঐ বৃহৎ পুরাতন জীর্ণ অট্টালিকা,—বোধ হয় ত্রিশ বৎসর মেরামত হয়নি। আমার মায়ের ঠাকু'মা অর্থাৎ বাগবাজারের “ডাক-সাইটে”



“বড়গিন্নী” যতদিন জীবিতা ছিলেন, ততদিন মাঝে মাঝে “এখানে সেখানে” একটু আধটু মেরামত হ’ত ! কিন্তু তাঁর স্বর্গলাভের পর—বালি চূণ সুরকী এক সরাও এই প্রাসাদতুল্য অট্টালিকাকে হ’তুর—বাছড়—চামচিকে—পায়রাদের কবল থেকে রক্ষা করবার জন্ত ঢোকে নি । সম্পত্তির মালিক আমার মাতামহী, তিনি তো কপর্দকশূণ্ডা ব’ল্লেই হয় । মাতামহের জ্ঞাতিকুটুম্ব অনেকে এই ভিটেতে মাথা গুঁজে আছেন বটে, কিন্তু তাঁরা পরের বাড়ী মেরামত-বাবদে পরমা খরচ ক’র্কেনই বা কেন ? তাঁর ওপর—বাড়ীখানি তিন চারবার বন্ধক পড়েছে । না পড়বেই বা কেন ? দেনা না ক’ল্লেই বা মাতামহীর পেট চলে কিসে ? বাবা অনেকবার ব’লেছিলেন—“এত বড় বাড়ী রেখে দরকার কি ? বিক্রী করে নগদ টাকা যা পাবেন—তা থেকে দেনা শুধে যা বাকী থাকবে,—তাঁর সুদে সচ্ছন্দে একটা ছোটোখাটো বাড়ী ভাড়া নিয়ে থাকবারও সুবিধা হবে, নিজের ভরণপোষণও সচ্ছন্দে চলবে ।” মাতামহী সুপরামর্শের সারস্ব নিজে বুঝলে কি হবে ? অন্যান্য হিতাকাঙ্ক্ষী জ্ঞাতিকুটুম্ব—( বিশেষতঃ যারা ঐ ভিটেতে নিঃখরচায় দিব্যি কালযাপন ক’রছেন—) তাঁকে স্পষ্টাক্ষরে বুঝিয়ে দিলেন,—“ঋগুরের ভিটে নিজে হাতে করে বেচতে নেই । বন্ধক দিতে দিতেই তোমার জনমটা কেটে যাবে তো ! তাঁরপর—যা হবার হবে—তুমি তো দেখতে আসবে না । কিন্তু তোমার দ্বারা যেন ঋগুরের নাম লোপ না পায় ।”

এমন যুক্তিপূর্ণ কথার ওপর আর কথা আছে—না—থাকতে পারে ?  
আমি দৌহিত্র সূতরাং অপুত্রক মাতামহের বিষয়ের একমাত্র  
উয়ারিসান আমি ।

## দশম পরিচ্ছেদ ।

দিদিমার “চতুর্থীর” শ্রাব্দের পরও মাকে প্রায় তিনচার মাস বাগবাজারে থাকতে হয়েছিল। কারণ,—বাড়ীখানা এবং তৎসংলগ্ন বিঘেখানেক জমী—উত্তরাধিকারত্ব-সূত্রে যখন পাওয়া গেছে, তখন এর ব্যবস্থা তো একটা করা চাই। আমি শনিবার দিন আড়াইটের সময় স্কুলের ছুটী হ'লে মামার বাড়ী যেতুম, সোমবার সকালে বাড়ী ফিরে আসতুম। পালে পার্কণে স্কুল বন্ধ থাকলে, ছুটীটা মামার বাড়ীতেই কাটত। দিদিমা মর্কীর প্রায় মাসখানেক পরেই গ্রীষ্মের লম্বা ছুটি দু'মাস পাওয়া গেল। সেই পাকা ছুটী মাস আমি দস্তুরমত বাগবাজারবাসী হয়েছিলুম।

“বাগবাজার !” সহরের সেরা জায়গা ! যখন খুব ছোট ছিলাম—অর্থাৎ যখন বিদ্যোভাগর মশায়ের উপক্রমণিকার “ব্যঞ্জন-সন্ধি” আয়ত্ত হয়নি,—তখন “বাগবাজার” নাম শুনে মনে ক'র্তুম—সেখানকার

বাজারে বুঝি “বাঘ” পাওয়া যায় ! উপক্রমণিকার সন্ধি বিচ্ছেদ ক’ত্তে শিখে বুঝলুম—“বাক্—ছিল—বাজার” বাগবাজার ; অর্থাৎ কিনা “অত বাক্য—বাক্‌চাতুরী—বাত্তেলা আর বকাটে”—ক’ল্কেতা সহরে আর কোথাও এমন অদম্যব রকম প্রচুর নয়, যেমন এই উত্তর পল্লীতে ! সেই জন্তু সুবিবেচক সুশীলজনগণ অনেক গবেষণা করে তবে এ স্থানটির নাম রেখেছেন “বাগবাজার !” সে সময় একটা প্রবাদই চলিত হয়েছিল—

“সখ্—সৌখীন—রঙ্গ—বাহার—

এসব নিয়েই বাগবাজার !”

কথাটা নেহাৎ বাজে নয় । সহরে সখের যাত্রা, থিয়েটার, পাঁচালী, হাফ-আখ্‌ড়াই, কবি,—এ সবার সৃষ্টি বাগবাজারে ! আজ সহরে—( শুধু সহরে বলি কেন,—সমগ্র বাংলাদেশে ) এই যে আঁতুড়ের খোকাটা পর্য্যন্ত “ভীষণ এ্যাক্টর”—ভরস্কর থিয়েটারী “আর্ট-অভিজ্ঞ” এবং ভয়াবহ গোছের সবজাস্তা নাট্য-সমালোচক এবং **প্রযোজক** হয়ে নাট্য-জগতে ভীষণ ভূমিকম্প লাগিয়ে বেড়াচ্ছেন, এ সবার নটগুরু, জনক, সৃষ্টিকর্তা, প্রতিষ্ঠাতা **গিরিশচন্দ্র, অর্ধেন্দু, অম্বতলাল** প্রভৃতি নাট্যজগতের মহাপুরুষগণের উৎপত্তি এই বাগবাজারে ! দেশ-বিখ্যাত মোহনচাঁদের পাঁচালী হাফ-আখ্‌ড়াইয়ের দলের উদ্ভব এই বাগবাজারে ! সদর রাস্তায় “আট-ঘোড়ার” জুড়ী-ইঁাকিয়ে প্রত্যহ অবিঘ্না-মোসায়েব-পরিবৃত “কাপ্তেন বাবু,—যিনি ( আধুনিক প্রচলিত “বেল্” বা “হর্গ্” অভাবে ) রামশিঙ্গে বাজিয়ে সহর সরগরম করে রাস্তার “হুধারী সারি সারি” খরিদারের

প্রত্যাশায় দণ্ডায়মানা বারান্দাদের মুটো মুটো টাকা ছুঁড়ে মার্ভে মার্ভে মহানন্দে “কাপ্তেনী” ক’ন্তে ক’ন্তে যেতেন এবং বৎসর পাঁচেকের মধ্যে নগদ ত্রিশ চল্লিশ লক্ষ টাকা উড়িয়ে দিয়ে বাংলা দেশে প্রবাদ বাক্য রচনা করেছিলেন—

“পাঁচ হাজারেই বড়লোক ঘুঁটেকুড় নীর

ব্যাটা,—

লাখ টাকায় বামুন ভিড়ী,

সে—টাকায় মারে ব্যাটা—

সেই “কাপ্তেন বাবুর” জন্ম এই বাগবাজারে! ব্রাহ্মণবংশে মা লক্ষ্মীর অপমানকারী এই সব মহাপ্রভুরা জন্মেছিলেন বলে—মা লক্ষ্মী চিরদিনই ব্রাহ্মণজাতির প্রতি নিদ্রা।

ক’ল্কেতার শোভাবাজার শ্রামবাজার—এ’ছোটো জায়গা বাগবাজারেরই অঞ্চল! স্মতরাং বাংলাদেশে (aristocracy) আভিজাত্য-গৌরবে—বড়লাহুবি চালে—ধনে-মানে কুলে-শীলে—নানডাকে শোভাবাজারের রাজবংশই শীর্ষস্থান অধিকার ক’ন্তেন। বাগবাজারের “অভিমন্যু বধ” সখের যাত্রার গান তখন বাংলা দেশের অবলবৃদ্ধবনিতার মুখে মুখে ছিল—

“তুমি যে মাধবীলতা আমি যে তমাল,

তোমার বিরহে প্রিয়ে থাকি কিসে বল ;

মণিহারা হয়ে ফণী বাঁচে কি কখনো—”

এ গান সুদূরদেশবাসীরা—হঠাৎ সহরে বাবুরা জানতে না পারেন, কিন্তু ক’ল্কেতার বনেদী বংশের অনেকেরই জানা আছে।

এদিকে সখ-সোখীন-রঙ্গ-বাহার এ সবে মূল্যধার হিসেবে “বাগ-বাজার” যেমন বিখ্যাত, আর এক বিষয়ে “বাগবাজার” কল্কেতার সকল পল্লীকে টেকা মেরেছিল। সেটাই হচ্ছে—নেশা। বাংলার আবিপত্য স্থাপন করে ব্রিটিশ গভর্নমেন্ট আবগারি বিভাগে চট করে যে এতটা আয় বাড়িয়ে ফেলতে সক্ষম হয়েছিলেন,—তদানীন্তন বাগবাজার-নিবাসীরা প্রধান কারণ! মদ, গাঁজা, চরস, চণ্ডু, আফিং, পঞ্চরং, গ্রাফ-সেট,—এ সবতে এত মেডেলিষ্ট ( Medalist ) সংখ্যা সহরের আর কোথাও ছিলনা। বিশেষতঃ এমন গঞ্জিকাভক্ত শুধু বঙ্গে নয় সমগ্র ভারতে আর কোথাও ছিল কিনা সন্দেহ। কিম্বদন্তি এইরূপ—বাগবাজারের অষ্টম বর্ষীয় শিশুটী পর্যন্ত দিনরাত গাঁজার ধোঁয়ায় “বোম্বান্” ( Baloon ) হয়ে থাকে। শূন্যমার্গে কাকেও উড়তে দেখিনি, তবে গল্পছলে দিদিমা একদিন ব’লেছিলেন—বেশ মনে আছে—“আমাদের ঐ “দেসো”—( অর্থাৎ আমার মাতামহের নম্পর্কে ভ্রাতৃপুত্র—১৪।১৫ বছরের আনারই বয়সি ছোকরা ) রাত্তির বেলা ড্যানা বার করে আকাশে ফর্ ফর্ ক’রে ওড়ে,—আমি স্বচক্ষে দেখেছি।”

দিদিমা হাজার হোক গুরুজন,—মায়ের মা ; তাঁর কথা তো অবিধাস কর্কার কোনো কারণ নেই। আমি “দেসো” মামাকে একদিন হাতে গায়ে ধরে খুব আগ্রহসহকারে এবং seriously ব’লেছিলুম—‘তোমার পায়ে পড়ি দেসো মামা ! রাত্তিরে যখন তুমি উড়বে, আমাকে একবার ডেকে দেখিও না ! দোহাই মামা—তোমার—”

দেসো মামা চক্ষু বুঁজে কি ভাবলেন জানিনা ! খানিকক্ষণ অর্ধ-

নিমীলিত নেত্রে আমার দিকে চেয়ে ব'ল্লেন—“তুই ছেলেমানুষ, তুই কি গ্যাসের বাঁজ সহ্য ক'র্ন্তে পার্কি ?”

“কিসের গ্যাস ?”

“ওড়বার গ্যাস—যার জোরে বোঁ করে আকাশে উড়ি !”

“তা—তুমিও তো ছেলেমানুষ ; আমার চেয়ে কত আর বড় ? তুমি সহ্য কর কি ক'রে ?”

“আরে—আমরা হ'লুম বাগবাজারের ছেলে !”

“আচ্ছা মামা—সত্যি কি তোমার ডানা আছে ?”

“আছে বই কি ?”

“কই ? দেখি না একবার !”

“দেখবি ?” ব'লেই দাসু মামা কাপড়ের কোঁচা (যা দিয়ে তিনি খালি গা থেকে বেড়াতেন ) কোমরের ওপর না'বিয়ে ছ'দিককার পাঁজরা ছটো দেখিয়ে ব'ল্লেন—“এই দ্যাখ্—আমার ছ'পাশে ড্যানা ছটো এখন চামড়া ঢাকা রয়েছে !”

চক্ষিণ ঘণ্টা দাসু মামা কোঁচার কাপড়ে গা থেকে বেড়াতেন, স্মুতরাং তাঁর স্বরূপ দেখবার সুবোগ আমার বড় ঘটে উঠতো না ! সেদিন আমার প্রতি সদয় হয়ে যখন গাত্রবস্ত্র উন্মোচন করে দেখালেন, সেই অপরূপ দেহ দেখে আমি সত্যিই বিস্মিত—স্তুস্তিত হয়ে গেলুম ! ঠিক যেন একখানি কঙ্কাল দেহ ! বুকের পিঠের পাঁজরার হাড়গুলি একটি একটি করে গুণে নেওয়া যায়। মাত্র একখানি ফ্যাকাশে রংয়ের পাতলা চামড়া ঢাকা। দেখে মনে হ'ল, মামা ডানার সাহায্যে উড়তে সক্ষম হো'র আর নাই হোন, একটু ফাঁকা জায়গায় যদি তিনি হাত পা

মেলে দাঁড়ান, হুমুমান-জনক পবনদেব অতি অল্প আয়াসেই তাঁকে শূণ্ঠ-পথে উড়িয়ে নিয়ে যেতে সক্ষম ! শুন্তে পাই, হাতে-খড়ি হবার পর বর্ণপরিচয়ের সঙ্গে সঙ্গেই দাসু মামার আবগারি-পরিচয় হয় ; অর্থাৎ তিনি পাঠশালে গুরুমহাশয়ের স্বহস্তে সজ্জিত ফৌজদারী-বালাখানার তামাক (সবে মাত্র ধরিয়ে তিনি হঠাৎ বিশেষ কার্যোপলক্ষে কলিকা শুক হাঁকাতী বেখে বাড়ীর ভিতর গেছেন কিম্বা দাসু মামা অথবা কোন “পড়ুয়াকে” কামাক সেজে ধরিয়ে আন্তে আদেশ করেছেন সেই সময় ছুঁচার টান টেনে) প্রথম অভ্যাস করেন। পাঁচ ছয় বৎসরের শিশুর তামাক টানার এই অভ্যাস থেকে বছর পাঁচ ছয়ের মধ্যে গাঁজায় দগ মারার এমন শক্তি জন্মেছিল যে, কলকাতার সহরে “মেডেলিষ্ট দেসো” নামেই দেসো মামা সুপরিচিত হয়েছিলেন।

পূর্বেই বলেছি, মামার বাড়ীতে মাতামহের নিজের ভাই, ভাইপো, ভাগ্নে বা ভগ্নী কেউ ছিলেন না। যাঁরা থাকতেন তাঁরা সবাই দূর সম্পর্কীয়। ওরই মধ্যে মাতামহের-নিকট সম্পর্কে পিস্তুতো ভাই তারাচাঁদ গাঙ্গুলী ছিলেন—বাড়ীর কত্তা। বিশেষতঃ বৃদ্ধ মামার বাড়ীটার সমগ্র বড়গিন্নীর অর্থাৎ মায়ের ঠাকুরমার তিনিই অভিভাবকস্বরূপ ছিলেন। বড়গিন্নী এবং আমার দিদিমা তাঁকে বড়ই বিশ্বাস ক’তেন। তাঁর দেহরক্ষার পর তারাচাঁদই দায়ে আদায়ে আমার মাতামহীকে দেখতেন শুন্তেন,—বিষয় সম্পত্তির তত্ত্বাবধান ক’তেন। মাতামহীর সংসার চালাবার টাকার দরকার হ’লে ধার করে টাকা সংগ্রহ করে আন্তেন। যখন-তখন তিনি দিদিমাকে আশ্বাস দিয়ে বলতেন—“তোমার কোন ভাবনা নেই বৌদি ! তুমি যতদিন বেঁচে আছ—রাজার হালে কাটিয়ে যাও !”

তার দাছ ( এই ব'লে আমি তাঁকে ডাকতুম ) বাগবাজারের একটা ঝালু লোক ! তাঁর পৈতৃক অবস্থা অতি হীন ছিল । লেখাপড়া শেখবার জন্যে পিতৃমাতৃহীন অনাথ তারাচাঁদ বাল্যকাল থেকেই বাগবাজারে এই মুখ্যো পরিবারে আশ্রয় লাভ করেন । সৌখীন বড়মানুষের বাড়ীতে বাস করে আর অবাধে বাগবাজারের নামজাদা বখাটে ছেলেদের সঙ্গে মিশে লেখাপড়া বতদূর হওয়া সম্ভব তারাচাঁদ দাদামহাশয়ের ততদূরই হয়েছিল । তিনি গৌরমোহন আড্ডির স্কুলে ফিফ্‌থ্ ক্লাশ পর্যন্ত প'ড়লে কি হবে, ক্লাশ হিসেবে বিছের ওজন ক'লে দেখা যায়,—নাইন্‌থ্ ক্লাশের বিছোও তাঁর অর্জন হয়নি । স্তরাং অতি কষ্টে ১২ টাকা মাইনের এক “টালি” ক্লার্কের কাজ তিনি জোগাড় করে নিয়েছিলেন । টালি ক্লার্কের কাজ কিছুই না,—কেবল ( Dock ) “ডকে” জাহাজ ভিড়লে আমদানী-রপ্তানীর মাল গুণ্‌তি করা । চতুর তারাচাঁদ এই টালি ক্লার্কের কাজ পেয়ে ছ'টাকা বেশ উপরি রোজগার ক'তেন । তারাচাঁদের উপরি রোজগারের একটা গল্প বলি ।

সেকালে বিলেত থেকে কোনো জাহাজ কলকাতার বন্দরে এলে খাস ( Raw ) গোরা কাপ্তেন ছ'হাতে টাকা খরচ ক'ত । সেই থেকে আমাদের বাংলাদেশে “কাপ্তেন” ও “কাপ্তেনী” কথা ছটোর সৃষ্টি । এই সব গোরা কাপ্তেন জাহাজ নিয়ে যে ক'দিন এখানে থাকতো, বাস্তবিক সে ক'দিন কোম্পানীর টাকা নিয়ে তা'রা যেন ছিনিমিনি খেলতো । তখন তো সাহেব জাত ভারতবর্ষে বাণিজ্যের মূলমন্ত্র বোঝেনি—always take, never give অর্থাৎ ভারতে বিশেষতঃ বাংলার গিয়ে “নোবো রাম—দোবোনা চাঁদ” হলেই “বাণিজ্যে বসতে



লক্ষ্মী। তখনকার সাহেবরা নিজেরাও যেমন পয়সা রোজগার ক'ত্ত, সেই সঙ্গে তাদের কর্মচারী দেশী লোকেরাও কিসে ছ'পয়সা পায়—নিজেরাই সেই ব্যবস্থা করে দিত।

বিগিতি জাহাজ ভিড়লেই জাহাজের আমদানী-রপ্তানী মাল ছাড়া কাপ্তেনের নিজের ইচ্ছেমত অনেক জিনিষ কেন্‌বার দরকার হ'ত! সেই সব জিনিষ সরবরাহ ক'ত্ত,—এই দেশের “ঠিকেদার” বাঙ্গালীরা। দরদস্তুর নেই,—কাপ্তেনের দরকার হয়েছে—“অমুক” জিনিষটা চাই। যা' দাম চাইবে,—অম্মি সঙ্গে সঙ্গে নগদ টাকা। তুখোড় তারাটাদ “yes, no, very well”-গোছ দুটো চারটে ইংরেজি কথা ক'য়ে—এই রকম কাপ্তেন ধরে মাঝে মাঝে বেশ ছ'পয়সা উপরি রোজগার ক'ত্তেন। তবে বাংলাদেশে তারাটাদের মত তুখোড় লোকেরও ত অভাব ছিলনা। তার ওপর “কাপ্তেনকে” মাল সরবরাহ করে মোটা রকম লাভ ক'ত্তে হ'লে বেশী টাকার দরকার; সে রকম টাকার সামর্থ্যও তারাটাদের ছিলনা। সুতরাং, ছ'দশ টাকার মাল বেচে তারাটাদ আর কত লাভ ক'ত্তে পারেন ?

তারাটাদকে একদিন একজন কাপ্তেন ব'লে—“বাবু! আমাকে একটা বিল্লী (বেরাল) দিতে পার? জাহাজে ভারি ই'তরের উৎপাত হ'য়েছে!” তারাটাদ পরদিন একটা বাঘা রংএর বড় বেরাল ধরে থলেতে পুরে এক ঝাঁকামুটের মাথায় চাপিয়ে জাহাজে “কাপ্তেনের” কাছে নিয়ে গিয়ে হাজীর। বেরালটার বাঘের মত রং আর হুটপুট চেহারা দেখে কাপ্তেন তো মহা খুসী। কাপ্তেন জিজ্ঞাসা ক'লে—“কত টাকায় কিনলে?” তারাটাদ হঠাৎ ব'লে ফেলেন—

“পঁচিশ টাকায় ?” ব’লেই তারাচাঁদের মুখ শুকিয়ে গেল ! ভাবলেন, হয়তো কাপ্তেন সাহেব বুঝতে পেরেছে—তারাচাঁদ বাড়ী থেকে ধরে এনে মিথ্যা কথা ব’লছে ! কাপ্তেন তখনি পেন্টুনের পকেটে হাত ঢুকিয়ে চল্লিশ টাকা বের করে ব’লে—“এই নাও বিল্লীর দাম ২৫ টাকা, তোমার বখসিস্ পনেরো টাকা ! আরও গোটা কতক যদি এনে দিতে পার তো বড় ভাল হয় !”

তারাচাঁদ বাড়ী ফিরে গিয়ে পাড়ায় বেরুলেন বেরাল ধ’ত্তে । যেখানে যার পোষা (ওরই মধ্যে বেশ ছুটপুট) বেরাল দেখেন,—তারাচাঁদ ধরে নিয়ে তা’কে রকমারি চিত্রবিচিত্র করে কাপ্তেনের কাছে বিশ-পঁচিশ-তিরিশ-চল্লিশ এমন কি পঞ্চাশ টাকায় বেচে আসেন । তারাচাঁদের এই “বেরাল ধরার” ব্যাপারের অর্থ কেউ বুঝতে পারেনা । জিজ্ঞাসা কলেই ব’লতেন “বেরালের উৎপাতে বাড়ীতে টেঁকা দায় হয়ে উঠেছে । দুধ খেয়ে রান্নাঘরে ঢুকে হাঁড়ীকুঁড়ী ভেসে মাহ্ খেয়ে জ্বালাতন করেছে । তাই বাড়ীতে বেরাল দেখলেই তা’কে খলেতে পুরে মাঠে নিয়ে গিয়ে ছেড়ে দিয়ে আসি !”

তারাচাঁদের বেশী নজর ছিল—বারাঙ্গনা-পালিত বেরাল-কুলের ওপোর । গেরোস্তো বাড়ীতে “পাতের কাঁটা-খাওয়া” ছুধের বাটী-চাটা বেরালগুলো গেরোস্তো গরীবের মতই শ্রীহীন,—দুর্কলাকার । বারাঙ্গনাদের যত্নে পালিত, দুধে-মাছে পুষ্টদেহ বেড়ালগুলির প্রতি তারাচাঁদের প্রথর দৃষ্টি । তারাচাঁদের বেরালের ব্যবসার জ্বালায় বারাঙ্গনা—মহলে ভীষণ কান্নাকাটা পড়ে গেল । সন্ধ্যার পর কুপল্লীতে তারাচাঁদ প্রবেশ কলেই অবিচারী সকলেই যে যার বেরাল সামলাতে ব্যতিব্যস্ত হয়ে প’ড়তো !

ক্রমে এমন অবস্থা বাগ্‌বাজার-শ্রামবাজার অঞ্চলে দাঁড়ালো যে, সকলেই যে যার পোষা বেরাল রীতিমত শিকল অথবা দড়ী দিয়ে কুকুরের মত বাড়ীতে চ'খের সামনে বেঁধে রাখতো! এই কার্যে তারাটাদ কিছুদিন বেশ ছ'পয়সা রোজগার করেছিলেন। বছর কতক পরে তারাটাদ টালি ক্লার্কের কাজ ছেড়ে বাগ্‌বাজারের সুবিখ্যাত এটর্নী রসিক মিত্রের অধীনে মুহুরী বা কেরাণী বা দালালের কর্মে নিযুক্ত হ'লেন। সোণার সঙ্গে সোহাগা মিশে গেল।

## একাদশ পরিচ্ছেদ ।

তারাটাদ ওরফে তারা দাহর শক্রমুখে ছাই দিয়ে ছ'টা ছেলে আর চারটা মেয়ে । ছ'টা ছেলে ছ'টা রত্নবিশেষ । চারটা মেয়ের তিনটা বিধবা,—তাঁরা ছেলেপুলে নিয়ে বাপের স্বন্ধেই ভর করেছিলেন । মেছোটীর অবস্থা ওরই মধ্যে সচ্ছল এবং তিনি সধবা । কাশীপুরে খন্ডুরাময়েই তিনি থাকতেন,—বাপের বাড়ীতে মাঝে মাঝে আসতেন । তারা দাহ নিজে খুব সখের লোক ছিলেন । সখের যাত্রার দলের তিনি একজন পাণ্ডা ; চোগা-চাপকান পরে “জুড়ী” গাইতেন । বড়োবয়সেও তিনি “যাত্রার জুড়ী” সেজে গান গাইছেন, কানে হাত দিয়ে “তান মার্ছেন” আমি নিজে দেখিছি । গলাখানি তাঁর বেশ মিষ্টি ছিল ।

প্রত্যহ সন্ধ্যার পর অফিস থেকে বেরিয়ে হাইকোর্টের ধার থেকে হেঁটে বাগ্‌বাজারে চলে আসতে আসতে তারা দাছ পথে যতগুলি পাইকিরি দিশি মদের দোকান ছিল, সব ক'টীতে ঢুকে ঢুকে এক একপাত্রে “দাঁড়া ভোগ” মেরে মজ্‌গুল হয়ে বাড়ী ঢুকতেন। প্রত্যহই আসবার সময় একটা না একটা কিছু বাজার করে নিয়ে আসতেন। ইলিশ মাছের সময় ইলিশ মাছ, তপসে মাছের সময় তপসে মাছ; কোন দিন এককুড়ী হাঁসের ডিম, কোন দিন সের ছই মাংস! যে দিন পয়সার বেজায় টানাটানি হ'ত, সেদিন অন্ততঃ পয়সা ছই-তিনের পেঁয়াজ আর ছ-তিন “ভাগা” কুঁচোটিংড়ী মাছ হাতে নিয়ে বাড়ী ঢুকতেন। তারা দাছ মন্ত প্রত্যহ খেতেন বটে, কিন্তু তাঁকে কখনো বেএজার হয়ে রাস্তায় টলে পড়তে কেউ দেখেনি,—কিন্মা কখনো তিনি বাড়ীতে এসে মাতাল হয়ে শুয়ে প'ড়তেন না বা মাতলামী ক'র্তেন না। তবে একটা মহাদোষ ছিল তাঁর,—মদ খেলে ভারি বকতেন! বাড়ী ঢুকে একটা না একটা ছুতো ধরে সেই যে ব্যাড়র-ব্যাড়র ক'র্তে শুরু ক'র্তেন, যতক্ষণ না আহাৰাদি সেরে (রাত্রি বারোটটা সাড়ে বারোটার সময়) বিছানায় শুয়ে ঘুমিয়ে পড়তেন, ততক্ষণ পর্যন্ত সে ব্যাড়-ব্যাড়ানি আর খামতো না!

বলেছি—ছয়টা পুত্র তাঁর—ছয়টা রত্ন! বড়টা ময়দার কলে বিল্ সরকারের কাজ ক'র্তেন, কিন্তু জীকে নিয়ে তিনি এমনি ব্যতিব্যস্ত হয়ে প'ড়তেন যে সব সময় কোম্পানীর কাজ ক'র্তে যেতে ফুরসুৎ পেতেন না। মাসের মধ্যে ১৬:১৭ দিন বাধ্য হয়ে তাঁকে অফিস কামাই ক'র্তে হ'ত; কারণ, তাঁর “পরিবারের” নিত্যই ব্যায়রাম। আজ বেজায়

মাথা ধরেছে, কাল পেট কনকন ক'চ্ছে, পোরণ্ড গা-গরম হয়েছে, তোরণ্ড ফিক-বেদনায় অস্থির হয়ে পড়েছে, এইরকম বড়মামীর একটা না একটা ব্যায়রাম দেহে লেগে আছেই। বড় মামা হরিপদ গাঙ্গুলী (তারি-দাহর বড় ছেলে) স্ত্রীপুত্র নিয়ে বড়ই বিব্রত। হু'তিনবার চাকরী গিয়েছিল, কিন্তু তুখোড় তারাদাহর হাতে-ধরাধরি কান্নাকাটীতে নিকুপায় হয়ে ময়দাকলের বড়বাবু বড়মামার চাকরীটী বজায় রাখিয়ে দিয়েছিলেন। বড়মামা মদ-ভাং খেতেন না বটে,—( আগে খেতেন কি না জানিনা ) কিন্তু প্রত্যহ তিনি আধভরি ( এ-বেলা সিকিভরি; ও বেলা সিকিভরি ) অহিফেন সেবন ক'র্তেন। পাড়ার ছুটু ছেলেরা বলে,—“পদা গাঙ্গুলী কাঁচা পাকা ছই-ই টানে।” অর্থাৎ বড়মামা কাঁচা আফিংএর ড্যালা তো খেয়েই থাকেন, উপরন্তু নাকি স্ফুড়ুং করে খালধারে করিম খলিফার আড্ডায় ঢুকে ছচার টান “চণ্ডু” টেনেও আসেন। যা-ই হোক, মামার চেহারা দেখলে নেহাৎ গুলিখোর নেশাখোর বলে মনে হয়না। হবেই বা কেন ? বড়বাবুর হাতে পায়ে ধরে তারি দাহ বড়মামার ৪৫ টাকা মাইনে করিয়ে দিয়েছিলেন। এই ৪৫ টাকাটী বড়মামার নেশার খরচে, রাবড়ী, মালাই, বাগবাজারের রসগোল্লার বাবদে এবং বড়মামীর এবং তাঁর ছেলে-মেয়েদের আবদার মেটাতে নিঃশেষ তো হ'তই, উপরন্তু তারাদাহকে বড়ছেলের খরচের জন্যে কিছু ঘুষও মাসে মাসে দিতে হ'ত ! মেজ-মামা—সেজমামা কাজকর্ম কিছু ক'র্তেন না বটে, কিন্তু তাঁরা ছই ভাই যেন “জোড়া পেলাদ।” হু'ভায়ে বড়ই সস্তাব,—একত্রে ইয়ারকি দেন, একই দলের খিয়েটারে, সখের যাত্রায় অভিনয় করেন, গুন্তে পাই,

একত্রে—একই অবিজ্ঞা-বাড়ীতে যাতায়াত ও করে থাকেন, কাজের মনো,—বড়মানুষের ছেলে ধরে ছাওনোট কাটিয়ে দালানী খাওয়া। টাকা যা' রোজগার হয়, বাপ মা স্ত্রীপুত্র—( দুজনেই বিবাহিত এবং সস্তানের জনক )—সে টাকার মুখ দেখতে পায়না ! নগদ টাকা হাতে প'ড়লে—টাকার পরিমাণে ফুর্তির পরিমাণ বাড়তো আর সেই পরিমাণে দুই ভায়ের বাড়ী থেকে নিরুদ্দেশের দিন ধাৰ্য হ'ত ! মেজোটির নাম রামপদ,—সেজোটির নাম কৃষ্ণপদ । বাগবাজারের বখাটে শ্রেণীর মধ্যে “রাম—কেষ্টা” দুই ভাই ছিলেন নামজাদা । সাদা চোখে ( Sober ) নেশাশূণ্য অবস্থার দু'ভায়ের প্রণয় দেখলে বাস্তবিকই প্রশংসা না করে থাকা যেতেনা ! কিন্তু “রাম-কেষ্টা” ( অর্থাৎ মেজমামা সেজমামা ) যখন মাল টেনে তরিবৎ হ'তেন, তখন সে মুখে তাঁদের কাছে দাঁড়ায় কে ? মদ্যপান ক'লেই তাঁরা হাড়ীমুচীরও অধম হয়ে প'ড়তেন । প্রথমে পাড়াপ্রতিবেশীর সঙ্গে ঝগড়া—গালাগালি—মারামারি,—শেষে ( Handed over to police )—পুলিশে চালান ! তারা দাড় “গুওটা গুওটা” ক'ত্তে ক'ত্তে জামিন দিয়ে খালাস করে বাড়ীতে এনে “গুওটাদের” পূর্লেন বটে, কিন্তু তা'তেও কি নিস্তার আছে ? বাড়ী ঢুকেই—দু'ভায়ে প্রথমে বাপকে গালাগালি, তারপর বড় ভাইকে—তারপর বাড়ীর যে যেখানে আছে সবাইকে ( এমন কি আমার মাতামহীকে পর্য্যন্ত ) একধার থেকে অকথা ভাষায় গালি দিতে শুরু ক'লেন । কেউ যদি এসে প্রতিবাদ ক'লে,—বাস—আবার লঙ্কাকাণ্ড বেধে গেল । সব শেষে “রাম-কেষ্টা” দু'ভায়ে পরস্পরে মত্তাবস্থায় চুলোচুলি লাগিয়ে দিলেন । এ গুর চোদপুরুষান্ত ক'রে

ও এর বাহান্ন পুরুষ ধরে স্বর্গে পাঠায়। তারপর শেষরাত্রে,—হয় উঠোনে পড়ে ছ'ভায়ে নিশাযাপন করেন, নয়তো শোবার ঘরে ঢুকে যে ঘর স্ত্রীকে ঠ্যাঙ্গাতে শুরু ক'ল্লেন। ভয় ক'ত্বেন কেবল আমার মাকে। মা যখন আমার বাড়ী গিয়ে থাকতেন,—বাড়ীর আব-হাওয়া যেন ব'দলে যেতো। সবাই “দিদিমণি” ব'লতে অজ্ঞান,—সবাই “দিদিমণিকে” ভুঠ ক'র্বার জন্তে বাতিব্যস্ত। এই “ভগবানের অপূর্ব চিড়িয়াখানায়” নানা রকমের হিংস্র জীবজন্তুরা আমার মার কাছে যেন নিরীহ মেঘের মত থাকতেন।

তারাদাও “মা-মণি” ব'লতে ব'লতে কি যে ক'র্ষেন ঠিক ক'ত্বেনা পেরে খানিকক্ষণ বাড়ীময় ঘোরপাকই খেয়ে ফেলতেন। মা বাড়ীতে এসেছেন শুনে অফিস থেকে আসবার সময় বড়বাজার থেকে ভাল খাবার নিয়ে এসে মাকে সাধাসাধি ক'র্ভেন—“বড় সাধ করে বুড়া বয়সে তোর জন্তে দেখে শুনে খাবার এনেছি মা মণি! তুই তোর ছেলে ব'সে ব'সে খা,—মা-মণি, আমি দেখে চক্ষু জুড়োই,—জীবন সার্থক করি।” মা দূর থেকেই ব'লতেন “আমি ঠাকুরঘরে যাচ্ছি কাকা,—কাচা কাপড়ে বাজারের খাবার ছোঁবোনা। বিধু ঝির হাতে দিন, খোকা খাবে এখন! আমি মস্তুর নিয়েছি, বাজারের খাবার তো খাইনা!” মার ঈঙ্গিতে বিধু-ঝি খাবারের ঠোঙ্গা নিয়ে চলে গেল। তারাদাও তখন পুরো-দস্তুর রংএ রয়েছেন, তিনি মাকে সহজে ছাড়েন কি? বাজারের খাবার মা খাবেন না শুনে ব'ল্লেন—“কেন? দোষ কি মা-মণি! ভাল খোঁটা বামুনের তৈরি খাবার! আমি তোর গুরুজন, আমি ব'লছি—তুই খা,—তোর কোনো দোষ হবেনা! আচ্ছা—বড়বাজারের ঐ



খোঁটা বেটাদের খাবার না খাস্, আমি নবীন ময়রার দোকান থেকে ফাষ্টো কেলোশ রসগোল্লা সন্দেশ এনে দিই—”

মা। “মিছিমিছি কেন পয়সা নষ্ট ক’র্বেন কাকা? এই বুড়ো বয়সে খেটে খেটে দেহ মাটী করে পয়সা রোজগার ক’চ্ছেন, সে পয়সা বাজে খরচ কর্তে আছে?”

তারা। “বাজে খরচ? তুই—তুই আমার মা—আমার মা-মনি আমার মার পেটের ভায়ের বাড়ি যে হরিসাধন— (আহা! সে স্বর্গে গেল,—পুণ্যাত্মা,—আর আমি বেঁচে রইলুম—ব’লেই তারাদাহুর খানিক ক্রন্দন)—আমার আপন মায়ের পেটের ভায়ের মেয়ে তুই,—আমার শেলা, কুশীর চেরেও কত আদরের ধন তুই,—তাকে ছ’টাকার খাবার খাওয়াব, এতো আমার বাপচোদ্দপুরুষের ভাগ্যি!” তারাদাহু মায়ের ঘরের সামনে বারান্দায় দাঁড়িয়ে এইরকম বক্তৃতা শুরু ক’লেন, দেখতে দেখতে বাড়ীর বিস্তর ছেলেমেয়ে সেখানে জমায়েৎ হ’ল। মা সেই সুযোগে ঠাকুরঘরে নিঃশব্দে ঢুকে আছিকে মনো-নিবেশ ক’লেন। তারা দাহু একা আর কতক্ষণ ব’কবেন? ঠানদির ডাকাডাকি চীৎকারে অগত্যা ক্ষুধমনে নিজের ঘরে চলে গেলেন। বড়বাজারের সেই খাবার মা আমাকে খেতে দিলেন না। কতক বিধু ঝিকে দিলেন,—বাকী,—বাড়ীর অন্ত্যান্ত ছোট ছেলেমেয়েদের ডেকে বিধু ঝিকে দিয়ে বণ্টন করে দিলেন। কারণ, মাতালকে তিনি বড় ঘণা ক’র্তেন। মাতালের ছোঁয়া জিনিষ তিনি নিজে তো স্পর্শ ক’র্তেনই না, উপরন্তু আমাকেও গ্রহণ ক’র্তে দিতেন না।

বাবা-মা পরামর্শ করে তারা দাহুকে ডেকে ব’লেন “এ বিষয় আমরা

বিক্রী কর্কারই সাব্যস্ত করেছি। হিসেবপত্র সমস্ত বুঝিয়ে সুঝিয়ে দিন। কোথায় কার কাছে বিষয় বন্ধক আছে, কতটাকা আসল, কত সুদ ইত্যাদি যত শীঘ্র পারেন দেখিয়ে শুনিয়ে দিন!”

তারা দাছ যেন আকাশ থেকে পড়লেন! . খানিকক্ষণ নির্ঝাক হয়ে চেয়ে থাকবার পর বাবাকে ব'ল্লেন—“এ বাড়ী বিক্রী হবে?”

বাবা ব'ল্লেন—“বিক্রী হবে না তো কি শুধু শুধু সুদ দিয়ে কিম্বা সুদ ফেলে রেখে, সুদে আসলে হক্—না—হক্ মহাজনের গর্ভে এতটা সম্পত্তি ছেড়ে দিয়ে আহাম্মক বোনে থাকব?”

তা। “তা বাবাজি—তা—তা—মা-মণি—জামাই বাবাজী কি বাড়ীটা রাখবেন না?”

বাবা। “আমি এ বাড়ী রেখে কি কর্কা বনুন! আমার অত বড় পৈতৃকবাড়ী, এখনও তার দশ পনেরোটা ঘর খালি পড়ে আছে! এ বাড়ীতে মেরামত খরচা করে এটাকে বাসযোগ্য ক'র্ত্তে হ'লে—বিস্তর টাকা খরচ ক'র্ত্তে হবে। অত টাকা আমি কোথায় পাব বনুন!”

বাবার কথা শুনে তারা দাছ বুঝলেন,—এদিক দিয়ে বড় সুবিধে হবেনা। মাকে একদিন নিভূতে বোঝাতে লাগলেন। বেশ মুরুঝিয়ানা চালে উপদেশ দিতে শুরু ক'ল্লেন, “লোকে যথাসক্কা দিয়ে পৈতৃক ভিটে বজায় কর্কার চেষ্টা করে। পৈতৃক সম্পত্তি বজায় থাকলে বাপঠাকুদার নামও বজায় থাকে! তুই জামাই বাবুকে বেশ করে বুঝিয়ে বল মা,—পঞ্চাশ ষাটহাজার টাকার জন্তে এত বড় বিষয় সম্পত্তিটা নষ্ট করা কি উচিত?”

মা অবাক হয়ে কিছুক্ষণ তারা দাদুর মুখের দিকে চেয়ে রইলেন। পঞ্চাশ-ষাট হাজার টাকা দেনা শোধ দিয়ে বিষয় রক্ষা ক'ত্তে হবে? মা জিজ্ঞাসা ক'ল্লেন “এত টাকা দেনা হ'ল কবে কাকা?”

একটু হেসে তারা দাদু রাক্ষা চোখ দুটা মুদ্রিত করে ব'ল্লেন “দেনা কি ছ'এক বৎসরে হয়েছে মা নীতু? বিশ বছর ধরে দেনা চলেছে। প্রথম দেনার পত্তন বড়মামী ( অর্থাৎ আমার মার পিতা-মহী ) করেন—শাগুর ( অর্থাৎ স্বর্গীয়া শান্তিময়ী দেবী, আমার বড়মাসীর) বিয়েতে

“বড়দি'র বিয়েতে কত টাকা দেনা করেছিলেন ঠাকুমা?”

“সে প্রায় ৫৬ হাজার টাকা হবে। আমার ঠিক মনে নেই।”

“এতটাকা খরচ হয়েছিল? বলেন কি কাকা? ভবানীপুরের গোকুল বাঁড়ুযো মশাই বড়লোক, ঠাকুদার দূরসম্পর্কে শালা হ'তেন। ঠাকুদা মর্বার পর ঠাকুমা নিজে গিয়ে কেঁদে তাঁর হাতে পায়ে ধরে-ছিলেন,—সেই জন্যে শুন্তে পাই তিনি বড়দি'র সঙ্গে ছেলের বিয়ে দিয়ে এক পরস। “পণ” নেননি? শুধু আমি কেন,—দেশশুদ্ধ লোক সবাই এ কথা জানে!”

তারা দাদু হটবার পাত্র নন। একে বাগবাজারের প্রসিদ্ধ ঝামু “তারা ড্যাংগুলি”—( তারা গাঙ্গুলীকে সকলেই তারা ড্যাংগুলি বলে ডাকতো, ) তার উপর তিনি এটর্নী রসিকমিত্রের মুহুরী ( একরকম ডান হাত ব'ল্লেই চলে ) আমার মার মত সরলপ্রকৃতি বিষয়বুদ্ধি-হীনা জ্বীলোকের দুটো সরল সত্য কথায় “ভড়কে” যাবার “ছেলেই” ননু তিনি। মার কথা শুনে—খুব গর্বে'র সঙ্গে ব'লে উঠলেন,—“আরে—

কে তোকে এ কথা ব'লে যে ভবানীপুরের নামদাদা কঞ্জু—হাড়কিপটে গোকুল বাঁড়ুয্যে তোর বড়দিদির সঙ্গে বেটার বিয়ে দিয়ে এক পয়সা নেয়নি? কে বলে? কোন্ শালা এ কথা বলে? নগদ টাকা নেয়নি বটে,—কিন্তু দশ—দশ হাজার টাকার গয়না এই তাঁরাটাদ গাঙ্গুলী শ্রাকরা ডেকে নিজের হাতে গড়িয়ে তোর বড়দিদির সোণার অঙ্গ হীরে জহরতে মুড়ে তবে গোকুল বাঁড়ুয্যের ভিটেতে পাঠিয়েছিল! বলি, তোর ও তো তখন নেহাৎ অজ্ঞান অবস্থা নয়; তুইও তো তখন ৭৮ বছরের মেয়ে! বরকনে বিদেয় হবার সময়—তোর বড়দিদি কি খালি গায়ে শাঁখা-রুলী-হাতে বরের সঙ্গে যাচ্ছিল দেখেছিনি?”

মা বলেন—“না তা দেখবো কেন? সোণা হারে মুক্তো জড়োয়া গহনা বড়দি বিয়ের পরদিন ক'নে সেজে যাচ্ছিলেন,—দেশশুদ্ধ লোক সবাই দেখেছে, আর একবাক্যে সবাই গোকুল বাঁড়ুয্যে মহাশয়ের জয়-জয়কার করেছে! বিয়ের রাত্রে বড়দির স্বশুর নিজে দাঁড়িয়ে থেকে সব গয়না পরিয়ে দিয়েছিলেন। বাপের বাড়ী থেকে—অর্থাৎ আমার ঠাকু'মার কাছ থেকে একজোড়া বালা, চারগাছা মল, কাণের গোটা ছ'চার মাকড়ি বড়দি' পেতে ছিলেন।”

ঈষৎ রাগত হয়ে মার কথায় বাধা দিয়ে তারা দাঁছ ব'লেন—“তুই যে আমার অবাক করে দিলি নীতু! তোদের তিন বোনের বিয়েতে টাকা খরচা হয়নি—তুই ব'লতে চাস? শান্তির বিয়ে, প্রীতির ( অর্থাৎ আমার মেজ মাসীমা স্বর্গীয়া প্রীতিময়ী দেবীর ) বিয়ে, তোর বিয়ে কি সব বিনি খরচে হয়েছিল?”

“ধাক্কা—ও সব কথায় কাজ নেই। বড়দি' মেজদি'—তুই দিদিই

আমার যখন বিয়ের ছ'চার বছর না পেকতেই স্বর্গে গেছেন,—তখন তাঁদের নিয়েব কথা তুলে তো কোন লাভ নেই—”

তাবাদাত্ত খুব মুক্কিয়ানা-চালে নিজের “হেঁড়ে” মাথাটীতে বামহস্ত বুলাইতে বুলাইতে বলতে লাগলেন—“ই্যা—হক্ কথা বলতে হবে,—মেজাজ দেখিয়েছে বটে, তোব শুব্ব শাশুড়ী। অমন কপবান, গুণবান, চাঁদ্রবান ছেলের বিবে দিলে তোব সঙ্গে,—বাকে বলে “কাণাকডীটী” পর্য্যন্ত ন নিয়ে !”

মা এ সব পুর্ব্বানো বথাব বাবা দিয়ে ব'ল্লেন—“ও সব বাজে কথাব আব কাজ কি কাকা? শুন্লেন তো—পঞ্চাশ ঘাট হাজার দেবার সামর্থ্যও আদার নেই,—আব থাকলেও—অত টাকা দিয়ে পৈতৃক ভিতে বজায় রাখবাব ইচ্ছেও আদার নেই !”

“তাহ'লে কি ক'ত্তে হবে বল্ মা! তোব এ ভিতে বেচে ফেলা মানি—আমাদের এতগুলি প্রাণীকে পথে বসানো! এ বুডো বয়সে কোথায় যাব,—কাব কাছে আশ্রয় পাবো,—এই ভেবেই—এই কদিন আমার “হাড্ডি সাব” শব্দ হ'য়েছে।”

বলেই তারাদাত্ত দস্তবমত হাউ হাউ করে কাঁদতে শুরু কল্লেন। তাবা দাত্তব কান্না শুনে—বাড়ীব যে যেখানে ছিগ—একে একে সবাই সেখানে জমায়েৎ হ'ল। সবাই এক বাক্যে বলতে শুরু কল্লেন—কাজটা আমাদের ( অর্থাৎ আমার বাবা-মাব ) খুবই অন্যায়! অনাগ গরীব কতকগুলো আশ্রিত লোককে পথে বসাবার জন্যে আমবা ইচ্ছে করেই এ বাড়ী বেচছি! নইলে—বাহুডবাগানের বাজু বাঁড়ুয্যের ছেলে,—যার নিজেরই বোজগার মাস গেলে হাজার হাজার টাকা,—তাকে কিনা টাকাব অভাবে এমন একটা সম্পত্তি বিক্রী ক'ত্তে হয়!

সপ্তরথীতে মাকে ঘিরে এমন বাক্যবাণ বর্ষণ কর্তে শুরু করলেন,—  
যার জন্যে সত্য সত্যই মাব প্রাণান্ত হবার উপক্রম হয়েছিল।

অগত্যা নিকপায়ে মা বল্লেন—“আচ্ছা—কেন সবাই মিলে এমন  
অনর্থক গণ্ডগোল করছে? উনি ( অর্থাৎ আমাব বাবা ) এখানে এলে  
সকলে সক সঙ্গে বুঝিয়ে বলা যাক,—যদি কোন উপায়ে এ ভিটে রক্ষা  
হয়! আমারও যতদূর সাধ্য—আমি বলব! আর আপনাবাও যদি  
কিছু সুপরামর্শ—যুক্তি দিয়ে ওঁকে বুঝিয়ে বাড়ীখানা রাখবার চেষ্টা কর্তে  
পারেন কর্বেন! আমাব নিজের হাতে টাকা থাকলে তো এ সব কথা  
বলতেই হ'ত না! কি কর্ব—আমি যে নিকপাব!”

মাবের কথায় সবাই আশ্বস্ত হ'লেন। তারা' দাছ বল্লেন “পরামর্শ  
দিতেও জানি, যুক্তিও আছে ঢেব! কিন্তু—নেয় বা কে,—আর দিই  
বা কা'কে?”

## দ্বাদশ পরিচ্ছেদ

বাগবাজারের স্বর্গীয় কিশোরী মুখ্যের ভিটে অর্থাৎ আমার মাতামহের ভদ্রাসন বাড়ী বিক্রী হ'লনা—বজায় রইলো। এটর্নী-কুল ধুবন্ধর রসিক মিত্র মহাশয়ের কৌশলে এবং বাগবাজারের নামজাদা “খালিকা”—“তারা ড্যাংগুলি” অর্থাৎ তারাচাঁদ গাঙ্গুলী ওরফে আমার তারা দাছর কুট বিষয়বুদ্ধিচাতুর্ষ্যে আমার বাড়ীর নামটা তখনকারমত কিছুকাল বজায় রইল। বাবা আমার নিতান্ত সাদাসিধে মানুষ, বিষয়বুদ্ধির কোনো ধারই ধারতেন না! মা তথৈবচ। তার ওপর—আমার বাড়ীর ঐ বৃহৎ গোষ্ঠি দিনরাত্রি মাকে খোসামোদ কর্তে আরম্ভ ক'লে—যাতে মা পৈতৃক ভিটে বিক্রী ক'র্তে রাজী না হন। খোসামোদে মা বশ হতেন না—এটা নিশ্চয়। কারণ,—সে সময় জ্ঞী-শিকার তত রেওয়াজ না থাকলেও “লেখাপড়া-জানা-মেয়ে” বলে মার একটা বেশ সুনাম বা ছর্গাম (যা' বলেন তাই) ছিল। সুতরাং মা

নেহাৎ “হাবা-গোবা” জীলোকের মত লোক চিন্তে পান্তেঁন না—বা মনোভাব বুঝতেন না—এমন নয়। স্বার্থসিদ্ধির জন্তে সকলে তাঁকে রাজরাণীর মত খাতীর বা যত্ন ক’চ্ছেন—তা’ তিনি বেশ স্পষ্টই বুঝতে পান্তেঁন। তিনি ভালরকমই জানতেন যে তাঁর মুখের সামনে যারা তাঁকে “তোমার মত ভাল—তোমার মত দয়াময়ী—তোমার মত উদার—তোমার মত মেজাজী পৃথিবীতে আর কোনো জীলোক নেই” বলে উচ্চ প্রশংসা ক’চ্ছেন—তাঁরাই অসাক্ষাতে তাঁকে—“দেমাকে মট্ মট্ ক’ছে—কুচুটে—ঝগড়াটে ইত্যাদি সাটিকিকেট দিতেও তিলমাত্র ইতস্ততঃ করেন না। বাবার সঙ্গে পরামর্শ করে মা তাঁর পৈতৃক ভিটে সম্বন্ধে এই সাব্যস্ত কর্লেঁন,—“ঘর থেকে টাকা না বের করে যদি ভদ্রাসন বাড়ীটা থাকে—এরং এতগুলি অক্ষম পরাশ্রয়ী ব্যক্তিকে পথে বসানো থেকে রক্ষা কর্তে পারা যায়,—তা’তে আর বাধা দিয়ে কাজ নেই। মামাবাড়ীর বিষয় খেয়ে আমার ছেলের বড়মানুষ হবার দরকার নেই!”

দরকার নেই তো দরকার নেই! মার মতেই বাবা মত দিলেন। বল্লেন—“হ্যাঁ—যা বলেছ। এ বিষয় উদ্ধার কর্তে হ’লে পঞ্চাশ-ষাট হাজার টাকার দেনা পরিশোধ বাবদে না বার করলে ও—পাঁচ-সাত হাজার মামলার বাবদে বার ক’র্তেই হবে। শুধু তাই নয়—এর সঙ্গে অনেক জাতীয়স্বজন—এমন কি দু’একজন এটনি মুহুরীকে শ্রীঘর যেতে হবে—জালজোচোরীর অপরাধে!”

আমার সামনে একথাটা চাপা দিতে মা বাবাকে ঈর্ষিত ক’র্লেঁন। কথাটা সে সময় চাপা পড়ে গেল বটে, কিন্তু বরাবর আমার কাছে চাপা



রইলো না। ভালমন্দ সকল রকমের লোক বাড়ীতেও থাকে—পাড়াতেও থাকে। বিশেষতঃ, পরচর্চা যখন বাঙ্গালী জাতের সব চেয়ে বেশী প্রিয় এবং মুখরোচক জিনিষ, তখন আমি আমার বাড়ীর বৈষয়িক কথাগুলো নিজে চেষ্টা করে জানবার ইচ্ছে না ক'লেও—অথবা সে সম্বন্ধে নিজে অনুসন্ধিৎসু হয়ে কা'কেও কিছু প্রশ্ন না করলেও বাগবাজারে ( শুধু বাগবাজারে কেন—ক'লকৈতার সহরে ) এমন লোকের অভাব ছিল না— যিনি আমাকে কাছে পেলেই বলতে এতটুকু ইতস্ততঃ ক'র্তেন না যে— তোর বাবা এত বড় বিদ্বান—এত বড় একজন হাকিম—এত বড়লোক হয়েও এটনি রসিক মিত্রের আর ঐ জোচোর “তারা ড্যাংগুলির” পাল্লায় পড়ে গেল ? তোর মা না হয় মেয়েমানুষ, জালজুচুরী বোঝেনা ? তোর বাবাও কি এতটা মুফুরে ?” কেউ ব'লেন—একবার আমার সঙ্গে যদি পরামর্শ করে—তা'হ'লে আমি সব জালজুচুরী ধরিয়ে দিই !” কেউ ব'লেন—উঃ—কিশোরী মুখ্যের এতটা বিষয় পাঁচ ভূতে লুটে খেলে গা ?” তিনকড়ি গোসাঁই দুর্গাচরণ ঘোষাল, প্রিয় দত্ত প্রভৃতি বাগবাজার-নিবাসী প্রবীণ ভদ্রলোকেরা গুলুম—দলবন্ধ হয়ে বাবার সঙ্গে নিতুতে দেখা করে বলেছিলেন—বে, তাঁরা নিঃস্বার্থভাবে মামলায় সাক্ষ্য দিতে প্রস্তুত আছেন ! শুধু তাই নয়—অনেকে নিমন্ত্রণগুলো মাকে তাঁদের বাড়ীতে আনিয়ে তারাদাছ এবং রসিক মিত্রের বিক্রমে মামলা রুজু করাবার জগ্রে বিশেষ উৎসাহ দিয়েছিলেন। কিন্তু আমার বরাংক্রমে বাবা-মা কিছুতেই মামলা ক'র্তে রাজী হ'লেন না। মা উপরন্তু ব'লেন—“পৈতৃক বিষয় আমি ষোলো আনাই ছেড়ে দিতে রাজী, তবু মকদ্দমা ক'র্তে রাজী নই!” তিনকড়ি গোসাঁই এত চটে গেলেন

যে একদিন আমার সামনেই বলে ফেলেন—“তোমার বাবা কি আর হাকিম ? ও একটা হাঁদারাম,—গাধা গরু ব’ল্লেই চলে !”

জনশ্রুতি এই—আমার মাতামহের বাপ স্বর্গীয় কিশোরী মুখ্যো মশাই—হঠাৎ একমাত্র পুত্রের ( অর্থাৎ আমার মাতামহ স্বর্গীয় হরিসাধন মুখ্যো মশাইয়ের ) অকালমৃত্যুতে সমস্ত বিষয়সম্পত্তির ভার মাতামহের পরম সুহৃদ ( সে সময় ) নতুন এটর্নী রসিক মিত্রের ওপোর অর্পণ করেছিলেন । বৃদ্ধ পুত্রশাকে এমন আচ্ছন্ন হয়ে পড়েছিলেন যে চোক চেয়ে একবার দেখতেন না—বিষয় আশয় নগদ টাকাকড়ি নিয়ে পরম বিশ্বাসী এটর্নী মহাশয় এবং তাঁর মুহুরী—তারাতাঁদ গাঙ্গুলী কি সমস্ত কীর্তি ক’চ্ছেন । বাঙ্গালী জাতকে—বিশেষতঃ এটর্নীকে খোলো আনা বিশ্বাস করে চক্ষু বুঁজে বসে থাকলে সচরাচর যা হ’য়ে থাকে—এ ক্ষেত্রে ঠিক তাই হয়েছিল । সুতরাং, বাবা ব’ল্লে—“এর জন্তু হুঃখ করবার কোনো কারণ নেই !” কিশোরী মুখ্যের মৃত্যুর পর একে একে তাঁর জায়গাজমি যেমন লাটে চ’ড়তে শুরু হ’ল—( নগদ টাকা, সে তো কর্পূরের মত কোন্ কালেই উপে গেছে—তাঁর কথা কয়েই দরকার নেই ), গয়নারাণী বন্ধকের জন্তে ঘরের বাহিরে গিয়ে ফিরে আর ঘরে ঢুকতে যেমন পথ পেলেনা—নতুন এটর্নী—দরিদ্রসন্তান রসিক মিত্রের তেমনি সেই সঙ্গে ক্রমে ক্রমে জায়গাজমী সাহেবী ফ্যাশানের বাড়ী, পরিবারের গা-ভরা গয়না, গাড়ীঘোড়া, বাগান, একে একে দেখা দিতে শুরু করলে ! এই যে ক’ল্কেতার সহরে রসিক মিত্র মহাশয় একজন “টাকার কুম্বীর” ব’লে জনসমাজে পরিচিত, আদৃত এবং সম্মানিত—এ বিপুল অর্থ তিনি মিত্রের হাতে অতি অল্পদিনেই উপার্জন করেছিলেন । শুন্তে পাই—

বসিক বাবু বাপের অবস্থা অত্যন্ত হীন ছিল। কেদার মিত্র ( বসিক মিত্রের বাপ ) টাকা জেলাব এক পল্লাগ্রাম থেকে একবকম নিঃস্বলে প্রথমে ক'ল্কেতা সহরে প্রবেশ করেন। ভিক্ষে-শিক্ষে কবে কোন-বকমে দু'তিন টাকা সংগ্রহ কবে—তাই দিয়ে খানকতক গামছা কিনে বাস্তায় “ফেবি” কবে বেড়াতেন—আর হাটখোলায় “দিগ্‌মী বাড়ী-উলিব” গোলা ঘবেবদাওয়ায় এসে বাত্রে শুয়ে থাকতেন। স্থানাভাবে রসুই কবে খেতে পাভে ন না,—একটা তাতেব আড্ডায় প্রত্যহ পাঁচটা পয়সা নগর দিয়ে এক বলা দুটা ভাত খেতেন আর বাত্রে এক পয়সাব মুড়ি-মুড়কী খেয়ে ঐ দাওয়ায় প'ড়ে থাকতেন। “দিগ্‌মী বাড়াউল” বহেস-কালে খুব কড়া মেজাজে মেয়েমানুষ থাকলেও এই প্রৌচকালে প্রায় ৫৪।৫৫ বৎসব বয়েসে ( জীলোক বলে বার্কব্য সে বয়েসেও তাব ওপোব বীতিমত আনিপত্য লাভ ক'ত্তে পাবেনি ) ধর্ম্মে কস্মে মন দিয়ে মেজাজটা একটু নবম কবে ফেলেছিলেন, প্রাণেব ভেতব দয়ামায়া জিনিষ দুটোকে মাঝে মাঝে স্থান দিতেন। তাই গামছাওলা গবীবেব ছেলেটা সস্তায় দুই একখানা ভাল গামছা বাড়াউলীকে বিক্রী কবে তাঁর প্রাণে একটু করুণা জাগিয়ে বখন প্রার্থনা কলে—“এই দাওয়ায় এক কোণে যদি আমাকে একটু স্থান দেন তাহ'লে গবীবেব প্রাণটা বন্ধে হয়, আন আনি কিছু চাইনা মা ঠাক্কণ”,—তখন তিনি চক্ষুজ্জায় প'ড়ে এবং ধর্ম্মকর্ম্মেব” খাতীবে—“না” ব'ল্তে পাল্লেন না। কেদার বাত্রিবাসের একটা আস্তানা পেয়ে একবাবে যেন স্বর্গ হাতে পেলে। বাড়াউলি দেখলে, বাজাল ছেলেটি বড় ভাল। মুখে ব'ল্তে না ব'ল্তে ফাই-করমাজ খাটে, হাটবাজার করে দেয় নিজেব ক্ষতি কবেও। রাত্রে বাড়া আস্বার

সময় বাড়ীউলির অন্ত্রে ভক্তিভরে ফলটা পাকড়টা সন্দেশটা রসগোল্লাটা, কখনো বা এক আধ জোড়া কাপড় কিনে এনে উপহার দেয় ! ক্রমে বাড়ীউলী ব'লেন, “কেদার ! হোটেলের নগদ পয়সা দিয়ে না খেয়ে এই দাঁড়য়ার একপাশে ছুটো রেঁখে পেতেও তো পার !” কেদারের বাসস্থান ক্রমে পাকা হয়ে গেল ! পুরোপুরী পাকা হ'ল সেইদিন,—যেদিন দিগ্‌মী-বাড়ীউলী মা শীতলার কৃপায় ভেদবমি রোগে হঠাৎ শয্যাশায়ী হ'য়ে প'ড়লেন, আর সে রোগে অগত্যা গুরুত্ব ভার প'ড়লো কেদার গামছা-ওলার ওপোর ! সেইদিন থেকেই কেদারের বরাত ক্ৰিবে গেল । কালশ্রু কুটীলা গতিতে গামছাওলা কেদার খোলার দিগ্‌মীর ঘরের দাঁড়য়ার রান্না খাওয়া শোয়া ছেড়ে মা শীতলার দয়ায় আর দয়াময়ী বাড়ীউলির ইচ্ছায় তাঁর ঘরের অভ্যন্তরে স্থানলাভ করলেন । শুধু ঘরের ভেতর স্থান লাভ কি ? প্রোচা বাড়ীউলি “দিগ্‌মীর” এখন থেকে যুবক গামছাওলা কেদারই হ'ল পাকা বাড়ীওলা ! দিগ্‌মীর অল্পসল্প পুঁজিপাটায় কিছু তেজারতি কারবার ছিল । মাসে ২০।২৫ টাকা সুদ তাতে উপার্জন হ'ত ! পাকা ব্যবসাদার কেদার মিত্র সেই ব্যবসাতাকে এমন “ফ্যালাও” করে তুললে যে বছরখানেকের মধ্যে দিগ্‌মীর মাসিক সুদের আয় প্রায় শতাবধি টাকা দাঁড়াল । পরামর্শ মন্ত্রণার দ্বারা কেদার দিগ্‌মী বাড়ীউলিকে দিয়ে একখানা ছোটখাটো কাপড়ের দোকান বাগবাজারের বড় রাস্তার ওপোর খুলিয়ে দিয়ে খোলার বাড়ী বিক্রী করিয়ে তা'কে নিয়ে তুললে দস্তুরগত এক কোঠাবাড়ীতে । রাস্তার ধারে বড় ঘরটায় দোকান আর ভেতর দিকে ছুটীতে ঘরসংসার পেতে প্রেমানন্দে জীবনযাত্রা নির্বাহ ক'র্তে শুরু ক'লে । হঠাৎ “দিগ্‌মী” বাড়ীউলির ঈশ্বরপ্রাপ্তি

হ'তেই—কেদার দোকানপাট কিছুদিনের মত লোক-দেখানো বন্ধ করে—দেশে চলে গেল। সেখানে গিয়ে দেশস্থ একজন পরিচিত লোককে দোকানখানি বিক্রী করে এবং দিগ্‌মীর নগদ টাকাকড়ী গয়নাগাঁটা যা ছিল—সমস্ত আত্মসাৎ করে—দেশের বাড়ীঘরদোর মেরা-মত করে—আরো কিছু জায়গা-জমী বিষয়-আশয় কিনে—সপরিবারে ক'ল্কেতার ঐ বাগবাজারেই এসেই বসবাস ক'র্ত্তে শুরু কল্লে। দিগ্‌মী বর্ত্তমান থাকতেই চতুর কেদার মিত্র মশাই বাড়ীউল্লিকে বুঝিয়ে সুঝিয়ে তার নামের তেজারতি কারবারটা নিজের নামে করে নিয়েছিলেন। সুতরাং এবার দেশ থেকে ফিরে এসে পূর্বেকার কারবারটা চালাতে কেদার মিত্রকে কোন রকম বেগ পেতে হল না। “সুদী” কারবারে কেদার মিত্র মশাই গেরস্ত গরীব অভাবী লোকদের গলা কেটে রক্ত শোষণ করে ( শুধু হাতে টাকায় ছ'আনা পর্য্যন্ত সুদ নিয়ে, পাচশো টাকার সোণার গহনা রেখে মাত্র পঞ্চাশটা টাকা শতকরা ছ'টাকা সুদে ধার দিয়ে ) বড়মানুষি না করে—সচ্ছল গেরোস্ত হয়ে বেশ সুখে সচ্ছন্দে গুছিয়ে সংসার চালাচ্ছিলেন—কিন্তু কাণ্ডজ্ঞানহীন “কালের” তরু-সইলো না;—তিনি হঠাৎ একদিন তলব দিলেন, আর কেদার মিত্র তেজারতি ব্যবসা,—সুদ আদায়, মামলা করে ছোট আদালতে ঘুরে ফিরে অধমর্ণ লোকের নামে শমন, ওয়ারেন্ট, পে-অ্যাটাচ্‌মেন্ট অর্ডার ইত্যাদি আবশ্যকীয় মহাজনী কর্ম্ম,—নিজের স্ত্রী, পুত্র, কন্যা, আত্মীয়স্বজন প্রভৃতি সকলকে পরিত্যাগ করে অনন্তধামে যাত্রা ক'ল্লে।

সেই কেদার মিত্রের ছেলে বাগবাজারের স্বনামধন্য রসিক মিত্র মহাশয়,—এটী—এট—ল! রসিক ছেলেবেলা থেকেই খুব মেধাবী

এবং হিসেবী ছিলেন। বাগবাজারে বাস ক'লেও বাপের উপদেশে তিনি কাকুর সঙ্গে মেলা-মেশা কর্তেন ন। রসিক মিত্র মন দিয়ে লেগা-পড়াও কর্তেন এবং পাঠ্যাবস্থায় তেজারতি কারবারে সাহায্য কর্তেন। কেদার মিত্র যখন দেহরক্ষা কল্লেন, রসিক মিত্র তখন দি, এ পাশ করে বছর তিনেক একজন এটর্নার আর্টিকেল হয়ে কাজ ক'চ্ছিলেন। বাপের মৃত্যুর পর রসিক তেজারতি কাবান চালাবার জন্তে এবং তা'তে উত্তরোত্তর উন্নতি করার আশায় কল্কেতার সহবের পরমা ওলা লোকেদেব সঙ্গে গেচে সেখে আলাপ ও ঘনিষ্ঠতা কর্তে শুরু কাল্লেন। নিজে যথাসময়ে রসিক এটর্নীশিপ পাশ করে—নিজে একটা ছোটো খাটো অফিস খুলে ভদ্রভাবে “চাল খাঁড়া” নিয়ে অবিচারে গৃহস্থ ধনী নির্ধনদের বলিদান দিতে জেঁকে ব'সলেন। সঙ্গে সঙ্গে তাঁর ইয়ার বন্ধুর সংখ্যাও যথেষ্ট বেড়ে গেল। এই সকল বন্ধুদের কার্য্য ভদ্রলোকদের ছেলেদের ধ'রে ভুলিয়া ভুলিয়ে” “ভুজং” দিয়ে হ্যাণ্ডনোট কাটানো, সাবালক মৃত্যু-পিতৃহীন কিশোর বা বৃদ্ধবৃদ্ধকে অথবা ছোট বড় সম্পত্তির ওয়ারিশন্দের কুপথে নিয়ে গিয়ে—মদ বেণ্ডায় উন্মত্ত করে বিষয় বন্ধক দেওয়ানো, কিম্বা সম্পত্তির মালিক অভিভাবকহীনা বিধবা (স্বামীপুত্র-হীনা) স্ত্রীলোকদের সন্ধান করা। এ সমস্ত কার্য্যের জন্যে রসিকের কাছ থেকে তা'রা মাসিক কিছু তো পেতোই, উপরন্তু টাকা দেওয়া-নেওয়ার সময় তাদের দালালীও দিতে হ'ত। রসিকের প্রথম “বলি”—তা'রই পীলবাসী মাণিক বসু নামে একটা উনিশ-কুড়ি বছরের নিরীহ ভালমানুষ ছোকরা। মাণিকের বাপ মা কেউ ছিল না,—অভিভাবকের মধ্যে এক জাতি খুড়ো। মাণিকের বাপ সামান্য চাকরি ক'র্তেন বটে কিন্তু খুব

মিতব্যয়ী ছিলেন ব'লে মর্ষার সময় মাণিকের জন্যে হাজার দুইতিন টাকা নগদ আর দু'খানা কোঠাবাড়ী রেখে গিয়েছিলেন। একখানিতে মাণিক নববিবাহিতা পত্নী, ঐ জাতি খুড়া খুড়া আর তার ছেলে মেয়ের সঙ্গে বাস কর্ত্ত,—অপর খানি ভাড়া দেওয়া ছিল। এতেই খুব কায়ক্লেশে মাণিকের সংসার চ'লতো। পাঁচজনকে সুপারিস্ ধরে অনেক কষ্টে মাণিক কোন এক সওদাগরী আফিসে কুড়ী টাকা বেতনের একটা চাকরি যোগাড় করে নিয়েছিলেন। এই বাড়ীভাড়া মাইনেতে মাণিকের সংসার একরকম সচ্ছলেই চ'লছিল। হঠাৎ কাল ক'লে মাণিকলাল থিয়েটার দেখতে গিয়ে। সেখানে এক অভিনেত্রীকে দেখে মাণিকের মাথা বিগড়ে গেল; মাণিক তার প্রেমে একেবারে উন্মত্ত হয়ে পোড়লো! ঠিক সেই সন্ধিক্ষণে রসিকের প্রসাদ দাস দত্ত নামে এক সুবর্ণবণিক জাতীয় অনুচর মাণিকের প্রাণের বন্ধু হয়ে তার সঙ্গে জুটে পোড়লো। গোরাক্তোর ছেলে মাণিক হঠাৎ কাপ্তেন বাবু হয়ে বাগবাজার থেকে বেরিয়ে পোড়লেন। মাণিকের টাকার ভাবনা কি—রসিক মিত্রের এটর্নী যখন তার সহায়? মাণিক আফিস কামাই-করে সমস্তক্ষণ (অবশ্য দিনের বেলায়) রসিক বাবুর বাড়ীতে কিম্বা অফিসে বসে থাকত—কখনো কখনো রসিকবাবুর বাড়ীতেই আহারাদি কর্ত্ত, সন্ধ্যা না হ'তেই রসিক বাবু কর্ত্তক সংগৃহিত এক “টম্ টমে” চড়ে “ফুল বাবুটা” সঙ্গে মাণিক কুপল্লীতে হাওয়া ভক্ষণ ক'তে বেরোন, সঙ্গে থাকেন রসিকেরই পার্শ্বচর। তারপর—যা হয় ঠিক তাই হ'ল! তিনমাসের মধ্যে মাণিকের বাড়ী দু'খানি রসিক মিত্রের সম্পত্তিভুক্ত হ'ল—আর একদিন সকালে মাণিক তার বৈঠকখানায় “আসেনিক” নামে

তীব্র বিষের সাহায্যে নখর সংসারের মায়া পরিত্যাগ করে অনন্তনিদ্রায় অভিভূত হোলো।

পূর্বেই বলেছি, রসিক মিত্র মশাই আমার মাতামহের সোদরতুল্য বন্ধু ছিলেন। শুনতে পাই,—মাতামহ যে সরিকানি মামলায় নিযুক্ত হয়ে বিস্তর টাকা নষ্ট করেছিলেন,—এই রসিক মিত্রই তার মূল! আর একটা মহৎ গুণ ছিল রসিক মিত্রের, ( বয়স হ'লে লক্ষ করে দেখেছি— চোরজোচ্চোর যারা হয়, তাদের সে গুণটি যেন ঈশ্বরের দান ) বড় মিষ্টিভাষী তিনি! কথাবার্তা, মৌখিক আদর-আপ্যায়ন, শিষ্টতা ভদ্রতায় কেউ ঘূর্ণাক্ষরে বুঝতে পারত না যে, এই ব্যক্তির পেটে পেটে এমন শয়তানি বুদ্ধি থাকতে পারে। এই নির্ঘাৎ গুণে তিনি আমার মাতামহের পিতাকে অর্থাৎ কিশোরী মুখ্যে মশাইকে এমন বশ করেছিলেন যে পুত্রশোকাচ্ছন্ন বৃদ্ধ একমাত্র পুত্রের অকাল মৃত্যুতে রসিক মিত্রকেই তাঁর মৃতপুত্র বিবেচনায় সাহসনা লাভ ক'লেন এবং অবশেষে এই এটর্নী “রসিককে” এবং তাঁরই অন্নভোজী তারাচাঁদ গান্ধুলীকে অকপটে বিধ্বাস করে সমস্ত বিষয় সম্পত্তির তত্ত্বাবধানের ভার এই দু'জনের প্রতি অর্পণ করে নিশ্চিন্ত রইলেন। তার পরিণাম যা হবার তা পাঠকবর্গে পূর্ব পরিচ্ছেদে জানতে পেরেছেন এবং আরও আত্যন্তরিক ব্যাপার আমি যয়োপ্রাপ্তির সঙ্গে সঙ্গে ক্রমে শুনতে পেয়ে বুঝলুম—“ছনিয়া অকপট বিশ্বাসের স্থান নয়!”



## ত্রয়োদশ পরিচ্ছেদ

মামার বাড়ীতে পুরাকালে, শুন্তে পাই,—দোলছর্গোৎসবাদি  
বারো মাসে তের পার্কণই খুব “ধুমধামে” সম্পন্ন হ’ত! ক্রমে  
যেমন মা কমলার কৃপাদৃষ্টি ক্ষীণ হ’তে শুরু হল,—যেমন কষ্ট  
ব্যক্তির একে একে পৃথিবী থেকে স্বর্গে যেতে লাগলেন,—সঙ্গে সঙ্গে এক  
এক করে পালপার্কণ ক্রিয়াকর্ম বন্ধ হতে শুরু হ’ল। কেবল  
নানা ছঃখকষ্ট শোকতাপের মাঝেও মার পিতামহী অর্থাৎ বড়  
গিন্নী—অন্নপূর্ণা পূজোটা সাধ্যমত বজায় রেখেছিলেন। তাঁর মৃত্যুর  
পর আমার মাতামহী “নমো-নমো” করে কোন মতে স্বাশুড়ীর আদেশ  
পালনের জন্তে অন্নপূর্ণা পূজোটা ক’র্তেন। কিন্তু এ বৎসর মাতামহীর  
অবর্তমানে পূজো করে কে? আর কার জন্তেই বা পূজো হবে?  
সকলে মাকে ধরে ব’নলো—“তুমি যখন বাড়ীর মালিক, তখন এ বছর  
তোমাকে ঘটী করে পূজা ক’র্তেই হবে।”

মা হেসে বলেন—“আমি ঘট। করে পূজো কর্ব কেন? আমি কি বাপের বাড়ীতে বাস কর্তে এসেছি যে আমি ঘট। করে পূজো কর্ব? আর পূজো যে কর্ব, পয়সা পাব কোথায়?”

মার বৃষ্টিপূর্ণ কথা শুনেও সকলে বলতে লাগলো—“তা—এতে দোষ কি? বাপের বাড়ী তো পরের বাড়ী নয়। হাজার হোক একশো বছরের পূজো,—এটা কি বন্ধ করা ভাল?”

মা দেখলেন—এদের সঙ্গে তর্ক করে যখন বুঝিয়ে উঠতে পারা যাবে না,—তখন এ ক্ষেত্রে এ সম্বন্ধে কোনো কথা না কওয়াই ভাল। তিনি কারুর কোন কথায় (অবশ্য এই পূজো সম্বন্ধে) কাণই দিলেন না। যে যা বললেন,—কেবল শুনেই যেতে লাগলেন! পূজোর দিন আষ্টেক আগে থেকে মামার বাড়ীতে—পাড়ীতে খুব সাড়া পড়ে গেল—“এবার মুখ্যো বাড়ীতে খুব ধুমের অন্তর্পূর্ণো পূজো!” তারা'দাহ সকাল বেলা “উবু” হ'য়ে ঠাকুর দালানের রোয়াকে বসে—গড়গাড়ীতে হাত খানেক লম্বা কাঠের নল লাগিয়ে তামাক টানতে টানতে চাঁচিয়ে চাঁচিয়ে বলতে লাগলেন,—“একশো বছরের পূজো,—মা অন্তর্পূর্ণোর পূজো,—এই কিশোরী মুখ্যোর ভিটের হবে না বল্লেই হবেনা! হু! একি বন্ধ হবার যো আছে—যতক্ষণ তারা গাঙ্গুলী উঠে নেড়ে-চড়ে বেড়াচ্ছেন!” বল্লেই গুড়গুড়ির নলে এক বিষম স্মৃৎটান্—সঙ্গে সঙ্গে বিপর্যয় সধুম কাশি এবং শ্লেষ্মা উদ্গীরণ এবং যেখানে বসে ধূমপান আর নানা রকমের আক্ষালন এবং আত্মশক্তি বিবরণ,—সেইখানে সেই রোয়াকের উপরেই শ্লেষ্মাপূর্ণ নিষ্ঠীবনের নরক সৃজন। সেই সময় কেউ যদি এসে জিজ্ঞাসা কর্লে

“এ বছর কি মাকে আনা হবে ?” ব্যাস্—আর যায় কোথা ? কোন রকমে কাশি-শ্লেষ্মার ঠালটা সামলে নিয়ে দিগুণ—ত্রিগুণ—চতুগুণ উৎসাহে তারা দাছ আরম্ভ ক’লেন—হ’বে না ! একশো বছর ধরে এই ভিটেতে মা আসছেন । এই ভাঙ্গা ইট বার করা সাত পুরুষে দালানে মা অন্নপূর্ণা যুগযুগান্তর ধরে আসছেন—আজ আবার নূতন করে আসবেন কি ? এতো পীঠস্থান—এটাতো মাফাৎ কাশীধাম—অন্নপূর্ণার মন্দির ! হুঁঃ—বলে মাকে আনা হবে ? এ কথা কি আবার জিজ্ঞাসা ক’র্ত্তে হয় ?”

শুধু বারবাড়ীতেই গলাবাজী করে তারা দাছ ক্ষান্ত হ’লেন না ! অন্তরমহলে মার কাছে গিয়ে আরম্ভ কলেন—তোমার বাপ মার আশীর্বাদের জোরে তোর এই দীনহীন কাকাটী সব ক’র্ত্তে পারে,—জানলি মা নীতু !”

মার দৃঢ়সঙ্কল্প,—কোন কথার উত্তর দেবেন না,—অন্ততঃ অন্নপূর্ণার পূজার দিন পর্য্যন্ত !

“তোমার মত মা লক্ষ্মী যেখানে অমন রাজার মত জামাই যে বাড়ীর, সে বাড়ীতে পূজা হবে না,—এও কি একটা কথা ?”

সত্যসত্যই অন্নপূর্ণা পূজার রীতিমত আয়োজন দেখতে পাওয়া গেল ! ঠাকুর দালান মেরামত হ’ল, পূজার তিন দিন আগে বেশ বড় প্রতিমা এল ! ঢাকচোল কাশীর আওয়াজে বাড়ী সরগরম হ’ল, পল্লী শর্য্যন্ত কেঁপে উঠলো ! সকলেই অবাক । খরচটা ক’চ্ছে কে ? তারা দাছর কি মেজাজ খুলে গেল যে দিদিমা মর্ষ্যার পরই একেবারে মামার বাড়ীতে ধূম ধাক্কা লাগিয়ে দিলেন ? দেখে শুনে মা পর্য্যন্ত স্তম্ভিত হ’য়ে গেলেন !

তারা দাহ পূজার আগের দিন সন্ধ্যার সময় অভ্যাস মত রং চড়িয়ে মার কাছে এসে ব'ল্লেন,—“দেখ্‌লি মা নীতু—দেখ্‌লি,—তোর এই কাকাটার ভক্তির জোরটা কি রকম! বল্‌ সত্যি করে বল্—এই তারা গাঙ্গুলী না পারে কি? ব্যস্—আর ভাবনা কি মা! এইবার প্রাণ ভরে আমোদ কর,—মায়ের পূজো কর! খরচের জন্তে কিছু ভাবিস্নে মা। এখনও, বাজার হাট করে—চার পাঁচশো টাকা এই তোঁর কাকার ট্যাঁকে—হ—হ। পূজো হবে না?”

এইবার মা কথা কমে ফেল্লেন। ব'ল্লেন—তা—ব'ল্‌ছিলুম কি কাকা,—পূজো ক'চ্ছেন,—গেরোস্তা গরীবের মত নমো নমো করে—আমার মা বৈনন ক'র্তেন ইদানীং সেই রকম করে কল্লেই হ'ত। অনর্থক এতটা টাকা বাজে নষ্ট করে লাভ কি?”

একে রং চড়ানো আছে,—তার ওপোব মার এই কথায় তারা দাহর রং আরও ঘেন ঘোবালো হয়ে উঠলো। রান্নাঘরের ভিত্তর মা বসেছিলেন। তিনি ছিলেন চৌকাটের বাইরে! চৌকাটের ছয়ারে দুহাতে ভর দিয়ে ঈষৎ রান্নাঘরের ভিতর মুখটা প্রবেশ করিয়ে তারা গাঙ্গুলি গর্কভরে ব'লতে লাগলেন—“তোঁর মতন মা আর বাবাজির মত বাবা,—আমাদের পূজার টাকার ভাবনা কিরে বেটা? হ্যাঁ—ব'লতে হবে মা,—হক্‌ কথা ব'লতে হবে! মেজাজ বটে! বেঁচে থাক্‌ প্রাতবাক্যে—বেঁচে থাক্‌ বাবাজি! আরে তুই আমার গরভোধারিণী—আর তোঁর এই খোকা—উঃ—কি ব'লব মা,—আনন্দে আমার প্রাণ ফেটে যাচ্ছে”—বলেই তারা দাহ কাঁদতে শুরু ক'ল্লেন।

“যান্—কাকা—বারবাড়ীতে যান্—কাজকর্মের দিনে এখানে দাঁড়িয়ে সময় নষ্ট ক’র্বেন না—“বলেই মা মুখ ফিরিয়ে বামুন ঠাকুরগের সঙ্গে রান্নার সম্বন্ধে কথা কইতে মনোযোগ দিলেন।

আমি তারা দাহর রকম দেখছিলাম—ঠিক তাঁর পাশে দাঁড়িয়ে। আমায় হাতের কাছে পেয়েই—আবার একেবারে ভাবে গদগদ হয়ে দু’হাতে আমাকে বুকের কাছে টেনে জড়িয়ে ধরে আরম্ভ করলেন—“আর—এই—এই তোর ছেলে—তোর এই খোকা—দেগিস্ দিকি নীতু—এই ব’লে রাখ্ছি—এ ছেলে তোর রাজা হবে—হবেই হবে! যদি না হয় তো আমায় বাপেই জন্ম দেয়নি! কিরে শালা—হুঁ—হুঁ—শালা তোর বাপ দিয়েছে হাজার—যাক্—নাঃ—বারণ করে দেছে—নাঃ—”

আমাকে মাতালের কবলিত দেখে মা একেবারে ক্রোধে আত্মহারা হয়ে রান্নাঘর থেকে তাড়াহাড়ি বেরিয়ে এসে চীৎকার করে আমাকে ব’ললেন—“হ্যারে—অ মুখপোড়া—হতচ্ছাড়া—পাজী নচ্ছার,—বিকেল থেকে ডেকে ডেকে মচ্ছি—কোন্ চুলোয় ছিলি বলতো!”

মার গর্জন শুনে—তারা দাহ ভয়ে তৎক্ষণাৎ আমাকে ছেড়ে দিয়ে আপনা আপনি ব’লতে ব’লতে গেলেন—“বেটীর সব ভাল। কেবল রাগটা একটু বেশী—”

আমি বুঝতে পেরেছিলাম—মা হঠাৎ এতটা আমার ওপোর ঝাল ঝাড়ছেন কেন? আমি কোনো কথা না ক’য়ে আস্তে আস্তে মার কাছে গিয়ে বললাম—“আমাকে কখন তুমি ডাকলে মা?”

“বিশ পঁচিশ বার তোকে ডাকতে পাঠিয়েছি—তুই এমন আহ্লাদে মেতে আছিস্ যে আমার কথা তোর কাণেই পৌঁছয়নি। এমন অবাধা

হও যদি—তা হ'লে পূজা হয়ে গেলেই পরও তুমি বাড়ী যাও ! যাঃ—  
সটান ওপোরে চলে যা, আর বারবাড়ীতে যেতে হবে না ! এখন  
আমি খাবার নিয়ে যাচ্ছি—খেয়ে দেয়ে—”

হঠাৎ কথার মাঝখানে তাড়াতাড়ি মাথায় ঘোমটা দিয়ে মা রান্না-  
ঘরের ভিতর ঢুকে পড়লেন ! পেছনে ফিরে দোখ—কাছারির পোষাক-  
আঁটা বাবা দাঁড়িয়ে মুচ্কে মুচ্কে হাসছেন ! আমাকে কাছে টেনে  
নিয়ে সম্মুখে মাথায় হাত বুণিয়ে ধীরে ধীরে ব'লতে লাগলেন—“মুণ  
আলাতন ক'চ্ছিস্ বুঝি ?”

আমি কথাটা না ক'য়ে বাবাকে জড়িয়ে ধরে চূপ কয়ে দাঁড়িয়ে  
বসিলাম ।

বাবা আস্তেই বাড়ীশুক মেয়েছেলে স্ত্রীপুরুষ যে যেখানে ছিল—  
একেবারে সকলেই সেই রান্নাবাড়ীর দাঙ্গানে জমায়েৎ হয়ে খাতীর ক'ঠে  
শুক ক'লে ! “ওরে—বৈঠকখানার হলঘর খুলে দে—” “না—না—  
ওপোরের ঘরে একেবারে নিয়ে যা—” “ওরে আলোটা ধরনা”—“এস  
—জামাই বাবু—এ রান্নাবাড়ীর ধোঁয়ার কেন ?”—“আঃ কি জালা  
গা—ওরে একখানা চেয়ার না হয় এখানেই এনে দেনা !”

চাদিক থেকে সকলে যার যা ইচ্ছে তাই বলে চোঁচাতে শুরু  
করে দিলে !

বাবা হাসতে হাসতে ব'ললেন—“এসেছি তো প্রায় আধ ঘণ্টার  
ওপোর ! বাইরের বৈঠকখানায় বসে এতক্ষণ কাটালুম, একটা চেনা  
মুর্তি তো নজরে ঠেকলো না ! এত বড় কর্ম্বাড়ী—কে কার মাথা খায়,  
কিছু কর্তব্যক্তি বা বাড়ীর কোনো ছেলেপুলে কা'কেও তো দেখতে

পেলুম না! কাজেই সটান বাড়ীর ভেতর—রান্নাবাড়ীতেই চলে এলুম—  
—দেখি যদি চেনা লোক কাকেও দেখতে পাই—”

চিরগন্তীর বাবার রসিকতায় আবালবৃদ্ধবনিতা এক সঙ্গে একটা  
বিকট হাসির রোল তুলে দিলে! সকলে আবাহন করে বাবাকে, সেই  
সঙ্গে) আমাকে ওপোরের ঘরে নিয়ে গিয়ে বসালে। বাবা আমাকে  
ব'ল্লেন—“বা দিকি—ওকে একবার ডেকে আন দিকি! একটা  
কথা বলে বাই—রাত্রি হয়ে গেছে—এখনি বাড়ী ফিরতে হবে—”

আমি মাকে ডাকতে যাচ্ছি—আমাকে বাধা দিয়ে বড় মামীমা  
বল্লেন—“ঠাকুরবি আসছে! তা—তুমি কি এখনি যাবে নাকি  
ঠাকুর জামাই? ওমা—তাও কি হয়?” একটা শেয়াল ডাকলে  
যেমন গা শুদ্ধ শেয়াল “ক্যা—ক্যা ছ্যা” করে চীংকার ক'র্তে মুরু করে,  
বড়মামীর ঐ কথায় সমবেতা নারীমণ্ডলী সকলেই চীংকার করে বলে  
উঠলো—“তাও কি হয়! আজ রাত্রে কি যাওয়া হতে পারে? আজ  
কি,—কাল পূজা—পোরণ্ড বিজয়া,—সেই তোরণ্ড ছেড়ে দোবো!”

এই যখন অবস্থা—তখন চরম ক'র্তে তারাদাছ সপুত্র সেখানে  
ব্যস্তভাবে উপস্থিত হল!

“এই যে বাবাজী! কতক্ষণ? বড়মামা ব'ল্লেন—“একি? এখনও  
কাছারির পোষাক ছাড়নি যে?” মেজমামা সেজমামা এমন কি  
দেদো মামাটী পর্য্যন্ত বাবার অঙ্গ স্পর্শ করে কাছারির পোষাক  
মায় জুতো পর্য্যন্ত খুলে দিতে অগ্রসর হ'লেন। বাবা চেয়ার ছেড়ে  
লাফিয়ে উঠে ব'ল্লেন—“এরকম বাড়াবাড়ী কল্লে—আমি এখনি এখান  
থেকে চলে যাব!”

তারা দাছ ব'ল্লেন—“আচ্ছা—আচ্ছা—থাক্—থাক্—তুমি একটু বিশ্রাম করো ! আরে—বাবাজী যাবেন কি করে ? যজ্ঞেশ্বর না থাকলে যজ্ঞ হবে কি করে ?” ইত্যাদি ব'ল্তে ব'ল্তে তারাদাছ, মামীরা, মেয়েছেলে যারা সব ভীড় করে দাঁড়িয়েছিলেন একে একে সকলেই প্রস্থান করলেন। আমরা দু'জনে যেন হাঁক ছেড়ে বাঁচলুম।

আমি জিজ্ঞাসা ক'ল্লুম—“তুমি আজই চলে যাবে বাবা ?”

বাবা হেসে বল্লেন—“যাবো না তো কি তোর মামার বাড়ীতে থাকবো ?”

“থাকোনা বাবা ! কাল পূজো দেখে—রাত্রে মামাদের থিয়েটার দেখে, পোরণ্ড ভাসান দেখে যাবে—”

“দূর বেটা—” বলে আমার গালে একটি মূছ করাঘাত করে জিজ্ঞাসা করলেন—“তোরা যাবি কবে ?”

“সেই—বোশেখ মাসে—”

“তুইও অ্যাদ্দিন থাকবি ? বেশ মজার আছিম্ না ? খাচ্ছিম্—দাচ্ছিম্—ওকে জ্বালাতন ক'চ্ছিম্—পড়তে শুন্তে হচ্ছেনা—”

মা ঘরে ঢুকেই ব'ল্লেন—“তা আর ব'ল্তে ? থাক্—আর ছটো দিন বইতো নয় ! ভাসানের পরদিন ওকে পাঠিয়ে দোবো—”

আমি কাতর ভাবে বল্লুম—“আমি তোমার সঙ্গে যাব মা ! আমার স্কুল খুলতে কুড়ি বাইশ এখনও দিন দেবী !”

বাবা বল্লেন—“না—না ! এতদিন থাকলে তোর দাদাবাবু রাগ ক'র্ষেন ! এই তো কতদিন এখানে কাটালি—আর তোর মাও তো বোশেখ মাস প'ড়তেই যাবে।”



মা ব'ল্লেন—“আমি মাসের শেষশেষি যাব ! তা যাক্ সে কথা—  
তুমি কোর্ট থেকে বরাবর এলে ? বাড়ী হয়ে এলেনা কেন ?”

“এসেছিলুম—বাগবাজারে নলিনীর জন্তে একটা পাত্র দেখা হয়েছে  
সেই সম্বন্ধে একটু কথাবার্তা কইতে ! তা বল্ছিলুম কি—হঠাৎ তোমার  
এ খেয়াল গেল কেন ?”

মা বিস্মিতা হয়ে ব'ল্লেন—“কি খেয়াল ?”

“হঠাৎ বলা নেই কথা নেই ধুমধাম করে—একরাশ টাকা খরচ  
করে মা মর্ত্তে না মর্ত্তেই ঘটাই করে অন্নপূর্ণা পূজো করা কেন ?”

“আমার ভারি বয়ে গেছে কিনা—যে, আমি বাপের বাড়ীতে মা  
মর্ত্তার একমাস পরই ঘটাই করে অন্নপূর্ণা পূজো ক'র্ত্তে যাব ! আর টাকা  
তো আমার হাতে বল বল ক'চ্ছে !”

বাবা ঈষৎ হুঃখিত হয়ে ব'ল্লেন—“এই বোশেখ মাসেই নলিনীর  
বিয়ে—তোমার তো কিছু দিতে হবে—অন্ততঃ হু'চারখানা গয়না তুমি  
না দিলে তো ভালো দেখায় না ! নইলে—আমাদের যে বাড়ী আর  
আমার তোমার ওপোর সবাই যে রকম সদয়—!”

মা আরও বিস্মিতা হয়ে ব'ল্লেন—“তা—এখানকার পূজোর সঙ্গে  
ওকথা ব'লছ কেন ? এখানে কি আমি টাকা খরচ ক'চ্ছি যে, তুমি  
এত কথা কইছ !”

“বলি—আমার কাছে থেকে তো আটশো টাকা নিলে পূজোর খরচ  
ক'র্ত্তে—”

মা একবারে মাথার হাত দিয়ে বসে প'ড়লেন ! কিছুক্ষণ বাবার  
মুখের দিকে ফ্যাল ফ্যাল করে চেয়ে হাঁপাতে হাঁপাতে ব'ল্লেন—  
“সে কি ? আটশো টাকা ? আমি নিলুম ? কবে ?”

“কেন ? তোমার তারাচাঁদ কাকা দিন আঠেক আগে নিয়ে এলেন !”

মা একরকম চীৎকার করে ব’ল্লেন—“অ্যা—সে কি ? কাকা—”  
 কল্লোই ঘর থেকে বেরিয়ে যাচ্ছিলেন—হঠাৎ সামনে তারাচাঁদ ড্যাংগুলি  
 দস্তপাটি বিস্তার করে ঘরের বাইরে থেকে ব’ল্লেন—“হ্যা—হ্যা—বাবাজি  
 আমার সাক্ষাৎ সদাশিব আর তুমি বেটি তো সাক্ষাৎ অন্নপূর্ণা !  
 টাকা আনবো না ? তোর নাম করে টাকা চাইবো না রে বেটি ?  
 বৌদি মর্কার পর এ পূজোটা যদি ঘট করে না করা হয় তা’হলে  
 তোর বড় ঘরে শ্বশুরবাড়ীর—আমার এমন রাজা জামাইয়ের—তোর  
 মত মা লক্ষ্মীর যে দুর্গাম হবে—”

বাবা হাস্তে হাস্তে ব’ল্লেন—“আপনি ব’ল্লেন যে আপনার ভাই-  
 ষ্বির একান্ত অনুরোধ !”

“অবিশি ব’লিছি—নিশ্চয়ই ব’লিছি ? একথা যে অমাগ্নি হয়—সে  
 যেন শত বেটার মাথা খায়—তার যেন বংশে বাতি দিতে কেউ না  
 থাকে ! তোমার কাছ থেকে টাকা চেয়ে নোবো—এ আর বেনী কথা  
 কি বাবাজি ? তোমার টাকাও যা—আমার ঐ মা লক্ষ্মীর টাকাও তাই !  
 বলুক—বলুক—ঐ আমার মা বেটী—ওর মনে মনে ভারি ইচ্ছে হয়েছিল  
 কিনা—যে এ বছরের পূজোটা ঘট করে হয়”—

অবগুণ্ঠনে আবৃত্তি হয়ে ক্রোধে কম্পানিত কলেবরে মা ঝড়ের মত  
 ঘর থেকে বেরিয়ে দালানে দাঁড়িয়ে উচ্চকণ্ঠে ব’লতে লাগলেন—“কক্ষনো  
 না—কক্ষনো না ! আমি কান্দালগরীবের মেয়ে ! আমার বাপ মা  
 মত দীন-দুঃখীই হোন্—তারা পরের টাকায় কখনো দূকপাত ক’র্তেন

না! আমার বাপের বাড়ীতে ঘটা করে পূজা হবে—আমার বাপমার নাম জাহির হবে—আমার খশুরবাড়ীর টাকায়? ছি—ছি—কাকা! আপনি কি? ছিঃ! আমায় গলায় দড়ি দিয়ে ম'র্তে ইচ্ছে ক'চ্ছে!”

মার কাছে গিয়ে দেখি মা দালানে বসে রীতিমত কাঁদতে শুরু করেছেন। বাবাও অপ্রস্তুত—তারাদাছর তো মুখের চেহারা সম্পূর্ণ বদল হয়ে গেছে! এমন সময় কোথা থেকে ঠান্দিদি (তারাদাছর স্ত্রী) একবারে উগ্রচণ্ডী মূর্তি ধারণ করে জামায়ের (অর্থাৎ আমার বাবার) সামনেই তারা দাছকে এক ধাক্কা মেরে ব'লতে লাগলেন—“তুমি মর্কষ কবে? যম তোমায় কবে নেবে? এতটুকু মানইজ্জৎ কি তোমার কিছু নেই?”

তারাদাছ জীর হাতের সজোর ধাক্কা খেয়ে দেয়াল ধরে কোন গতিকে তাল সামলে আমতা আমতা করে ব'লতে লাগলেন—“তা—তা—আমোদ ক'ত্তে গিয়ে—আপনার জনের কাছ থেকে টাকা এনে যে এতটা বিপত্তি ঘটবে—তা—তা বাবাজি—বাকি যে কটা টাকা আছে”—

ঠান্দি ছুকার দিয়ে ব'ল্লেন—“দাও এখুনি—এখুনি—ওদের নাকের ওপোর যে ক'টা টাকা আছে ফেলে দিয়ে জামাই বাবুকে একখানা ছাওনোট লিখে ওর কাছে দেন্দার হয়ে টাকাটা একমাসের ভেতর শোধ করে দাও। পূজা হবে না কেন? এ ভিটেতে একশো বছর পূজা হয়েছে কি জামাই বাবুর টাকা নিয়ে?”

বাবা গস্তীর হয়ে ব'ল্লেন—“আপনি অণ্ডায় রাগ ক'চ্ছেন খুড়ীমা! আমি তো কিছু বলিনি!”

ঠান্দি সেই রকম চড়া সুরে ব'লতে লাগলেন—“তুমি নিজেকে না বল বাবা, তোমার ইজ্জী তো বেশ দশ কথা ব'ললেন—তা তো শুন্লে—”

মা হুঃখ কান্না সমস্ত চাপা দিয়ে নিজমূর্ত্তি ধারণ করে—লজ্জাস্বরম ত্যাগ করে গলা ছেড়ে দালান থেকে ব'ললেন—“মাত্রা ছাড়িয়ে যেওনা খুড়ীমা! দশ কথা আমার বিলক্ষণ ব'লবার আছে—শুধু গুরুজন বলে কিছু বলিনি! ওপোর দিকে থু থু ফেল্লে নিজের গায়ে লাগবে বলেই চুপ করে সয়ে কেবল নিজের লজ্জার ঘুণায় নিজেই মাথা খু ড়ছিলুম! কাকাবাবু যে কাজ করেছেন, যদি এতটুকু বুদ্ধি থাকতো—ত'হ'লে ঘরের ভেতর মুখ লুকিয়ে পড়ে থাকতে—জামায়ের সামনে দাঁড়িয়ে অমন ইতরোমি ক'ত্তে না! বাও—কর্ত্তাকে নিয়ে যে যার জায়গায় যাও—আর গণ্ডগোল কোরোনা! নইলে—মান থাকবে না বলে দিচ্ছি!” বলেই মা আমাকে নিয়ে রান্নাবাড়ীতে চলে গেলেন। আমি রান্নাঘরে মাকে পৌঁছে দিয়ে—ছুটে ওপোরে গিয়ে দেখি—বাবা ঘরে নেই! শুন্লুম—তিনি বাড়ী চলে গেছেন।

## চতুর্দশ পরিচ্ছেদ

মামার বাড়ীর একশো বছরের অনূর্ণা পূজোর ব্যাপারে এ বছর যে কাণ্ডটি ঘোটলো এবং বাগবাজারের খলিফা তারা ভ্যাংগুলি মশাই যে কাণ্ডটি ঘটালেন,—শুধু পূজোর আগের দিন সন্ধ্যা বেলায় আমার মামার বাড়ীতে নয়,—এ ধাক্কা আমার পৈতৃক ভিটে বাহুড়বাগানে পর্যন্ত আমাদের অথাৎ আমার বাবা, মা এবং আমাকে সাম্ভাতে হয়েছিল। বাবা হঠাৎ সন্ধ্যার পর এই সমস্ত গোলমাল দেখে শুনে মামার বাড়ী থেকে চলে গেলেন। বাবা চলে যাবার পরই বাড়ীশুদ্ধ লোক এসে আমার মাকে খোসা-মোদ ক'র্তে আরম্ভ ক'লেন। ঠান্দি গলায় বস্ত্র দিয়ে হাতজোড় করে—এমন কি হাঁটু গেড়ে পর্যন্ত মার কাছে কাঁদাকাটি করে ব'লতে লাগলেন—“পোড়া বুদ্ধির দোষে কি ব'লতে কি বলে ফেলেছি মা—আমায় মাপ করো,—তুমি আমার পেটের মেয়ের বাড়া।

তোমার মনে দুঃখ দিলে আমার ইহকাল পরকাল সব যাবে মা” ইত্যাদি ইত্যাদি। তারা দাছ তো নিজের গালে মুখে চড়িয়ে কেঁদেই অস্থির। মার দুই হাতে ধরে,—( ভাবের চোটে কখনো পায়ে হাত দিতে যান ) সেই মামুলী কাঁছনী গাইতে শুরু ক’লেন। নিজের বুদ্ধির দোষে যে কাণ্ড করেছেন—( অবশ্য যদিও সেটা বিশেষ এমন কিছু দোষের নয় )—তার জন্তে তাঁর প্রাণে কি ব্যথা বেজেছে— তা যদি মা আমার স্বচক্ষে দেখতে চান—তাহ’লে এখুনি তারা দাছ বুক চিরে দেখিয়ে দিতে পারেন। মামাদের মাগীদের, সম্পর্কীয় মাসীদের, মাসতুতো ভায়েদের,—মোট কথা, মামার বাড়ীর যে যেখানে ছিলেন,—সকলকার সে রাত্রে—পূজার উত্তোগ আয়োজনে যোগদান করা ছেড়ে, প্রধান কার্য হোলা—আমার মাকে তুষ্ট করা। মা প্রথমটা নির্ঝাক হয়ে রান্নাবাড়ীর দালানে একধারে দেয়ালে ঠেস দিয়ে চুপ করে বসেছিলেন। বোধ হয় লজ্জায়, ঘণায়, রাগে, দুঃখে— তিনি একেবারে আত্মহারা হয়ে পড়েছিলেন। কাকুর কোনো কথায় উত্তর না দিয়ে মাঝে মাঝে আঁচল দিয়ে চোখ মুছছিলেন। সকলকার (মৌখিক) কাতর অনুরোধে বাহ্যিক ধৈর্য্য ধরে ব’লেন— যাক—আর এ কথার কাজ নেই। যা হবার তা হয়ে গেছে। কাকুর দোষ নেই—সবই আমার অদৃষ্টের দোষ। নইলে—কোথাও কিছু নেই—হঠাৎ এমন ধারাটা ঘটবেই বা কেন।” মা লোক-দেখানো অন্নপূর্ণা পূজার উৎসবে যোগদান কলেন না। আমিও যেন ছাফ ছেড়ে বাঁচলুম।

আমি হাঁফ ছেড়ে বাঁচলুম কেন—তা বলি। পূজার আগের

দিন বাবা আমার বাড়ীতে আসতে—তারা দাছর ব্যাপার এবং কাণ্ডকারখানা শুনে মা যে রকম চটেছিলেন—তাতে আমার মনে দৃঢ় ধারণা হ'ল—যে, মা পূজোর দিন সকালেই আমাকে হুকুম ক'র্বেন—“যা এখনি বাড়ী চলে যা।” মাকে তো আমি চিনি! আছেন তো বেশ ঠাণ্ডা মেজাজে আছেন,—আব্দার করে যখন যা ব'লছি যেটা—চাইছি—ন্যায়মত তাই ক'চ্ছেন। তাই দিচ্ছেন। একবার যদি মেজাজ বিগড়ে যায়, একবার যদি গো ধরে বসেন,—এটা হবেনা,—তখন কার সাধ্য তা থেকে তাঁকে অন্তমত করার? সত্যি কথা ব'লতে কি,—আমার পিতামহ যত বড়-লোকই হোন,—বাড়ীর লোক, পাড়ার লোক, দেশের লোক তাঁকে যতই ভয় করুন, আমি কিন্তু—কখনো তাঁকে ভয় ক'র্তু ম না। আর বাবাকে? বাবাকে আমি ভয়তো ক'র্তু মই না,—উপরন্তু, এত জ্বালাতন ক'র্তু ম,—এত উপদ্রব তাঁর কাছে ক'র্তু ম যে, আমার মনে হয়—কোনো বাপ ছেলের এত উপদ্রব বোধ হয় এতটা আব্দার সহ্য কর্তে কিছুতেই পারেন না। অবশ্য বাপ মাত্রেই নিজের ছেলেকে ভালবাসেন, এটা কিছু নতুন কথা নয়। কিন্তু আমার চিরদিন মনে হয়, আমার বাবা আমাকে যেমন ভালবাসতেন, সংসারে বুঝি এত স্নেহ—এত ভালবাসা আর কোনো পুত্র তার বাপের কাছে পায়না। সত্যি মিথ্যে জানিনা। এইটে আমার মনে হয় তেরো চোদ্দ বছরের অজ্ঞান বালক আমি, পাপপুণ্য ধর্ম্মাধর্ম্ম বিচার করবার শক্তি নিশ্চয়ই সে সময় আমার হয়নি। তখন পিতৃভক্তি

কা'কে বলে বুঝতুম না বা তার মর্ম উপলক্ষি কর্তে পারতুম না, এটা অতি সত্য। তখন জানতুম না যে “পিতাঃ স্বৰ্গঃ পিতা ধৰ্ম্মঃ পিতাহি পরমস্তুপঃ! পিতরি প্রীতিমাপনে প্রিয়ন্তে সৰ্বদেবতা।” আমি সে সময় ভাবতুম, বাবা ভিন্ন এ পৃথিবীতে আমার যথার্থ আপনার কেউই নেই। বাবা আদর করে কাছে ডাকলে, বাবা সন্নেহে কোলের কাছে টানলে, বাবা হেসে হেসে দুটো মূছ তিরফারের কথা কইলে, বাবার কোল ঘেঁসে শুয়ে থাকলে, মনে হ'ত, আমি স্বর্গে! মনে হ'ত, প্রাণের যত দুঃখ, যত ব্যথা, যত কষ্ট, যত গ্লানি, সব যেন কোথায় মিলিয়ে গেল! সেই বাবা আমি পেয়েছিলুম! দেবতার মত সুন্দর, সুরূপ, বিদ্বান, মিষ্টভাষী, সদাই হাস্যমুখ, সম্মানবৎসল, পরদুঃখকাতর, কর্তব্যপরায়ণ,— সেই বাপ আমি পেয়েছিলুম! মহাপাপী হতভাগ্য আমি, বিধাতার ইচ্ছায় জীবনে আমায় অনেক দুঃখকষ্ট পেতে হবে, অনেক যন্ত্রনা-লাঞ্ছনা, অনেক গঞ্জনা সহিতে হবে, তাই অকালে, অতি অল্প বয়সে, জ্ঞান-চক্ষু উন্মীলিত হবার পূর্বেই অর্থাৎ এমন দেবতা-পিতার স্নেহ ভালবাসা উপলক্ষি করবার পূর্বেই, জ্ঞানবুদ্ধি বিকাশে প্রাণভরে পিতৃপূজা করবার অবসর পাবার পূর্বেই এমন বাপকে হারিয়ে-ছিলুম।

পৃথিবীতে ভয় - কর্তুম, কেবল মাকে। ভয়ও যেমন কর্তুম ভক্তিও সেই রকম কর্তুম। মার কড়া শাসনে এক একবার মনে হ'ত, না দিনকতক যদি কোথাও চলে যান, তা'হ'লে আমি একটু নির্ভয়ে ফুঁটি করে বেড়িয়ে বেড়াই। কিন্তু প্রথম দু'একদিন মার কাছ-ছাড়া হ'য়ে গোলমালে আমোদে ফুঁটিতে বেশ কেটে



যেতো। তিন দিনের দিন দেখতুম মা বিহনে ছনিয়া আঁধার। তখন মনে হ'ত, আর যদি ছ'একদিন মাকে না দেখতে পাই, তাহ'লে নিশ্চয়ই মরে যাব।

মামার বাড়ীতে মা এসে যখন ছ'চার মাসের জন্মে থাকতেন, আমি বাড়ী থেকে শনিবার ফুলেব ছুগী হ'লে তবে মার কাছে আসতে পেতুম, রবিবারে মার কাছে থাকতুম, সোমবারে সকালে বাড়ী যেতুম। বাড়ীতে সোমবার রাত্রে শুয়ে শুয়ে দিন গুণতুম, উঃ শনিবার হ'তে এখনও অনেক দেৱী, সবে তো আজ সোমবার। মঙ্গল বুধবার ঐ ভাব। অতি ক্ষুধমনে বিছানায় শুয়েই প্রাণটার ভেতর কি রকম ছু করে উঠতো তা বন্বার কথা নয়। ছ'চার ফোঁটা চোখের জল অনেক কঠোর ভাব অবলম্বন সত্বেও—মাথার বালিশে গড়িয়ে পোড়তো। মায়ের মুখখানি ভাবতে ভাবতে ঘুমিয়ে পড়তুম। বাবার কাছেই শুতুম—একদিন ঐ রকম শুয়ে শুয়ে মার জন্মে ভীষণ “মন-কেমন” কর্ত্ত বনেই কেঁদে ফেলেছি,—বাবা টের পেয়েছেন। তাড়াতাড়ি আলো জ্বলে খুব ব্যাকুল ভাবে বাবা জিজ্ঞালা ক'ল্লেন “কি হয়েছে খোকা, কাঁদছিষ্ কেন ?” মহা অপ্রস্তুতে প'ড়ে হঠাৎ বলে ফেলুম—বড্ড পেট ব্যথা ক'চ্ছে”—

অসুখ শুনে বাবা চিন্তিত হয়ে প'ড়লেন। আমি কিন্তু অসুখের কথা ব'লে ফেলেই ভাবলুম,—এখনি ত ডাক্তার ওষুধ-পত্রের পর্ক লেগে যাবে ! অমনি ঝাঁ করে কথাটা শুধরে নিয়ে ব'ল্লুম—“সেরে গেছে বাবা—একদম সেরে গেছে,—আর একটুও পেট ব্যথা করছে

মা”—বলেই একগাল হেসে শুয়ে পড়লুম। বাবা খানিকক্ষণ আমার পানে চেয়ে হেসে ফেলেন। আমার মাথার চুলের ভেতর আঙ্গুল প্রবেশ করিয়ে সম্মুখে আদর ক’র্তে ক’র্তে ব’লেন—“এই তো ছুদিন আমার বাড়ীতে হৈ হৈ করে কাটিয়ে এলি,—সবেমাত্র কাল এনেছিস,—এর মধ্যে এত মন কেমন ক’লে চলবে কেন বাবা ? ইস্কুল কামাই করে আমার বাড়ীতে থাকলে সবাই রাগ ক’র্বে।”

“সবাই” অর্থাৎ আমার মা রাগ ক’র্বেন ! এ সম্বন্ধে বাবার নিজের কিছু আপত্তি নেই,—দিশেষ আমার চোখে জল দেখে ! কিন্তু মা রাগ ক’র্বেন,—দাদাবাবু রাগ ক’র্বেন ইত্যাদি বলে যখন আমায় খুব আদর করে মিষ্টি কথায় বোঝান,—আমি মার কাছ-ছাড়া হয়ে যে ছঃখভাগ ক’চ্ছিলেম,—সে ছঃখজ্বালা দণ্ডিই তখনকার মত সব ভুলে গেলুম !

বলেছি—কেবল শুয়ে শুয়ে দিন গুণতুম—কবে শনিবার আসবে ! বৃহস্পতিবার বিকেল বেলাটা থেকেই আনন্দের সূত্রপাত ! ভাবতুম, আজকে রাতটা পোহালেই কাল শুক্রবার ;—শুক্রবার কাটলেই শনিবার উপস্থিত,—ব্যস্—একেবারে তিনটের সময় মার কাছে উপস্থিত। আমার বাড়ীতে পৌছেই মার কাছে গিয়ে—মার কোলে দশ পনেরো মিনিট ব’সলেই সবকামনা পূর্ণ হ’ল,—একেবারে হাতে স্বর্গ ! যে মার জন্যে ক’দিন মন ছট্‌ফট্ ক’চ্ছিল, সেই মার কাছে আর ছ’দণ্ড বস্বাধ দরকার নেই। মায়ের সম্পর্কে আর এখন না এলেও চলে ! মা যত বাড়ীর কথা জিজ্ঞাসা করেন,—মনে মনে বেশ বিরক্ত হয়েই তার জবাব দিই। মার কাছে এসেছি,—মনে ক’লেই মাকে পাব,

এই হ'লেই যথেষ্ট! তখন আমার বাড়ীর পাঁচ রকম ফুঁতির জন্তে প্রাণ লালায়িত।

তাই ব'ল্ছিলুম,—মার রাগ প'ড়ে যাওয়াতে—মামার বাড়ীর অন্ত কারও আনন্দ হোক আর না হোক,—আমার আনন্দ আর ধরেনা! যে রকম করেই হোক,—তারা দাড় বুদ্ধি খরচ করে সাত আট শো টাকা পূজোর জন্যে জোগাড় করে এনেছেন! সেই টাকাটা খরচ হবে এক দিনের পূজায়! সে কি কম সমারোহ? মার রাগের দরুণ—এমন সমারোহে আনি যোগদান ক'র্ত্তে পাবনা,—একি কম আফ'শোষের কথা? যা হোক, পূজোর দিন সকাল থেকেই মহা ফুঁতি! ফুঁতির ওপোর ফুঁতি,—মামার বাড়ীতে বাগাজারের সখের থিয়েটার হবে—রাত্রি দশটায়। মেজ মামা সেজো মামা, দেসো মামা—সবাই মাজবে। পালা হবে গিরিশচন্দ্রের “সীতার বনবাস।” মামার বাড়ীর মস্ত উঠোন। ঠিক ঠাকুর দালানের দিকে মুখ ক'রে বড় স্ট্রেক বাঁধা হ'চ্ছে। লোকজন ঠাকুর দেখুক না দেখুক,—যেখানে তক্তপোষ পেতে “সিন” খাটানো হ'চ্ছে, সেইখানেই সব ভীড় করে দাঁড়িয়ে দেপ'ছে। থিয়েটার আমি এ পূর্বে পাঁচ ছ'বার পাবলিকে দেখছি,—আমাদের বাহুড়বাগানের বাড়ীতেও দেখিছি। সত্যি ব'লতে কি,—থিয়েটার দেখার মত আমোদ আমার আর কিছুতে হ'তনা।

আমার জীবনে প্রথম থিয়েটার দেখি,—রয়েল বেঙ্গল থিয়েটারে “প্রহ্লাদ চরিত্র।” প্রথম থিয়েটার যে রাত্রিতে দেখি, তারপর মাস কয়েক ধরে প্রত্যহ রাতে বিছানায় কেবল স্বপ্নই দেখেছি,—সেই ছোট্ট সুন্দরছেলেটা—পরে শুন্লুম,—কিন্তু তখন যেন বিশ্বাস হ'লনা,—সে

ছেলে নয়, সেএকটা চল্লিশ বছরের বুড়ো মাগী প্রহ্লাদ নেজেছে,—  
 ভেলভেটের ওপোর জরীর কাজ করা কোট গায়ে,—কপালে গালে  
 তিলক চন্দনের ফোঁটা কাটা, মাথায় চূড়ো বাঁধা,—হুঁহাতে তালি দিয়ে  
 নাচতে নাচতে গাইতে গাইতে এলো “তোমর নাম রেখেছি হরিবোলা।”  
 সেই দরওয়ানী প্যাটেন্ট চেহারা (সাজসজ্জাসমেত—মায় গালপাট্টাটি  
 পর্যন্ত তার ভোজপুরীর মতো) “হিরণ্যকশিপুর” “ভীমচক্র—ভীমচক্র”  
 বোলে ফুটলাইটের ধারে এসে “উবু” হ’য়ে হামাগুড়ি দেওয়ার  
 “পশ্চারে” ভীষণ ভয়বিহ্বল উন্মাদের দৃশ্যাভিনয়,—আমি অভিনয়  
 দেখবার পর কতদিন যে শয়নে স্বপনে জাগরণে মানসনয়নে দেখেছি,  
 তার আর ইয়ত্তা নাই।

লোকজন খাওয়ানে: শেষ হ’লে রাত্রি বারোটোর পর কন্সার্ট বেঞ্জে  
 উঠল! থিয়েটার আরম্ভ হয় আর কি। এইবার “ড্রপ” উঠলো ব’লে।  
 মামার বাড়ীর অত বড় উঠোনে একেবারে “ন স্থাসং তিলধারণং।  
 দোতালার চপ্‌নিলানো বারান্দায়, ঠাকুরদালানে মেয়েদেরও  
 তেমনি ভীড়। মা থিয়েটার-বাত্রা গান-বাজনা আমোদ প্রমোদ  
 মোটেই ভালবাসতেন না। মেয়েদের খাওয়া-দাওয়া হ’লে নিজেব  
 ধরে আমার (সম্পর্কীয়া) এক রুগ্না দিদিমাকে নিয়ে দরজায় খিল  
 দিয়ে গুয়ে পড়েছিলেন। আমাকে বার বার ব’লে দিয়েছিলেন।  
 “দরজায় খিল দেওয়া রইল; সমস্ত জানলা খুলে রাখলুম। ঘণ্টা  
 খানেক থিয়েটার দেখে আমাকে পাশতলার জানলা দিয়ে ডাকবি,  
 আমার সজাগ ঘুম,—উঠে দরজা খুলে দোবো। সমস্ত রাত জাগিস্নি,  
 অসুখ ক’র্কো—বুঝলি খোকা?”

আমি লম্বা ঘাড় নেড়ে স্বীকার ক'লুম—“মাতৃ-আজ্ঞা অক্ষরে অক্ষরে পালিত হবে।” ভাবলুম, একবার তো আসরে গিয়ে একটা জায়গা দখল করে বসি,—তারপর ঘণ্টা দেড়েক পরে কি ঘণ্টা-আষ্টেক পরেই শুতে আসি,—সে তখন বোঝা যাবে! ছ'হাজার লোকের মাঝখানে মা' তো আর আসরে গিয়ে আমাকে টেনে আনতে পারেনা। অল্প কাকেও ডেকে আনতে ব'ল্লে—সেও যে আনাকে ঐ জন-সমুদ্রের ভেতর থেকে গ্রেপ্তার ক'রে আনতে সক্ষম হবে,—সেটা তেমন সম্ভবপর নয়।

“গ্রীণ্‌কমে”—(সাজ ঘনে) সন্ধ্যা থেকেই বসেছিলুম;—কাই-ফরমাজ ও খুব খাটছিলুম। কিন্তু যত রাত্রি হ'তে লাগলো—একটা বিশ্রী ক'ও দেখে সেখানে আর বেশীক্ষণ তিষ্ঠতে পারলুম না। রামু নামার সীতার বনবাসে “রাম” সাজবার কথা; তিনি সন্ধ্যার পরই এমন মাতাল হয়ে শুয়ে পড়েছেন—যে, তা'কে তোলে কার বাপের সান্য। সাজঘরের তক্তাপোষের একধারে রামুগামা অর্থাৎ মেজ মামা ফ্ল্যাট হ'য়ে শুয়ে আ ওড়াচ্ছেন—“আমি ঠিক আছি বাবা! ঠিক টাইমে ডেস পরে appear হবে। কোন্ শালা টের পাবে যে আমি মাতাল হয়েছি—হ্যাঁ—ভারিতো রামের পাট—Damn it—ব'লে পাশ ফিরতে গিয়ে একবারে তক্তাপোষ থেকে মেজেতে “পপাত”। মেজ মামার অবস্থা চোখে থেকে সকলে সাব্যস্ত ক'ল্লেন—কেষ্টো মামা,—তার বাল্মিকীর পাট ছিল, তিনি সে পাট আর কাউকে দিয়ে অগত্যা “রাম” সাজুন। মেজ মামা খুবই রাজী। তিনি বুক ফুলিয়ে ব'ল্লেন—“গিরিশ ঘোষের এমন কোনো নাটক আছে যা কেষ্টো

গাঙ্গুলীর কণ্ঠস্থ নয় ? আমি ম্যানেজারকে তখনি ব'লেছিলুম যে মেজ-  
দা'কে পাট দিচ্ছ বটে—কিন্তু প্লে—র রাত্রে ঠিক থাকলে হয় !”  
ম্যানেজার কেণ্টো মামাকে ব'ল্লেন,—“ওতো বেঠিক হয়ে পড়েছে।  
তুমিও তো সম্পূর্ণ ঠিক নেই দাদা। দুই ভায়ে সকাল থেকেই  
তো চালাচ্ছ।” কেণ্টোমামা খুব মিলিটারী মেজাজে চোখ রাঙ্গিয়ে  
ব'লে উঠ'লেন—“খবরদার ব'লছি ম্যানেজার—নুখ দানলে কথা কোয়ে.  
অমি কি মেজদার মতন পেঁচি মাতাল—”

এই সব মাতলামো কাণ্ডকারখানা দেখে শুনে আমি খুব হু-  
মনে সাজঘর থেকে বাইরে এসে আসরে স্টেজের সামনে মধ্যখানে  
বসে প'ড়লুম। বাইরে থেকে শুন্তে পাচ্ছি,—সাজঘরের ভেতর দীতিমত  
গোলমাল চেজনিচি ঝগড়াঝাঁটি হ'চ্ছে। ছবাব তিনবার চারবার  
কন্সার্ট বাজলো। হাততালির ওপর হাততালি—শিসের ওপর শিশ,  
তবু ড্রপ ওঠেনা। বাইরে লোকেরা বলাবলি ক'চ্ছে “যত সব  
নেশাপোলের—মাতালের কাণ্ডকারখানা ! রেমোটো ও বেমন মাতাল  
কেণ্টো ও তেমনি মাতাল !” আরও শুনলুম,—ছ' ভায়ে “রাম” মাতাল  
সাজি নিয়ে খুব ঝগড়া লাগিয়ে দিয়েছে। শেষে পাড়ার ছ'চার জন  
মুকুন্নি গিয়ে মীমাংসা করে দিয়েছেন,—“ম্যানেজার নিজে রাম  
দেজে বেমন তেমন করে হোক—প্লেটা আনন্ত করিয়ে দিন।  
নইলে, আর গোলমাল থামানো বাচ্ছেনা।”

ভেতরে এই রকম বন্দোবস্ত হবার পর পটাশ করে একটা পট্কা  
আ ওয়াজ এবং সঙ্গে সঙ্গে ঘণ্টা বাজার পর ড্রপ উঠে গেল। কার্টের  
পুতুলে রমত দাঁড়িয়ে আছেন “রামরূপী” ম্যানেজার হস্তিতারণ মতল

( মামাদের জ্ঞাতি ) এবং লক্ষ্মণরূপী ঐ পাড়ারই একটি ছোকরা ( নেহাৎ ছোকরা নয়—২৫।২৬ বছর বয়স )। হরিতারণ মামা শুন্সুম কখনো কোনো বড় পার্ট প্লে করেন নি। গতাস্তুর না দেখে “রাম” সাজতে বাধ্য হয়ে তিনি ভয়ঙ্কর ভীত এবং nervous হয়ে পড়েছেন। আমরা দর্শকরূপে বাইরে থেকে বেশ স্পষ্ট দেখতে পাচ্ছি পা দুটো তাঁর ঠক ঠক করে কাঁপছে, তিনি দাঁড়িয়ে দাঁড়িয়ে দক্ষিণ হস্তে নিজের ফ্রেঞ্চকাট দাড়ি চুলকোচ্ছেন আর বামহস্তে প্রম্টারকে ইঙ্গিত ক’চ্ছেন “ব’লে দাও—ব’লে দাও।” প্রম্টার নিজের মাথার অর্ধেকটা ষ্টেজের বাইরে এনে “রামকে” একহাতে ধাক্কা মেরে ব’লতে লাগলো—“বলঃ—“নাহি জানি ভাইরে লক্ষ্মণ, এই কিরে রাজ্যস্থ—  
বলঃ—“লজ্জানমনববধুসম” রামের মুখে কথা ফুটে-ফুটেও ফোটেনা ! তিনি কেবল গলা খাঁকারি দেন, দাড়ী চুলকোন্ আর বাঁ হাতটা পেছন দিকে নিয়ে গিয়ে সমস্ত আঙ্গুলগুলো একসঙ্গে নেড়ে নেড়ে প্রম্টারকে ইঙ্গিত ক’রে অস্পষ্ট স্বরে ব’লেন “জোরে বলনা !” রাম এবং প্রম্টারের রকম দেখে আমরা তো আসরে সব হেসে লুটো-পুটি ! এমন কি মেয়েরা পর্যন্ত হাসির রোল তুলে দিতে কল্প ক’ল্লে না।

এমন সময়—কেষ্টোমামা ভেতর দেখে “রাম” সেজে বেরিয়ে এসে মানেজারকে এক ধাক্কা মেরে ব’ল্লে,—“মানেজারি করগে না বাবা হরিতারণ দা’ ! “হেরো” সাজা কি তোমার কস্ম ? এই দেখ বাবা—  
একটো করা কা’কে বলে !—ব’লেই টলে টলে একহাতে রামরূপী হরিতারণ মামার কাঁধ জড়িয়ে ধরে শুরু ক’ল্লেন,—“নাই-জ—জানি

ভা—র—রে লখ—ফোন্—এ—কির্—রে রাজ—জ সুখ ?—ক্ষণে ক্ষণে  
মন হর ভা—ই—”

বেশ এ্যাক্টো হ'চ্ছে—এমন সময় রামু মামা একে বারে আশ  
সাজা” অবস্থায় “রামরূপে” ষ্টেজে হাজির ! এসেই সেজো মানার  
বুকের ওপর এক ধাক্কা মেরে ব'ল্লেন “কালকের ছেলে তুই—তো  
বড় ভাই আমি, আনার পাট তুই প্লে ক'র্কি ? চলে যা ষ্টুপিট্—”

চমৎকার ব্যাপার। এক দৃশ্যে একটা রামের পরিবর্তে একেবারে  
তিন মুক্তি শ্রীরাম উপস্থিত ! দর্শকবৃন্দের কি অবস্থা, তা' আ  
না বলাই ভাল। কোনো বুদ্ধিমান ব্যক্তি সেই সময় ভেতর থেকে  
তাড়াতাড়ি “ড্রুপ” ফেলে দিলে—তাই রক্ষে ! নইলে,—ষ্টেজে  
ওপোর আরও না জানি কি ভীষণ রকমের কেলেকারী দর্শকদের নজরে  
পোডতো—কে জানে ?

ড্রুপ পরবার পড়ও কি নিস্তার আছে ? রাম মামা ড্রুপসিনের  
রোলারটা ছ'হাতে তুলে ধ'রে বাইরের দিকে পরচুল-সম্মত মাথাটি  
বের করে দর্শকদের চোঁচিরে ব'ল্লেন, “দর্শক মশাইরা—মাইরি বলছি—  
আমি নাতাল হইনি ! শালারা বদমাইসি করে আনাকে রাম সাজতে  
দিলেনা।”

বিকট হাসির রোলে মামার বাড়ীটা যেন ফেটে পড়বার উপক্রম  
হ'ল !



## শঞ্চদশ পরিচ্ছেদ

সে রাত্রে মামার বাড়ীতে অভিনয়ের প্রারম্ভে রামুমা—কেঠোমামা  
রন্থয়—যে কেলেকারিই করুন,—“সীতার বনবাস” নাটকের খুব সুন্দর  
অভিনয় হয়েছিল। তারাদাছ, বড় মামা, মেসো মশাই, অন্তান্ত মামাতো  
—মাস্ততো ভায়েরা এবং পাড়ার জনকতক মুরকি ভদ্রলোক,—কিশোরী  
মুখুয়ার বাড়ীতে—হাজার হাজার মেয়েছেলের সামনে জন ছ’চার মাতাল  
মাতলামি কাণ্ড ক’ছে দেগে, নিজেরা কোমর বেঁধে সাজঘরে ঢুকে  
“রাম-কেঠা” দুই ভাইকে এবং যার যার মুখে মদের গন্ধ ছিল,—সবাইকে  
গলাধাক্ক। দিয়ে বাড়ী থেকে বিদায় ক’রে বাগবাজার পাড়া থেকেই  
জনকতক যুবককে ধরে এনে রাম, লক্ষ্মণ, সুমন্ত্র, বান্নিকী সাজিয়ে অভিনয়  
আরম্ভ করিয়ে দিলেন। অভিনয় আরম্ভ হ’তে রাত্রি প্রায় একটা  
বাজলো। শেষ হ’তে বেশ সকাল হয়ে গেল বটে,—কিন্তু এই পাঁচ ছ’ঘণ্টা  
প্রায় তিন হাজার দর্শক (মেয়েপুরুষ মিলে) মস্তমুগ্ধের মত নিশ্চল  
নির্ঝাঁক হ’য়ে বসেছিল। কেউ একবার জায়গা ছেড়ে ওঠেনি।

এ রকম সর্বোৎসাহ-সুন্দর অভিনয় আমি জীবনে “পাব্লিক” কিম্বা “প্রাইভেট” থিয়েটারে এর পরে কখনো দেখেছি বলে মনে হয়না। এই সব অবৈতনিক অভিনেতাদের সঙ্গে পরে আমার যথেষ্টই আলাপ পরিচয় হয়েছিল এবং এঁদের মধ্যে অনেকেই “পাব্লিক” থিয়েটারের বড় বড় অভিনেতা হয়ে বাংলার দর্শকবৃন্দকে বহুকাল পর্য্যন্ত আনন্দদান করে-  
ছিলেন। তখন বঙ্গরঙ্গমঞ্চে “আর্টেরও” সৃষ্টি হয়নি—তখন “এক পয়সা” নামের কাগজেরও এত ছড়াছড়ি ছিল না, তখন বাংলা থিয়েটারের **প্রযোজক** নামে একটা অভূত জীবের সৃষ্টি হয়নি তখন নাট্য-

সমালোচক বলতে “পটলীর মার গোকাকে” বোঝাতো না,—আর তখন বিজ্ঞাপনেরও এত আড়ম্বর ছিলনা। তাই তখন নাট্যাভিনয়ে বথার্থ “অভিনয়” যাকে বলে—তাট-ই হতো। আর “সমজদার” শিক্ষিত ভদ্রলোকেরা বা ভদ্রদত্তাদের বৈঠকগানার, মজলিসে, অফিসে, স্কুলে, কলেজে, অভিনয় এবং নাটকের বথার্থ “সমালোচনা” করতেন। প্রশংসার যোগ্য অভিনেতাকে প্রশংসা করতেন,—তার নাম ধরে নয়—তার “ছুনিকা” অভিনয়ের কথা উল্লেখ করে। মোট কথা তখনকার রাম, লক্ষণ হ’ল “চাকাই মমলিন্,”—এখনকার রাম, লক্ষণ হয়েছেন “জাপানী সিল্ক।” সে রকম অভিনেতাও আর বাংলা দেশে জন্মাবে না—সে রকম অভিনয়ও আর কেউ দেখবে না।

যাক্। আমার বাঁড়ীর এই অভিনয় দেখে আমি তো আত্মহারা! শুধু আমি নয়—বাড়ীশুদ্ধ—পাড়াশুদ্ধ সকলে এমন খুসী হয়েছিলেন আনন্দে এমন মেতে উঠেছিলেন, যে অভিনয় অস্ত্রে অভিনেতাদের হাতে ধরে সকলেই অনুরোধ কর্তে লাগলেন—“আর একদিন—এই সামনের

শনিবারেই আর একবার এই “সীতার বনবাস” অভিনয় করা হোক।” তারা দাহকে পাড়ার লোকেরা পীড়াপীড়ি করে বলতে লাগলেন— “খরচ যা হবে—আমরা দোবো—আপনি শুধু আপনাদের উঠোনটা দিন।” তারা দাহ হঠাৎ গম্ভীর হয়ে বল্লেন—“কেন? আমার বাড়ীতে থিয়েটার হবে—আপনারা খরচ দেবেন—কি রকম কথা? কিশোরী মৃগুয়োর ভিটে কি বারোয়ারিতলা?” কথাটা বলা অন্তায় হয়েছে বুঝে সবাই আন্তা আন্তা করে দোষ কাটাবার চেষ্টা করতে লাগলেন। নিতাই চক্রবর্তী তারা দাহর হাত থেকে হুকোটা টেনে নিয়ে কোগ্লা দাঁতের মাড়ী বের করে হাসতে হাসতে বল্লেন—“আরে বুঝলে না হে ভাগ্যচাঁদ,—ওরা পষ্ট বলতে পারবেনা বলে—যুগিয়ে তোনার বলছে—তুমি খরচপাতি করে আর একবার থিয়েটারটা শুনিবে দাঁও! হ্যা—হ্যা—হ্যা—” বন্ধেই চক্রবর্তী মশাই অপরূপ মুখভঙ্গি করে দন্তবিহীন মুখে তামাক টানতে লাগিলেন।

আশ্চর্য্য কথা—সমস্ত রাত্রি আমার মা থিয়েটার দেখেছেন! ব্যাপারটা বনলুম এই। বাড়ীশুদ্ধ সকলে (অবশ্য মেয়েরা) মাকে সঙ্কে থেকে খোসামোদ ক’চ্ছিলেন থিয়েটার দেখবার জন্তে। মা কিছুতেই রাজী হননি। আমার (সম্পর্কে) দুই মাসী—(রাজা মাসী আর শৈল মাসী—আমার মায়ের আপন পিস্তুতো ভগ্নী) বড় একটা বাগবাজারে আগেন না—কারণ, দু’জনকারই স্বশুরবাড়ী খুব দূরদেশে। এবার বহুকাল পরে এঁরা এই অল্পপূর্ণা পূজো উপলক্ষে আমার মামার বাড়ীতে এসেছেন। মার সঙ্গে এঁদের বড় ভাব। এরা মাকে বল্লেন—“তুমি যদি থিয়েটার না দেখ ছোড়দি,—তা’হ’লে আমরাও দেখব না।” এই

ব'লে তাঁরা মার শোবার ঘরের সামনে হতো দিয়ে প'ড়লেন । অগত্যা বাধ্য হয়ে মাকে থিয়েটার দেখতে হয়েছিল । কিন্তু ভাগ্যক্রমে— থিয়েটার আরম্ভ হবার সময় ( রাম-কৃষ্ণ ) মামা দুটী বখন কেলেঙ্কারী ক'চ্ছিলেন,—তখন মা দর্শকরূপে উপস্থিত ছিলেন না । তা যদি হ'ত তা'হ'লে ব্রহ্মা-বিষ্ণু-মহেশ্বর এলেও মাকে থিয়েটার দেখতে রাজী করাতে পার্তেন না—তা—মাসীরা তো কোন্ ছার !

অভিনয়ের পরদিন ডুপুরেলা খাওয়া-দাওয়ার পর অন্দর মহলে দোতলার লম্বা দালানে বাড়ীশুদ্ধ মেয়েরা মজলিস্ করে যখন অভিনয়ের সমালোচনা কচ্ছিলেন—সে মজলিসে আমি আর মা উপস্থিত ছিলাম অ্যাকটিং সহক্কে কেউ অখ্যাতি করেন নি বটে,—কিন্তু বিশেষ সুখ্যাতিও কেউ ক'লেন না । “রাম-লক্ষ্মণ বেশ সেজেছিল—বেশ করেছিল”—এই রকম সামান্য দুটো চারটে অভিমত প্রকাশ করে পুরুষ-অভিনেতাদের ছেড়ে দিয়ে—সবাই সহস্রমুখে সুখ্যাতি ক'লে “সীতার আর লবকুশের” । সেকালে অর্থাৎ ৩০।৪০ বছর আগে সহরের ( শুধু সহরের নয়—বাংলা দেশের ) মেয়েরা—এখনকার মত এতটা শিক্ষিতা—আলোকপ্রাপ্ত ( enlightened ) হননি ? কেউ-কেউ লেখাপড়া অল্পবিস্তর বা শিখ'তেন—তা'তে বড় জোর দুর্গেশনন্দিনীর আয়েষার প্রেমটুকু অতি কষ্টে হয় তো উপলব্ধি ক'র্তে পার্তেন—কিন্তু সে সহক্কে কথায় বা কাগজে লিখে তিলমাত্র অভিমত প্রকাশ ক'র্তে সক্ষম হ'ন না । সুতরাং তাঁ'রা সে সময় শিক্ষিতা হ'লেও ) নাটকের নাটকত্ব—অভিনয়ের রস—অভিনেতার “কেরদানি”—acting এর আর্ট কিছুই বুঝতেন না । তাঁ'রা মুগ্ধা হতেন—করণ গান শুনে এবং রসায়ক বক্তৃতা শুনে । তাই

“সীতার বনবাস” নাটকের অভিনয়ে তাঁরা আত্মহারা হয়েছিলেন—  
যখন “সীতারূপী” ভোলানাথ দাদা ( বোস্ পাড়ায় থাকতেন—ভাগ নাম  
ভোলানাথ ঝাড়ুঘো,—মামাদের আত্মীয় ) সুমধুর কণ্ঠে বিজন বনে  
কঁদে কঁদে গয়েছিলেন—

“চমকে চপলা চমকে প্রাণ

চাহ মা চপলহাসিনী !—”

ভোলা দাদা এমন “সীতা” সেজেছিলেন যে, যাঁরা তাঁকে কখনো  
সাজবার পূর্বে দেখেননি—তাঁরা কিছুতেই বিশ্বাস ক’র্তে পারেন নি—  
“পুরুষমানুষ মেয়ে সেজে অভিনয় ক’চ্ছে।” “সীতার” প্রায় পাঁচ-ছ-  
খানা গান ছিল। ভোলাদা’কে একখানি গান তিনবার চারবার গাইতে  
হয়েছিল—নইলে দর্শকবৃন্দ ছাড়েন না। আহা! সে কি গান, সে কি  
আওয়াজ—সে কি সুর নিয়ে খেলা! গানবাজনার আমি ওস্তাদ না  
হ’লেও—অতি বাল্যকাল ( প্রায় ন—দশ বছর বয়েস ) থেকেই গান  
বাজনার রস বুঝতুম! সে বয়েসে ছাত্রজীবনে যতটুকু সম্ভব লুকিয়ে লুকিয়ে  
অভ্যাস কর্তুম। “সীতার” ভূমিকায় ভোলা দাদা রঙ্গমঞ্চে দাঁড়িয়ে  
যেমন মন-মজানো মধুর সুরে গান গেয়ে—দর্শকদের বিমুগ্ধ করেছিলেন,—  
আজকাল পাবলিক থিয়েটারে কোনো ( দেড়টা মুনসেফের বেতন-  
ভোগিনী ) “নামজাদী” অভিনেত্রী ( কোকিলকণ্ঠী বা ক্লানেটকণ্ঠী )  
রঙ্গমঞ্চে গান গেয়ে বা অভিনয় করে সে রকম মনোরঞ্জন ক’র্তে সক্ষম হন  
না,—একথা আমি তামা-তুলসী-গঙ্গাজল স্পর্শ করে ব’লতে প্রস্তুত আছি!  
কেউ রাগ করেন তো ঘরের ভাত বেশী করে খাবেন!

আম্মার মার কিন্তু সব চেয়ে ভাল লেগেছিল—লবকুশের রামায়ণ গান—

“গাও বীণা গাও রে।”

গাও ইন্দ্রসনে, ক্ষীরোদতীরে,

অনন্তশরনে, অনন্তনীরে ;

গাও বীণা গাও রে।”

আর সেই কুশলবের—“লব” সেজেছিলেন—আম্মার দেসো মামা। চেহায়ায় “তালপাতার দেপাই” হ’লে কি হয়—রাজা বা গ্রাকসেটে বাবা বিশ্বনাথকে পর্যন্ত তার মানালে কি হয়—দেসো মামার যে এমন মধুর গলার আওয়াজ—এত চমৎকার গান সে যে গাইতে পারে—তা অস্তুতঃ আম্মার, আম্মার মার এবং আম্মার মাসীমাদের জানাছিল না। সে রাত্রে “লব” সেজে নেশাখোর দেসো মামার—আম্মার মার কাছে খুব পসার বেড়ে গেল। মা তাঁকে আর একবার ঐ রামায়ণ গানটা গাইতে ব’লেছিলেন। দেসো মামা শুধু রামায়ণ গান কি,—লবকুশের বতগুলো গান সীতার বনবাস নাটকে ছিল—স্মৃতি করে মেয়েদের সামনে প্রাণভরে গেয়ে ফেলে। মা খুসী হয়ে দেসো মামাকে একটা “ট্যাকঘড়ি” কেনবার জন্তে পনেরোটা টাকা উপহার স্বরূপ প্রদান করেছিলেন।

টাকা পাবার পরদিনই দেসো মামা নিজে রাখাবাজারে গিয়ে দেখে- শুনে পছন্দ করে “কুরভাইজার” একটি ওয়াচ কিনে তা’তে কালো “কার” বেঁধে গলায় পরে একটা ছিটের সার্ট গায়ে চড়িয়ে তার বুক পকেটে ঘড়ী রেখে বাবু সেজে দিনকতক খুব ঘুরে বেড়ালেন। পাঁচ সাত দিন পরে সখ মিটে গেল,—সেই পনেরো টাকা দামের সখের ট্যাকঘড়ীটি

দাসু্যামা ( লোকের মুখে শুন্লুম) মাত্র সাড়ে ন টাকার বিনিময়ে একজন প্রতিবেশীকে দাতব্যতা ক'রে একদিন খুব সন্মারোহে শ্রামবাজার “ফোর্টে” ( Fort ) নেশার রাজস্বয় বন্ধ সম্পন্ন করেছিলেন ।

কলিকাতা সহরের দক্ষিণে “গড়ের মাঠে” যেমন ইংরাজরাজের “ফোর্ট ওইলিয়াম” নামে কেল্লা আছে,—যেখানে গোলাগুলি কামান বন্দুক রক্ষিত আছে এবং সৈন্তেরা অবস্থান করে শত্রুর কবল থেকে কলিকাতা-অধিবাসীদের রক্ষা কচ্ছেন,—আমাদের বাল্যকালে উত্তর কলিকাতায় শ্রামপুকুরের বড় মাঠটার তেমনি একটা ফোর্ট ছিল । সেখানে “গোলার” বদলে “গুলি” থাকতো,—সৈন্ত-সেপায়ের “বদলে— এই অঞ্চলের যত “নামকাটা সেপায়ের দল” অর্থাৎ—গাড়বদাটে— নেশাখোর বাপে-খেদানো—মায়ে তাড়ানো ছেলেরা বিরাজ কর্ত্ত !” অতি পুরোণো ভাঙ্গা বড় কোঠাবাড়ী,—কার তা জানি না, বাড়ীর মালিক কে,—তা কারও জানবার আবশ্যক হয়নি ; তবে,—আমি যতদিন দেখেছি, ততদিন জানি,—সে ফোর্টে শুধু নেশাভ্যাং ক'র্ত্তই—লোকেরা সেখানে যাতায়াত ক'র্ত্ত । হেন কুকর্ম্ম তবে জনশ্রুতি এই যে এই ফোর্টে বাংলা অভিধানে নেই—বা সেখানে সম্পাদিত না হ'ত । বাড়ীটা লোধ হয় একশো বছরের পুরোণো এবং আমার বিশ্বাস,—তৈরী হবার দিন থেকে যতদিন না ভূমিস্থাৎ হয়েছিল ততদিন পর্য্যন্ত কখনো একবার চুনকাম বা মেরামত হয়নি । পনেরো ঘোলটা ঘর—দালান, বারান্দা সবই ছিল, কিন্তু আমি যখন দেখেছিলুম তখন নীচের একটা ঘর ছাড়া আর কোনো ঘরের ছাদ ছিলনা । যে ঘরটা বাগোপযোগী ছিল—সেটা একটা “হল- ( Hall ) ঘরের মত । আড়্‌ডা জমতো

সেইখানে। আড্ডাধারীরা বাঁশের চাড়া দিয়ে সেটা বেশ মজবুৎ করে আপনাদের বাসোপযোগী করে রেখেছিল। বাড়ীটা ফোর্টেরই উপযুক্ত বটে! মাঠের প্রায় মাঝখান বরাবর অবস্থিত ছিল। আর একটা বিশেষত্ব ছিল,—সদর দরজা ছাড়া—চোকবার বেরুবার “গুপ্ত” দরজা ছিল তার তিন চারটা। আড্ডাঘরটি বাড়ীর এমন জায়গায় নির্বাচিত হয়েছিল যে, সদর দরজা দিয়ে হঠাৎ কোনো নতুন কেউ সে বাড়ীতে ঢুকে আড্ডাঘরটা খুঁজে বের ক’র্তে পার্তনা,—বিষম গোলক-ধাঁধায় পড়ে যেতো।

এই বাড়ীতে সদর দরজায় জিনিষ বেচতে এসে “বরফওলা” “খাবারওলা” “চানাচুর-ঘুগ্নিদানাওলা”—প্রভৃতি নানা রকমের ফেরিওয়াল। বিনি পসরায় যে কত জিনিষ দিয়ে গেছে,—তার আর ইয়ত্তা দেই। পুলিশের তাড়া পেয়ে একবার যদি কেউ ফোর্টের ভেতর ঢুকতে পার্ত,—তা’কে ধরে কার বাবার সাধ্য? নতুন ঝি বা নতুন চাকর আগ-সন্দেশের বা কমলালেবুর বা পূজোর তত্ত্ব নিয়ে ঠিকানা লেখা চিরকুট কাগজ দেখিয়ে বাড়ীর সন্ধান ক’র্তে ক’র্তে এই ফোর্টের হৃদ্যে এসে প’ড়লে,—তত্ত্বের সমুদয় জিনিষ বাজেয়াপ্ত হ’ত।

দেসোনার সন্দেশে একদিন বিকেল বেলা—এ হেন “ফোর্টে” বেড়াতে গিছলুম। সেই ভাঙ্গা বাড়ীটার ভেতর ঢুকতেই ভয়ে প্রাণটা যেন আতকে উঠলো। তখনো সূর্য্যদেব অস্তাচলে গমন করে নি—বাইরে বেশ রদ্দুর আছে। কিন্তু সে ফোর্টের ভেতর আলোক প্রবেশ যেন নিষিদ্ধ। কতকগুলো ভাঙ্গা ঘরের ভেতর দিয়ে—একে বেকে—হোঁচট খেতে খেতে—আড্ডা ঘরের সামনে পৌঁছুতেই—একটা বিকট



হুর্গন্ধে যেন অনপ্রাসনের ভাত উঠে যাবার উপক্রম হ'ল। মনে কল্পম কোথাও বুঝি ইঁহুর পচেছে। পকেটে একখানা এসেন্সমাথা রুমাল ছিল—সেইটে বের করে নাকে চাপা দিলুম। দেসোমামা আমাকে হাসতে হাসতে বললে—“এর মধ্যে তোর এত গন্ধ লাগলে—তুই ফোর্টের সব দেখবি শুনবি কি করে? চল—তাকে বাড়ী রেখে আসি।” আমি মহা অপ্রস্তুতে পড়ে গেলুম। মরিয়া হোয়ে ফোর্টের ভেতর ঢুকেছি—আভ্যন্তরীণ ব্যাপার না দেখে বাড়ী ফিরে যাব স্বর্গের দ্বারে এত কষ্ট করে এলে—স্বর্গ না দেখে ফিরে যাওয়া কি বুদ্ধিমানের কাজ? মামাকে বল্লুম—“সে কি মামা? একবার নাকে গন্ধমাথা রুমালখানা ধরেছি বলে—মহাভারত অশুদ্ধ হয়ে গেল? আচ্ছা—এই না হয় রুমাল পকেটে রাখলুম—চল কোথায় যাবে!”

“হ্যাঁ—এই তো চাই! এই তো বেটাছেলের কাজ!” বলেই মামা আমায় হাত ধরে—একটা ভেজান দরজা খুলে—অন্ধকার সমাচ্ছন্ন ঘরের ভেতর ঢুকলেন। বাপ রে বাপ! সে কি হুর্গন্ধ? ঠিক যেন গড়া পোড়ান হচ্ছে। দরজা জানালা চাদিকে বন্ধ। ঘরের ভেতর কারও সাড়াশব্দ নেই—অথচ দশ-বারোজন লোক সেখানে আছে। আমি বারকতক “উকি” তুলে—আবার রুমালখানা বার করে নাকে চেপে ধল্লুম। দেসোমামা বললে—“এই তাকিয়াটায় ঠেস দিয়ে বোস্ খোকা—আমি ততক্ষণ একটু মৌজ করে নিই।” সময় হয়েছে—বলেই মামা একদিকে সরে গেলেন।

আমি এই ছেঁড়া সতরঞ্জির উপর বসে পোড়লুম। মামা তাকিয়াটা আমার কাছে সরিয়ে দিয়েছিল—অন্ধকারে তার “স্বরূপ” ভাল করে

তখন দেখতে পাইনি কিন্তু স্পর্শে বুঝলুম—সেটা একটি “অড় বিহীন” তেলচিট্‌চিটে অতি ময়লা ছোটো-খাটো পাশবালিশ। হাত দিতেই হাতময় তেল আর ময়লা লেগে আঙ্গুলগুলো নোংরা হয়ে গেল। দেসোমামা আমাকে বসিয়ে রেখে হাত তিনেক তফাতে গিয়ে “কাৎ” হয়ে শুয়ে পড়লো। ঠিক এই ভাবেই কাৎ হয়ে অনেকে শুয়ে আছেন দেখলুম। সকলেরই মাথায় শিয়রে এক একটি আলো জ্বলছে—আর এক একজন লোক প্রত্যেকের মাথার শিয়রে বসে কি কচ্ছে—ঠিক বুঝতে পারলুম না। দেসোমামা কাৎ হয়ে একটা ছোট বালিশ (আঁতুড়েব ছেলেরা যে রকম বালিশ মাথায় দিয়ে শোর ঠিক সেই রকম) মাথায় দিয়ে তো শুয়ে পড়লেন। একটা লুঙ্গিপরা মুসলমান একটা ছোটদের খেলনা উপযোগী হুকো, তাতে লম্বা নল লাগানো নিয়ে এসে দেসোমামার শিয়রে বোসলো। মামা নলটা মুখে করে যেই শুলেন—আর সেই মিরামাহেব একটা সাল পাতা থেকে কালো “কাইয়ের” মত কি জিনিষ লম্বা লোহার ছুড়ি দিয়ে তুলে নিয়ে সেই ছোট “হুকোটোর নলের” মাথায় “ছিন্‌দ্রিতে” লাগিয়ে সেটাকে পিদীমের আগুনে ছুরে দিতেই দেসোমামা শোঁ শোঁ করে টানতে লাগলো। বাপরে বাপ—সে কি ভীষণ টান! খানিকক্ষণ পরেই সেখানটা এমন ধূমাচ্ছন্ন হ’ল—যে সেখানে সেই মুসলমান বা দেসোমামা কাকেও আর দেখতে পাওয়া গেল না। সেই ধোঁয়া থেকেই এই চিম্‌শে মড়াপোড়ার গন্ধ বেরুচ্ছিল।

যতগুলি লোক সেখানে শুয়েছিলেন—তারি সকলেই ঐ বিকট ধূমপানে রত ছিলেন। আমি মিনিটখানেক পরই তাড়াতাড়ী দরজা খুলে ঘর থেকে বেরুতেই—ঘর শুধু লোক এক সঙ্গে চীৎকার করে বলে

উঠলো—“কে—রে শালা—বদমায়েস আমাদের সর্বনাশ করলে—মার শালাকে—”! একজন তাড়াতাড়ী ঘরের দরজা বন্ধ করে বাইরে আমার কাছে এসে বললে—“কে হে তুমি?” আমি ভয়ে ভয়ে বলুম—“আজ্ঞে আমি দেসোমামার সঙ্গে এসেছি।”

সে লোকটা বিকৃত মুখখানা আরও বিকৃত করে বললে—“দেসো-মামার সঙ্গে এসেছি—তবে তো একবারে রাজা করে দিয়েছে। এত গুলো লোকের সর্বনাশ করলে তার খেসারৎ দেবে বলতে পার?”

আমি। আজ্ঞে-কি করেছি মশাই?

লোকটা সেই রকম রুম্ব্ব্বরে মুখ ভেংচে মারমুখী হয়ে বললে—“কি করেছি মশাই? “চণ্ডু” খেয়ে এসেছ—“চণ্ডু” খাও শুয়ে থাক, নয় চলে যাও। ফস্ করে দোরটা খুলে দিয়ে সব মাটা করে দিলে, আবার বলছ—“কি করেছি মশাই।”

এতক্ষণে বুলুম দেসোমামা প্রভৃতি মহাপুরুষেরা দোর জানালা বন্ধ করে “চণ্ডু” খাচ্ছেন। শুধু তাই নয় “চণ্ডু” খেতে আরম্ভ করলে সূর্যের আলো এবং বাতাসের সঙ্গে সম্বন্ধ একেবারে নিষিদ্ধ। অজ্ঞানতঃ একটা অপরাধ করে ফেলেছি, তার আর উপায় কি? অতি কাতর স্বরে তাঁকে বলুম “আজ্ঞে না জেনে শুনে হঠাৎ একটা অন্তায় করে ফেলেছি মাপ করুন!” লোকটা অস্তিত জীব। সেই যে মেজাজ রুম্ব্ব্ব করে হর থেকে বেড়িয়েছেন সে মেজাজ আর কিছুতেই ঠাণ্ডা হতে চায় না। আমার কাতরতার তার মেজাজ নরম হওয়া চুলোয় যাক্ উত্তরোত্তর আরও গরম হয়ে উঠলো। তিনি সেই রকম মুখে বললেন—“মাপ করুন মশাই! মাপ অমনি করলেই হ’ল! বার গণ্ডা

পয়সার নেশা আমার মাটা করে দিয়ে এক কথায় মাপ করুন মশাই  
“বললেই আমার চতুর্ভুজ লাভ হ’ল আর কি? ঝড়াক করে একটা  
টাকা ফেলে দিতে পাভে—বুঝতুম ভদ্রলোকের ছেলে—”

লোকটা কথার মাত্রা চড়িয়ে আরও কি কি জানি আমাকে ব’লতে  
যাচ্ছিল। আমি বুঝলুম—বেচারার বারো গুণা পয়সা আমার দরুন  
লোকমান হইয়াছে—কিছুতেই সে আমাকে ক্ষমা করতে প্রস্তুত নয়।  
আমি পকেট থেকে কা করে একটা টাকা বের করে তার হাতে দিয়ে  
বললুম—“এই নিন্ মশাই—আপনার লোকমান করেছি এই তার দণ্ড  
দিচ্ছি—”

ছুর্ভিক্ষ পীড়িত—বহুদিন যাবৎ অনাহারী ব্যক্তি যেমন সন্মুখে অন-  
ব্যঞ্জন দেখলে আনন্দে আত্মহারা হয়ে তার প্রতি ধেয়ে যায়—সেই রকম  
সেই নেশানোর লোকটা টাকাটা আমার হাতে দেখে একেবারে  
ঝড়ের মত আমার ঘাড়ের ওপরে এসে পড়লো এবং ঢিলে ছেঁ মারার  
মত টাকাটি আমার হাত থেকে ছেঁ মেরে নিয়ে—একবারে সেখান  
থেকে অন্তর্ধান।

তার ব্যাপার দেখে আমি অবাক হ’য়ে সেখানে দাঁড়িয়ে রইলুম।  
খানিকক্ষণ পরে আড্ডাঘরের দোর জানালা সব খুলে গেল। সঙ্গে সঙ্গে  
একটা বিবাক্ত হাঁওয়া যেন সেই ঘর থেকে বেরিয়ে “ফোট” বাড়ীটা  
একেবারে শ্মশানের মত “আমোনিত” করে দিল। জনকতক লোক  
সেই ঘর থেকে বেরিয়ে গেল। দেসোমামা আর বেরোয় না। আমি  
সেইখানেই দাঁড়িয়ে আছি। তখন সন্ধ্যা হয়ে গেছে। ফোটে তখন  
রীতিমত অন্ধকার। ঘরের বাইরে দাঁড়িয়ে দাঁড়িয়ে ভাবছি—দেসো-

মামা বেরুলে হয়। বাড়ী ফিরে প্রাণটা বাঁচাই।” সাহস করে চৌকাটের ধারে এসে দেখি—দেসোমামা যেখানে শুয়েছিলেন—সেই-খানেই চক্ষু বুঁজে শুয়ে আছেন—নীরব—মুখে কথাটা নেই! একজন বুড়োগোছের লোক আড্ডাঘরের “পাট” কত্তে ব্যস্ত; আমার দিকে দৃষ্টিপান করবার তার ফুরসুৎ নেই।

দেওয়ালে একটা (Hinks এর ডবল পোল্টের) ওয়াললাম্প ছিল—লোকটা প্রথমে তার চিম্নীটা নিজের পরনের অতি ময়লা, তেল ধরা কাপড়ের কোঁচার সাহায্যে সাক্ করা চুলোয় যাক—আরও যেন ময়লা ক’লে। যা হোক—আলো জ্বালা হ’লে—একটা মুড়া ঝাঁটা নিয়ে—সেই “শতবর্ষের”—“শতছিদ্র”—“শতমণ-ধূলা-পরিপূরিত” সতরঞ্চি-খানাকে প্রাণপণ বন্ধে এখার থেকে ওখার পর্যন্ত ঝাঁট দিতে শুরু করলে। ঝাঁটার চোটে—সমস্ত ঘরটা ধুলোয় যেন “ধূমচ্ছন্নের” মত হয়ে গেল। আমি নাকে রুনাল দিয়ে—চৌকাটের বাইরে অসিম ধৈর্য সহকারে দাঁড়িয়ে সমস্ত ব্যাপার দেখছি। কষ্ট কি রকম যে হচ্ছে—তা আর বন্বার কথা নয়—তবু মজা দেখবার কোঁতুহল এমন প্রবল হয়ে উঠেছে যে, কোন রকম কষ্ট আর গ্রাহ্যই কচ্ছি না। “চণ্ড পান পর্ব” শেষ হবার পরও দেসোমামা প্রমুখ জনতিনেক প্রাণী সেখানে—সে ভাবে—সে রকম “কাৎ” হয়ে চক্ষু মুদে শুয়ে আছেন—সবাই নড়ন-চড়ন রহিত। হঠাৎ দেখলে মনে হয়—তারা আর ইহলোকে নাই। ঘর ঝাঁট দেবার বহর দেখে মনে হ’ল—এইবার তারা শয্যাत्याগ করে উঠে ঘর থেকে বেরিয়ে আসবেন—কারণ যে রকম ধূলা উড়ছে তাতে বাইরে দাঁড়িয়ে আমারই দম বন্ধ হবার জোগাড়—ঘরের ভেতোর তো কথাই নেই। সেই অবস্থায়

সেই ঘরে নির্ঝিকার হয়ে এই কয়টা প্রাণী কেমন করে নিদ্রাসুখ উপভোগ কচ্ছেন—আমি তো কিছুতেই ভেবে ঠিক কত্তে পাল্লুম না। নিশ্চয়ই এরা মহাযোগী সিদ্ধ পুরুষ।

ঘর ঝাঁট দেওয়া শেষ হ'ল—লোকটা একটা জলপূর্ণ মাটির তাঁর নিয়ে (বোধ হয় তাতে গঙ্গাজল ছিল) ঘরের চাদিকে—বিশেষতঃ চৌকাটে “ছড়া” দিতে আরম্ভ করলে। তখন দারুন গ্রীষ্মকাল, বৈশাখ মাসের শেষ—ভীষণ গরমে লোকের প্রাণ “টা-টা” ক'চ্ছে। এই গঙ্গাজলের ছিটে সেই সুষুপ্ত প্রাণী তিনটার গায়ে লাগবা-মাত্রই তারা তড়াক করে এক সঙ্গে লাফিয়ে উঠে সেই নিরীহ ব্যক্তিটিকে একযোগে আক্রমণ করে—সঙ্গে সঙ্গে কিল্-চড়-লাগি ঘা-কতক দিয়ে বললে—শালা—ঘোষণা মশাই—সবাইকে একেবারে গঙ্গায় ডুবিয়ে মারলে?—শীতে সব মারা যাচ্ছি—এই ভাবে আরম্ভ করে অভিধান বজ্জিত অনেক বাক্য তার প্রতি প্রয়োগ করে—বে যার অধিকৃত স্থানে গিয়ে বসলেন। আমি মনে কল্পম—আবার বুঝি তাঁরা শয্যা নেবেন। আমি তাড়াতাড়ী ঘরের ভেতর ঢুকে দেসোমামার কাছে গিয়ে ডাকলুম—“রাত্রি হ'চ্ছে—দেসোমামা—চল—?” মামা চক্ষু বুঁজে বসেছিলেন—একবার ক্ষণিকের জগ্ৰ তুলু তুলু নয়ন যুগল বিষ্ফারিত করে বললেন—“তুই—তুই—এখনও রয়েছেই? আমি বলি তুই বাড়ী—” বলেই মামা বসে বলেই চক্ষু বুঁজলেন—তাহার মুখের কথা মুখেই মিলিয়ে গেল।

## ষোড়শ পরিচ্ছেদ ।

সেই নিরীহ লোকটী অর্থাৎ “ঘোষজা” বেচারী মার ধোর গালাগালি খেয়েও নির্বিকার হয়ে কলের পুতুলের মত ঘরের কাজ সারতে লাগলো; মুখে তার কথাটি নেই। আমি দেসোমামার অবস্থা দেখে ক্রমে ভীত এবং চিন্তাবিত হ'য়ে পোড়লুম। রাত্রি হয়ে যাচ্ছে—মা হয়তো যাচ্ছেতাই করবেন—তবে ভরসার মধ্যে এই,—দেসোমামা মাকে বলে এসেছেন—“ছোড়দি,—খোকাকে নিয়ে একটু এ বাড়ী ও বাড়ী বেড়িয়ে আসি। এমন চাঁদের মত ভাগ্নে আমার—একেবারে যাকে বলে রাজপুত্র—বাদশাপুত্র! পাঁচ শালাকে দেখাব না! মা বিশেষ করে কেবল বলে দিয়েছিলেন—“দেখিস্ ভাই কোথাও কিছু খেতে টেতে দিসনি”—

দেসোমামা—দেড়হাত জিব বার ক'রে দাঁত কেটে ব'ললেন—  
“রাধামাধব—ছোড়দি—বাগবাজারের কোন শালার বেটার শালাকে

বিশ্বাস করি? এমন টুকটুকে ভাগেটি আবার দেখে হিংসেতে কোন্ শালা আমার ওপোর শক্রতা করে বিষ খাইয়ে দেবে, তা কি আর জানিনা?”—বলেই সমগ্র বাগবাজার নিবাসী ভদ্রলোকদের অকারণ চোদ্দপুরুষান্ত কর্তে শুরু করলেন। মা দেসোমামার রকম সকম দেখে কথা বার্তা শুনে শুধু হাসলেন, কোনো কথা বললেন না। আমাকে বেড়াতে যাবার অনুমতি দিয়ে বারবার সাবধান করে দিলেন।

সুতরাং মার কাছ থেকে বেড়াতে যাবার অনুমতি নিয়ে এসেছি বলে—মনে একটু ভরসা ছিল। দেসোমামা ঝিমুতে লাগলেন—আমি সেই অবসরে ঘরের চাদিক ভাল করে পর্যবেক্ষণ করে নিলুম। “ফোর্টের” সেই আড্ডা ঘরটি যথার্থই কল্কেতার সহনে একটা দেখবার জিনিষ! ঘোষণা ঘরে ধূনো গঙ্গাজল দেওয়া শেষ করে,—কোথা থেকে একগাছি বেলফুলের “গোড়ে” এনে দেওয়ালে টাঙ্গানো একখানি কালীঘাটে প্রাপ্তব্য—কালী মূর্তির পটের ফ্রেমের চাদিকে অতি ভক্তিভরে যত্ন করে পরিয়ে দিয়ে মাষ্টাঙ্গে প্রণাম করলেন। সঙ্গে সঙ্গে সকলেই চক্ষু বুজে ভাবে গদগদ হয়ে—“মা—মা—মা”—বলে বিকট সুরে মাকে ডেকে প্রণাম করলেন। দেসোমামার ভক্তিটা কিছু বেশী; তিনি গড় হয়ে মাথাটি ভুঁয়ে ঠেকিয়ে প্রায় দশমিনিট ধরে প্রণাম কর্তে লাগলেন। ঘরের চাদিকে দেওয়াল-আলমারি,—কতকগুলো আলমারির পাল্লা নেই, কোনোটার ফ্রেন নেই, আছে কেবল ভেতর দিকে সেলুক আটা। সেই সব আলমারির তাকে আড্ডার ব্যবহার্য সমস্ত জিনিষ রক্ষিত। মদের বোতল, মদের শিশি, গাজার কল্কে—ছোট বড় নানা আকার



প্রকারের কাঁচের গেলাস্, বিস্কুটের বাক্সতে তামাক টীকে, কয়লা, ঘরের দেওয়ালে ছোট ছোট পেরেকের গায়ে গাঁজা খাবার “সাঁপি” ছোট বড় হুকো, তামাক, চণ্ডু, গুলি খাবার নানারকমের নল! আর আছে উঁচুদিকে বড় বড় হুকে ঠাঙ্গানো তেলপাকানো বাঁশের ছোট বড় মাঝারি “সাইজের” লাঠি—ঠিক আব্লুস কাঠের মত রং—যার এক ঘায়ে বাঘ পর্য্যন্ত কাবু হয়ে পড়ে। হুঁচারখানা খাপে আটা তলোয়ার, দুটো তিনটে টঙ্কি, একখানা ছোট হোঁরা দেওয়ালের কোণে ঐ রকম হুকে দড়ি দিয়ে বাঁধা ঝুলছে! একধারে সাত আট জোড়া নানারকমের ছোট বড় মুগুর, জোড়া কতক লোহার “Dumb-bell” (ডম্বল) পাঁচ সাতটা লোহার গোলা রয়েছে দেখলুম। চার পাঁচ জোড়া বাঁয়াতবলা দুটো পাকোয়াজ, একটা টেবিল হারমোনিয়াম, একটা “ডোয়ার্কিন্ সনের” বক্স্ হারমোনিয়াম,—দেওয়ালে টাঙ্গানো খান কতক বেহালা, চার কোনে চারটে বড় তানপুরা,—ইত্যাদি সঙ্গীতের আসবাবপত্র দেখে বুঝলুম,—“ফোর্ট” অধিকারীরা শুধু আবগারি প্রিয় নন,—গীতবাঁজেও তাঁদের যথেষ্ট অনুরাগ আছে। এ ছাড়া আরও একটা জিনিষ দেখে আড্ডাধারীদের মনে মনে বহু তারিফ না করে থাকতে পারলুম না,—একধারে রন্ধনের উপযোগী পেতলের হাঁড়ি, তিজেল, লোহার কড়া, এবং চার পাঁচটা শিকেতে কতকগুলি নতুন হাঁড়ি ঘরের শোভা সম্পূর্ণ করার জন্ত “ঝুলায়মান বা বিরাজমান” শুধু তাই নয় গোটা দুই “তোলা” উন্নত ঘরের এক কোনে সযত্নে রক্ষিত স্মুতরাং “ফোর্টে” যে কি নেই,—তাঁতো আমি ভেবে ঠিক কর্তে পারলুম না। সন্ধ্যার পরই “ফোর্টের” আড্ডাঘর জমজমাট! এক এক করে

হরেক রকমের লোক আসতে শুরু করে। আমার বয়সী তের চৌদ্দ বছরের ছোকরা থেকে পঁয়ষট্টি বছরের বুড়া পর্যন্ত সে “ফোর্টের” সেপাই বা আড্ডাধারী। যে আসে সেই আমাকে দেখে আমার পরিচয় জিজ্ঞাসা করে। দেসোমামা গম্ভীর হ’য়ে সবাইকে বলে—“আমার ভাণ্ডে।” একজন প্রোট ভদ্রলোক রসিকতা করে বললেন “নরানাং মাতুলক্রমঃ সূতরাং ওতো এই কচি বরসে এখানে আগে আসবে।” যা—হোক মুখ্যে বাড়ীর দৌতুর সন্তান এবং বিধবার ওয়ারিশান বলে সকলেই আমাকে যথেষ্ট আদর যত্ন কর্তে শুরু করলেন। ক্রমে আমার ফোর্টের আড্ডাটি বেশ ভাল লাগতে লাগলো। কত রকমের “বোলচাল”—কত মরার কথাবার্তা, কত রসিকতা গুনলুম—খানিক পরে কি জানি কার আদেশে এক হাঁড়া সন্দেশ নিয়ে সেই ঘোষণা মশাই—আমার সামনে এনে রাখলেন। একখানা নয়, এক বাটি নয়, এক ঠোঙ্গা নয়, একটা ছোটো নয়,—একেবারে এক হাঁড়া। আড্ডায় যে যে স্থানে ছিলেন—সবাই একবাক্যে আমাকে বলতে লাগলেন—“খাও—বাবা খাও, লজ্জা কি?” কেউ বললেন “আমি তোমার সম্পর্কে মামা হই—” কেউ বললেন—“তোমার মাতামহ আমার ক্লাসফ্রেণ্ড।” কেউ বললেন—“তোমার মাকে কত কোলে পিঠে করে ঠাকুর দেখিয়ে এনেছি।” একটা অতি অর্কাচীন মাঝখান থেকে বলে উঠলো—“হরি-মাধন খুড়ো (আমার স্বর্গীয় মতামহ) আর আমি একাধিক্রমে বাইশ বছর “টুন্সী খেমটীটলির” ঘরে মদ খেয়ে আমোদ করিছি।” আড্ডা শুদ্ধ লোক তাকে মার্তে কেবল বাকী রেখেছিল। আমি তো বাস্ত্য্যাক্যে খেয়ে গেলুম। প্রথমতঃ এরা কি আমায় রাকস না

কি ঠাউরেছে যে এই কাঁচা বয়সে আমি এক হাঁড়া বাগবাজারের রসগোল্লা খেয়ে ফেলবো? সে সময় তামাক বা বার্ডসাই নেশা চলছিল,—বৈকালে বা দিনের বেলায় উৎকট রকমের যা হবার হয়ে গেছে,—সন্ধ্যার পর সেরকম কিছু আর কাকেও কর্তে দেখিনি, তবে তাঁদের মেজাজটা এমন খোলসা হ'ল কিসে—যার জন্তে তাঁরা আমাকে এক “হাঁড়া রসগোল্লা” জলযোগ কর্তে বলেন!

দেসো মানার এতক্ষণে চৈতন্যোদয় হ'ল। তিনি বোধ হয় আমার মার কাছে তাঁর প্রতিশ্রুতির কথা স্মরণ করে ফেলেন। তাড়াতাড়ি আমার কাছ থেকে হাঁড়াটাকে একটু সরিয়ে দিয়ে বলে উঠলো—  
“হাঁ—হাঁ—করেন কি আপনারা আমার সোণার চাঁদ ভাঙে, কত বড় লোকের ছেলে হাকিমের ছেলে—তার ওপোর রাম বাঁড়ুয়োর নাতি, কিশোরী মুখুয়োর নাৎনি হল—ওর মা, আমার ছোড়দি।”

সবাই হো হো করে হেসে উঠলো? একজন বললে—“দেসো মামা আজ একেবারে বেহেড্ হয়ে পড়েছে;—দাও তো শালার সর্বাঙ্গে এই ভিজ্জে গামছাখানা জড়িয়ে—”

বোলবামাত্রই দেসোমামা—“বাবারে—শালারা ব্রহ্মহত্যা কল্লে—” বলেই একেবারে আড্ডাঘর থেকে টেনে দৌড়।

বাইরে থেকে মামা হাঁকতে লাগলেন—“চলে আয় খোকা—শালা ছোটলোকদের আড্ডা থেকে। ছ্যা—ছ্যা—ভদ্রলোক “কেউ কোর্টে” ঢোকে? যত শালা ছোটলোকের মরণ বইতো নয়! কোনো শালা ভদ্রলোক ওখানে আছে?”

বাইরে দাঁড়িয়ে দাঁড়িয়ে দেসো মামা যত গর্জন ও গালিবর্ষণ কর্তে

থাকে,—ঘরের ভেতরে তত হাসির রোল বাড়তে থাকে। দেসোমামার এই রকম অভদ্রোচিত অকথ্য গালাগালিতে কেউ রাগ তো করেন না, উপরন্তু সবাই বেশ আনন্দ উপভোগ করেন দেখলুম। যা হোক—বাইরে থেকে দেসোমামা ঘরের ভেতরের সবাইকে গাল দেয়,—আর ঘরের ভেতর থেকে ছ'পাঁচজন দেসোমামাকে বাপাস্ত চৌদ্দপুরুষাস্ত করেন। এই ভাবে খানিকক্ষণ বেশ মজা হ'তে লাগলো! বিলু জ্যাঠা আমার কাছে এসে একটা পরিষ্কার বাটাতে চারটা রসগোল্লা নিয়ে আমার সামনে ধরে খুব আদর করে স্নেহ-ভরে আমার গায়ের মাথায় হাত বুলিয়ে আমাকে বললে—“খাও তো দাদা—আমি তোমার মার খুড়ো হই,—তুমি আমার নাতি,—আমি আদর করে দিচ্ছি—খাও!” মহা মুন্সিলে পড়ে গেলুম আর কি! ভদ্রলোক,—প্রবীণ লোক,—বৃদ্ধ লোক,—এমন আদর করে খেতে বলছে, কেমন করে কথা ঠেলি? বাস্তবিক আমি কিছুতেই “না” বলতে পারলুম না। অগত্যা একটা রসগোল্লা তুলে নিয়ে খেলুম।

“আরে—কোথাকার হেব্লা ছেলেরে তুই? এমন চমৎকার রসগোল্লা।”

ঘাড় ফিরিয়ে দেখি—বক্তা স্বয়ং দেসোমামা—কখন এসে আমার পাশে জমী নিয়েছে দেখিনি।

যা হোক দুটো রসগোল্লা গেয়ে ফেল্লুম বটে, কিন্তু প্রাণে বড় ভয় হ'ল,—মা টের পেলে কুরুক্ষেত্র কাণ্ড বাধাবেন!

ঘরগুদ্ধ লোক—ছমিনিটের মধ্যে হাঁড়াগুদ্ধ রসগোল্লা—ময় রস পর্য্যন্ত নিঃশেষ করে ফেল্লে।

জলযোগ পর্ব সমাধার পর দেসোমামা হার্মোনিয়াম টেনে চক্কু বুঁজে একখানি মধুর গান ধল্লেন, সে গান আমার আজও যেন কানে লেগে আছে!—

মামা শুধু মধুর কণ্ঠে—সবাইকে মুগ্ধ করেন নি,—নেশাখোর দেসো মামা গানটী খুব ভাবের সঙ্গে গেয়েছিলেন—তাই বোধ হয় অত মিষ্টি লেগেছিল।

মামার গানের সঙ্গে যদিও ক্লানেট, বেহালা, হার্মোনিয়ামের সুর চলছিল,—কিন্তু সকল সুরকে ছাপিয়ে সেই মধুর কণ্ঠধ্বনি পল্লীবাসীর কানে মধুবর্ষণ করছিল! আড্ডায় তখন “গঞ্জিকা দলনে” সবাই উৎসাহান্বিত; দেসোমামার গানে সবার সে উৎসাহ যেন চারপাশ বেড়ে উঠলো! সবাই—“বেচে থাক্ বেটা দেসো—বেঁচে থাক্ রথ পর্য্যন্ত!” কেউ বললে—“বেটা যেন কোকিল বাচ্চা—” একজন বললে—“গা—গা—বেটা ‘কালনে খাঁর’ দৌস্তর—আর একটা গা—গোলাপ জলে ছাঁকা মাল,—এখুনি টিপ তৈরী করে খাইয়ে দিচ্ছি,—তোার চোদ্দ পুরুষ উদ্ধার হয়ে যাবে।”

দেসোমামা এ সব মিষ্ট-সম্বোধনে চিরভ্যস্ত—বেশ বোঝা গেল! স্মতরাং এতে তিলমাত্র বিচলিত না হয়ে পুনরায় গান ধল্লেন—

গান শেষ করে হার্মোনিয়ামটা হঠাৎ আমার দিকে ঠেলে দিয়ে দেসোমামা আমাকে বল্লেন—“তুই একটা গা খোকা—বলেই চক্কু বুঁজে একটা পাকানো বার্ডশাই ধরিয়ে গাঁজার কলকে ধরার কায়দায় ছ’হাতে দশ আঙ্গুলে বাগিয়ে ধরে—শোঁ-শোঁ করে টানতে লাগলেন—যে ছ’চার টানে সেই তিন ইঞ্চি লম্বা বার্ডশাইটা নিঃশেষ হবার উপক্রম।

দেসোমামা এক মুখ ধোঁয়া ছেড়ে আবার বল্লেন—“গারে খোকা—  
শীগ্গির গেয়ে নে—এখনি বাড়ী যেতে হবে। ছোড়্দি তোকে অনর্থ  
কর্কে—এমন রাগী নয়—হঁ—হঁ জানিস্ তো?”

আমি গাইব কি? দেসোমামার হঠাৎ একি খেয়াল হ'ল আবার!  
আমাকে নীরব দেখে—নবাই আরম্ভ করলে—“গাও—গাও—তোমার  
মুখ দেখেই বুঝতে পাচ্ছি—তুমি বেশ গাইতে পার।”

আমি অত্যন্ত লজ্জিত হয়ে বল্লুম—“আমি গাইতে জানিনা মশাই।”  
একজন বল্লেন—“তা কি হয়? মুখ্যে বংশের দৌত্তুর সন্তান—  
বাগ্‌বাজারে মামা বাড়ী—বাতুরবাগানে বাপের বাড়ী—তুমি গাইতে  
জান না—এও কি সত্য কথা?”

দেসোমামা মহা রাগত হয়ে বল্লেন—“কেমন ভদ্রলোকের ছেলে-রে  
তুই—ভদ্রলোকদের মান রাখতে জানিস্ না? চট করে একখানা গেয়ে  
ফেলনা। বড় মুখ করে আমার ভাগে বলে পরিচয় দিয়ে তোকে  
এনেছি—”

বিষু জ্যাঠা বল্লেন—“তুই থাম্ দেসো—ছেলেমানুষ—ভড়্কে  
ষাবে!—ঐ গাইছে—”

কি করি?—না গাইলে তো ছাড়ান্ নেই। একখানা গেয়ে  
ফেলুম!—

“যদি সারাটা জীবন, কাঁদাবে এমন,

( তবে ) প্রাণমন কেন হরেছিলে।

যদি নিরবধি অধারে, ত্যজিবে আমারে

( কেন ) আশার প্রদীপ জেলেছিলে ॥

যদি, বিরহের বিষে, পোড়াইবে শেষে,  
 কেন, প্রেমসুধা প্রাণে বরষিলে ;  
 যদি, পায়ে ঠেলে চলে, যাবে অনহলে,  
 কেন, ভালবেসে বুকে ধরেছিলে ॥”

কোন রকম ঘাড় নিচু করে গান গেয়েই—তাড়াতাড়ি উঠে  
 পড়লুম। ঘরে দেখি লোক ধরে না। ভেবেছিলুম—গান শুনে সবাই  
 হাসবেন। বুঝলুম—সকলে যথার্থই খুসী হয়েছেন এবং এত তারিফ  
 কত্তে আরম্ভ করেছেন—যে, বাস্তবিক সে “তারিফ বাহবা”—  
 ইত্যাদির জ্বালায় আমার প্রাণান্ত হবার উপক্রম। দেসোমামা আধ-  
 পোড়া চুরুটটা আমার হাতে দিয়ে ফুঁত্বিতে বলে উঠলো—“কোসে  
 মারো দম্ব বাপধন।”

## সপ্তদশ পরিচ্ছেদ ।

মাস দুই মামার বাড়ীতে বসবাস করে আমি এই বারো তেরো বছর বয়সেই দস্তুর মত সকল বিষয়ে বেশ “নায়েক” হয়ে উঠলুম। তামাক, চুরুট, সিদ্ধিতে আমি বিশেষ পরিপক্বতা লাভ করেছিলুম। প্রত্যহ “আখড়ায়” গিয়ে গাখী বাজনা অভ্যাস কর্তুম। কতরকমের ইয়ারকি রসিকতার কথা যে সে বয়সেই শিখেছিলুম তা বলবার নয়। আমার কথা শুনে সকলেই বলতো—“উঃ—এইটুকু ছেলের কথায় যেন স্কুরের ধার।” চুল ছাঁটা টেরি কাটার বাহারে চেহারায় বেশ একটু নতুনত্ব হয়েছে স্পষ্ট বুঝতে পাল্লুম।

বোশেখ মাসের শেষাশেষী মার সঙ্গে বাছুরবাগানের বাড়ীতে ফিরে এলুম। আমার বৈমাত্রেয় ভগ্নী “নলিনীর” বিবাহ। স্মৃতরাং মামার বাড়ীর বিষয় আশয়ের পাকা রকম কিছু ব্যবস্থা না করেই বাধ্য হয়ে মাকে



চলে আসতে হ'ল। এবার বাড়ীতে এসে আমার খাতিরটা ছেলেমহলে যেন কিছু বেশী রকমের দেখলুম। দাদাবাবু আমাকে দেখে খানিকটা আমার দিকে চেয়ে মুচ্কে হেসে বললেন—“বাঃ—দিব্য চেহারা হয়েছে তো! টান্তে টান্তে শিখিছিস্?” ঠাকুমা সেখানে উপস্থিত ছিলেন; ঠাকুদার কথা শুনে বললেন—“শিখবে বইকি! কেমন লোকের নাতি!”

নলিনীর বিয়ের সব ঠিকঠাক হয়েছে, সপ্তাহ খানেক মাত্র বাকী। পাত্রটির বাপ মা নেই; পাত্রের কাকা নিঃসন্তান তিনিই অভিভাবক। পরিচয় বিশেষ কিছু তখন শুনিনি। বিবাহের তিনচার দিন পূর্বে শুনলুম, নলিনীর বিবাহ আপাততঃ স্থগিত রাখতে হবে। বাবা সকালবেলা গম্ভীর মুখে বৈঠকখানায় বসে আছেন। আমি এক পাশে বসে প'ড়ছি। সেদিনটা ছিল রবিবার। হঠাৎ দাদাবাবু ঘরের ভিতর এসে উপস্থিত হ'লেন। বাবা যেমন ঘাঁড় হেঁট করে বসেছিলেন, সেই রকম বসেই রইলেন।

দাদাবাবু একটা তাকিয়া ঠেস দিয়ে বসে কথা আরম্ভ করলেন—  
“কিছু সাব্যস্ত করলে?”

বাবা বললেন—“না, এখনও কিছু সাব্যস্ত কর্তে পারিনি!”

“পরশু গায়ে হলুদ। এখনও যদি সাব্যস্ত না করবে, তা'হলে করবে কবে?”

“আপনি যা অনুমতি করবেন—আপনি যে রকম সাব্যস্ত করবেন, সেই রকমই হবে।”

“আমি সাব্যস্ত তো গোড়া থেকেই করেছি—নতুন করে আর কি করব। আমি এক পয়সাও দিতে পারব না। প্রায় সাড়ে পাঁচ লক্ষ টাকা আমার দেনা। সিরাজগঞ্জের Agencyর ম্যাক্ফার্সন সাহেব—

শুনেছি নাকি—আমার পঞ্চাশ হাজার টাকার গোলমাল করেছে। বড় সাহেব বলে—আগে টাকাটা Deposit দিয়ে তারপর তদ্বির করো। এই পঞ্চাশ হাজার টাকার এক টাকাও জোগাড় হয়নি, এ অবস্থায় তোমার মেয়ের বিয়েতে আবার পাঁচ সাত হাজার টাকা কোথা থেকে বের করি?”

এমন সময় মেজ কাকা সকাল বেলাতেই একগাল পান চিবুতে চিবুতে ঘরে এসে ঢুকলেন। চক্ষু দুটি রাঙ্গা করমচার মত, মুখখানা লাল টুকটুকু কচ্ছে, গা দিয়ে উৎকট গন্ধ বেরুচ্ছে, এসে বসলেন আমার গা ঘেঁসে, দাদাবাবু এবং আমার বাবার কাছ থেকে দেড়হাত তফাতে। কথা-বার্তার মাঝখানে তিনি নিজের মুরুর্কিয়ানা চালে বলে ফেললেন—  
“এ নিয়ে আর মাথা ঘামাবার দরকার কি? সরকার মশাইকে দিয়ে একখানা চিঠি পাঠিয়ে দাও বড়দা—অনিবার্য কারণে বিবাহ আপাততঃ বন্ধ। ব্যাস সোজা কথা।” মেজ কাকার কথায় কেউ কোনো উত্তর দিলেন না। দাদাবাবু একটু বিরক্ত হয়েই বললেন—“তুনি যে কোনো কথাই কইছ না গনেশ! কি করবে বল।” বাবা বললেন—  
“এতদূর এগিয়ে হঠাৎ বিয়েটা বন্ধ করা কি ভাল হবে? আমি যদি কোন রকমে টাকা যোগাড় করতে পারি!”

দাদাবাবু বললেন—“তোমার মার হাতেও তো একটি কপর্দক নেই শুনু—”

মেজকাকা একটু রুদ্ধস্বরে বললেন—“আর থাকলেও—বড়দার জগ্রে প্রত্যেক বার মা কেন টাকা বার করবে? এ তো বড় আবদার কম নয়! বাবা অপরাধীর মত চুপ করে রইলেন। দেখতে দেখতে অগ্রাণ্ড

কাকারা আমার বৈমাত্রেয় ভায়েরা একে একে এসে ঘরের ভেতর জেঁকে বসলেন। বাবাকে যেন সপ্তরথীতে ঘেরে ফেলল। বাবাকে নীরব দেখে দাদাবাবু বল্লেন—“তোমার হাতে কত টাকা মজবুত আছে শুনি।”

বাবা মুখ তুলে চেয়ে বল্লেন—“আমার হাতে কোথা থেকে থাকবে বলুন? যা ছশো একশো ব্যাঙ্কে আছে তাতে তো আর মেয়ের বিয়ে হ’তে পারে না—”

মেজকাকা একটু মুচ্কে হেসে বল্লেন—“বাবার কথাটা বুঝতে পারলে না বড়দা? তোমার হাতে, মানে, বড় বৌদির হাতে—”

“এক পয়সাও নেই।”

বলেই বাবা জানালার পানে শূণ্ণদৃষ্টিতে চেয়ে কি জানি ভাবতে লাগলেন।

মেজকাকা (কমল চন্দ্র) ঘরে ঢুকে পর্যন্ত কোন কথা কন্নি! হঠাৎ তিনি মেজকাকার দিকে চেয়ে বল্লেন—“তুমি যেমন মুফু মেজদা তাই বড়দাকে জিজ্ঞাসা কচ্ছ—বড় বৌদির হাতে টাকা আছে কি না! বড় বৌদির হাতে তো সব। সেই তো হ’ল Bengal Bank।”

বাবা একটু বিরক্ত হয়ে মেজকাকার দিকে মুখ ফিরিয়ে বল্লেন—  
“গুরুজনের সামনে একটু সংযত হয়ে কথা ব’লতে শেখো কমল—”

খুব চড়ে উঠে মেজকাকা বাবার কথায় বাধা দিয়া বল্লেন—“সত্য কথা বল’ব তার আর সংযত অসংযত কি? বড়বৌদির হাতে টাকা নেই তুমি বল’তে চাও?”

বাবা ধীরভাবে বল্লেন—“কিনে বুঝলে তুমি?”

মেজকাকা বল্লেন—“ও একা বুঝবে কেন? সবাই তা বুঝেছে।

তোমার এই সব “মা মরা” কচি কচি ছেলেরা পর্যাপ্ত জানে—তাদের বাপের যা কিছু নগদ টাকা কড়ি সবই তাদের বিমাতার আয়ত্তে—”।

মেজকাকার কথা শুনে বৈমাত্র ভায়েরা সবাই মুচ্কে মুচ্কে হাসতে লাগল।

বাবা বিশেষ প্রতিবাদ না করে শুধু বল্লেন—“সবাই যদি জোর করে বল, তা’হলে আমি নাচার। কিন্তু আমি বলছি—“সকলের এ ধারণা অত্যন্ত ভুল।”

মেজকাকা বিক্রমের হাসি হেসে মেজকাকার দিকে চেয়ে বলতে আরম্ভ করলেন—“আমাদের আগা-গোড়া সবই ভুল, সবই মিথ্যা! বাগবাজারে অননুপূর্ণা পূজায় ছ’চার হাজার টাকা এক রাতে খরচ করে—ধুমধাম লাগিয়ে দেশশুদ্ধ লোকজনকে নেমস্তন্ন করে খাওয়ানো, যাত্রা, থিয়েটার নাচ গান ইত্যাদি—এই সমস্তই ভুল।”

দাদাবাবু চক্ষু বুজে তাকিয়া ঠেস দিয়ে এতক্ষণ নীরব হয়ে গুড়গুড়িনে নলে মুখ দিয়ে আম্মারে “তান্নকুট সেবন” কচ্ছিলেন। মেজকাকার কথায় একটু যেন উত্তেজিত হয়ে উঠে বল্লেন—“তুমি চুপ কর কমল! বাগবাজারে কি হয়েছে না হয়েছে, সে খোঁজে আমাদের কোন দরকার নেই।” বলেই বাবার দিকে চেয়ে আবার আরম্ভ করলেন—“তুমি আমার বড় ছেলে, লেখাপড়া যথেষ্ট শিখেছ, হাকিমি কর, বুদ্ধিশুদ্ধি যথেষ্ট আছে—একথা দশে ধর্ম্মে সবাই বলে। কিন্তু শুনে আশ্চর্য্য হয়ে গেলুম আমি—যে আমার ছেলে হয়ে, আমরা বর্ত্তমান থাকতে—তুমি কি হিন্দেবে এই বুড়ো বয়সে খশুর বাড়ীতে ছ’পাঁচ হাজার টাকা খরচ দিয়ে’ ধুমধাম করে অননুপূর্ণা পূজা করেছ? টাকা খরচ করে পৈতৃক

ভিটেতে বাপ, মা, ছেলেমেয়ে, ভাই, বোন, আত্ম-কুটুম্ব নিয়ে আমোদ করলে কি নাম হোতো না? না তাতে আনন্দ হ'ত না? ছিঃ—তুমি যে এতটা একেবারে “বে-হেড” হ'তে পার তা আমি স্বপ্নেও ভাবিনি।”

ঠাকুরদার কথা শুনে বাবার মুখখানি যেন সাদা হ'য়ে গেল। চোকু ছুটা তাঁর ছল-ছল কর্তে লাগলো। মনে হ'ল—হয়তো বা এখনি তাঁর চোখ দিয়ে শ্রাবণের ধারা বইবে। কোন মতে আত্ম-সম্বরণ করে তিনি বল্লেন—আপনি বাপ, গুরুজন—আপনার কাছে মিথ্যে বলব না। পাকে চক্রে পড়ে আমি স্বপ্নের বাড়ীতে অন্নপূর্ণা পূজার জন্তে কিছু টাকা দিয়ে-ছিলুম বটে—কিন্তু সে অত টাকা নয়।”

ঠাকুরদা বল্লেন—“অত টাকা নয় তো কত টাকা শুনি।”

বাবা বল্লেন—“আটশো টাকা। আর সে টাকা “বাড়ীর ভেতোরের” (অর্থাৎ আমার মায়ের) জলপানি মাসোয়ারার টাকা থেকে জমানো। যদি বিশ্বাস করেন তাহ'লে আমি শপথ করে বলতে প্রস্তুত আছি যে আমার স্বপ্নের এক আত্মীয় অত্যন্ত হীন চাতুরী করে আমার কাছ থেকে ঐ আটশ টাকা নিয়ে গিয়েছিল। আমার নিজের ইচ্ছায় সাধ করে টাকাটা সেখানে অন্নপূর্ণা পূজোতে contribute করিনি।”

“ও সব কথা কচি ছেলেদের বুঝাও গিয়ে গণেশ!” বলেই ঠাকুরদা তাকিয়ায় আবার ঠেস দিয়ে চক্ষু বুঁজে গুড়গুড়ির নল মুখে করে টানতে লাগলেন।

মেজ কাকা বল্লেন—“তাহ'লে বাবা আপনি সরকার মশাইকে দিয়ে পাত্রেয় বাড়ীতে চিঠি পাঠিয়ে দিন যে বিয়ে আপাততঃ বন্ধ রইল।”

ঠাকুরদা বাবাকে বল্লেন—“কি বল গণেশ?”

বাবা বল্লেন—“তা কি করে সম্ভব হ’তে পারে? পাকা দেখা হয়ে গেছে, নেমতন্ন পত্র ছাপা হয়ে গেছে, বিয়ের জিনিষপত্র সব অর্ডার দেওয়া হয়েছে—”

ঠাকুদা বল্লেন—“তাতে হয়েছে। কিন্তু টাকা কোথায়?”

মেজ কাকা বল্লেন—“সে ভাবনার আপনার দরকার কি বাবা? যার মেয়ে সে বুঝবে! আপনি অনর্থক মাথা ঘামিয়ে করেন কেন? আর সত্যি কথাই তো! এতদূর এগিয়ে—কোন্ আক্কেলে বিয়ে বন্ধ করার জন্তে এ বাড়ী থেকে পত্র যাবে? অন্ততঃ আপনি যখন বর্তমান রয়েছেন।”

মেজ কাকা তখনি সায় দিয়ে বল্লেন—“বটে তো? বড়দাই যেন বাপ-দাদার মানমর্যাদা, বংশের নামসম্মত গ্রাহ্য করেন না! তা বলে তো আমরা সেটা বরদাস্ত কর্তে পার্ক না? বড়দা বুঝেন শ্বশুর বাড়ীর মানমর্যাদা, শ্বশুর বাড়ীর নাম ডাক। বড়দার গদাই ভাবনা—কিসে বড়বৌদির মনস্তৃষ্টি কর্কেন—”

যা কখনো দেখিনি শুনিনি—যা কখনো স্বপ্নেও ভাবিনি, হঠাৎ তাই আজ চোখের ওপোর দেখলুম—শুনলুম। বাকুদের স্তূপে আগুনের কিন্‌কি পড়লে যেমন একটা ভীষণ অগ্নিকাণ্ড হয়—মেজ কাকার এই শেষ কথাটায় বাবা একেবারে সেই রকম জলে উঠে চীৎকার করে বল্লেন—“মুখ সামলে কথা কোন্ গোপাল ষ্টুপিড...রাস্কেল...পাজী... বদ্‌মাস! ফের যদি এ রকম বেকাস কথা কইবি...এক লাগিতে তোর মুখ ভেঙ্গে দেবো...”

কথাগুলো বলতে বলতে মুখ চোখ রক্তবর্ণ করে বাবা দাঁড়িয়ে উঠে থরথর করে কাঁপতে লাগলেন।

বার বাড়ীতে যে যেখানে ছিল...সবাই সেই বৈঠকখানা ঘরের দিকে ছুটে এল। মেজ কাকা কি একটা কথা বলতে যাচ্ছিলেন...বাবা তাঁর মুখের কাছে একটা আঙ্গুল খাড়া করে বলেন...*One word more & I will kick you out at once...* রাস্কেল ! এত বড়স্পর্ধা তোমাদের ? বড় ভাই বলে এতটুকু করলেও বাপের সামনে বসে, ছোট লোক ইতরের মত কথা কহিতে আরম্ভ করেছ ? অনেকক্ষণ সহ করেছি...চিরদিন তোমাদের অত্যাচার সহ করে এসেছি ! কত সয় ? রক্তমাংসের দেহে মানুষ আর কত সহ কর্তে পারে ?” বলেই বালকের মত হাউ হাউ করে কাঁদতে আরম্ভ করলেন ; বাবার কাঁদা দেখে আমিও কেন্দে ফেল্লুম।

চোক মুছে দেখি...লোকের ভীড় ঠেলে ঠাকুমা বৈঠকখানায় বাবার পাশে এসে...আদর করে বাবার হাতটী ধরে বাবাকে বাড়ীর ভেতর নিয়ে চললেন। নিরীহ মেঘ শাবকের মত কোঁচার খুঁটে চোখ মুছতে মুছতে বাবা ঠাকুমার সঙ্গে অন্তঃপুরে গেলেন।

\* \* \* \* \*

নলিনীর বিবাহ বন্ধ হ'ল না। লোক দেখানো ধুমধামে বড়লোক রামচন্দ্র বাঁড়ুয্যে মশায়ের পৌত্রীর বিবাহ হয়ে গেল। খুব “ইংরিজি বাজনা বাজি” করে “খাস্ গেলাসের রোশনি করে বর এসে আসরে বরের সিংহাসনে বোসলো।”

বরের মুখের দিকে চেয়ে দেখি, একি...এ যে আমার সেই প্রাণের বন্ধু...যশোর স্কুলের সহপাঠি “রাজেন”...যশোরের সিভিল সার্জেন ডাঃ রামপ্রসাদ চাটুয্যের ছেলে।

আনন্দে আমি আত্মহারা হয়ে একেবারে বরকে জড়িয়ে ধরে বল্লুম...“রাজেন ! তুই নলিনী দিদির বর ?”

## অষ্টাদশ পরিচ্ছেদ ।

মা লক্ষ্মী চিরদিন অচলা হয়ে কোনো সংসারে কখনো থাকেন না, এ কথা সহজেই প্রমাণ করা যায়। যাকে উপলক্ষ করে তিনি প্রথমে “নারিকেলাম্বুৎ” সংসারে ঢোকেন, তাঁর জীবদ্দশাটায় “ধনে পুত্রে লক্ষ্মী লাভ”—ধুলো মূঠো ধল্লো সোনা মূঠো ইত্যাদি চলিত কথাগুলোর স্বার্থকতা প্রায়ই দেখা যায়। খুব পুণ্যবানের সংসারে হয়তো প্রথম পুরুষের ( Generationএর ) পর দ্বিতীয় পুরুষ-টাতেও ঐ ভাব বজায় থাকে। তৃতীয় পুরুষেই যে “ভাঙ্গোন্” অনিবার্য—তাঁর দৃষ্টান্ত শতকরা সাড়ে নিরেনকু ইটা সংসারে মিলিয়ে পাওয়া গেছে। সে রকম সকল দিকে “বোল-বলাও” কিছুতেই বজায় থাকে না, তা সেটা পয়সার দিক থেকে বা বংশ রক্ষার দিক থেকেই হোক। অজস্র ধনদৌলত আছে, অথচ ভোগ করবার কেউ নেই, অথবা ছারপোকার বংশ বৃদ্ধির মত যতদিন যাচ্ছে—কেবল বংশই বৃদ্ধি হ’চ্ছে কিন্তু তাদের



দিনান্তে অন্নমুষ্টি পর্য্যন্ত জোটা তার—এমন অবস্থা ! হয়তো সেই বংশ-জাত কোনো হতভাগ্য সপরিবারে ভিক্ষানে জীবন যাপন কচ্ছে,—এ দৃষ্টান্তও বিরল নয়। এই সব দেখে শুনেই বুঝি শঙ্করাচার্য্য লিখে-ছিলেন—“মা কুরু ধন জন যৌবন গর্ভং,—হরতি নিমেষাৎ কালঃ সর্বং ?”

পিতামহ রামচন্দ্র বাঁড়ুয়্যে মশায়ের জীবদ্দশাটা পর্য্যন্ত লোক দেখানো বড় মানুষি চালে সংসার বেশ চলেছিল। যদিও “ভাঙ্গোন্” আরম্ভ হয়েছিল তাঁরই শেষ দশা থেকে, তবু বাহুড়বাগানের বাঁড়ুয়্যে বংশ ক’ল্কাতার সহরে একটা বোনেদি বড়লোকের ঘর বলে বাজার খুব সরগরম করে রেখেছিল। ঠাকুন্দা মশাই নিজে যথেষ্ট উচ্ছৃঙ্খল—অমিতব্যয়ী ছিলেন,—সে জন্ত একদফা “পয়সা” নষ্ট তো হতোই, তার ওপোর—আমার “গো বেচারী” বাবা ছাড়া,—বাড়ীর টিক্‌টিকীটা পর্য্যন্ত সবারই “নবাবি চাল” হয়ে পড়েছিল। স্মৃতরাং আয়ের সঙ্গে খোঁজ নেই,—অথচ রাজারাজাড়ার মত ব্যয় আছে। ইন্দ্রের ঐশ্বর্য্য যখন নিঃশেষ হয়ে যায়, তখন ভাগ্যবান হরিরাম বাঁড়ুয়্যের ঐশ্বর্য্য কদিন অটুট—অক্ষয়—অব্যয় থাকতে পারে ? তিন চারটা—“হোসের” মুৎসুদ্দি হওয়াতে ঠাকুন্দার আয় সেদিক থেকে নেহাৎ অল্প ছিলনা বটে,—কিন্তু মাঝে মাঝে লোকমানের ধাক্কা সামলাতে তাঁর “হোসের” আয়ে সঙ্কুলান হওয়া চুলোয় যাক্—ঘর থেকে টাকা নিয়ে গিয়ে “এণ্ড কোম্পানীদের” দিয়ে আসতে হ’ত। তিনি নিজে যেমন মন্তপায়ী—চরিত্রহীন—দাস্তিক—“সবজাস্তা” ছিলেন “হোসের” কাজেও বেছে বেছে কর্মচারী নিযুক্ত কর্তেন—সেই শ্রেণীর লোকদের !

“হোসের” কাজের সঙ্গে তাঁর টাকা নিয়েই সঙ্ক। সেই “টাকার” কাজে রীতিমত জামিন নিয়ে, সুচরিত্র কাজের লোক নিযুক্তকলে.—তবেই না সকল দিকে মঙ্গল হ’ত ? কিন্তু তা .তো তিনি কর্তেন না ! লোকের মুখে শুনেছি “অবিষ্টামহল” থেকে জোর সুপারিশ নিয়ে যদি কেউ তাঁর কাছে চাকরীর আবেদন কর্ত—তৎক্ষণাৎ তাঁকে তিনি মোটা মাইনে দিয়ে “হোসে” ক্যাশের কাজে নিযুক্ত কর্তেন। এই শ্রেণীর লোকেরাই কোম্পানীর তহবিল-তছুর-পাত করে তাঁর কতটাকা যে লোকমান করিয়াছে তার আর ইয়ত্ন নেই। চাকরীর জন্তে ঠাকুদার কাছে এসে কেউ দাঁড়ালে তিনি সব আগে তাকে জিজ্ঞাসা কর্তেন— “তোমার রক্ষিতা স্ত্রীলোক আছে ?” থাকলে তখুনি চাকরী। না থাকলে অগ্নি অগ্নি বিদায় ! ঠাকুমা নাকি এর কারণ জিজ্ঞাসা করলে উত্তরে ঠাকুদা বলেছিলেন—“আরে বুঝলে না—মেয়ে মানুষ বাঁধা থাকলে বেটা ক্যাশ ভেঙ্গে কোথাও পালাতে পারবে না। সহজেই ধরা পড়বে !” চমৎকার যুক্তি।

যাক্। এই তো গেল ঠাকুদার জীবদশাতেই আমাদের সংসারের আর্থিক অবস্থা। তবু সুখে দুঃখে শান্তিতে অশান্তিতে বাইরের বড়-মানুষি চাল বজায় রেখে সকলে “তালে-গোলে” কোন রকমে দিন কাটাচ্ছিলুম। সংসারে সকল দিকে মানিয়ে জুনিয়ে—ওরই মধ্যে সকলকে তুষ্ট করে বুঝিয়ে সুজিয়ে অতিকষ্টে পারিবারিক শান্তিটাকে জোর করে ধরে রেখেছিলেন—আমার সতীলক্ষ্মী পিতামহী কিন্তু—সব ঘুলিয়ে গেল—সকল দিকে ওলোট-পালোট হ’ল—বাড়ুয্যে সংসার হ’তে শান্তিদেবী, সঙ্গে সঙ্গে মা লক্ষ্মী চিরবিদায় গ্রহণ করলেন সেইদিন—

যেদিন আমার পিতামহী অনন্তশয়নে চিরনিদ্রায় অভিভূতা হয়ে বাড়ু য়ে সংসারকে লক্ষ্মীহীনা করে চলে গেলেন।

ঠাকুদা আর অন্দর মহলে চোকেন না। শোকে—হুঃখে—পত্নী বিরহের বেদনায় নিশ্চিন্ত হয়ে—নির্ভয়ে—নির্বিবাদে জীবনের বাকী কটা দিন মনের সাধ মিটিয়ে “আমোদে প্রমোদে” দিবারাত্রি বিভোর হয়ে কাটাবেন বলে। বয়েস প্রায় আশী বছরের কাছাকাছি,—কিন্তু—আশ্চর্যের বিষয় এই যে সে বয়সেও তাঁর এই সব জঘন্য কার্যে প্রবৃত্তি ও রুচি ছিল!

মেজ কাকা, সেজ কাকা লেখাপড়া সাজ করেই ঠাকুদার সঙ্গে “হোসে” বেরুতেন। বেতন অবশ্য মোটা রকমেই পেতেন, কিন্তু তাতে তাঁদের নিজেদের এবং তাঁদের ছেলেদের বাবুয়ানির খরচ কুলোতো না বলে—প্রতিমাসে ঠাকুদার কাছ থেকে টাকা নিতে হ’ত। মাঝে মাঝে পিতাপুত্রদের টাকা নিয়ে খুব বচসা হ’ত শুনতে পেতুম। ছোটকাকা ( কনক চন্দ্র ) মাসের মধ্যে বাইশ দিন বাড়ীতেই থাকতেন না। তাঁর একটা “মুসলমান বাইজি” রক্ষিতা ছিল; তাঁর প্রেমেই তিনি বিভোর হ’য়ে থাকতেন। ঠাকুদার সব চেয়ে তিনিই ছিলেন—“আদরের ধন!” তাঁর সমস্ত খরচপত্র ঠাকুদা খুব আনন্দের সহিত বরাবর জুগিয়ে যেতেন।

বাবা “ছ-শো” টাকা বেতন পেতেন। মাসটা কাবার হ’লেই সংসার খরচের জন্ত চারশো টাকা পিতামহের হাতে দিতেন। বাকী দুশো টাকা নিজের হাত খরচের জন্ত বাপের সম্মতিক্রমে রাখতেন। সেই দুশো টাকাতে আমাদের কয় ভাইয়ের স্কুল কলেজের মাইনে,

মার হাত ধরচ—বাবার নিজের ছ'দশ টাকা বাজে ধরচে ব্যয় হ'ত  
সুতরাং বাবার হাতে টাকা জম্বার কোন উপায় ছিল না।

যাক্—এইবার পারিবারিক গোটা কতক কথা ব'লে—আমি আমার  
বংশের প্রত্যেক চরিত্র বর্ণনায় বিরত হব। শত্রুর মুখে ছাই দিয়ে—  
ছ'পুরুষের মধ্যে বাছড়াগানের হরিরাম বাড়ুঘো মহাশয় হ'তে উদ্ভূত  
এ সংসারে এত জনসংখ্যার বৃদ্ধি হয়েছে, যে আগাগোড়া প্রত্যেকটির  
ইতিহাস বিবৃত কর্তে গেলে, দস্তুর মত একখানি অষ্টাদশ-পর্কের কলির  
মহাভারত গ্রন্থ লিখিত হয়ে পড়বে। বুদ্ধিমান এবং বুদ্ধিমতী পাঠক  
পাঠিকাগণের কাছে যতটা আমার বাল্য ইতিহাস এ পর্য্যন্ত ব্যক্ত করেছি—  
তাই থেকেই তাঁরা বেশ স্পষ্ট বুঝতে পারবেন,—শুধু আমার পিতামহের  
নির্বুদ্ধিতায় তাঁর পৌত্র দৌহিত্রের অশুভ ভয়াবহ পরিণাম অবশ্যস্বাভাবী  
এবং অনিবার্য হয়েছিল কি না!

নলিনীর বিবাহের জন্ত সমস্ত টাকা বাবাকেই সংগ্রহ কর্তে হয়েছিল,—  
অবশ্য—কর্জ করে। বাবার সেই সাত হাজার টাকার ঋণ ছর-দৃষ্টক্রমে  
তিনি নিজে শোধ কর্তে সক্ষম হননি। সে ঋণ শোধ করেছিলাম—  
আমি। কেমন করে,— তা পরে জানাবো।

নলিনীর বিবাহের পর,—বাবা মেজকাকার কাছে গিয়ে অপরাধীর  
মত ( বড় ভাই হ'লে ছোট ভাইয়ের কাছে ) তাঁর দুটা হাত ধরে ক্ষমা  
চেরেছিলেন। মেজ কাকা ক্ষমা কল্লেন বটে,—কিন্তু মুখের ওপোর  
এ কথাটাও জানিয়ে দিলেন—“তোমার ওপোর আমার কোন রাগ  
নেই বটে,—কিন্তু বড় বৌদির অহঙ্কার আমি কখনই সহ্য কর্তে  
পারি না।”

বাবা জিজ্ঞাসা করলেন—“সে বেচারীর অহঙ্কারটা কিসে দেখলে শুনি ?”

মেজ কাকা বেশ গরম হয়েই বললেন—“আরে বাপ রে! অহঙ্কার নয়? তেজে অহঙ্কারে একেবারে ফেটে পড়েছে! আমাদের সঙ্গে ভাল করে কথা কওয়াই চুলোয় যাক, বাবাকে পর্যন্ত তিনি গ্রাহ্য করেন না,—অপমান কর্তেও কসুর করেন না?”

বাবা খুব শান্ত ভাবে বললেন—“কথা সে খুব বেশী কারুর সঙ্গেই কয়না,—কিন্তু গুরুজন কিম্বা সংসারের কোনো আপনার জনকে সে অসন্মান কি অনাদর করে,—এ কথা কখনো শুনিনি।”

মেজ কাকা একটু শ্লেষের হাসিচ্ছলে বললেন—“রাগ কোরোনা বড় দা,—বড় ভাই বলে তোমাকে কিছু বলতে পারিনা বটে কিন্তু তোমার ঝাকামির কথা শুনে পিত্তি শুদ্ধ জলে যায়। তুমি ধর্ম কথা কও দিকি—বড়বৌদি নিজের চালে থাকেন না?”

বাবা অবাক হয়ে জিজ্ঞাসা করলেন—“এর মানে তো বুঝলুম না গোপাল! জীলোক “চালে” থাকবে কি রকম? বিশেষতঃ শ্বশুর বাড়ীতে?”

মেজ কাকা। “মনে আর তুমি নোঝোনা...এতদিন হাকিমি ক’চ্ছ “চাল” মানে “অহঙ্কার।” এই তো বাড়ীতে এত বৌ-বি সব রয়েছে,... সবাই সবাকার সঙ্গে বস্ছে দাঁড়াচ্ছে...হাসছে...কথা কইছে...তাস খেল্ছে...গল্পগুজব কচ্ছে। কিন্তু...কখনো বড়বৌদিকে কারুর সঙ্গে মেলামেশা করে দেখতে পাও? জানেন কেবল রান্না ঘরটা আর নিজের শোবার ঘরটা! তোমাদের সেজ-বৌ বলেন...দিদি কেবল

সংসারে কাজ নিয়েই লোক দেখানো ব্যস্ত থাকেন। সবাইকে জানাতে চান...মস্ত বড় কাজের লোক,...তিনিই যেন বাড়ীর সর্ব সর্বময়ী!”

বাবা এবার হেসে ফেলেন,...খানিকক্ষণ চুপ করে থেকে ব'লেন...  
“তাহ'লে তোমরা বলতে চাও, সংসারের কাজে ব্যস্ত থাকাটাও তার দোষ? আর...হ্যাঁ, আর একটা কথা যে কি বলে গোপাল,... ভাল বুঝতে পারলুম না; তোমাদের বড় বৌদি কারুর সঙ্গে মেলা-মেশা করেন না? তার মানে পুরুষদের সঙ্গে বলছ?”

মেজ কাকা বিষম ক্রুদ্ধ হ'য়ে ব'লেন...“ছোট ভায়ের সঙ্গে ঠাট্টা ক'চ্ছ বড়দা? খুব বিণ্ডে তো?”

বাবা কিন্তু তিলমাত্র রাগ না করে...সেই রকম হেসে হেসেই বলতে লাগলেন,...“ঠাট্টা করিনি গোপাল,...তোমার কথাটা বুঝতে পারিনি...তাই তোমাকে জিজ্ঞাসা কচ্ছি। রাগ কোরোনা ভাই, আমি সবই জানি সবই বুঝতে পারি...সে তোমাদের সবাকার চক্ষুশূল! কুক্ষণে তোমাদের বাড়ীতে এসেছিল,...কুক্ষণে আবার আমি বিবাহ করেছিলুম! যাক...যা হ'য়েছে...তাতো আর ফিরবে না! আমি অনুরোধ কচ্ছি, তাকে ক্ষমা না কর্তে পারো আমি বড় ভাই... আমার ওপোর রাগ করে থেকেনা,...”

মেজকাকা বাবার কাতরতায় তিল মাত্র দুঃখ অনুভব করেন না; বুঝতে পারলুম।

বাবা মা সংসারে যতই নির্নিরোধী হয়ে থাকবার চেষ্টা করুন,... বেশ দেখতে পেতুম ;...বাড়ী শুদ্ধ সকলেই যেন তাঁদের সঙ্গে গায়ে পড়ে ঝগড়া বিবাদ করবার চেষ্টা কর্তেন! পুরুষ মহলে বাদ-বিসম্বাদ

যত হোক ..না হোক, পিতামহীর মৃত্যুর পর বাড়ীর ভেতর দিনরাত্রি যেন “চুলোর আগুন” জলেই আছে। অন্তরমন্ডলে এ অশান্তির মুলাধার ছিলেন...আমার সেই পিসিমা...ঠাকুরমার মৃত্যুর পর যিনি যথার্থই সে সময়ে বাড়ীর “গিন্নীর” পদে অভিষিক্তা হয়েছিলেন, অবশ্য আমার পিতামহের আদেশ এবং ইচ্ছায়। শুধু যে আমার মার সঙ্গে “ছল” করে তিনি ঝগড়া করতেন তা নয়, বাড়ীর কোনো স্ত্রীলোক তাঁর কাছে লাঞ্ছিতা অপমানিতা না হয়ে “পার” পেতো না। যে মুখ বুজে চূপ করে সরে যেতে পারতো, সেদিন “ঝগড়া ঝাঁটা” চীৎকার গোলমাল অল্পে অল্পে শেষ হ'ত। কিন্তু মেজাজ তো সকলকার সব দিন সমান থাকে না। বাস্তবিক যে নিরপরাধী সে হয়তো পিসিমার অন্তর কথায় বা আচরণে একটু আধটু প্রতিবাদ করত। ব্যস...তাহ'লেই একেবারে লঙ্কাকাণ্ড। আমার বৈমাত্র ভাইগুলিকে পিসিমা অণু কোন বিষয়ে “তৈরী” করে উঠাতে পারুন আর না পারুন...পদে পদে আমার মাকে কটুকথা বলতে অপমান কর্তে রীতিমত শিক্ষা দিতেন। পিসিমার প্রশ্নে বড়দা ( ছোপেন ) এমন বেড়ে উঠেছিল যে একদিন কি একটা সামান্য কথায় আমার মাকে “হারামজাদী” ব'লে তেড়ে মার্তে পর্য্যন্ত গিয়েছিল।

কিন্তু...ঈশ্বরেচ্ছায়—আমিও ক্রমে যখন বেশ “মাথা ঝাড়া” দিয়ে উঠলুম...এবং জন সমাজে একজন “কাঠ মৌয়ার” বলে আমার একটু “সুনাম” বেজে উঠলো...সেই সঙ্গে আমার মায়ের ওপোর অত্যাচার...যার তার কাছে আমার মার অপমান...মায়েয় সঙ্গে গায়ে পড়ে ঝগড়া করা...ইত্যাদি ব্যাপারগুলো ক্রমে বিশেষ রকম কম পড়ে এলো। বিশেষতঃ একদিনের একটা ঘটনায়।

আমি তখন এন্ট্রেন্স ক্লাশে পড়ি। টেট্ একজামিনের আর দিন আটেক বাকী আছে। হঠাৎ আমার সেজদা দীনেন্ আর আমার পিস্তুতো ভাই রমেশ সন্ধ্যার সময় আমার কাছে এসে বলেন... “আখ্যারাম...চল...ষ্টার থিয়েটারে “চন্দ্রশেখর” প্লে দেখে আসি। খুব চমৎকার হয়েছে...গঙ্গাবন্ধে প্রতাপ শৈবলিনীর সঁতার...ওঃ...কি Grand বলেই ছ’জনে খুব উৎসাহে গলাবাজী করে চন্দ্রশেখর নাটকের অভিনয়ের দৃশ্যপটের সুখ্যাতি কর্তে লাগলো। সামনে একজামিন্... এসময় থিয়েটার দেখতে যাই কি করে? মা কি যেতে দেবে ভাই... কথা কটা আমার শেষ হতে না হতেই মা সেই ঘরে এসে উপস্থিত। আমি কোনো কথা জিজ্ঞাসা করবার আগেই মা বলেন...“আজ বাদে কাল একজামিন্...এ সময় থিয়েটার দেখতে না গেলে চ’লবে কেন?” দীনেন্ দাদা ( অর্থাৎ সেজদা ) বলেন...“একদিন রাত্রে ছ’ঘণ্টা না পড়লেই বুঝি ছেলে মুকু হয়ে যাবে।”

“হ্যাঁ ..যাবে! থিয়েটার দেখতে হয়...তোমরা নিজেরা দেখগে...ওর মাথাটা খেতে এসেছ কেন?”

রমেশদা’ ইয়ারকির পুরে মাকে বিদ্রূপ করে অশ্লান বদনে বলেন... “বুঝলে না বড়মামী...তোমার খোকার মাথাটা যে কেষ্টনগরের সরভাজা...”

হঠাৎ ক্রোধে দিগ্বিদিক জ্ঞানশূন্য হয়ে মা চীৎকার করে বলে উঠলেন...“কি বলে নচ্ছার...বদ্মায়েস্? যত বড় মুখ নয়...তত বড় কথা? এখুনি মুখখানা “সানে” রগরে দেবো—তা জান?”

সেজদা বলে—“কেন তুমি ওর মুখ সানে রগড়াবে? ও তোমার খায় না পরে?”



মা বলেন—“যাও...তোমরা এখান থেকে—ভরসঙ্কে বেলা গোলমাল কোরো না।”

কি কথায় কি হয়—কে বলতে পারে? মার কথা শুনে...সেখানে বাড়ীর অগ্রাঙ্গ মেয়েছেলেরা জমায়েৎ হ'ল। মা সকলকে ব্যাপারটা আছোপাস্তু জানিয়ে দিলেন। গোলমাল শুনে পিসিমাও সেখানে উপস্থিত হলেন। গায় অগায় কিছু না বুঝে, কোন বিষয়ে কিছু বিচার না করেই পিসিমা ক্রোধে একেবারে “আগুন” হয়ে বলতে শুরু করলেন—“জানি লো বড়বো—জানি! কার ছেলে কত ভালো...তা আর আমার জানতে বাকী নেই! ছেলেটা তোমার বড় ভাল, বড় সুচরিত্র! ভাজা মাছটা উন্টে খেতে জানে না।”

মা বলেন—“কেন মিছে কৌদল ক'চ্ছ ঠাকুরঝি! আমি তো বলিনি...আমার ছেলে ভাল—”

পিসিমা সে কথায় কোন কান দিলেন না...নিজেই বকে যেতে লাগলেন...“আমাদের ছেলেরা বড় মন্দ...আর গুঁর খোকাটা একেবারে সোণার চাঁদ। তবু যদি, চান্দিকে “হাড় বগাটে” নাম না বেরুতো। দেখ্‌কো লো বড়বো দেখ্‌বো...মর্কো না—কটা পাশ করে তোর ছেলে...”

আমি আর সহ্য কর্তে পার্লুম না। পিসিমাকে রেগেই বল্লুম... “মিছে চেঁচামেছি কচ্ছ পিসিমা? যাও না...এখান থেকে...”

রমেশদা বলে উঠলো...“কেন যাব? তোর কথায় নাকি?”

আমিও গরম হয়ে বল্লুম...“হ্যাঁ...আমার কথায়...”

এই রকম কথাবার্তা বচসার মাঝখানে হঠাৎ বাবা সেখানে উপস্থিত হ'লেন।

এত মেয়েহলের ভীড় দেখে বাবা জিজ্ঞাসা করলেন...“কি হয়েছে কি ? দিন রাত্তির ঝগড়া কিচিমিচি তোমাদের ভাল লাগে ?”

সেজদা বললে...“কে ঝগড়া কচ্ছে...সেটা আগে দেখ, তারপর সবাইকে বোকে।”

বাবা বললেন...“কেউ ঝগড়া করেনি...ঝগড়া ঝাঁটা কেউ কর্তেই জানেনা তা আমি জানি। ক্ষান্ত দাও বাবা...আর সন্ধ্যা বেলা হট্টগোলে কাজ নেই!”

রমেশদা বাবার কাছে এগিয়ে এসে বললে...“আখ্যারামের ভারি আশ্পদ্ধা বেড়েছে...জানলে বড় মামা! আমার মাকে এমন যাচ্ছে তাই অপমান কল্লে...”

আমি ক্রমে দাঁড়িয়ে উঠে বল্লুম...“কি তোমার মাকে অপমান করিছি শুনি। এখানে গোলমাল কচ্ছিল সবাই...তাই এখান থেকে যেতে বলেছি...”

সেজদা আমাকে একটা জোর ধম্‌কানি দিয়ে বলে উঠলো... “চুপ কর ঠুপিড্ ?”

বাবা বললেন...“ওর অন্তায় কি হয়েছে দিনু যে ওকে ধম্‌কাচ্চিস্ ?”  
সেজদা ক্রমশঃ বাবার ওপোরই চোখ রাঙ্গিয়ে বলতে লাগলো... “তুমি তো ওর আর ওর মায়ের কিছু অন্তায় দেখতেই পাবে না। সাধ করে সবাই বলে...তুমি বুড়ো বয়সে কুপথে যাইতেছ...”

সেজদার কথা শুনে আমি বেন হঠাৎ জ্ঞান বুদ্ধি হারিয়ে কেল্লুম। পিঞ্জর মুক্ত বাঘ যেমন সামনে শীকার দেখে তার ওপোর একেবারে ঝাঁপিয়ে পড়ে আমিও সেই রকম পশুর মত সেজদার ওপোর লাফিয়ে

পড়ে তাকে মাটিতে ফেলে গলা টিপে অনবরত ঘুসি মারতে শুরু করলুম। তারপর কি হ'ল...আমার মনে নেই। অন্ধ রাতে চেয়ে দেখি আমি বিছানায় শুয়ে আছি...আর আমার মা বসে আমার কপালে অডিকোলোন মিশানো জলপট্টি দিচ্ছেন। দেহ একটু সুস্থ বোধ করলুম এবং সঙ্গে সঙ্গে উঠে বসলুম। মা জিজ্ঞাসা করলেন...“কিছু খাবি?”

আমি বললুম...“হ্যাঁ...বড্ড খিদে পেয়েছে মা...”

মা বিছানার ওপোনেই খাবার এনে দিলেন। আমি খেতে লাগলুম কিন্তু তখনও আমার অসুস্থতার কারণটা ঠিক বুঝে উঠতে পারিনি।

মা জীবৎ হেসে বললেন...“এত রাগ তোর শরীরে? ছিঃ...এ বয়সে এত রাগ তো ভাল নয়...”

সন্ধ্যারাজের ঘটনাটা এইবার মনে পোড়লো। আমি কোন কথা না বলে লজ্জায় ষাড় হেঁট করে খাবার খেতে লাগলুম।

## উনবিংশ পরিচ্ছেদ ।

পাঁচ বছর কেটে গেল ! বড় অল্পদিন নয় ; এর মধ্যে জগতে কত পরিবর্তন হয়, কত ধনবান নির্ধন হয়,—কত ফকীর আমীর হয়, কত ভাগ্নে কত গড়ে ; কত সুখসম্পদ, কত আপদ বিপদ ঘটে, পূর্বে তা কে নির্ণয় কর্তে পারে ? আমাদের সংসারে যে পরিবর্তন ঘটেছিল তা বলাই বাহুল্য । কল্কেতার নামজাদা বড় লোক রামচন্দ্রবাবু ( আমার পিতামহ ) সাতদিন নিউমোনিয়া রোগে ভুগে ইহ সংসারের লীলাখেলা সমাপ্ত করে মহাপ্রস্থান করেন । তাঁর জীবদ্দশায় উইল একটা করেছিলেন, তাতে তাঁর পুত্র পৌত্র দৌহিত্র সকলেরই একটা "হিস্যো" ছিল, সকলকারই নাম উল্লেখ ছিল, বাদ পড়েছিল কেবল অধীনের নামটা ।

ঠাকুদার সমস্ত ঋণ পরিশোধ করে—অবশিষ্ট সম্পত্তি যা ছিল, এক সংসারে "যৌথ পরিবার" হয়ে থাকলে—"নবাবী চাল" চলতো না

বটে,—সুখে স্বচ্ছন্দে স্বচ্ছলে সবাকার দিন যাপন হ'ত এটা স্বপ্নে। কিন্তু তা তো হবার জো নেই। ঠাকুদার শ্রাব্দের পরদিনই সংসার ভেঙ্গে গেল। বাড়ী “পাটিশন” হ'ল। সুতরাং হাড়িও ভিন্ন হ'ল। দেনাদার দায়ে সামনের বস্তি জায়গাটা সব প্রথম বিক্রী হয়েছিল। সুতরাং “অবিদ্ধা পঞ্চকা” ঠাকুদার মৃত্যুর পর বস্তি বিক্রীত হবার সঙ্গে সঙ্গেই অন্তর্ধান হয়েছিলেন। অত বড় বাস্তবভিটে কল্কেতার সহরে খুব অল্পই দেখতে পাওয়া যায়। ঠিক যেন রাজ-রাজড়ার বাড়ী। “পাটিশন হবার পর দেখলে মনে হ'ত যেন রামচন্দ্র বাবুর সঙ্গে সঙ্গে হরিনাম বাড়ুয়োর বসত বাড়ীটা পর্য্যন্ত উড়ে গেছে। জ্ঞাতি কুটুম্বের সঙ্গে তফাৎ হয়েও আমাদের কিন্তু নিস্তার নেই। কাকারা সবাই যে বাঁর স্ত্রী পুত্র নিয়ে পৃথক হ'য়ে রইলেন, কারুর সঙ্গে কারুর কোন সম্পর্ক নেই; ভায়ে ভায়ে যেন পাড়া প্রতিবেশীর ভাব। বাবা ভাল মানুষ,—তিনি কর্তার বড় ছেলে,—সুতরাং লোকতঃ ধর্ম্মতঃ—তাঁকে বাধ্য হয়ে অনেকের ঝক্কি পোহাতে হোলো। আমাদের সংসারে অনেক “আগাছা” এসে ভরস্তুর কল্লেন, তার মধ্যে আমার পিসিমা এবং তাঁর পুত্র রমেশচন্দ্রের নামই বিশেষ উল্লেখযোগ্য।

ঠাকুদার মৃত্যুর পর পিসিমা দিন কতক “বিষহীনা ভূঙ্গঙ্গিনীর” মত হয়ে পড়ে ছিলেন। কোনো ভাই আমোল দিলে না দেখে তিনি বাবার শরণাগতা হয়ে পড়লেন। তার ওপোর আর একটা বিশেষ দাবী ছিল তাঁর আমার বাবার সংসারে;—তিনি আমার বৈমাত্র ভায়েরের মানুষ করেছিলেন। বৈমাত্র ভায়েরা আমার মায়ের সংস্পর্শে আসতো না,—এমন কি তাঁরা আমার মার সঙ্গে খুব কম কথাবার্তা

কইতেন। 'স্বামী'দের প্রধান অভিভাবিকা ছিলেন আমার ঐ পিসিমা। আমার বৈমাত্র, ভগ্নি নলিনী কিন্তু আমার মায়ের বড়ই অনুগত ছিল। নলিনী বিমাতাকে নিজের গর্ভধারিনীর মত ভক্তি শ্রদ্ধা কর্ত্ত, ভাল বাসতো। কাজেই, মারও তার প্রতি খুব বেশী রকম টান ছিল।

বৈমাত্র ভায়েদের সঙ্গে আমার তেমন সদ্ভাব না থাকলেও, পিসিমা মনে মনে আমার প্রতি বিদ্বेष পরায়ণা হ'লেও,—রমেশদার সঙ্গে আমার ভাব খুব বেশী রকমের ছিল। রমেশদা বার তিনচার এণ্ট্রেন্স এক-জামিনে ফেল করে—একটা সওদাগরী অফিস ত্রিশ টাকা মাইনের কেরানীগিরি জোগার করে নিয়েছিলেন। অফিসের মাইনের টাকা থেকে এক পয়সা তিনি সংসারেও দিতেন না; নিজের মাকেও তাও তুলে দু'টাকা দিয়ে কখনো সাহায্য কর্ত্তেন না।

ঘোর “বয়াটে” ছেলে ব'লে রমেশ-দার খুব একটা নাম ডাক ছিল। আমাদের বাল্যকালে বয়াটে কথাটার যেমন প্রচলন ছিল, আজকাল সে রকম একেবারেই নেই। তখন একটু “চালচলনের” এদিক-ওদিক দেখলেই—লোকে মস্তব্য প্রকাশ কর্ত্ত—“ওটা বয়ে” গেছে। স্কুলে যদি “তেড়ি” কেটে কোন ছেলে যেতো অথবা ছাত্রবস্থায় যদি দশ আনা ছয় আনা কিম্বা সামান্য মাত্র ছোট বড় চুল ছেটে সিঁথি কেটে “বাবু” সেজে কেউ বেড়াতো—অমনি সাধারণ লোকের মতে সে “বয়াটে ছোকরা,” এর ওপোর যিনি সিগারেট-তামাক কিম্বা পান দোকান খেয়ে ঠোঁট রাঙ্গা করে বাহার দিয়ে বেড়াতেন, কিম্বা একটু বাচালতা কর্ত্তেন—বা বন্ধু মহলে রসিকতার মাত্রা কিছু বাড়িয়ে ফেলতেন—তিনি তো একেবারে মার্কণ মারা “ঘোর বয়াটে।”

এ সবেৰ ওপোৱা যিনি আবার সখের থিয়েটার ব্যক্তির দলে নাম লেখাতেন, কিম্বা গান বাজনা অভ্যাস কৰ্ত্তেন, তাঁর নাম হ'ত “গৰ্ভ-বয়াটে।” কোনো কৰ্ত্তৃপক্ষ তাঁর ছেলেপুলেদের তাঁর সঙ্গে মিশতে দেওয়া দূরে থাক্ হঠাৎ বাক্যালাপ কৰ্ত্তে দেখলে—একেবারে ক্রোধে অগ্নি শৰ্ম্মা হয়ে—ছেলেদের লাঞ্ছনা গঞ্ছনা তিরস্কার কঠোর শাসনের সীমা রাখতেন না। এই “গৰ্ভ বয়াটের” ওপোৱা যারা যেতেন তাঁরা তো এ সংসারে একেবারে “জাতিচ্যুত” বুলেই চলে। গৰ্ভ-বয়াটের শেষ সীমা হ'ল একেবারে অধঃপাতে যাওয়া; অর্থাৎ তখন তিনি বারাক্ছনা-ভবন-গমন “সুৰাপান” প্রভৃতি কাৰ্য্যে অবাধে মনোনিবেশ কৰেছেন। সুতরাং লোক চক্ষে তিনি একেবারে সত্ত্ব “কাল কেউটে!”

যা-হোক “গৰ্ভ-বয়াটে” পর্য্যন্ত সে সময় রমেশ-দার খেতাব। আমাদের আত্মীয় স্বজন সকলেই রমেশদার সংস্পর্শ থেকে নিজেদের ছেলেপুলে সামলাতে ব্যতিব্যস্ত। আমার কাকামশাইরা নিজেরা যদিও “বখাগিতে” এবং অধঃপাত-গমন-ব্যাপারে শীৰ্ষস্থান অধিকার কৰেছিলেন, তাঁরাও তাঁদের ছেলেদের সাবধান কৰ্ত্তেন ‘খবরদার’—রম্শার সঙ্গে কেউ—মিশিস্ নি!” রমেশদা’ আমাদের শুনিয়ে শুনিয়ে বলে বেড়াতো—নরানাং মাতুলক্রমঃ! কথায় বলে “বাপ্ কো বেটা সিপাহিকা ঘোড়া”—

আগেই বলেছি—বাবা আমার কাকুর কোনো কথায় থাকতেন না, অথবা কাকুর সম্বন্ধে কোনো খোঁজ খবর রাখতেন না;—বা কোন মন্তব্যও প্রকাশ কৰ্ত্তেন না। কেউ হয়তো আত্মীয়তা কৰে বাবাকে

বলতো—“সোঁক গনেশবাবু ? তোমার ছোট ছেলেটা রমেশের সঙ্গে এত মেশামিশি করে,—তুমি কিছু বল না ?”

বাবা অবাক হয়ে বলতেন—“কি রকম ? আপন পিস্তুতো ভাই এক বাড়ীতে থাকে,—তার সঙ্গে মিশবে না কি রকম কথা ?”

ওটা যে হাড় বগাটে গো ! যাহোক্ ঈশ্বরেচ্ছায় ছেলেটা তোমার লেখাপড়া শিখছে, এর মধ্যে ছোটো পাশ করে ফেলে ।”

“তা ফেলে বই কি ।” বলেই বাবা সে প্রসঙ্গ যত পূর্বক নিজেরই সমাপ্ত করে দিলেন ।

কিন্তু রমেশ-দার সম্বন্ধে বাবার যত ভাল ধারণাই থাকুক—মা কিন্তু মনে মনে তার প্রতি বিশেষ তুষ্ট ছিলেন না । স্পষ্ট কিছু বলতেন না বটে, কিন্তু আভাসে ইঙ্গিতে বেশ বুঝিয়ে দিতেন তাঁর মনোগত ইচ্ছা একেবারেই নয় যে আমি রমেশ-দার সঙ্গে বেড়াই । প্রায়ই আমাকে বলতেন আজ বাদে কাল বি-এ একজামিন্ দিবি, যখন তখন রমেশের সঙ্গে বেড়িয়ে বেড়ানো আমি ভাল বুঝি না ! দীনু, সুধো ( অর্থাৎ আমার বৈমাত্র ভাই সেজ্‌দা, ছোড়দা ) ঐ রমেশের সঙ্গে আড্ডায় ঘুরে ঘুরে তিন বছর চার বছর ধরে এন্ট্রান্সে ফেল ক’চ্ছে, তুইও কি “বি, এ”, টা পাশ করিনি মনে করেছিস্ ?

মার সঙ্গে তর্ক করা চলে না । আমি জান্তুম—মা ভেতরে ভেতরে খুব নজর রেখেছেন—আমি রমেশ-দার সঙ্গে কোথায় যাই—কি করি ! যত দিন যায়—তত দেখি—মা যেন আমার ওপোর ক্রমে ক্রমে সন্দেহের মাত্রা বাড়িয়ে ফেলছেন ! এন্ট্রেন্স ফাষ্ট্ ডিভিসনে, “এফ্ এ” ফাষ্ট্ ডিভিসনে পাশ করেছি ; বাড়ীতুচ্ছ পাড়াশুচ্ছ লোকজন অবাক হয়ে



গিয়েছিল। শুন্তে পাই অসাক্ষাতে অনেকে বিশেষতঃ আমার আত্মীয় কুটুম্বেরা এন্ট্রেন্স পাশ হতেই বলাবলি করেছিল—“নিশ্চয়ই ঘুস দিয়ে আত্মারাম পাশ করেছে, নয়তো ‘একজা-মিনাররা’ ভুলে নাম ছাপিয়ে দিয়েছে,—নইলে—চব্বিশ ঘণ্টা ঐ হাড়বয়াটে রম্শার সঙ্গে আড্ডায় ঘুরে নিজে একেবারে অধঃপাতে গেছে—ও পড়লে কখন যে একেবারে ফাষ্ট ডিভিসনে পাশ হল ?”

“এফ্-এ পাশের খবর বেরুতে খুড়ীমায়েরা বলেছিলেন—“কলিতে ভগবানের কি সুবিচার আছে ? আমাদের ছেলেরা কেউ বাড়ীর চৌকাঠের বাইরে পা দেয় না, দিন রাত্তির “বয়ে-মুখে” হয়ে আছে তারা বছর বছর ফেল্ হচ্ছে,—আর আত্মারাম টক্-টক্ করে পাশ করে বেড়িয়ে যাচ্ছে ! কলিতে কি ধর্ম্ম আছে ? ছ্যাঃ—”

তবু মা যে কেন আমার ওপোর এমন সন্দেহ কচ্ছেন যে আমি রমেশ-দার সঙ্গে বেড়ালে “বয়ে” যেতে পারি,—এটা তখন বুঝতে পারিনি—এখন হাড়ে হাড়ে বুঝছি !

পাড়ায় একটা “জিম্জ্জাষ্টিকের” আখড়া ছিল। বাড়ীর সকল ছেলেরা সেখানে ব্যায়াম ( Exercise ) কর্তে যেতো ! বাবা নিজে সেখানে গিয়ে আমাকে ডাঙ্কেল, যুগুর ভাঁজতে ব্যায়াম কর্তে বলতেন। গোড়াতেই মা খুব আপত্তি করেছিলেন। মা বল্লেন—“লেখা পড়ার সময় আখড়ায় মেশামিশি করবার দরকার কি ?”

ব্যায়ামের উপকারিতা সম্বন্ধে মাকে বেশ করে বুঝিয়ে দিয়ে বাবা হুকুম দিলেন—“থিয়েটার যাত্রার আখড়ায় যাস্নি। বরং এখানে নিয়মিতভাবে exercise কল্লে—শরীর ভাল থাক্বে, পড়াশুনোতে

উৎসাহ বাড়বে,—মনেও বেশ ফুর্তি হবে। আমি বলছি বড়বো—  
তুমি এ বিষয়ে ওকে বারণ করোনা—”

আমি নিস্পরোয়ায় জিম্‌ন্যাস্টিকের আখড়ায় যাতায়াত কর্তে আরম্ভ  
করলুম। প্রথমটা ব্যায়াম করে “স্বাস্থ্য-উন্নতি” করবার উদ্দেশ্য ছিল,—  
কিন্তু ক্রমে ডায়েল মুণ্ডর ভাঁজা, ডন্ বৈটক করা—এসব ছেড়ে হোরাই-  
জেন্টেল বারে ( Horizontal Barএ ) ট্র্যাপিজে “প্লে” শিখতে লেগে  
গেলুম। অতি অল্প দিনেই বেশ একজন ভাল “প্লেয়ার” (Player) হয়ে  
নানা রকমের “প্লে” অভ্যাস করে শিখে ফেললুম। ভাল প্লেয়ার বলে  
অন্তান্ত “আখড়ার” মুকিবরা আমাকে দলে টানবার চেষ্টা কর্তে লাগলো।

মা কিন্তু মাঝে মাঝে বলতেন—“ই্যারে ব্যায়াম কলে তো শুনতে  
পাই—বেশ হুটপুট হয়। তুই দিন দিন যেন আরও পাকিয়ে যাচ্ছিস!  
কেন বলতো?”

আমি বললুম—“পাঁচ ছ’মাসের মধ্যেই কি অশুরের মত শরীর হয়  
মা? বছর ছ’চার না গেলে চেহারা শোধরাবে কেন?”

বাস্তবিক তখন কিন্তু আমি জানতুম না—যে জিম্‌ন্যাস্টিকে হাড়ের  
“কাঠিন্ণ” বাড়ে,—কিন্তু শরীর পাকিয়ে যায়!

রমেশদা’ আখড়ায় যেতো বটে—কিন্তু জিম্‌ন্যাস্টিক করার ধার দিয়ে  
যেতো না। আমরা অনুরোধ কলে বোলতো—“আরে অম্মিতেই  
আমার গায়ে যা জোর আছে—তোদের দশ বছর কুস্তি জিম্‌ন্যাস্টিক  
করেও তা হবে না!”

রমেশ-দার দেহটা বেশ নাছস-মুছস—কিন্তু গায়ে এককড়াও  
জোর নেই। একটা মস্তগুণ ছিল রমেশ-দার;—প্রথমে গায়ে পড়ে

ঝগড়া বাঁধিয়ে দিত, তারপর মারামারির উদ্যোগ দেখলেই ;—বেমালুম সেগান থেকে সরে পোড়তো। মারামারি কর্তে, মার খেতে পড়ে থাকতুম আমরা,—যারা তার সঙ্গে থাকতেন। চিৎপুরের ট্রামে কোথায় যাচ্ছিলুম—ঠিক মনে নেই। সেই ট্রামে দুটো “চীনে” (Chinese) আমাদের ঠিক সামনের বেঞ্চিতে বসেছিল। আমার ও বুদ্ধিশুদ্ধি তেমন ভাল ছিল না—এটা স্বীকার কর্তেই হবে। রমেশদা’ বলে—“আচ্ছা আত্মারাম তোর কেমন সাহস দেখি দিকি ! চীনে দু’বেটার বিউনি ধরে হেঁচকা মার দিকি !”

আমি বললুম—“না—ছিঃ! শুধু শুধু ওদের টিকী ধরে টানবো কেন ?”

“উঃ—ভারি সাহস ! ভারি জিম্জামাষ্টিক কর্‌নেওলা ! দু’বেটা চণ্ডুখোর চীনেকে এত ভয় ? দূর—দূর—আর গায়ের জোড়ের বড়াই করিসনি !”

“গায়ের জোড়ের বড়াই আমি কবে করলুম রমেশদা ?” আমি তো পালোয়ান নই !—দুর্ভলসিং ভেতো বাঙ্গালী—”

রমেশদা’ বলে—“সেদিন মনুমেণ্টের ধারে পাঁচ বেটা চীনে বসেছিল, কেমন হঠাৎ খেয়াল হ’ল,—বোঁ করে তাঁদের কাছে গিয়েই ক’বেটার মাথার টিকি ধরে খানিকটা টানতেই—বেটারা আপনা আপনি মাথা ঠোকাঠুকী করে কান্চু-মান্চু করে এমনি রগড় কত্তে লাগলো, আমি আর দীলু হেসে বাচিনে !” বলেই হো—হো করে রমেশদা’ এমন হাসতে শুরু কল্লে—যে চীনে দু’জনও তার হাসির রকম দেখে হাসতে লাগলো।

পূর্বেই বলেছি—“চীনে” দু’জন ঠিক আমাদের সামনের বেঞ্চিতে বসেছিল। সকলেই জানেন সে সময় চীনেরা ঠিক আমাদের দেশের মেয়েদের মত চুল রাখতো—বাহার করে বিউনি বেঁধে পিঠের ওপোর ঝুলিয়ে দিত। সত্য কথা বলতে কি—রমেশদার কথা শুনে আমার মনে মনে ভারি ইচ্ছে হচ্ছিল—ঘোড়ার লাগাম ধরার মত দু’হাতে দুটো বিউনি ধরে একবার হাতের সুখটা করি! যেমন মনে হওয়া—সঙ্গে সঙ্গে কাজ করা। চীংপুরের ট্রাম যাচ্ছিল দক্ষিণতলার দিকে। আমি যখন এই কাজটা করলুম,—গাড়ী তখন লালবাজারের গোড় পেরিয়ে,—জুতো-ওয়ালাদের হৃদয়ে এসে পড়েছে। চীনে দু’জন টিকীতে টান পড়না-মাত্রই তৎক্ষণাৎ দাঁড়িয়ে উঠে তাদের বেঞ্চি থেকে লাফিয়ে আমাদের বেঞ্চিতে এসে একসঙ্গে একযোগে আমাকে আক্রমণ করে—আমার সঙ্গে হাতাহাতি লাগিয়ে দিল। গাড়ীশুদ্ধ লোক হৈ-হৈ করে আমাদের মাঝখানে পড়ে মারামারি থামাবার চেষ্টা কর্তে লাগলো ট্রাম থেমে গেলো—ভীষণ গোলমাল শুনে রাস্তা থেকে লোকজন গাড়ীতে উঠে পড়লো। আরোহীদের সকলেই আমাদের যাচ্ছেতাই করে বলতে লাগলো—“চীনেদের সঙ্গে চালাকী! ওরা আসোলা খায়,—এখুনি মেরে তক্তা বানিয়ে দেবে।”

কথা শুনে বুঝতে পারলুম না—আসোলা আহারে শক্তিমান হয় কেমন করে! কিন্তু বুঝবার অবকাশ পেতে না পেতে দেখি—প্রায় পাঁচশো চীনে “কান্চু—মান্চু—আন্চু—ফান্চু” করে—শুধু আমাকে নয়,—আরোহী সমেত ট্রাম গাড়ীটাকে পর্যন্ত আক্রমণ করে ভীষণ রাগ প্রকাশ কর্তে শুরু কলে। “আসোলা” আহার কলে গায়ের শক্তি না

বাড়ুক—ক্রোধের মাত্রা যে ভীষণ বাড়ে, সেদিন তার প্রমাণ পেয়ে-  
 ছিলুম। “কিস্কিয়ার” ভাষায় সমগ্র “বেন্টিঙ্ক ষ্ট্রীট” মুখরিত করে—  
 গাড়ীর উপরেই ইট পাটকেল—জুতা তৈরী করবার যন্ত্রপাতি পর্যন্ত  
 বর্ষণ কর্তে লাগলো। ভীড়ের মধ্যে চীনেদের হাতে দু’দশ ঘা “মোক্‌ম্”  
 রকমের প্রহার “ভক্ষণ” করে কোনও রকমে প্রাণ নিয়ে পালিয়েছিলুম।  
 রমেশ-দা কিন্তু গোলমাল হবার বহুপূর্বেই ট্রাম থেকে লাফিয়ে পড়ে  
 একবারে অন্তর্ধান হয়েছিল।

## বিংশ পরিচ্ছেদ ।

আমার বৈমাত্র বোন নলিনী বেশ সুপাত্রেই পড়েছিল—সে বিষয়ে আর কোন সন্দেহ নেই। রাজেন যদিও বয়সে আমার চেয়ে অনেক বড়ো, তাহ'লেও সে আমার সহপাঠী এবং বালাবন্ধু। ক্লাশে সে সকল ছেলের চেয়েই বড়ো বলে, যশোর স্কুলের হেড-মাষ্টার তাকে “বড়-দা” খেতাব দিয়েছিলেন। যশোরে “রাজেন” নাম বলে তাকে কেউ চিন্তে পার্তো না,—“বড়-দা” বলেই বুঝতে পার্ত। বাগ্‌বাজারে সকলে তাকে “রাজা মাষ্টার” বলে ডাকতো। যথার্থই রাজেন “মাষ্টার” উপাধির যোগ্য ছিল। হেন বিদ্যা নেই বা হেন কর্ম নেই—যা রাজেনের সাধ্যাতীত ছিল। ময়ুরছাড়া কার্তিকের মত দেখতে না হোক—রাজেনের চেহারার চটক ছিল খুব। রংটা ছিল টুকটুকে ফর্সা—“হাড়েমাসে” দোহারা গড়ন; দেখতে “খুবই রোগা” ছিপছিপে বা খুব “ষগু-গুগু” মনে হত না—দেহে তেজ ও শক্তির অভাব নেই—স্পষ্ট বোঝা যেতো।

“জিম্‌গাষ্টিক্” কর্তে এমন পারে যে অনেক বড় বড় “প্লেয়ার”রা পর্যন্ত রাজেনের প্লেয় কায়দার সুখ্যাতি কর্তেন। গান গাইতে—হারমোনিয়াম বাজাতে ছাত্রমহলে প্রায় অধিতীয়। গলার সুর যেন শ্রোতার কানে মধুবর্ষণ কর্তে—যে শুনে সেই মুগ্ধ হোতো। রাজেন যদিও কোনো “কালোয়াতের” কাছে সঙ্গিত বিদ্যা শিক্ষা করেনি—তথাপি শ্রোতাদের মুগ্ধ হবার আরও একটা বিশেষ কারণ এই যে, রাজেনের গানের “বাণী” ভারি শুদ্ধ এবং গান গাইবার সময় এমন চমৎকার চোখ মুখের ভাব কর্তে,—গানের কথার ভাবের সঙ্গে এমন নিজের প্রাণের ভাব মিশিয়ে গান গাইতো যে, সে কথা বন্বার নয়। আর একটা রাজেনের গানের বিশেষত্ব ছিল,—সে সকল রকমের গান জানতো এবং কোন আঙ্গরে কি রকম গান গাইলে শ্রোতারা খুসী হবে, ঠিক তা বুঝতে পেরে—সেই রকমই গাইতো।

রাজেন অবৈতনিক থিয়েটারে একজন নামজাদা অভিনেতা। ক’ল্‌কেতার সহরের একজন বড়দের সৌখীন অভিনেতা বলে—দেশ-বিদেশে তার খ্যাতি। এমন কি তার অভিনয় দেখবার জন্য “পাবলিক” থিয়েটারের অভিনেতা-অভিনেত্রীরা পর্যন্ত লালায়িত হ’ত। শুধু তাই নয়,—রাজেন ছাত্রাবস্থায় কবিতা, উপন্যাস, নাটক, সঙ্গীত রচনায় সাহিত্যজগতেও বেশ নাম অর্জন করেছিল। তার উপর রাজেন বি, এ পড়ে। এট্রেস—এ-লে অবহেলে পাশ করে, আমার সঙ্গে এক কলেজে বি, এ ক্লাশের ছাত্র। লেখাপড়াতে তার মেধা অপূর্ব। শুন্তে পাই—এ-লে একজামিন যেদিন আরম্ভ হবে তার পূর্বদিন রাজেন এক বাগান পাটিতে গিয়ে রাত্রি চারটে পর্যন্ত আমোদ করেছিল।

রাজেন যশোরের সিভিল সার্জেন ডাঃ রামপ্রসাদ চাট্টোয়ের একমাত্র পুত্র। রাজেন যখন তৃতীয় শ্রেণীর ছাত্র, তখন তার বাপ মা দু'জনেই স্বর্গারোহণ করেন। ডাক্তারবাবু (রাজেনের বাপ) মর্কীর সময় কনিষ্ঠ ভ্রাতা দুর্গাপ্রসাদ এবং তাঁর পত্নীর হাতে রাজেনকে সমর্পণ করেছিলেন। রাজেনের পিতামহ (অর্থাৎ ডাক্তারবাবুর বাপ) অত্যন্ত দরিদ্র ছিলেন। সামান্য কেরাণীগিরি করে—চারটা কণ্ঠার বিবাহ দিয়ে এবং ডাক্তার বাবুর লেখাপড়ার খরচ জুগিয়ে তিনি একেবারে নিঃস্ব হয়ে পড়েছিলেন, এমন কি পৈতৃক ভিটেখানি পর্যন্ত বিক্রী হয়ে গিয়েছিল। পিতার মৃত্যুর পর ডাক্তার বাবুর অক্লান্ত পরিশ্রমে এবং অত্যাশ্চর্য অধ্যবসাতে সংসারে প্রতিষ্ঠা লাভ করেছিলেন। বাড়ী বাগান গাড়ী-ঘোড়া বিষয়-আশয় সবই হয়েছিল। দুর্গাপ্রসাদ বাবুর যখন সাত বৎসর বয়স তখন তাঁর (অর্থাৎ ডাক্তার বাবুর) বাপ মা দু'জনেই মারা যান। ডাক্তারবাবু নিজের ছেলের মত আদর যত্নে কনিষ্ঠকে মানুষ করেন। দুর্গাপ্রসাদবাবু আলিপুর কোর্টের উকীল। ডাক্তারবাবুর অবর্তমানে রাজেনের তিনিই এখন অভিভাবক। রাজেন কাকা মশাইকে যেন যমের মত ভয় কর্তে। দুর্গাপ্রসাদবাবু খুব “রাশ-ভারী” লোক ছিলেন; পাড়া প্রতিবেশী পর্যন্ত তাঁকে বিশেষ রকম সমীহ কর্তে। রাজেনকে তিনি পুত্রের অধিক স্নেহ কর্তেন বটে—কিন্তু খুব কড়া শাসনের ওপোর রাখতেন। রাজেন ভরসা করে কাকা মশায়ের সঙ্গে কথা কইতে পার্তে না।

দুর্গাপ্রসাদবাবুর বিবাহের চার পাঁচ বৎসর পরেই একটা পুত্র সন্তান জন্মেছিল। জন্মাবধি রোগভোগ করে সেই শিশু পিতামাতার কোল



শুণ্য করে চলে যায়। তারপর আর দুর্গাপ্রসাদবাবুর কোনো সম্বানাদি হয়নি। ভ্রাতৃপুত্র রাজেনই তার একমাত্র আকর্ষণ।

দুর্গাপ্রসাদবাবু বাহ্যিক কঠোর ভাব অবলম্বন করে রাজেনকে যত শাসনই করুন—তার পত্নী (রাজেন তাঁকে “মায়ী” বলে সম্বোধন কর্তে)—স্নেহময়ী, সাক্ষাৎ কারুণ্য রূপিণী বিন্দুবাসিনী দেবী—পিতৃমাতৃহীন “ভাসুর-পোকে” এত অধিক আদর দিতেন যে তারই জন্ম রাজেনের এত অধঃপতন হয়েছিল এবং সংসারে সকল বিষয় এবং সকল দিকেই তাকে এত কষ্ট এত লাঞ্ছনা গঞ্জনা ভোগ কর্তে হয়েছিল। দুর্গাপ্রসাদবাবু আদৌ ইচ্ছা কর্তেন না—রাজেন ছাত্রাবস্থায় কারও সঙ্গে মেলামেশা করে। এর জন্ম তাকে ভৎসনা কর্তেন। এমন কি পাড়া প্রতিবেশী কোনো ছেলে পুলে বাড়ীতে এসে রাজেনের সঙ্গে পড়বার ঘরে বসে বাজে কথাবার্তা কয়—এটা তিনি মোটেই পছন্দ কর্তেন না। শুনতে পাই—রাজেন এট্রেন্স পাশ করবার পূর্বে তাকে কাকামশাই সদর দরজার চৌকাঠের বাইরে পা দিতে দিতেন না। এট্রেন্স পাশ হবার পর রাজেনের প্রতি হুকুম হ’ল “সকাল বিকেল এক ঘণ্টা করে বাড়ীর বাইরে বেড়িয়ে আসবে।” কোথাও গল্প কর্তে বা আড্ডা দিতে যদি এক ঘণ্টার ওপোর দশ পনেরো মিনিট বেশী হ’ত তাহ’লে রাজেনের আর লাঞ্ছনায় সীমা থাকতো না। আমার মনে হয়—দুর্গাপ্রসাদবাবুর এত “বজ্র আঁটনির” জন্মই “ফস্কা গেরো” হয়েছিল। রাজেনের কারও সঙ্গে মেশামেশি সম্বন্ধে দুর্গাপ্রসাদবাবু যতই “কড়াকড়ির” মাত্রা বাড়াতো লাগলেন রাজেনের “বন্ধু সংখ্যা বৃদ্ধি”—“আড্ডা দেওয়া”—ইরারকির মাত্রা সেই পরিমাণে বাড়তে লাগলো। দুর্গাপ্রসাদ ভারি ছঁসিয়ার হয়ে

রইলেন—“সামনে দিয়ে ছুটগৈ না গলে”—রাজেন পেছন দিয়ে হাতী গলিয়ে দিতে লাগলো।

পুত্রহীনা “মায়ী” ( রাজেনের কাকীমা ) রাজেনের প্রতি রমণী স্বভাবজাত স্নেহমায়া বাৎসল্য মনতীর পরিমাণ তাঁর দিন দিন এত বেড়ে উঠেছিল যে রাজেন উৎসবের পথে অগ্রসর হ’চ্ছে জেনেও কিছুতেই সামাল দিয়ে উঠতে পারেনি। “মায়ীর” কাছ থেকে টাকা আদায়ের আবশ্যক হ’লেই রাজেন “অনশন ব্রত” অবলম্বন ক’র্ত্ত ; প্রত্যহ নানা-রকম মিথ্যা কথা রচনা কর্ত্তে তিলনাড় ইতস্ততঃ বোধ ক’র্ত্ত না। আজ অমুক বন্ধুর বিবাহে উপহার দিতে হবে—আজ একজন অনাথ দরিদ্রের কণ্ঠাদানে সাহায্য কর্ত্তে হবে—অমুক লোকের একটা সোণার ঘড়ী এক-দিন ব্যবহার কর্ত্তে এনেছিলুম, সেটা চুরী গেছে—তার দণ্ড দিতে হবে নইলে সে পুলিশে দেবে—এই রকম কত মিথ্যা অজু’হাতে রাজেন তার সরল প্রাণা করুণাময়ী “মায়ীর” কাছ থেকে টাকা আদায় ক’র্ত্ত—তা আর কত বলব। “তোকে আর টাকা দেবো না” বলে মায়ী কতবার প্রতিজ্ঞা করেছিলেন কিন্তু রাজেনের শুকনো মুখ দেখে বেশীক্ষণ তাঁর রক্ষা কর্ত্তার সুযোগ হ’ত না। সুতরাং রাজেন যে সংসারে এতটা অনিত্যবয়ী হয়ে শেষে অর্থের জন্ত এত কষ্ট পেয়েছিল, সংসার রহস্য জ্ঞানহীনা বিন্দুকাসিনী তার জন্ত অনেকটা দায়ী।

সন্ধ্যার পর রাজেনের বাড়ীর বাইরে থাকবার হুকুম ছিল না। রাজেন বন্ধু বাড়ীর নিমন্ত্রণ খাবার অছিলায় সপ্তাহের মধ্যে অন্ততঃ চারদিন কাকী-মশাইয়ের কাছ থেকে হুকুম পাশ করিয়ে নিত। অনেক সময় হুকুম না নিয়েই রাজেন বাবু সঙ্গে সন্ধ্যার পর গোপনে বাড়ীর বাইরে চলে

যেতো। দুর্গাপ্রসাদবাবু জানতে পেরে মহা রাগারাগী কর্তেন। “মায়ী” বুঝিয়ে বলতেন—“তা ওর কি অপরাধ। লোকে যদি ওকে আদর করে নেমন্তন্ন করে—ও যাবে না?”

কথাটা যুক্তিপূর্ণ হলেও দুর্গাপ্রসাদবাবু তাতে তেমন সন্তুষ্ট হ’তেন না। রাজেন মাঝে মাঝে সন্দের পর বন্ধুর বাড়ীতে নিমন্তন্ন রক্ষা কর্তে যেতে আরম্ভ কল্লে। শনিবার রবিবার নিমন্তন্ন রক্ষাটা খুব জোর চলতো, সেটা বন্ধু বাড়ীতে কি—কি থিয়েটার বাড়ীতে—কিছা আর কোনো—দুর্গাপ্রসাদবাবু একটু কষ্ট স্বীকার করে যদি সে খোঁজটা রাখতেন—তা হ’লে বোধ হয় রাজেনের “চরিত্রহীনতা” সম্বন্ধে একটা দুর্গাম বাজারে প্রচার হ’ত না।

## একবিংশ পরিচ্ছেদ ।

কর্মফল সকলকে মানতেই হবে । সংসারের চাঙ্গিকে চেয়ে দেখ—  
মানুষ শুধু কর্ম করে যাচ্ছে না, তার প্রত্যেক কর্মের সঙ্গে সঙ্গে কর্ম-  
ফলও ভোগ কচ্ছে । তা সে কর্মফল পূর্বজন্মানুষ্ঠিত কর্মেরই হোক—  
বা এই জন্মের কৃতকর্মেরই হোক । মোট কথা, কর্মও তাকে কতে  
হবে—কর্মফলও তাকে ভুগতে হবে ।

এই আমি আত্মারাম বাড়ুঘো—বড়লোকের অর্থাৎ ধনবানের ঘরে  
জন্ম গ্রহণ করেছি—দেবোতার মত পিতা—সতীলক্ষ্মী বুদ্ধিমতী সুশিক্ষা-  
প্রদায়িনী জননী—সদ্ব্রাহ্মণ বংশজাত—লেখাপড়া ও কিছু অল্প শিখিনি—  
বোধহয় শক্তি কিছু কম নয়—ভালমন্দ বিচারের যথেষ্ট ক্ষমতা আমার  
—তবু সংসারে আমার এত অধঃপতনই বা হোল কেন—আর সকল  
রকমেই আমার অদৃষ্টের চাকা উল্টো দিকে ঘুরে গেল কিসের জন্ত ?

কিছুই কিছু না। অদৃষ্টও কিছু নয়—কেবল কর্মফল। একজন সাধু—চিরজীবন একনিষ্ঠ হয়ে সত্যন্যায় ধর্ম পুণ্যের সাধনা করে দিন যাপন করেছে,—সে যদি হঠাৎ চুরি করে জেলে যায়,—আর একজন নাগজাদা ছোচোর হঠাৎ আমীর হয়ে ধ্যান দান পুণ্যকার্য ইত্যাদির অনুষ্ঠান করে জনসমাজে মহাপুণ্যবান দাতাকর্ণবিশেষ বলে প্রতিষ্ঠা লাভ করে,—এ সবার একমাত্র কারণ কি কর্মফল নয়? যাক্—এসব—পুরোণো—তত্ত্বকথা—

যখন আমার বিবাহ হয়,—তখন আমি “ফোর্গ ইয়ারে” (বি, এ ক্লাশে) পড়ি। ক’লকাতার সন্নিকটে ছগলি জেলার অন্তর্গত “দই-বাড়ী” গাঁয়ের জমাদার কালিকাপ্রসাদ মুখুয্যের পৌত্রীর সঙ্গে আমার বিবাহ হয়। সে আজ অনেক দিনের কথা। বাবার আমি ছোট ছেলে—মায়ের আমি শিবরাত্রের “সন্তে”—সুতরাং আমার বিবাহটা খুব ঘটা করেই হয়েছিল। ক’লকাতার ছ’চারগু বড় ঘরে আমার বিয়ের সম্বন্ধ হয়ে ভেসে যায়,—তার প্রধান কারণ, ( পরে শোনা গেল ) কল্যাকর্তা বলেছিলেন—“ছেলেটা লেখাপড়া শিখলে কি হয়—স্বভাব-চরিত্র বড় সুবিধার নয়—থিয়েটার করে।” তখন “ছেলে থিয়েটার করে—গানবাজনা করে” এটা বিবাহোপযোগী পাত্রের পক্ষে একটা মস্ত দুর্গাম। হায় রে কাল-মাহাত্ম্য! তখন সখের থিয়েটারে পুরুষমানুষকে মেয়েমানুষ সাজিয়ে অভিনয় কলে, অসাবধানে ভদ্রলোকের বৈঠকখানায় ভদ্রভাবে ছ’চারখানা গান গাইলে—ভদ্রসমাজে তার কলঙ্ক প্রচারিত হতো—এমন কি—তার বিয়ের সম্বন্ধ পর্যন্ত ভেসে যেতো। আর এখন বিবাহের জন্ত পাত্র-

পাত্রী “দেখা-দেখির” সময় পাত্র বা পাত্রীর গুণ যাচাই করা হয় “অভিনয়-চাতুর্য্য” দেখে বা হারমোনিয়ম সহযোগে মিহিসুরে—

“সুন্দর হে ! মম বুক-বন্দরে

( তোমার ) প্রেমের নোঙ্গরখানি ফেলো

ধীরে—”

ইত্যাदि গান শুনে ।

যাই হোক—অনেক পাত্র দেখাশুনার পর জমীদার কালিকাবাবুর অদৃষ্টে আমার মত “নাত্জামাই” লাভ হল—সেটা কস্মফল মানতে হবে ।

নহরের ছেলে—ক’লকেতার ছেলে—বালাকালে বা কৈশোরে, বিশেষতঃ বিয়ের পূর্বে পল্লীগ্রামে যাতায়াত বড় বেশী ছিল না । সামান্য জমীদারের নামে বাংলাদেশে যে একশ্রেণীর “জীব” আছে, তা কেবল লোকের মুখে শুন্তুম—চক্ষে দু’দশজনকে দেখলেও আলাপ-পরিচয় না ঘনিষ্ঠতা করবার সুযোগ বড় হয় নি । ভগবানের রূপায়—জমীদার-পৌত্রিকে বিবাহ করে—জমীদার-বংশের সাথে আত্মীয়তা কবে—বাংলাদেশে “জমীদার জীবটাকে” ভাল করে বোঝবার এং জানবার অবকাশ পেয়েছিলুম । অবশ্য—এ যুগ-পরিবর্তনের সময় সমগ্র বাংলা-দেশটার যখন আগাগোড়া সকল বিষয়েই পরিবর্তন ঘটেছে—তখন এই জমীদার সম্বন্ধে আমার ত্রিশ বত্রিশ বছর পূর্বের অভিজ্ঞতা এখনকার দিনে প্রত্যেক বিষয়ে ছবছ না মিলতে পারে—তখন বা বুঝেছিলুম—দেখেছিলুম—জেনেছিলুম—সরল প্রাণে তাই ব্যক্ত করে বাছি ।

“দইবাড়ীর” জমীদার কালিকাবাবুর বৃহৎ পরিবার । সমস্ত গ্রামটা জমীদার-বংশের শাখাপ্রশাখায় যেন ছেয়ে ফেলেছে । গ্রামখানি ক্ষুদ্র

হলে ও পঁচিশ ত্রিশখানি প্রাসাদতুল্য অট্টালিকায় সুশোভিত। মালিকেরা সবাই 'দইবাড়ীর জমীদার' নামে পরিচয় দেন। মোদা কথা, কাউকে খেটে খেতে তো হয়ই না,—উপরন্তু নিশ্চিত্তে, নির্ভয়ে, নির্বিঘ্নে “ঘি-ছধ—মাছের মুড়ো—পোলা ও-কালিয়া খেয়ে—বিলাসিতায় অঙ্গ ঢেলে মানব-জীবন ধারণের সার্থকতা প্রতিপন্ন ক'চ্ছেন। বিদ্যাশিক্ষা—জ্ঞানচর্চার কোনো প্রয়োজনীয়তা যে আছে,—সে বিষয়ে একেবারে অনভিজ্ঞ। কোনগতিকে নাম-সইটী কর্তে শিখলেই হ'ল! ব্যস,—বেঁচে থাক “দশ-শালা বন্দোবস্ত”—Permanent Settlement in Bengal—মহাত্মা লর্ড কর্ণওয়ালিসের স্মৃতি অক্ষয় হোক! জমীদারের পরোয়া কি? কেবল প্রজ্ঞা ঠাঙ্গান্—আর বাবুগিরির চুড়াস্ত করুন!

কুক্ষণে এই জমীদার জীবের সৃষ্টি হয়েছিল। আজ বাংলা দেশের যে এতটা অধঃপতন—বান্ধালী জাতি যে জনসমাজে এত হীন প্রতিপন্ন হয়েছিল—এত অকর্মণ্য—এত অপদার্থ হয়ে দাঁড়িয়েছিল—এই জমীদার-কুলের উদ্ভবই তার প্রধান কারণ। এই বান্ধালী,—জগতের এমন একটা মেধাবী—শক্তিমান—বুদ্ধিমান—চতুর—সর্বকর্মক্ষম জাতি—এই বান্ধালী যে এতটা অলস—শক্তিহীন, ভীরু, কাপুরুষ হয়ে—আপনা-দের সর্বস্ব পরকে দিয়ে—পরমুখাপেক্ষী দাসানুদাস হয়ে—মৃতপ্রায় হয়ে পড়েছিল—এই জমীদার-কুলের সৃষ্টিই তার মুখ্য কারণ।

গৃহ-বিচ্ছেদ, নিজেদের মধ্যে দলাদলি, মারামারি, কাটাকাটী—এই বাংলাদেশের জমীদারই তার পথপ্রদর্শক! বুদ্ধিমান চিন্তাশীল ব্যক্তি-মাতেই সামান্য গবেষণার দ্বারা এর সত্যাসত্য অবহেলে নির্ণয় কর্তে পার্কেন। আজ বাংলা দেশ—বান্ধালী জাতি যে উন্নতির পথে এতটা

অগ্রসর, সেটা শুধু বাংলাদেশ থেকে জমীদারবংশ লুপ্ত হবার উপক্রম বলে। অর্থহীনতায়—ঋণের দায়ে (অবশ্য বিলাসিতা এবং মামলা মোকদ্দমার জগু আজ এ দশায় তাঁরা উপনীত)—বাংলার জমীদারের আর সে তেজ্জ দর্প গর্ব নাই,—আজ তাঁদের গৃহস্থ দরিদ্র বাঙ্গালী প্রজারা সবাই মানুষ হয়ে মাথা তুলে দাঁড়াতে শিখেছে, এবং তখনকার দিনের মত জমীদারের পাশবিক অত্যাচার মেন-শাবকের মত অধোমুখে সহ্য কর্তে কেউ প্রস্তুত নয়। আজ নিরীহ প্রজারা বুঝেছে—অচিরে বাংলা দেশ থেকে এই অপদার্থ “জমীদার জীব” লুপ্ত হয়ে কথামালার “উপকথায়” পর্য্যবসিত হবে। তাই আশা করা যায়, সমগ্র বাংলা দেশ—বাঙ্গালী জাতিটাই উন্নত একদিন হবে।

আমার দাদাশ্বশুর বলে বলছি না—জমীদার কালিকাবাবু কিন্তু অতি নিরীহ গৃহস্থ লোকের মত জীবন যাপন কর্তেন। তাঁর চাল চলন—আচার-ব্যবহার দেখে মনে হ’ত—তিনি বাংলাদেশের জমীদারদের নাম ডোবাতে বসেছেন। তিনি জমীদার—বড়মানুষ বটেন, কিন্তু তাঁর ভিটেতে জমীদারী-বড়মানুষী “চাল” ছিল না। কিন্তু অল্প বাড়ীর বাবুরা—শুরে বাবা—তাঁদের বাড়ীর “টিক্‌টিক্‌টির পর্য্যন্ত “জমীদারী চাল—বড়মানুষী ঝাঁজ ! সে আশুরের এত অঁচ্—সামনে দাঁড়ালে অঙ্গ বলসে যায় ! একটা দৃষ্টান্ত দিই।

বিবাহের সাতদিনের ভেতর ‘বর-কনেকে’ জোড়ে শ্বশুর-বাড়ীতে যেতে হয়। নতুন জামাই এলে—জাতকুটুম্বরা সকলেই নিমন্ত্রণ করে খাওয়ায়—কাপড় চাদর দেয়—“কাঞ্চনমূল্য” দিয়ে জামাইকে আশীর্বাদ করে। জামাইয়ের রোজগার বড় মন্দ হয় না তাতে। আমি শ্বশুর-



বাড়ী যাবার পরদিনই কোনো এক “তরফ”—( সেটা বড়তরফ কি ছোটতরফ কি মাঝারি তরফ—কোন্ তরফ—তা আজও আমি নির্ণয় কর্তে পার্লুম না—কারণ যাকে দেখি সবাইকে মনে হয় বড়তরফ ) এই রকম একটা বড়গোছের তরফ থেকে আমার নিমন্ত্রণ হোলো। বয়েস তখন আমার মাত্র আঠার-উনিশ—সুতরাং এখনকার হিসাবে অতি নাবালক। আমার সম্পর্কীয় এক “স্বাক্ষী” আমাকে সঙ্গে করে আমার স্বশুর-বাড়ী থেকে সেই “বড়তরফ” জমীদারবাবুর বাড়ীতে নিয়ে গেলেন ; গিয়ে দেখি,—হ্যাঁ—জমীদার বাড়ীর চাল বটে। মস্ত বড় সুসজ্জিত হলঘরে ( দোতালায় ত নিশ্চয়ই ) সারি সারি ছোট—বড়—মাঝারি “সাইজের” হরেক রকম সাজ-সজ্জায় আদব-কায়দায় “জমীদার” এবং “জমীদার বাচ্ছারা” তাকিয়া ঠেস দিয়ে উচ্চাসনে ( তোষকের উপর জাজিম পাতা বিছানায় ) পা ছড়িয়ে বসে আছেন ;—আতর, গোলাপ, এসেন্স, বেলফুল, জুঁয়ের গোড়ের গন্ধে ঘর “ভরপুর !” অনুমানে বুঝলুম—কালিকাধাবুর নাত্জামাই-নিমন্ত্রণ উপলক্ষে এই সমারোহ ! পূর্বপরিচিত বন্ধু ( এক্ষণে শ্যালকে পরিণত ) সতীশের সঙ্গে ধীরে ধীরে সে আসরে গিয়ে তো উপস্থিত হলুম। সেখানে উপস্থিত হবার পূর্বে মনে মনে ভেবেছিলুম—নতুন জামাই,—দেখতে শুনতে কুৎসিত নই,—কলকেশার বড়ঘরের ছেলে,—বয়েস অল্প,—বি, এ পড়ি,—বাপ ডেপুটি ম্যাজিষ্ট্রেট—না জানি কত আদরই পাব। হায়রে—পোড়া অদৃষ্টে সবই উল্টো হয়ে গেল ! আমাকে দেখে—সকলেই অপাঙ্গে একবার চাইলেন বটে—কিন্তু আদর-অভ্যর্থনা করা চুলোয় যাক—ভদ্রতার খাতিরে কেউ একবার মুখেও বলেন না—“এস—বোসো” ইত্যাদি মামুলি গোটাকতক

সৌজন্য-বাণী। সহচর সতীশের অভ্যর্থনায় “হংসমধ্যে বকো যথা”—ভাবে বাবুদের মধ্যখানে বসলুম বটে,—কিন্তু প্রাণটা বেজায় চটে গিয়েছিল—সে কথা আর বেশী বলে বোঝাতে হবে না। বসবামাত্রই আদবকায়দা-মাকিক—সোনার ডিবে-ভরা পান সাম্নে একজন দয়া করে ধরে দিলেন ; একজন সিগারেটের “সোণার কোঁটা” খুলে সাম্নে রাখলেন। কিছুই স্পর্শ না করে—খুব গম্ভীরভাবে দেয়ালের দিকে তাকিয়ে রইলুম। সতীশ বলে—“একটা পান খাও হে!”

আমি ঈষৎ হেসে বল্লুম—“না—থাক্।” ছত্রিশ রকমের বাগ্‌বন্ধ—(সবগুলির আমি নামও জানিনা) সেখানে সবাকার সাম্নে পড়ে ছিল। হঠাৎ কেউ সে ঘরে ঢুকলে মনে কর্ত্ত—এতক্ষণ বুঝি এখানে কনসার্ট (concert) অর্থাৎ ঐক্যতানবাদন হচ্ছিল—এই খানিকক্ষণ ধেমে গেছে। বাক্—বাবুদের মধ্যে গায়ক ছ’চারজন ছিলেন ;—পালা করে তাঁদের “কণ্ঠ স্বরের” কারদানি দেখাতে লাগলেন। চূপটা করে বসে বসে শুন্ছিলুম। সতীশ মাঝখান থেকে বলে উঠলো—“তুমি একখানা গাওনা আত্মারাম।”

আমাকে ফরমাস্ করে সতীশ, বাবুদের বলতে ছাড়লে না—“নতুন জামাই আপনাদের বেশ ভাল গাইতে পারে। শুনুন না একখানা।” সতীশের সুপারিশ করবার তাৎপর্য এই যে—বাবুরা তার কথা শুনে আমাকে গান গাইতে অনুরোধ করবে। বাবুদের বয়ে গেছে আমাকে অনুরোধ কর্ত্তে। আমি কিন্তু সতীশের ওপর মনে মনে উত্তরোত্তর এমন চট্‌ছি যে মনে হচ্ছে—অন্ত কোথাও হ’লে—ওর কান মলে দিতুম। আমি কোনো উচ্চবাচ্য কর্লুম না দেখে—তাঁরা একে একে তাঁদের সঙ্গীত-

কুশলতা এবং বাণ্যযন্ত্রে কে কতদূর “লায়েকত্ব” প্রাপ্ত হয়েছেন—তার পরিচয় দিতে শুরু করলেন। খানিকক্ষণ সঙ্গীতাদি চর্চার পর এইবার তাঁরা ‘বাক্‌চাতুর্যা প্রদর্শনে’ এবং একজন কলকেতার ছেলেকে অর্থাৎ একজন—অজমীদার বালক বা কিশোরকে “জমীদারী চালের” কথা শোনাতে মনোনিবেশ করলেন। এখানে বলে রাখি,—হলঘরে বিছানায় ধারা বসে ছিলেন ( আমি ছাড়া ) সকলেই ভিন্ন ভিন্ন বাড়ীর হ’লে ও একই “গোষ্ঠীর প্রাণী।” অর্থাৎ—জাতি কুটুম্ব—খুড়তুতো মাস্তুতো ভাই,—ভাইপো ইত্যাদি। আর আশে পাশে ঘরের ভিতর-বাহিরে দাঁড়িয়ে ছিল—“বাবুদেরই” প্রজাবর্গ—কিষ্কা ঐ “দই-বাড়ী” গাঁয়ের গরীব গৃহস্থ। তারা ব্রাহ্মণ কায়স্থ হলেও—একই গ্রামের লোক হ’লেও, নিজপল্লীবাসী হ’লেও—জমীদারের সঙ্গে একাসনে বসবার তাদের অধিকার নেই বা তারা সাহসই করে না। তার ওপোর—তাদের পরিধানে ময়লা বা আধময়লা কাপড়জামা—পায়ে পুরোণো বা ছেঁড়া জুতো! বাবুরা যত “বড়মানুষী চালের” কথা কয়—তারা আশ পাশ থেকে দাঁড়িয়ে তারিফ্‌ কর্তে থাকে। সে এক ভারী রগড়ের দৃশ্য। একজন বলে উঠলো—“বুঝলে সেজ্‌দা, খুকীর বিয়েতে এবার আর গহরকে—কি মাল্‌কা বাইজীকে আনা হবে না”—অপর একজন—“যা বলেছ—ওদের গান একঘেয়ে হয়ে গেছে”—আর একজন—“ওরা কি ছাড়বে? দই-বাড়ীর জমীদারের বাড়ীতে বিয়ে, বেটীরা নিজেই হাজির হবে—”

আর একজন—“এবার লক্ষ্মী থেকে মুন্‌বাইকে আমার ছেলের অন্নপ্রাশনে আনাচ্ছি।”

একজন—“কত নেবে?”

সেইজন—“কত আর—হাজার টাকা নাইট।”

“তা গহর-মান্কাকেই তো পাঁচশ’ টাকা দিচ্ছি—”

এই এক দফা হ’ল।

একজন মাঝ থেকে বলে উঠলো—“অক্ষয় দা! তুমি সেদিন ‘ওয়েলার’ জুড়ীটা কত দিয়ে কিনলে?”

অক্ষয়দা। জুড়ীটা পোড়লো সাতহাজার। ল্যাণ্ডোখানা ছ’ হাজার—

একজন। আমার পনিটা দেড়হাজার দিয়ে কিনলুম—ওটা বিলিয়ে দিয়ে এক জোড়া ভাল দেখে ‘পেগুপনি’ আনছি—সাড়ে পাঁচ হাজার পড়বে।

এইভাবে অশালার পরিচয় কিছুক্ষণ চললো। প্রসঙ্গ ঘুরে গেল।

একজন বলে—“ওহে—Planters Stores যে Dynamo fit করে এইখানেই আলো জ্বালবে বলেছিল—এখনও কিছু কচ্ছে না—সরকারকে বল তো, কাল এক-খানা কড়া চিঠি লিখুক—”

আর একজন—“Dynamo বসাবে কোথায়? আমি তো বিশহাজার টাকা Sanction করে রেখেছি—Electric আলো না হ’লে আমার আর চলছে না, বুঝলে বড়দা—”

তখন ইলেকট্রিক আলো একটা অপূর্ব ব্যাপার। কাজেই সেই প্রসঙ্গে বুঝলুম—দই-বাড়ীর জমিদার বাবুদের বাড়ীতে ইলেকট্রিক আলো জ্বলতে আর বিলম্ব নাই। প্রসঙ্গ ঘুরে গেল।

একবাবু বলে উঠলেন—“বুঝলি মাধব,—তোমার কথায় মিথি মিথি আট হাজার টাকা জলে দিলুম—ঐ Pianoটা কিনে। Hobbs Co. খুব

ঠিকালে মাধব। ভাল Piano অন্ততঃ দশ হাজার টাকা না দিলে পাওয়া যায় ? কর্তা সেদিন যেটা Boyan কোম্পানী থেকে আনালেন, সেটা বারো হাজার টাকা পড়লো—”

একজন গাঝখান থেকে ঝাঁ করে বলে উঠলো—“কাকাবাবু বড়-থোকার পৈতেতে কল্কাতার চারটে থিয়েটারই বায়না করে এসেছেন। বাড়ীতে থিয়েটার দিয়ে দিয়ে, থিয়েটার শোনার অরুচি হ’য়ে গেছে।”

একজন বল্লেন—“কি করা যায়। কল্কাতার সব থিয়েটারের ম্যানেজার, প্রোপ্রাইটার, প্রত্যেক নামে পাঁচ সাত দিন এসে ‘ধরনা’ দিয়ে পড়ে, হাতে-পায়ে ধরে ; কি করি, একটা কাজকর্ম হলে কাজে কাজেই থিয়েটার দিতে হয়। আর তা ছাড়া গাঁয়ের এইসব গরীব গেরেস্তো লোকেরা জমীদার-বাড়ীতে থিয়েটার দেখবার আশায় কেবল খোঁজ নিচ্ছে—কবে একটা কাজকর্ম হবে।”

এই প্রাণান্তকর “চালের” কথা চলেছে তো চলেছেই। তার আর বিরাম নেই! মোদা কথা—তাদের উদ্দেশ্য—‘কল্কাতার ছেলেকে’ জানিয়ে দেওয়া তাঁরা ‘জমীদার’—তাদের খুব টাকা—তাঁরা জনে-জনে ইন্দ্র, চন্দ্র, বায়ু, বরুণ প্রভৃতির মত দিকপাল। ওরই মধ্যে একজন এ মন্তব্যটীও প্রকাশ কর্তে ছাড়লেন না—যে তাঁরা কল্কাতাবাসীদের চেয়ে সহস্রগুণে সুখে এবং আরামে আছেন। কল্কাতায় বাস করে যে সব ‘সুখ-সুবিধা’ ভোগ কর্তে না পারে,—এই ‘দইবাড়ী’ গাঁয়ে বাস করেও তাঁরা সকল রকমে সেই সমস্ত ‘সুখ-সুবিধা’ ভোগ কচ্ছেন। ছ্যাঃ—কল্কেতায় ভদ্রলোকে থাকে ?

রাস্তায় লোকের বেজায় ভীড়—গোলমাল ধুলো কাদা, দুর্গন্ধ—শীতকালে ধোঁয়ার জ্বালায় কল্কেতার টেকা দায়। একটু নিঃশ্বাস ফেলে আরাম করার উপায় নেই—ইত্যাদি—ইত্যাদি! এই জগ্গেই দইবাড়ীর জমীদার বাবুরা কল্কেতায় থাকতে চান না।

আমাকে সারাক্ষণ নিথর নীরব দেখে যতীন্দ্র বেচারী বলে ফেলে—  
“কি—হ জামাই! তোমার মুখে যে কথাটা নেই। একেবারে বোবা মেরে গেলে যে! শুরবাড়ী এসেছ—লোকজনের সঙ্গে আলাপ-পরিচয় করো।”

অনেকক্ষণ থেকেই একটু একটু চট্ছিলুম। উপায়বিহীন হয়ে মনের রাগ মনে চেপে চূপটী করে নরক-যন্ত্রণা সহ কচ্ছিলুম। আর পাল্লুম না—বিশেষতঃ আমি,—কল্কেতার “মুখফোঁড়”—“ঠোটকাটা” বলে একটু-আনটু দুর্গাম যার আছে। যতীনের কথায় খুব শ্লেষ করে বল্লুম—“কি কথা কইব? কথা কইবার মত কথা এখানে হ’ত—তাহ’লে তাতে যোগদান কর্তুম।”

সমবেত বাবুরা নীরবে আমার মুখপানে চাইলেন। আমি যতীনের দিকে চেয়ে বলতে শুরু কর্লুম—“ময়রার কাছে ক্রমাগত যদি সন্দেশের কথা কওয়া যায়,—কতক্ষণ তাতে তার interest থাকে, বা তার ভাল লাগে? আমি. কল্কেতাবাসী—যাকে বলে ‘সহরে ছেলে!’ যে সব কথাবার্তা যে সমস্ত topics এখানে চলছে—আমার কাছে তা একেবারে uninteresting,—যাকে বলে as tedious as twice-told tale! বাইজী,—জুড়ীগাড়ী,—থিয়েটার ইত্যাদির প্রসঙ্গে কল্কেতার ছেলে নতুনকি এমন কি পাবে যাতে সে শুর-বাড়ীতে এসে মনঃসংযোগ

করে তাই শুনে প্রাণে আনন্দ উপভোগ কর্তে পারে ? সহরে ছেলে পল্লীগ্রামে এসেছি, আমি এখানে শুন্তে চাই—কার পুকুরে কেমন মাছ,—কে আজ টাটকা বাটা মাছ ভাজা খেয়েছেন, কার বাগানে কি রকম ফলফুলের গাছ, কার জমীতে কত ধান হ'চ্ছে ;—এই সমস্ত কথা এখানে হোতো,—আমি 'হাঁ' করে তন্ময় হয়ে শুন্তুম । কোটীপতি লোক কলকতার অলিতে গলিতে ! তাদের ঐশ্বর্য ভোগের কথায় who the devil cares to listen ! নাটোরের মহারাণী জমীদার-গৃহিনী “রাণী ভবাণীর” দানশীলতার মত কোন কথা শুন্তুম—কে পল্লীবাসী নিরনের অনের ব্যবস্থা কচ্ছেন, কে কার কতাদায়ে অর্থব্যয় করে পুণ্য সঞ্চয় কচ্ছেন, কে স্বার্থত্যাগ করে জ্ঞাতিকুটুম্বের সঙ্গে মামলা মোকদ্দমা আপোষে মিটমাট করে নিয়ে আবার “ভাই-ভাই” বলে মিত্রতা-স্বত্রে আবদ্ধ হয়েছেন,—এই রকম প্রসঙ্গ হোতো তাহ'লে সেধে, যেচে, সে-প্রসঙ্গে মহানন্দে যোগদান কর্তুম ।” মুখ ছুটলে আর রক্ষে নেই ! আঠারো-উনিশ বছর বয়েস থেকেই অধীন “বাক্যবিশারদ” খুব—সেই জগুই “বড়লোক” বাবুদের সঙ্গে জীবনে সদ্ভাব রাখতে পারলুম না । আর বোধ হয়—(অবশ্য—ঠিক বলতে পারলুম না—) সেই জগুই নিজের দিন এ সংসারে কিন্তে পারি নি ! যাই হোক সেই থেকেই ‘দইবাড়ীর’ কোনো জমীদার বাবুর সঙ্গে আমার আলাপ পরিচয় পর্য্যন্ত ঘটেনি । অবশ্য তার জন্ত আমি বিশেষ দুঃখিত নই ।

## দ্বাবিংশ পরিচ্ছেদ ।

সংসর্গের দোষ-গুণ আছে বই কি । কর্মফল বা অদৃষ্টের প্রভাবে  
এ সংসারে লোকে সৎ বা অসৎ পথে চালিত হয় সত্য,—কিন্তু তার  
উপলক্ষ্য হয় সংসর্গ বা সঙ্গ । প্রবাদ বচন—“সৎসঙ্গে কাশীবাস, অসৎ-  
সঙ্গে সর্কনাশ”—আমার জীবনে মিলিয়ে দেখেছি—অতি নিম্নল সত্য !  
অতি শৈশবকালে যশোর স্কুলে অতি নিম্নশ্রেণীতে যখন পড়ি—তখন  
বার্ডসাই, তামাক, সিদ্ধি খেতে শিখেছি—সেও সংসর্গের দোষ । সেটাতে  
পরিপক্বতা লাভ কল্পুম—বাগবাছারে “দেসোমামা” প্রমুখ জনকয়েক  
“নামকাটা” সান্দ্রোপাক্ষের সংসর্গের প্রভাবে । তবে আমার বাপ-মার  
পুণ্যের জোরে এটুকু বিশেষত্ব আমার ছিল—আমি ভাল-মন্দ সৎ-অসৎ  
দু’রকম সংসর্গে মেশামেশি ও ঘনিষ্ঠতা করতুম । আর একটা সুবিধা  
ছিল,—লেখাপড়ায় আমার মেধা ছিল—ঝোঁকও ছিল । কাজেই  
সংসর্গ নির্বাচনে আমার ভাল-মন্দ বিচার করবার কোনো প্রয়োজনীয়তা



ছিল না। অর্থাৎ হৃদলেই আমি “কল্কে” পেতুম। যখন যে দল আমাকে টানতো—আমি অবহেলে সেই দলে বেমানুম গিশে যেতে পারতুম। কোনো দলেই আমার “তেলে-জলে” মেশার ভাব থাকতো না। দর্জিপাড়ার একটা সখের থিয়েটারের আখড়া ছিল। রমেশ-দা সেখানে আড্ডা দিতে গাঝে মাঝে যেতো। রমেশদার সঙ্গে যখন আমার এত ঘনিষ্ঠতা—এত মেলামেশা—তখন তো আমি সেখানে নিশ্চয়ই যেতুম। এখনকার মত তখন থিয়েটারের রিয়ামর্সাল দেবার ঘরকে “ক্লাব” বলতো না বা স্কুল-কলেজের ছাত্রের দল সেখানে জমায়েৎ হয়ে নির্দোষ-ভাবে নাটকের মহলা দিয়ে বা সরল প্রাণে হৃদয় গল্প গুজব আমোদ-আহ্লাদ করে যে বার বাড়ী গিয়ে পড়াশুনোর মনোনিবেশ কর্ত না। তখন “ক্লাব”ও ছিল না—“মেম্বর” ও ছিল না অথবা প্রত্যেকের নির্দিষ্ট মাসিক কিছু কিছু চাঁদায় ক্লাবের খরচ বা অভিনয়ের খরচ নির্বাহ হ’ত না। তখন জন দুই-চার ঘোর বয়াটে’ ছেলে মিলে একখানা ঘর ভাড়া নিয়ে “আখড়া” খুলে বোসতো; সেই আড্ডায় সেই শ্রেণীর বয়াটে’ ছেলেরা এসে জুটতো। একখানা নাটক নির্বাচিত হ’ত। এ-পাড়া সে-পাড়া থেকে ভাল অর্থাৎ ওরই মধ্যে বলতে-কহিতে অভিনয় কর্তে পারে—এমন সব অভিনেতাদের খোসামোদ করে আনা হতো। রিয়ামর্সাল ইচ্ছামত হোলো—না হোলো—সেদিকে কারও কোনো লক্ষ্য নেই। পূজোর সময় কোনো সৌখিন বাড়ীওলা দয়া করে অভিনয় করবার জন্তে নিমন্ত্রণ করলেন তো ভালই—নয় তো পূজোর মাসখানেক আগে থেকেই দলের সবাই সন্ধান কর্তে লেগে গেল, কার বাড়ীতে বড় উঠোন আছে;—এবং সেটা যদি পূজো-বাড়ী হয়—তাহ’লে কাউকে সুপারিশ ধরে বাড়ীর

মালিককে রাজী করিয়ে, অভিনয়ের নিয়ন্ত্রণটা কোন রকমে আদায় হ'লেই থিয়েটারের “আখড়া” খোলার সার্থকতা সম্পন্ন হয়ে গেল। এসব সখের থিয়েটারের দল চালাতো, দলের যিনি কাপ্তেন। তিনি যদি বরাতক্রমে পরসাগলা লোকের ছেলে হন, তাহ'লে তো কথাই নেই, ঈশ্বরেচ্ছায় তাঁর বাপের পয়সা আছে, তিনি ছশো পাঁচশো আমোদ কর্তে বা সখ মেটাতে খরচ কর্কেন—এ আর বিচিত্র কি? তবে উক্ত কাপ্তেনবাবু যদি গৃহস্থ বা সামান্ত অবস্থার লোকের ছেলে হ'তেন, তাহ'লে তাঁর এই থিয়েটার কর্কার সখ মেটাবার জন্ত হয় তাঁকে মায়ের বাক্স ভেঙ্গে টাকা কিম্বা গয়নার্গাটি চুরি কর্তে হোতো, না হয়—অন্ত এমন কোন অসৎ উপায় অবলম্বন কর্তে হোতো—যার জন্তে তাঁকে পুলিশে ধরে টানাটানি কোর্তো। তারপর অভিনয়ের কথা বেশী আর কি বলব? আমার মামার বাড়ীতে, “রাম-কেঠো” মামাদের “দীতার বনবাস” অভিনয় প্রথম মহড়াতে যে ভাবে চলেছিল—অধিকাংশ ক্ষেত্রে তখনকার সখের থিয়েটার এই ভাবেই হোতো। তার আর বিস্তারিত বিবরণের কোনো প্রয়োজন নাই। যাই হোক—রমেশদার সঙ্গে আমিও এই থিয়েটারের দলে নাম লিখিয়েছিলুম। আখড়া শুদ্ধ সকলেই যে আমাকে শুধু আমার সুন্দর চেহারা, মিষ্ট গলা, ভাল অভিনয় কর্কার শক্তির জন্ত খাতির কত্ত তা- নয়—আমি মাঝে মাঝে তাদের যথেষ্ট অর্থ সাহায্য কর্তুম। সে টাকার পরিমাণ কিছু বেশী হ'লে অর্থাৎ দশ পনেরো টাকা হ'লে বাবার কাছে চাইবা মাত্রই পেতুম, আর হ'এক টাকা হ'লে মার কাছ থেকে আদায় কর্তুম। বাবার কাছ থেকে সহজেই আদায় হোতো, কারণ টাকা চাইলে বাবা একবার জিজ্ঞাসাও কর্তেন না—“টাকার কি

দরকার ?” মার কিন্তু অতটা হাত দরাজ ছিল না। “কি হবে—  
তোমার টাকার কি দরকার—এই সেদিন এক টাকা নিলি—রোজ-  
রোজ টাকা চাওয়া কেন”—ইত্যাদি নানা কথা বলে একটা সম্ভ্রামজনক  
উত্তর শুনে তবে দুটা-একটা টাকা হাত-ছাড়া কতেন।

সংসারে লোকের পক্ষে যেটা বাস্তবিক কথা বলতে গেলে মহাপাপ,  
—আমি মাত্র এই মন্দ সংসর্গের গুণেই তা অভ্যাস কত্তে শুরু কল্পুম।  
সে মহাপাপ হচ্ছে “মিথ্যে কথা।” আমার জীবনে অনেক দেখে শুনে  
আমি সম্যক এই ধারণা করে নিয়েছি—যে মিথ্যা কথা বলার মত পাপ  
আর কিছুই নাই। যে মিথ্যা কথা বলে—তার সকল দিকেই ক্ষতি।  
আবার বার কাছে মিথ্যা কথা বলা হয়—তারও কিন্তু কম ক্ষতি নয়।  
যে কাজের জন্য মিথ্যা কথা বলা অনিবার্য হয়ে পড়ে, সে কার্যেও  
শেষে দিকে সফল ফলে না। শুধু তাই নয়—আমি পরীক্ষা করে  
দেখেছি, মিথ্যা কথায় কোনো জিনিষ গোপন করা চলে না—অথচ  
বলবার সময় মনে হয়—মিথ্যা কথায় “সত্য” চিরদিনের মত টাকা পড়ে  
গেল। মিথ্যা কথা বলতে আমি নিজে তো যথেষ্ট অভ্যাস করেছি,  
আর আমার এই দীর্ঘ জীবনে ছনিয়াদর্শন করে—অসংখ্য লোকের সঙ্গে  
আলাপ করে যে অভিজ্ঞতা লাভ করেছি—তাতে সম্যক ধারণা করে  
নিয়েছি যে—আমাদের জাতি অর্থাৎ সমস্ত বাঙ্গালী জাতিটা ভারতবর্ষের  
সকল জাতির চেয়ে মিথ্যা কথাটা বেশী করে থাকে। শুনে পাই  
কোন শাস্ত্রে নাকি আছে—গোটাকতক কারণে মিথ্যা কথা বললে পাপ  
তো হয়ই না বরং খুব পুণ্য হয়,—যথা নিজের বা অপর কারও জীবন  
রক্ষার জন্য মিথ্যা কথা কহিতে হবে, স্ত্রীর সঙ্গে নির্জন আলাপ—প্রসঙ্গ মিথ্যা

কথায় গোপন করা প্রয়োজন,—বৈষয়িক, রাজনৈতিক, ব্যবসা-বাণিজ্য-স্বকীয় সমস্ত “মতলব” মিথ্যা কথায় ঢেকে রাখতে হবে, যুদ্ধ-ক্ষেত্রে শত্রুকে মিথ্যা কথায় ভোলাতে হবে। বাস্তবিক এ সব বিষয়ে মিথ্যা কথা না বললে সংসারে সকল দিকে অচল হয়ে পড়ে। তথাপি আমাদের মহাভারতে বড় বড় অক্ষরে লিখেছেন যে কাব্যক্ষেত্রে যুদ্ধস্থলে অনিবার্য কারণে ভগবান শ্রীকৃষ্ণের প্ররোচনায় ধর্মপুত্র যুধিষ্ঠির মিথ্যা কথা বলতে বাধ্য হয়েছিলেন,—তথাপি সেই মিথ্যা বলার পাপে তাঁর নরকদর্শন হয়েছিল। নিজের কার্যনির্ধারিত জন্ত মিথ্যা কথা বলে—ততটা মহাপাপ বোধ হয় যে “না-হলেও না-হতে পারে!” কিন্তু হায়, আমাদের এই বাঙ্গালী জাতির শতকরা সাড়ে-নিরেনকুই জন লোক—অকারণে—অকাজে—সামান্য একটু আত্মপ্রসাদ লাভ করবার জন্ত—অনর্গল বুড়ি-বুড়ি মিথ্যা কথা বলে থাকেন। সেই জন্যই আমাদের জাতির এতটা অধঃপতন। সেই জন্যই আমার মনে হয়—ভারতবর্ষ স্বরাজ লাভ করলে—ভারতের অন্যান্য সকল জাতিই উন্নতি লাভ করবে, —সুখস্বচ্ছন্দ্য ভোগ করবে—কেবল “যে তিমিরে—সেই তিমিরে” পড়ে থাকবে আমরা অর্থাৎ আমাদের বাঙ্গালী জাতিটা—যদি না তার এই রকম গোটাকতক মারাত্মক দোষ শুধরে যায়।

আমি রমেশদার সঙ্গে বিশেষ এমন সমস্ত অন্যায় কাজ করেছি,—যার জন্ত বাধ্য হয়ে গুরুদ্বন্দ্বের সামনে অশ্লানবদনে আনাকে মিথ্যা কথা বলতে বাধ্য হতে হ'ত। টাকা চাইবার জন্ত—বিশেষতঃ সে টাকার পরিমাণ যদি অধিক হতো—মিথ্যা কথা যদি না বলি,—তাহলে টাকা পাওয়া যায় না। যা তো ছ'একটা টাকা ছ'চার দিন অন্তর দিতে হলেই

কত গোলমাল করেন,—ঠাঁর কাছ থেকে বিশ-পঁচিশ টাকা চাওয়া এবং চেয়ে পাওয়া যে কি-রকম দুঃস্থ তা সকলেই বুঝতে পারছেন। বাবা সদাশিব—দশ টাকা—মেরে-কেটে বিশ টাকা পর্য্যন্ত বিনা প্রশ্নে—নিঃসন্দেহে তিনি আমাকে চাইবামাত্রই দিতেন—কিন্তু “অনিবার্য কারণে—” যখন পঞ্চাশ টাকা বা একশো টাকার দরকার এসে ঘাড়ে চাপতো, (অথচ সে “দরকার” গুরুজনকে কিছুতে জানানো চলে না) তখন অগত্যা “মিথ্য কথা” (প্রথম প্রথম অত্যন্ত অনিচ্ছাক্রমে, পরে বেশ অভ্যস্ত হওয়াতে অবলীলাক্রমে) বলতে আরম্ভ করলুম। স্মরণ্য সংসর্গের গুণে আমার নৈতিক অধঃপতন কেমন ধীরে ধীরে হয়েছিল, এবং শেষে কি বিষময় পরিণাম দাঁড়িয়েছিল—পাঠক-পাঠিকাগণ আমার “কাহিনী” পড়েই বেশ বুঝতে পারবেন।

জীবনে সখের থিয়েটারে প্রথমে স্ত্রীলোকের ভূমিকায় অবতীর্ণ হয়েছিলুম। গিরিশচন্দ্রের “জনা” নাটকে আমি “জনা” সেজে এমন অভিনয় করেছিলুম—আমাকে এমন “মানিয়েছিল” যে, সখের থিয়েটারে নাম কিনে ফেলুম। বাবা-মা—বাড়ীর সবাই শুন্লেন। বাবা গম্ভীর হয়ে বলেন, “লেখাপড়ার সময় এ সব করা কেন? ছিঃ!”

মা একেবারে অগ্নিমূর্তি ধারণ করে—শুধু আমাকে মারতে বাকী রেখেছিলেন।

## ত্রয়োবিংশ পরিচ্ছেদ ।

একদিন বৈকালে—বেলা তখন প্রায় ছ'টা—হেদোর ধারে জনকয়েক বছর সঙ্গে বসে গল্প ক'ছি—হঠাৎ গম্ভীরভাবে রমেশদা এসে আমায় ডাকলে—“আছারাম ! শোন !” রমেশদা'র মূর্তি দেখে একটু খতমত খেয়ে গেলুম। ঠিক যেন বেগে আমাকে মার্তে এসেছে। যাহোক—মনের ভাবটা চেপে তার কাছে উঠে গেলুম। রমেশদা কোন কথা না বলে হেদো থেকে বরাবর বড় রাস্তায় বেরিয়ে এলো। আমি তার গম্ভীর ভাব দেখে কোন কথা জিজ্ঞাসা না করেই তার সঙ্গে চল্লুম। বড় রাস্তা পার হয়ে বিডন্ দ্বীপের ভেতর ঢুকলুম। খানিকটা গিয়ে জিজ্ঞাসা করলুম—“কোথায় বেতে হবে ?” রীতিমত ধমকানি দিয়ে “চলে আয়না—” বলে রমেশদা হনহন করে চলতে শুরু করে। মহা মুস্কিলে পড়ে গেলুম। রমেশদা'র রকম-সকম দেখে এইটুকু শুধু বুঝতে পেরেছিলুম—দাদু আমার খুবই চটে আছেন ! কিন্তু রাগটা আমার ওপোর কি

অপর কোনো ব্যক্তির ওপোর তাতো ঠিক বোঝা যাচ্ছে না ! একটা রীতিমত বাদ-বিসম্বাদের ব্যাপার—সেটা বেশ স্পষ্টই বুঝে নিলুম। অনেকক্ষণ ভাববার পর এটুকু ধারণা হল যে, তাঁর রাগের পাত্রটা কিন্তু আমি নই ! কারণ আমার ওপোর রাগ হ'লে—দাদা এভাবে চুপ করে আমাকে কিছু না বলে চলতে শুরু করতেন না। অন্ততঃ সামনা-সামনি পেয়ে ছটো একটা ঝাঁঝালো কথা নিশ্চয়ই বলতেন। ভাবলুম—দেখাই যাকুনা ব্যাপারটা কি ?

রমেশদা খানিকক্ষণ বাদে কথা কইলে। আমার দিকে একবার চেয়ে বলতে লাগলো—“তোকে কিছুই করতে হবে না—তুই কেবল আমাকে আগলাবি—ফস্ করে পেছন দিক থেকে কেউ এসে আমাকে না মারে।”

কি সর্বনাশ ! রমেশদা কি কারও সঙ্গে দাঙ্গা করতে যাচ্ছে ! আমি তাহ'লে তার ভাড়া-করা গুণ্ডার কাজ করব ! ভয়ে আমার প্রাণ শুকিয়ে গেল। আমি বললুম—“কারও সঙ্গে মারামারি করতে যাচ্ছ নাকি রমেশদা ?”

রমেশদা মুখ খিঁচিয়ে বলে উঠলো—“ভয়ে যে একবারে সিঁটকে গেলি। কি-রকম অপমান করেছে জানিস্ ? উঃ—কি বলব ! আচ্ছা—মজা দেখাচ্ছি একবার ! তোকে কিছু করতে হবে না। তুই শুধু দাঁড়িয়ে থাকবি। আমি কি-রকম জুতোপড়ি করি দেখবি এখন—”

আমি অত্যন্ত কাতর হয়ে বললুম—“ছিঃ রমেশদা ! লোকের সঙ্গে দাঙ্গা-মারামারি করা কি ভদ্রলোকের কাজ ?”

“তুই যা যাঃ—তোকে আর লেকচার দিতে হবে না। ভারি জিমনাষ্টিক করে পালোয়ান হয়েছিস্ ! যাঃ—দূর হ' ! তোর help চাই না। রমেশ

চন্দ্র একাই একশো। ঘোড়ার ডিমের মামাতো ভাই! একটা উপকারে নেই। এর চেয়ে দীর্ঘ-স্বথুকে আনলে ঢের কাজ হ'ত। যা তুই বেরো—” বলেই রমেশদা বুনো মহিষের মত ঘোঁ-ভরে হন্ হন্ করে চলতে লাগলো।

কর্মফল কে খণ্ডন করতে পারে? সেদিন রমেশদার এই রকম তাড়নার যদি তার সঙ্গ ত্যাগ করে ফিরে চলে আসতুম, তাহ'লে বোধ হয় সমস্ত জীবনের ইতিহাসটাই উল্টে যেতো। কিন্তু তা হো হবার জো নেই। কর্মফল যে আমাকে ভোগ করতেই হবে! রমেশদার তিরস্কারে আমি অত্যন্ত লজ্জিত হয়ে বিনা বাক্যব্যয়ে তার অনুসরণ করলাম। বিভূ-গার্ডেনের সামনে একটা চিকু-ঢাকা বারান্দা বার করা তিনতলা ছোট বাড়ীর ঠিক সামনে এসে পৌঁছুতেই রমেশদা আমার হাত ধরে টেনে নিয়ে একেবারে বাড়ীর ভেতরে ঢুকে পোড়লো। বাড়ীর নীচটা একটু অন্ধকারের মত। সেটা ফাল্গুন মাস—তখন সন্ধ্যা হয়ে এসেছে। নীচের তলায় লোকজন কাকেও দেখতে পেলুম না। কার বাড়ী—কি বৃত্তান্ত—কিছুই বুঝতে পাচ্ছি না। বুকের ভেতরটা যে কি কচ্ছে আমার—তা আর বলবার কথা নয়। কেবল মনে হচ্ছে—আজ কার মুখ দেখে সকালে উঠেছিলুম! পরের বাড়ীর ভেতর ঢুকে দাঙ্গা-ক্যানাদ,—হয়তো কুকুর-মারা করে ছাড়বে,—তার ওপোর আবার (trespass charge) অনধিকার প্রবেশের দায়ে পুলিশে যেতে হবে। ছি-ছি—কেন মরতে হতভাগাটার সঙ্গে এলুম গা? রমেশদা ডান-হাতি একটা সিঁড়ি ধরে বরাবর উঠে অন্ধপথে পৌঁছে, পিছন দিকে ফিরে আমার বললে—“হাঁ করে নাচে দাঁড়িয়ে রইলি কেন? উঠে আয় না—”



আমি ভয়ে একেবারে মৃতপ্রায় হয়ে নবমী-পূজোর পাঠার মত কাঁপুতে কাঁপুতে ধীরে ধীরে সিঁড়ি বেয়ে ওপোরে উঠতে লাগলাম। রমেশদা ততক্ষণে দোতলায় উঠে দালানের শেষের দিকে একটা ঘরের রুদ্ধ দরজায় জোরে জোরে ধাক্কা মেরে ডাকুতে শুরু করে—  
“শুরু ! এই শুরু ! দরজা খোল !”

আমি তাড়াতাড়ি উঠে রমেশদার কাছে গিয়ে অত্যন্ত বিনীত ভাবে বললাম—“কি ক’ছ রমেশদা ?—ভদ্রলোকের অন্তরমহলে ঢুকে এসব কি হ’চ্ছে ?”

রমেশদা’ সে কথায় কর্ণপাত না করে দরজায় জোরে জোরে লাথি মারতে মারতে ডাকুতে লাগলো—“শুরু ! এই হারামজাদী ! দোর খোল—”

ঘরের ভিতর থেকে বামাকণ্ঠে কে-যেন ক্রুদ্ধস্বরে বলে উঠলো,  
“না—দরজা খুলবো না। বেরো আগার বাড়ী থেকে”—

স্রীলোকের কণ্ঠস্বর শুনেই আমার তো মাথা ঘুরে উঠলো। আমি চারদিক যেন অন্ধকার দেখতে লাগলাম। মনে হ’ল, মুহূর্তে বুঝি ঘুরে মুখ খুবড়ে পড়ে যাব। কি সর্বনাশ ! এ যে বেশ্যা-বাড়ী !

রমেশদা ইতরের মত অশ্রাব্য গালি দিতে দিতে দরজায় এমন ভীষণ পদাঘাত করতে শুরু করে যে, অন্যান্য ঘর থেকে হরেক-রকমের স্রীলোকেরা বেরিয়ে এসে সেইখানে জমায়েৎ হ’য়ে রমেশদাকে যাচ্ছেতাই বলতে লাগলো—“কি রকম ভদ্রলোকের ছেলে তুমি ? এত অপমান করে তাড়িয়ে দিলেও যেতে চাওনা !” ইত্যাদি ইত্যাদি—

আমি ইত্যবসরে একটু প্রকৃতিস্থ হয়ে সরে পড়বার উদ্যোগ করছি,—এমন সময় সেই রুদ্ধঘরের দরজা খুলে একটা যুবতী বেরিয়ে চীৎকার করে গাল দিতে দিতে রমেশদার স্মুখে এসে দাঁড়ালো।

রমেশদা' তাকে দেখবা মাত্রই তেড়ে গিয়ে তার চুলের মুঠি ধরে তাকে ঘরের বিছানার ওপোর ফেলে ভীষণ প্রহার কর্তে শুরু করে! শুধু তাই নয়—রমেশদা' এমন বর্ষর যে, শুধু হাতে প্রহার করেও রাগ মিটলো না;—ঘরের কোণে কিসের একটা বোতল ছিল—সেইটে তুলে তাকে মারবার উপক্রম করে। বাড়ীতে একটা কি ভীষণ গণ্ডগোল-চীৎকার-কলরব যে উঠলো, সে-কথা লিখে প্রকাশ করবার সাধ্য নেই! আমি তাড়াতাড়ি ঘরের ভেতর ঢুকে রমেশদা'র হাতটা ধরে তাকে ঘর থেকে টেনে আনবার চেষ্টা করতে লাগলুম। রমেশদা যেন একেবারে উন্মত্ত হয়ে উঠেছে। আমি তাকে বত টানতে বাই—সে ততই বিক্রম প্রকাশ কর্তে থাকে। মুখ দিয়ে তার অনর্গল অশ্লীল গালাগালি বেরুচ্ছে! নরান্দ্র এমন জ্ঞান-শূন্য হয়ে পড়েছে যে, আমি যখন তাকে জড়িয়ে ধরে ধামাতে চেষ্টা করছি—সে তখন জীলোকটাকে ছেড়ে আমাকে গাল দিতে প্রহার কর্তে আরম্ভ করে। তখন সেই ভর সন্ধ্যাবেলা—সেই অপবিত্র স্থানে—আমাদের ছ'ভায়ে বন্দ বেধে গেল! আমারও দস্তুর মত তখন রাগ চড়ে গেছে। আমি মার্তে মার্তে রমেশদা'কে একেবারে দি'ড়ি থেকে গড়িয়ে নীচে ফেলে দিয়ে—সেই দোতলার বারান্দায় কাপ্তে কাপ্তে অর্চৈতন্য হয়ে শুয়ে পড়লুম। মারামারি-চীৎকার-গোলমালে বাড়ীটা মেনেপুরুবে ভরে গেল। কিছুক্ষণ বাদে নিজে একটু সুস্থ হ'য়ে,

লোকের ভীড় ক্রমে বাড়ছে দেখে—সেই দালানের সামনে একটা তেতলায় যাবার সিঁড়ি দেখতে পেয়ে—তাড়াতাড়ি তার ওপোর উঠে গেলুম। জামা কাপড় সব ছিঁড়ে গেছে—মাথার চুল উস্কো-খুস্কো হয়ে পড়েছে। এ অবস্থায় কি করে বাড়ী যাই—এই মহা ভাবনায় পড়লুম। সত্য সত্যই আমার কান্না এল! আমি তেতলার ওপোর উঠে গিয়ে—বারান্দার এককোণে দাঁড়িয়ে ক্ষুদ্র বালকের মত কাঁদতে লাগলুম। নীচে স্ত্রীলোকরা সেই রকম চীৎকার করে মহা জটলা লাগিয়ে দিয়েছে। কেউ বলছে—“দাও না বদ্মায়েস্টাকে পুলিশে ধরিয়ে—”

কেউ বলছে—“পালিয়ে গেল যে—নইলে কি সহজে ছাড়তুম?”

কেউ বলছে—“ভাগিয়াস্ ঐ ছোকরাটি সঙ্গে ছিল—তাই সুরির প্রাণটা রক্ষা হ’ল—”

মতামত প্রকাশের সঙ্গে সঙ্গেই সকলে আমার খোঁজ করতে লাগলো। একজন বলে—“তেতলায় গেল দেখলুম। বোধ হয়—ভয়ে নীলার ঘরে আশ্রয় নিয়েছে—”

কত রকমের কথা শুন্ছি—প্রাণে কত ভয়ই হ’চ্ছে! বাড়ী যাব কেমন করে? বাড়ী গিয়ে কি বলব? যত ভয় বাড়ছে—তত কান্নাও বাড়ছে। এমন সময় ধীরে ধীরে একটা সুন্দরী যুবতী মনোরম সাজ সজ্জায়—যেন রূপের চেউ খেলিয়ে চারদিক আলো করে—একেবারে পাশে এসে আমার হাতটা ধরে মিষ্ট ভাষায় খুব নম্র সুরে আদর করে বলেন—  
“আসুন—ঘরের ভেতর এসে বসুন—”

আমি বাক্যব্যয় না করে ধীরে ধীরে তার সঙ্গে সামনের একটা চমৎকার সাজানো বড় ঘরের ধব্ধবে পরিষ্কার নরম বিছানার একধারে অত্যন্ত সঙ্কুচিত ভাবে মুখটা নীচু করে বসলুম।

“বাঃ—অমনি করে বুঝি বসে”—বলেই সুন্দরী উচ্চহাস্ত করে আমার কাছে এসে দাঁড়ালেন। খুব আদর করে আমার ডান হাতটা ধরে টেনে, বেশ একটু আব্দারের সুরে বলতে আরম্ভ করলেন—  
 “না—তা হবে না। এ-রকম করে ভয়ে ভয়ে গো-বেচারীর মত বিছানার এক পাশে ঘাড়টা হেঁট করে—জজের সামনে আসামীর মত—  
 না—তা হবে না। উঠুন বলছি—নইলে আমিও এই রকম টানটানি—”  
 বলেই আবার সেই রকম উচ্চ হাস্ত! হাস্তটা—কথাটা—সবই বড় মধুর লাগলো! ভয়টা তখন প্রাণ থেকে যেন অনেকটা চলে গেছে মনে হ’ল। ভাল হয়ে বিছানায় বসবার জন্ত দাঁড়িয়ে উঠলুম। মুখ তুলে তার মুখের পানে চেয়ে দেখলুম। তীব্র আলোকে দেখতে পেলুম চোখের সামনে এক অম্পরা মূর্তি! অতি সুন্দর মুখখানি—হাসি-মাথা!

“দাঁড়ান্!” বলেই সুন্দরী ঘর থেকে তাড়াতাড়ি বেরিয়ে গেলেন। তখন একটা ভিজে পরিষ্কার তোয়ালে এনে আমার হাতে দিয়ে বললেন—  
 —“এই বড় আয়নাটার সামনে দাঁড়িয়ে বেশ করে মুখটুকু গা-হাত-পা মুছুন দিকি! খুলুন জামাটা!”

“থাক্—থাক্—কিছু দরকার নেই”—বলেই বিছানায় বসতে যাচ্ছিলুম, সুন্দরী আমার হাতটা ধরে বাধা দিয়ে সেই ভুবন-ভোলানো হাসি হেসে বললেন—  
 “বাঃ—দরকার নেই বলেই দরকার নেই? এই রকম চেহারা নিয়ে রাস্তায় বেরুবেন কি করে বলুন তো? না পেয়েই মাতাল নাম কিনবেন?”

ভাবলুম—তাও তো বটে! এ-রকম অবস্থায় পথেই বা বেরুবো কেমন করে, বাড়ীই বা ঢুকবো কি করে? গায়ে একটা আঁকির

পাঞ্জাবী ছিল—ভেতরে সিল্কের গেক্সী ছিল। পাঞ্জাবীটার হাতা ছটো, কাঁধের দুপাশটা, সামনের খানিকটা খুবই ছিঁড়েছে। পরণে দিশি কাল-পাড় ধুতি ছিল, তারও পেছনটা প্রায় আধ হাত ছিঁড়ে গেছে! সুন্দরী একটা গোলাপজল-ভরা ডিকেণ্টার আয়নার স্মুখে টেবিলের ওপোর রেখে বসেন—“আমার হাতে জামা-গেক্সীটা দিন। এই নিন্-কৌচানো কালপেড়ে ধুতি। একেবারে নতুন, কারও পরা নয়। কাপড়টা ছাড়ুন, নইলে রাস্তায় বেরুবেন কি করে? একটা সিল্কের সাদা পাঞ্জাবী আছে—”

আমি হেসে বল্লুম—“না—না—কাপড়-জামা ছাড়তে হবে না,—রাত্রিবেলা কোন রকমে এইটুকু পথ এখন—”

“আচ্ছা সে যা হয় পরে দেখা যাবে। এই নিন্—গোলাপজলে মাথাটা বেশ করে ধুয়ে ফেলুন—” বলে ডিকেণ্টারটা আমার মাথার ওপোর উপর করে খানিকটা গোলাপজল ঢেলে দিলেন। “থাক—থাক—চের হয়েছে—” বলে আমি ভিজ়ে তোয়ালে দিয়ে মাথা-গা-হাত বেশ করে মুছে ফেল্লুম। সুন্দরী তখন এক শিশি ‘চেরি ব্রশম’ আমার মাথায় ঢেলে দিয়ে চিরুণীখানা আমার হাতে দিয়ে বসেন—“নিন্—চুলটা আঁচড়ে ফেলুন—”

প্রসাধন কার্য সমাপন করে গেক্সিটা নিয়ে ঝেড়ে বুড়ে গায়ে দিলুম। সুন্দরী বসেন—“নিতাস্তই যদি জামাটা পরতে হয়, তাহলে একটু দাঁড়ান, আমার দিদিকে দিয়ে সেলাই করিয়ে দিই—” বলেই আমার উত্তরের প্রতীক্ষা না করে তিনি নীচে চলে গেলেন।

গা-হাত-পা মুছে শরীরটা যেন স্নিগ্ধ হোলো। কাপড়খানা তাড়া-

তাড়ি ঘুরিয়ে পরতে যাচ্ছি—এমন সময় সুন্দরী চাকর সঙ্গে জলখাবার এনে আমার সামনে রেখে চাকরকে হুকুম করলেন—“বড় গেলাসে বরফ-জল দে—”

জলখাবার দেখে বলে উঠলুম—“সন্ধ্যার সময় আমি খেতে টেতে পারি না।—আমি জল-টল খেয়ে বিকেল বেলা বেরিয়েছি—”

“কে বলছে—আপনি উপোস করে আছেন? নিন্ আর জালাতন কর্ছেন না।—আঃ—বড় ভোগান আপনি—খান্—ভাল খাবার—টাটকা ফল—কোনো অসুখ কর্ছেন না,—”

“না—সত্যি বলছি—”

“আমিও এতটুকু মিথ্যে বলছিনি। ঐ বুনো মোটোর সঙ্গে লড়াই করে নিশ্চয়ই আপনার খুব খিদে পেয়েছে! খান—আর কষ্ট দেবেন না। নইলে—জানেন না এই মুগ-পুড়ীকে, কিছুতেই না খাইয়ে ছাড়বে না।”

“এতো বড় মুষ্কিলের কথা! খিদে না থাকলেও খেতে হবে?”

“হ্যাঁ—হবে”—বলেই সুন্দরী একটু কৃত্রিম রেগে আমার কাছে ঘেসে বসে থালাটা তুলে আমার ডান হাতটা নিয়ে খাবারের কাছে ধরে বলতে আরম্ভ করলেন—“সহমানে নিজে খান তো খান, নইলে আমি জোর করে খাইয়ে দোবো।”

অগত্যা বাধ্য হয়ে খেতে শুরু করলুম।

তারপর উত্তম যশস্বা দিয়ে সাজানো মিঠে পান, সিগারেট, জরদা ইত্যাদি মুখশুদ্ধি এলো; যথারীতি সে-সকলের ও সদৃগতি করলুম। “এইবার বাড়ী যাই” বলে সুন্দরীর মুখের দিকে চাইলুম। মনে হ’ল, তিনি যেন একটু অশ্রস্বা হ’লেন। একটা ছোটখাটো দীর্ঘনিঃশ্বাস ফেলে বললেন—

“বাড়ী তো যাবেনই । একটু বসুন না । এইতো সব আটটা—দুটো কথা ক’ন—ততক্ষণ আপনার জামাটা সেলাই হোক ।—আচ্ছা কাপড়খানা ছাড়লে ভাল হ’ত না ? এই দেখুন, ঠিক আপনার মতই কালপেড়ে, আনকোড়া নতুন !”

“নাঃ—দরকার নেই ! কোন রকমে ছেঁড়াটা ঢেকে-চুকে—”

“বাড়ীতে যদি জিগ্যেস করে—কাপড় ছিঁড়লো কি করে ?”

“বোলবো—জিম্‌নাস্টিক কর্তে গিয়ে পড়ে’ গিয়েছিলুম—ছিঁড়ে গেছে—”

সুন্দরী নীরব হলেন ।

ক্রমে রমেশদার সম্বন্ধে কথা উঠলো । শুনলুম, রমেশদা যাকে প্রহার করলেন,—তিনি সুন্দরীর বাড়ীর ভাড়াটে—নাম “সুরবালা” । সুন্দরীর নাম “নীলাবাহু” । এ বাড়ীটি নীলার মা-ঠাক্করণের । নীলা মোজুরো করেন । একজন হাটখোলার পাটব্যবসায়ী কোটিপতির রক্ষিতা । বাবুর আসবার কোনো স্থিরতা নাট । কারণ, এই সহরে তিন চারটা এই রকম “কুঞ্জ” তাঁর নিদ্দিষ্ট আছে ।

রমেশদা-সুরবালার বিবাদের কারণ, সুরবালা একজন ধনবান নাগরের কুপাদৃষ্টিতে নিপতিতা হয়ে—তাঁর সঙ্গে বাঁধাবাঁধি করে বন্দোবস্তের ভিতর গিয়ে পড়েছেন,—দীন-দরিদ্র কেরণী রমেশ চন্দ্রের প্রণয়ে এক-সময় তিনি জ্ঞানশূণ্য হলেও ইদানিং পার্থিব উন্নতি কামনায় তাকে ত্যাগ কর্তে বাধ্য হয়েছেন । সুতরাং রমেশদার ওপর ‘তুমি আর এসোনা—’ ‘your services are no longer required’—বলে নোটিশ জারি হওয়াতেই এই কুরুক্ষেত্র-সমর ।

কথাগুলো নীলা আমার সমস্ত সংবাদ এবং পরিচয় জেনে নিলেন। আমি অনুরোধ না করলেও হারমোনিয়ম বাজিয়ে নীলা বীণাবিনিদিত সুরে গাইলেন—

গান শুন্তে শুন্তে জ্ঞানহারা হয়ে পড়েছিলুম ! একখানা নয়—  
ছ'খানা নয়—একেবারে পাঁচ-সাতখানা !

আসবার জন্ত যখন বিদায় চাইলুম—নীলা নীচে সদর দরজা পর্যন্ত আমার পৌঁছে দিলেন। সঙ্গে করে উপহার নিয়ে এলুম—তার সুন্দর চোখের ফোঁটাকতক অশ্রুজল ! দিয়ে এলুম—প্রাণের একটা অমূল্য জিনিষ—পবিত্রতা ! বাড়ী যখন ফিরলুম—রাত্রি ছিপ্রহর উত্তীর্ণপ্রায় !



## চতুর্বিংশ পরিচ্ছেদ ।

“আত্মকাহিনী” ব’ল’তে যে নিছক একটা কাল্পনিক এবং তরুণ-তরুণীর মনোরঞ্জনকারী আধুনিক পাশ্চাত্য ভাব-মেশানো প্রেমের উপন্যাস বোঝায় না,—আমার বিশ্বাস,—বুদ্ধিমান-বুদ্ধিমতী পাঠক-পাঠিকারা এটুকু মনে মনে বেশ ভালই জানেন । সুতরাং আমি যে আমার জীবনের কতকগুলো কথা’র সমষ্টি লিপিবদ্ধ কর্তে বসেছি,—তাতে ঘটনা-বৈচিত্র্য বিশেষ যদি কিছু খুঁজে বের কর্তে না পারেন,—তাহ’লে তার ভেতরে মানব-চরিত্র-বৈচিত্র্য যে যথেষ্ট আছে,—সেটা নিশ্চয়ই কেউ অস্বীকার করবেন না । ঐ কালের তরুণ-তরুণীরা যে প্রেমের “পাঠ” পড়তে-শুনতে ভালবাসেন, আমার কাহিনীতে সে-রকম “প্রেমের” নামগন্ধ পাবেন না । আমার জীবনে প্রেমের ব্যাপার যদি কিছু ঘটে থাকে, সেটা ঠিক সে কালেরই প্রেম, একালের অর্থাৎ ছাগসাহিত্যানুমোদিত প্রেম নয় । আমার আত্মীয়স্বজন

বন্ধুবান্ধব অনেক ; আমি, আত্মীয়-সম্পর্কীয়া স্নানরী যুবতী, কুমারী, সখবা, বিস্তর জীলোকের সঙ্গে আলাপ করেছি, ঘনিষ্ঠতা করেছি, যে যেমন সম্পর্কীয়া—যে বয়সে ছোট হবে তাকে সেইরকম স্নেহ করেছি— ভালবেসেছি,—আদর-যত্ন করেছি,—বয়সে বড় হলে তাঁকে ভক্তি-শ্রদ্ধা সম্মান করেছি,—কিন্তু কখনো কাকেও “প্রেম-চক্ষে” দেখতে পারিনি—কিন্তু আজও পর্যন্ত বুঝতে পারলুম না,—এদের প্রতি প্রেম ভাবটা মনে উদয় হওয়া কেমন করে সম্ভব হতে পারে ! দূর সম্পর্কে—( নিজেই সত্যোদর সম্পর্কের কথা দূরে থাক—) বড় ভাগের জী—“বৌদি হলেও জ্যেষ্ঠ ভ্রাতা সম পিতা” হিসাবে—তিনি মাতৃস্থানীয়া ! তাঁকে “বোঁঠান্-বোঁঠান্” বলে তাঁর প্রতি “প্রেম” নামক একটা অভঙ্গ-সন্তানোচিত ন্যাকাত্মক ভাব হৃদয়ে পোষণ করে ছাগতের পরিচয় প্রদান করা কেমন করে রক্তমাংসের দেহে সম্ভব হয়, সেটা কিছুতেই আজ পর্যন্ত আমার বোধগম্য হ'ল না ! মামাতো বোন্ মাস্ততো বোন্—পিসতুতো বোন্, খুড়তুতো জাঠতুতো বোন্—যত দূর সম্পর্কেরই বোন্ হোন,—বোন্ তো বটে ! এঁরা “দাদা দাদা” “ভাই ভাই” বলে সরল প্রাণে নিঃসঙ্কোচে নির্ভয়ে কাছে ছুটে আসবেন—আর সমস্ত স্মরণ ঘটনা সংযোগে মনস্তত্ত্বের একটা কাল্পনিক সুর ধরে তাঁদের সঙ্গে জুটে বাব প্রেম কর্তে, এই বা কোন্ দেশী কথা ? আর এ-রকম ভীষণ ভয়াবহ কল্পনাও যে কেমন করে মানুষের মনে আসতে পারে, এ বয়স পর্যন্ত আমি সে উদ্ভট সমস্তার কিছুমাত্র সমাধান কর্তে পারিনি । প্রাণের বন্ধু,—সোদরপ্রতিম, তার মাকে ‘মা’ বলি,—তার বাপকে বাপের মত দেখি, বাড়ীর ছেলের মত

অবাধে তাঁদের অন্তরমহলে যাতায়াত কর্তে পাই,—সবাই অকপটে আপন জন ভেবে বিশ্বাস করে—ভালবাসে—স্নেহ যত্ন আদর করে। সেই সুযোগে সেই বন্ধুর পত্নী বা তার ভগ্নী কিম্বা তার বোদি এমনি একজনকে নিজের গনগড়া প্রেমের নায়িকা ঠিক করে অবহেলে আত্মনিবেদন করে তার সঙ্গে “কায়মনোবাক্যে” অর্থাৎ প্রথমে “মনে”—তারপর—“বাক্যে” তারপর “কায়ে” এই আধুনিক সভ্য যুগের “প্রেম” কর্তে হবে! এরকম “প্রেম” করে—মনস্তত্ত্বের” বাপের আত্মশ্রদ্ধ করে এবং sex psychologyর সপিণ্ডকরণ করে যে প্রেমিক হয়,—অথবা এই রকম জঘন্য প্রেম কর্তার প্রশ্রয় যারা দেয়, বুঝতে পারিনি—তারা পশু না মানুষ। আমি কখনো সে রকম “প্রেম” করিওনি,—সে রকম প্রেম বুঝিও না। কিন্তু বুঝিনি বা করিনি বলে যে ছ’নিয়াতুকু কেউ সে রকম করেনি—তা আমি বলতে চাই না; তবে এ-শ্রেণীর প্রেমিক দুটো-চারটে যারা আমার নজরে পড়েছিল,—তাদের ভয়াবহ পরিণামও যে অনিবার্য হয়েছিল তাও স্বচক্ষে দেখেছি—এবং তাদের দুর্গতি-ভোগের সময় আমি যে কখনো এতটুকু সহানুভূতি প্রকাশ করিনি, এ বিষয়ে আমি হালফ্ কর্তে প্রস্তুত আছি। আমি বুঝেছি—জেনেছি এবং দেখেছি যে, এই প্রেম জিনিষটা—যাকে “love” বলে, সেটা কিছুই নয়,—মাত্র মনের একটা দুর্বলতা, একটা ক্ষণিক ব্যাধি বা উন্মত্ততা। ইংরাজিতে যাকে বলে—“Temporary insanity!” অবশ্য আমি তরুণ দলের ঔপন্যাসিক প্রেমের কথাই বলছি। এটাকে অনেকটা “চোখের নেশাও” বলা যেতে পারে। এর স্থায়িত্ব ততক্ষণ, যতক্ষণ প্রেমিক-প্রেমিকার মিলন না হয়। ঐ যে শুন্তে পাওয়া যায়

“প্রথম দর্শনেই প্রেম”—সেটা একেবারে নিছক মাতলামি কাণ্ডকারখানা, —গাঁজার নেশা ব’ললেও মন্দ হয় না। চট করে ধর্ত্তেও যেমন—চট করে ছাড়তেও তেমনি। যেই চোখে দেখা অমনিই প্রেম গজিয়ে ওঠা! যতক্ষণ না মিলন হচ্ছে, ততক্ষণের ভেতর লাফালাফি হাত-পা ছোঁড়া মাথা কোটা ইত্যাদি যত রকম পাগলামির লক্ষণ নিদানে পুরাণে ব্যক্ত আছে, সবগুলিই একে একে প্রকাশ পেতে থাকে; তারপর বৈধ উপায়ে ভদ্রভাবে উদ্বাহ বন্ধনে বা অবৈধ উপায়ে অভদ্রভাবে লোক-অগোচরে মিলন হলেই বাস্—ঠাণ্ডা! কিছুকাল পরে—“কে কার কড়ি ধারে!” উভয় পক্ষেরই দিন কতক বাদে পরস্পর পরস্পরকে আর ভাল লাগেনা। সেইজন্মে আমাদের সেকালে বাপমায়ের পছন্দ-করা আট-ন’ বছরের মেয়ের সঙ্গে বিয়ের বাসরঘর থেকে যে প্রেমের উৎপত্তি, সেটা ব্রহ্মের মত জীবনের শেষ মুহূর্ত্ত পর্য্যন্ত অটুট থাকে। আর পাশ্চাত্য জগতের অনুকরণে পঁচিশ বছরের বালিকার (?) সঙ্গে কোর্টশিপাস্ত্রে যে প্রেমের পারগতি—সেটার *ecstasy* বা তীব্রতার জের পৌঁছায় বড়জোর *Honey-moon* বা মধুচন্দ্রের ক’টা দিন পর্য্যন্ত! দেখুন না বিচার করে—প্রাচ্য জগতে সেকালের দাম্পত্য-প্রেমে কটা “ডাইভোস্” নামলা ঘটেছিল—আর এখনই বা ক’টা ঘটছে বা ঘটবার উপক্রম হচ্ছে! তা হ’লেই এই সবুজ বাবাজীদের ঔপন্যাসিক প্রেমের মধুরঘটা উপলব্ধি করতে পার্কেন।

যাক্—অবান্তর কথা অনেক হয়ে গেল। নীলার কাছ থেকে বিদায় নিয়ে বাড়ীতে এসে যখন পৌঁছলুম—তখন রাত্রি সাড়ে বারোটা বেজে গেছে। সমস্ত পপটা কি-রকম ভয়-ভাবনায় প্রাণটা অস্থির হয়েছিল—

তা ব'লে বোঝাতে পারব না। সদর-দরজা খোলাতে বিশেষ কষ্ট পেতে হয় নি—তার কারণ, পাড়েজী দারোয়ান অদৃষ্টগুণে অনেক রাত্রি পর্যন্ত হ'চারজন আপনার দেশওয়ালীকে নিয়ে মধুর কণ্ঠে সুললিত ভাষায় তুলসীদাস রামায়ণ পাঠ করে শয্যাশ্রয়ীদের নিদ্রা-আরাধনায় সহায়তা করেন এবং দেশওয়ালীদের দুস্তর ভবান্নব পারে যাবার সেতু-বন্ধনের উপায় উদ্ভাবন করে দেন। তবু—শ্রীরামচরিত-কীর্তনে বাধা-প্রাপ্তি হেতু পাড়েজী অত্যন্ত অপ্রসন্ন চিত্তে আমার ফটক খুলে দিয়ে একেবারে যেন আমাকে দেখে আকাশ থেকে পড়লেন—এইভাবে বলে উঠলেন—“আরে—ই—কেয়া? তুম্ খোকা বাবু—তুম্ এতেনি রাত্‌মে ঘর আয়া! আরে ছো—ছো! বড়বাবু—বহমা ভারি ঘোঁসা হয়—”

আমি তার কথায় কোনো জবাব না দিয়ে বাইরে পড়বার ঘরে জুতো জোড়াটা খুলে রেখে, পা টিপে টিপে অন্ধকারে অন্তরমহলে প্রবেশ করলুম। বুকের ভেতর বেজায় টিব্ টিব্ কচ্ছে—মুখের ভেতরটা শুকিয়ে যেন “আঠা কাটছে!” কোনো উপায়ে দেওয়াল ধরে ধরে—একতলা-দোতলা পার হয়ে—ঠেলে উঠলুম তেতলার দালানে। সিঁড়ির সামনেই বাবার শোবার ঘর। দরজা বন্ধ, আলো নিভানো দেখে মনে ভরসা হলো—বোধ হয় বাবা-মা ঘুমিয়েছেন। ভাবনা, নতুন বোঁ যদি দরজায় খিল দিয়ে ঘুমিয়ে থাকে—তাহ'লেই সর্বনাশ! বৈঠকখানায় গিয়ে শুতে হবে—নইলে উপায় কি? তেতলার শেষের দিকে আমার শোবার ঘর। দোর ভেজানো ছিল, ঘরে আলো জ্বলছে—! আন্তে আন্তে দরজাটা খুলে ঘরে ঢুকে খিল দিতে যাচ্ছি, এমন সময় বিছানার মশারি খুলে মা

এলেন বকতে বকতে—“কি কাণ্ড তোর খোকা ? রাত্তির একটার সময় বাড়ী ঢুকলি—বেরিয়েছিলি সেই বেলা পাঁচটায়—”

সাহসে বুক বেঁধে অম্মান বদনে বলে ফেল্লুম—“কি কর্ব মা—দিদির বাড়ীতে বেড়াতে বেড়াতে গিয়ে পড়লুম । রাজেন কোন মতেই ছাড়লে না—একজনের বাড়ীতে তাদের সখের থিয়েটার হচ্ছিল ; বলে, একটুখানি দেখে যা—! আমি কত বল্লুম—কিছুতেই—” ইত্যাদি—! দিবি বলে গেলুম, একটুও বাধলো না !

মা নির্ঝাক হয়ে আমার দিকে চেয়ে আমার কথা শুনতে লাগলেন । মায়ের তীব্র চাহনি দেখে আমার মনে হতে লাগলো—তিনি নীরবে শুধু আমার আপাদমস্তক নিরীক্ষণ কচ্ছেন না, আমার হৃদয়ের অন্তর্হল পর্য্যন্ত তন্ন তন্ন করে খোঁজ কচ্ছেন !

বালিকা-বধু “শুভা” দেখি দিবি জেগে আছে ! বুঝলাম—এই অভাগাই তার অনিদ্রার কারণ । আমি হেসে বল্লুম—“এত রাত্তির পর্য্যন্ত জেগে আছ যে ?” সে-কথায় কোন উত্তর না দিয়ে শুভা বলে—“মা কত রাগ কচ্ছিলেন । বাবা চাদিকে লোক পাঠিয়েছিলেন তোমার খোঁজ করতে ।”

“এত কাণ্ড হয়ে গেছে ?”

“বাবা-মা দু'জনেই খান্নি ! মা জোর করে বাবাকে দুধ আর মিষ্টি খাইয়েছেন । আমি মাকে কত সাধাসাধি বল্লুম—কিছুতেই একটা সন্দেশ পর্য্যন্ত খাওয়াতে পারিনি ।”

আমি কোন কথার উত্তর দিলুম না । চুপটি করে শুয়ে আত্মমানিতে গুড়তে লাগলুম আর ইচ্ছা হতে লাগলো—রাবেল্ রমেশদার মুণ্ডটা

এখনি সামনে পেলো ছিঁড়ে ফেলি ! শুভা আমাকে নীরব দেখে বলতে লাগলো—“এত রাত্তির পর্যন্ত বাড়ীর বাইরে কাটালে কি বলে ?”

আমি একটু ধমক দিয়ে বল্লুম—“আচ্ছা—আচ্ছা। তোমাকে ডেঁপোমি কর্ত্তে হবে না। তুমি ঘুমোও—”

ঘরে খানার ঢাকা ছিল। না খেয়েই শুয়ে পড়লুম।

দিন চারেক পরের কথা বলছি। বেলা প্রায় তিনটে, কলেজ থেকে বেরুছি—ঠিক ফটকের সামনে একটি ভদ্রলোক—বয়েস আন্দাজ তিরিশ-বত্রিশ হবে—দিব্যি বাবু-সাজে সজ্জিত, আমার কাছে এসে হেসে হেসে জিজ্ঞাসা করলেন—“আপনার নাম আত্মারাম বাবু ?”

“হ্যাঁ—কেন ?”

“একটু এদিকে সরে আসুন—একটা Privato কথা আছে।”

সহপাঠীরা বলে উঠলো—“খশুরবাড়ী থেকে নেমস্তন্ন এসেছে বুঝতে পাচ্ছি না ?” কতরকম হাসি-ঠাট্টা করেই যে-যার গন্তব্যস্থানে চলে গেল। আমি যেন মস্তমুগ্ধ হয়ে নীরবে সেই ভদ্রলোকের কাছে দাঁড়িয়ে রইলুম। কি জানি—কেন প্রাণের ভেতর একটা অজানা ভয় এসে ঢুকলো—বিশেষতঃ লোকটার চেহারা দেখে। আমি তার সঙ্গে অগ্রসর না হ'য়ে তাঁকে জিজ্ঞেস কর্লুম—“আপনি কে ? আপনাকে কখনো দেখেছি বলে তো মনে হ'চ্ছে না—”

“আমাকে চিন্তে পারবেন না—আপনাকে একজন খোঁজ কচ্ছে— তাই তার একটু উপকার কচ্ছি মাত্র। আসুন—”

“কোথায় যাব ?”

“ঐ গাড়ীর কাছে”—বলে নিকটবর্তী একটা সেকেণ্ড ক্লাশ গাড়ী দেখিয়ে দিলেন। গাড়ীর জানালা-দরজা বন্ধ। মনে হ’ল, যেন ‘মেয়ে সোয়ারী’ আছে। কিছুই বুঝতে পার্লাম না। কলেজের ধারে ‘মেয়ে সোয়ারী’ কে এসে আমায় খোঁজে! ভদ্রলোক হেসে আমার হাতটি ধরে বলেন—“ভয় কি! ক’ল্কেতা সহরের এমন পাক্কা ছেলে আপনি—দিন-ছপূরে একটা ভাড়াটে গাড়ীর কাছে যেতে ভয় পাচ্ছেন কেন?”

কথাগুলো বলেই তিনি আমাকে খুব সমাদরে টেনে নিয়ে চল্লেন। “টেনে নিয়ে” বলছি এই জন্তে যে আমি স্ব-ইচ্ছায় যেতেও চাইনি, তিনিও যখন আমাকে নিয়ে যেতে হাতটি ধরে আকর্ষণ কর্লেন, তাঁর কার্যে বাধাও দিইনি? গাড়ীর কাছে গিয়েই ভদ্রলোক দরজাটি খুলে কেলেই তাড়াতাড়ি আমাকে ঠেলে গাড়ীতে তুলে দেবার চেষ্টা কর্ত্তে লাগ্লেন। গাড়ীর ভিতরে চেয়ে দেখি—নীলা! দেখেই মাথা ঘুরে গেল! কোন কথা কইবার আগেই নীলা বলে উঠলো—“বড় রাস্তায় এই বিকেল বেলা দেশতুক লোকের সামনে অমন ঠা করে দাঁড়াতে হবেনা, উঠে আসুন—” বলেই হাত বাড়িয়ে আমার জামাটা ধরে টানতেই নিরীহ মেয়ের মত আমি নির্ঝাক হয়ে গাড়ীতে উঠে পড়লুম—আর বসলুম একেবারে নীলার পাশে। অবস্থাটা ঠিক বোঝাবার মত ভাষা সত্যই আমি গুঁজে পাচ্ছি না। আমি নেন ঠিক মরে গেছি। আমার মুখে কথা নেই—দেতে শক্তি নেই—বোধ হয় বকের স্পন্দন নেই, চক্ষে যেন দৃষ্টিও নেই।

“এত ভয় কিসের! আমি বাঘ না ভালুক—” বলেই হাসতে হাসতে নীলা আমাকে বাহুপাশে বেঁধেন করে—আমাকে—পাক্কার



বলব না। ছি ছি। এ আমি কি কচ্ছি? কলেজ থেকে বই হাতে লেখাপড়া করে কোথায় বাড়ী ফিব্ব, মা বসে আছেন জলখাবাব নিয়ে, বালিকা বধু খডখডীব পাগী খুলে বাস্তার দিকে চেয়ে আছে, কতক্ষণে বাড়ী ফিব্বো,—সে সব চুলোয় গেল। ভদ্রসন্তান, কলেজেব ছেলে,— আজ বাদে কাল বি এ একজামীন দোবো, পবের বছব এম-এ, বি-এল পডব, পাশ কর্ক,—চলেছি কিনা একটা বেঞ্জার সঙ্গে, অবাধে নীরবে চবিত্রহীন, মনুষ্য-সমাজেব ছেয় লম্পটেব মত? কোথায় যাচ্ছি—কেন যাচ্ছি—তাও জানিনা।

জিজ্ঞাসা কবলম—“গাডী কোথায় যাচ্ছে?”

“মাত্রেণে বধ দেখতে”—বলেই নীলা সেই রকম গায়ে ঢলে পড়ে ভাসতে লাগলো। সেদিন এই স্টীলোকটার কপাটি হাবভাবটি মেমন ভাল লেগেছিল, যেমন উপভোগ্য হয়েছিল, আজ ঠিক সেই ভঙ্গনে বিষবৎ বোধ হতে লাগলো। মনেব বাগ মনে চেপে গম্ভীরভবে বললম—“বঝেছি—তোমাব বাড়ীতে যাচ্ছে। কিন্তু আমাব সঙ্গে একম শক্রতা কর্কান মানে কি?”

“শক্রতা কি বকম?”—কথাটা নীলা বিস্মিত হয়ে জিজ্ঞাসা কলে। এবাব আব মখে হাসি নেই।

“তুমি বৃকতে পাবছ না?”

“না,—মতাই বৃকতে পাবছি না। আলাপ পরিচয় হযেছে, সেদিন আমাব বাড়ীতে একটা দাঙ্গা ফ্যাসাদ কেলেঙ্গাবী কবে গেলে, তার পর কি হল,—বাড়ীতে কে কি বললে, এ সব খবর নেবার জন্তে নিজে গাডী কবে কষ্ট কবে দেড়ঘণ্টা ধবে কলেজের সামনে

দাঁড়িয়ে দেখা করে খাতির করে বাড়ী নিয়ে যাচ্ছি, একে যদি শক্ততা বলে, তাহলে যিত্রতাটা কি রকম শুনি ?”

“দ্যা করে আমাকে ছেড়ে দাও—আমার সর্কনাশ কোরোনা—”

“সর্কনাশ বা হবার তাতো আমারই হযেছে,—তোমার কি ?  
কুমি তো দিবি মনের আনন্দে রয়েছ !”

“কি রকম ?”

“চল—বুঝিয়ে দিচ্ছি ।”

গাড়ী এসে বিডন ট্রাটের সেই বাড়ীটার সামনে দাঁড়ালো । কোচম্যান নেবে দরজাটা খুলতেই—নীলা তাড়াতাড়ি নেবে বাড়ীর ভেতর ঢুকে দরজার কাছে দাঁড়িয়ে বকতে লাগলো—“চট্ করে নেবে এসো—চারটে বেজে গেছে,—রাজের কুলের ছেলেরা আসছে—এসো শিগগীর—”

গাড়ী থেকে নাবা ছাড়া উপায় কি ? নাবলুম বটে,—নেবেই বাড়ীর ভেতর না ঢুকে টেনে পশ্চিম দিকে দৌড় ! উঠি কি পডি, হাওয়ার মত ছুটিছি ।

“একি আদ্যারাম ? ব্যাপার কি ? ছুটছি কেন ?”

সামনে চেয়ে দেখি—বাবা !

কি একটা মুসলমানের পক্ষ উপলক্ষে মেনিন কাছাবী বন্ধ ছিল । বাবা বিকেল বেলা বিডন গার্ডেনে বেড়াতে যাচ্ছিলেন । হাঁপাতে হাঁপাতে প্রায় জ্ঞান-শূন্য হয়ে রাস্তার ধুলোর ওপোর বসে পড়লুম ।





